


BIB. DOM.  
ANDEGAV.  
S. J.

38-H+



20  
1884  
1885  
1886  
1887  
1888





D 97  
DE VIRIS ILLUSTRIBUS

IN CASTELLA VETERI

SOC. JESU INGRESSIS

ET IN ITALIA EXSTINCTIS

LIBER II.

AUCTORE

JOANNE ANDREA NAVARRETE

PRESBYTERO HISPANO.



BONONIÆ MDCCXCVII.

••—————••  
EX TYPOGRAPHIA SANCTI THOMÆ AQUINATIS  
SUPERIORUM PERMISSU.





# PRÆFATIO.

**L**iber alter, quem promiseram, de Viris Illustribus Societatis serius in lucem prodit, quam pro quorundam votis, qui citius eum emitti voluissent. Apud quos ego non operis difficultatem, non longas Typographorum moras, non alia quæ intercesserint negotia; sed exiguas tantum ingenii, et corporis vires excusabo, quæ me lentius progredi, vel etiam interdum cessare coegerunt. Non propterea in his vestigandis, et comperiendis, quæ perscribenda fuerunt, minorem adhibui diligentiam; cum scirem, nihil huc nisi certum, et exploratum afferri oportere. Verumtamen, post literas in longinqua missas, post varios hæc illac discursus, qui non parum ad retardandam absolutionem operis effecerunt, nonnulla comperire omnino non licuit, quæ et historiæ lumen haud modicum addidissent, et ad uberiores insignium Virorum laudem plurimum deservirent. Omnes quidem, quorum facta in hoc libro recensentur, singularem virtutis opinionem apud eos, quibuscum vixerant, obrinuerunt: sed qui testes virtutum fuerant, eas potius suspicere, imitarique studuerunt, quam posterorum memoriæ diligenti narratione commendare. Ideo in quorundam rebus gestis exponendis brevior, quam oporteret, esse debui: non quod multo plura illi non fecerint, quæ digna

essent commemorari: sed quia iis morte præreptis; qui claris illis hominibus æquales fuerant, atque adeo propius eos inspexerant, multa de ipsorum præsertim adolescentia, et juventute necesse est ignorari. Sed cum iidem in provectora ætate, ad quam eorum plerique devenerunt, quorum mores in hoc secundo libro describuntur, tot fere habuerint actionum testes, quot habebant exilii comites; non æque operosum fuit, quæ illi præclare in senectute gesserant, idoneis confirmare testimoniis. Atque id maxime optandum erat in hoc scripturæ genere, in quo præstantium Virorum laudes continentur: cum is demum laudari vere sit dignus, non qui bene cœperit, aut processerit, sed qui vitam cum laude consummaverit.

In primo hujus operis libro tam multa de tiro-nibus dixi *Villagarsiensibus*, ut vereri subiret interdum, ne quibusdam prolixior illa narratio videretur. Eam tamen aliquis justo breviorē existimavit: multisque mecum egit, ut pro loci opportunitate superaddere non præternitterem quod in ea nonnulli desiderabant. Cum autem illud maxime requiri contenderet, ut tironum nomina enuntiarentur, qui constantes in superandis oppugnationibus fuerunt, quod etiam exemplo præclari cujusdam Historici confirmabat; id ego paucis hic expedire constitui, ne aut prudentis viri neglexisse consilium, aut aliquid videar de strenuorum adolescentium laudibus decerpisse.

Tirones ergo septuaginta quatuor, qui professionem in exilium coram Senatore ac testibus decreverant, et manu propria signaverant *Villagarsia*, cum inde *Turremcrematam* devenissent, mulus per

dies quindecim objecti fuerunt dimicationibus. Initio satis humaniter habebantur. Alter enim ex Duumviris, qui judiciariam ibi potestatem exercebant (cognomen illi erat Arnuntio) præcepit incolis, ut tirones benigne haberent, decentem iisdem victum subministrarent, et lineas purgarent vestes, aliaque præstarent officia, quæ ad itinerantium juvenum commodum spectabant: nec dubitarent, quin justam essent laboris sui mercedem accepturi. Post quartum vero diem Arnuntii Collega cum populi Decurione ad tirones veniens, multa illis indixit, quæ ad cohibendos eorum cœtus pertinebant, ne se invicem ad perseverantiam incitarent. Tres etiam religiosi viri, qui per eos dies in oppidum venerant concionaturi, ad profectionem tironibus disuadendam magna contentione sunt aggressi. Eorum quidam cursitare per domos, solliciteque rogare, ane novitii, qui manebant ibi, primum tirocinii annum explessent? Id si affirmabant: *Vobiscum ego*, ajebat, *non ausim congregi*: prorsusque ad alios præteribat. Audierat, credo, de votis, quæ tirones Societatis post primum probationis annum spontanæ devotionis impulsu soliti erant emittere: eosque proinde nolebat perturbare. Si vero negassent, ad illos ingressus, longa oratione persuadere nitebatur, nihil se melius honestiusque facturos, quam ut consilium abjicerent, quod inierant. Sed alius novitios omnes nullo discrimine habebat: et eos, qui prædicta vota conceperant, nihilo præterquam talari tunica ab elementariis, vel e trivio pueris differre, fidenter asseverabat. Contendebat etiam, novitios ad id tantum ex vocatione sua teneri, ut Institutum Societatis in Hispania profiterentur:

cum autem Societas in Hispania jam esse desiisset; liberos ab ea obligatione, et exauctoratos manere. Imo vero, respondebant tirones, vel in ipso Instituti nostri limine habemus, nostræ vocationis esse diversa loca peragrarè, et vitam agere in quavis mundi plaga, ubi majus Dei obsequium, et animarum auxilium speratur. Ad perturbandos tamen quorundam animos nihil eo fuit efficacius, quod aliquis e prædictis Concionatoribus asserebat: Novitios, salva conscientia, in exilium abire non posse, reosque fore letalis culpæ, si proficisci cum Patribus obstinarent. Non deerat inter ipsos, qui rigidum Censorem vel impugnando retunderet, vel compesceret objurgando: sed aliquorum animos dici vix potest, quantum hæc opinatio deterruerit. Tres inde, vel quatuor credibile est fuisse permotos, ut venirent ad Judices, ab eisque indumenta peterent secularia, in domos redituri paternas. Quorum petitioni cum ignorarent Judices, quo pacto satisfacerent, Senatorem illum per literas consuluerunt, qui Villægarsix, post abactos inde Socios, recognoscendis Collegii rebus immorabatur. Is ad Judices scripsit, ut convocatis tironibus, sententiam exquirerent singulorum, et qui vellent ad patrias reverti domos, propriis cujusque vestibis induerentur: mittebat enim quascunque in tirocinio invenerat asservatas, donec tirones religiosa vota nuncupassent. His acceptis literis, ac vestimentis, Judices in concilium tirones vocant: cujusque voluntatem nominatim explorant: et quos iteratæ multorum instigationes, atque injectus offendendi Numinis timor a priore sententia dimoverant, vestes jubent induère seculares.



Vix ea peracta fuerant, cum novæ afferuntur literæ, in quibus Arandæ Comes Judicibus imperabat, ut quos deliberandi causa tirones apud se receperant, Palentiam deducerent e vestigio, eosque Palentino Judici traderent examinandos. Inde autem patuit, quæ Turrecremata cum tironibus acta fuerunt, sine imperio facta fuisse Comitibus Arandensibus, cui Rex negotium dederat expellendi homines Societatis. Ipsi adeo Judices, qui nonnullis privatas vestes concesserant, easdem postea deponere, de novoque religiosas induere coegerunt. Hoc modo sistuntur omnes coram Palentiæ Judice, qui eos ad Societatis vestem exuendam minaciter adigit. Talari detracta veste, cum multis antiqua ipsorum indumenta deessent (nam quæ Villagarsia Turrecrematam, indeque Palentiam advecta sunt, pauca erant admodum pro numero novitiorum) plures vilissimis induti pannis, et in mendicorum habitu comparuerunt. His deinde accesserunt iteratæ quæstiones Judicis, suggestiones, instigationesque multotum, quibus flos tirocinii violenter concussus excidit. Quadraginta delectos juvenes illa dies abstulit Societati: quorum alios ingesta peccandi religio; alios vestimentorum probrosa spoliatio; nonnullos sparsus rumor, fore inter milites conscribendos qui paternas redire nollent in domos; quosdam diffidentia deveniendi ad portum antequam Patres solverent in Italiam; aliosque alia de concepta prius sententia dejecerunt.

De his ego, et aliis qui in Hispania remanserunt, multa veraciter possem dicere, quæ in egregiam ipsorum laudem redundarent. Novi enim eo-

rum aliquos in Religiosorum claustris , ad quæ postmodum confugerunt ; alios in Sacerdotali classe , ad quam post emensum studiorum cursum euecti sunt, et conspicuis in eadem muneribus decorati ; quosdam etiam in cælibatu , quem sequi statuerunt, tam exactam vivendi rationem instituisse, ut ab archetypo illo non discrepauerint, cui fuerant in tirocinio Societatis injecti . Nam et præclaro vitæ exemplo , et constanti animarum zelo , et libris editis, et eximia in pauperes misericordia , multam pro cuiusque conditione operam contulerunt, ut saluti consulerent proximorum . Hos , inquam , expresso singulorum nomine , libentissime commemorarem, nisi me magnus illorum numerus , atque oritura inde præfationis hujus prolixitas deterreret.

Reliqui trigiinta quatuor , qui tentationes , et terrores fortiter superaverant , cum ad atrium S. Dominici recessissent , graves ibi molestias a conferta plebis multitudine sustinuerunt . Sed illud longe fuit gravius, quod ibidem ab ipsorum gremio commilitones duo per fraudem avulsi sunt. Laurentius Alaguerus Vallisoletanus, egregiæ indolis adolescens, qui paucis in tirocinio mensibus multum in pietatis exercitatione processerat, constantiam suam jam ante demonstraverat Turrecremata . Ibi enim conatibus propinqui cujusdam viriliter obstitit, qui multis apud eum contendit, ut in patriam revertetur : solumque ab eo impetrare potuit, ut literas ad Genitorem mitteret, in quibus agebat inter alia, malle se sanguinem fundere , quam sponte sua deserere Societatem . Nunc vero ad eundem in atrio illo cum cæteris consistentem duo accedunt viri ,

rogantque instanter, ut velit ea nocte ad propinqui domum divertere, postridie mane sine obstaculo rediturus ad socios. Laurentius, seu fraudem timeret aliquam, seu nollet a reliquis separari, modo pro oblato hospitio maximas gratias agere, modo illud aperte recusare, modo etiam profiteri, deliberatum sibi esse in exilium cum cæteris proficisci. Sed cum ab eis nihilominus urgeretur, necessariam causatus est Præfecti novitiorum facultatem: ab ipsorum enim Magistro designatus fuerat antiquior inter omnes, qui reliquis in separatione illa præssset. Is, cum ad eum pro impetranda venia illi viri accessissent, satis caute respondit, reluctantem Alaguerum nolle se cogere; volentem ire, non prohibere. Respondum hoc oratorum iras accendit, qui nullum modo tironibus Moderatorem esse, inclamantes, Alaguerum abripiunt: cum eoque trahebant simul Rupertum Torrentem Bletissensem, qui minimus erat omnium, sed in retinendo susceptæ vitæ proposito vel cum maximis comparandus. Novitiorum Præfectus, quoniam vim propulsare non poterat, raptos orat, ne quid violenter agant: tirones illos a se libere dimittendos, si tertium alium admittant, qui posset eos post cœnam in diversorium deducere, in quo cuncti pernoctare decreverant. Conditione libenter accepta, designatur a Præfecto Joannes de Villanova, quo nullus opportunior erat, ut Laurentium, et Rupertum ab injuria defenderet, siqua forte adversum eos intenderetur. Sed cum dolose res agitur, parum et vires prosunt, et valet industria. Duo illi viri, postquam Laurentius, et Rupertus intra domum ingressi fuerant, ad Joannem im-

periose conversi: *Tibi jam*, inquit, *nihil agendum hic superest*: præcluseque celeriter ostio, ab omni eum aditu prohibuerunt. Deinde Alaguerum decenter indutum ad Patrem suum mittunt: Torrentem rhedario tradunt, qui Salmanticam revertebatur, ut eum, quamvis multa renitentem, devehendum Ble-tissam curet. Sub idem tempus Franciscus Alvarus, qui tertium tantum diem in exercitiis primæ probationis exegerat, et tamen in iteratis contentionibus veterani more certaverat, cum fortuito in Episcopi ædes introisset, ibidem detentus est, neque ad tirones redire permissus propter invaletudinem, quam præcedenti die contraxerat. Alius denique, postquam tentamina cætera superaverat, cum audisset deinde, Socios e Sanctanderi solvisse portu, neque tirones ad eam venturos urbem, sed potius in vincula conjiciendos, quoniam sine viatorio pergebant syngrapho; penitus despondit animum, et reverti decrevit in patriam.

Supererant igitur triginta juvenes, quos nulli adhuc adversi casus a complexu divellerant Societatis. Hi omnes Sanctanderum cogitabant, quamvis multi eos a profectioe illa, quippe inutili, et plena periculis, acerrime contenderent deterrere. Sed illi ab incepto non recessuros affirmabant, nisi prius tentarent omnia, ut in Italiam cum Patribus navigarent: quod si, post adhibitam pro viribus diligentiam, potiri optatis non possent, tunc certe in proprias domos sine ulla ignavia conscientia redituros. Ut autem certiores fierent, quo loco Sociorum res essent, Joannem de Villanova præmiserunt, qui per compendia properaret in portum, in-



deque regrediens, omnia sibi renuntiaret, quæ ibidem explorasset. Interea ipsi per viam, quæ Palentia ducit Astudillum, et Vallegueram, venerunt Burgos, ubi nova eos certamina, novique manebant casus. Burgensis Prætor tam multa illis ad se vocatis de temeritate consilii, quod arripiebant, vehementi oratione dixit, ut firmiores quosque deiecisset, nisi animum contra objectas difficultates jam ante obfirmassent. Sed cum deinde ad consulendos prudentes viros ex Prætoris jussu accessissent, inter consiliarios inventus est unus, aut alter, qui profectionem in exilium a tironibus sine scelere iniri non posse affirmaret. Id quatuor ipsorum a proposito avertit, quod hactenus secuti fuerant. Alii duo in eadem urbe detenti sunt morbo, quorum solatio, et auxilio duo item alii remanserunt. In his erat Josephus Martinius, qui deinde Ferrolium adveniens, conscensaque ibidem navi, cum Sociis in exilium venit. Cæteri progressi sunt Sanctanderum: sed in eo itinere duos insuper cum ingenti dolore amiserunt comites, quorum erat utriusque probata virtus, et indoles amabilissima. Emmanu-eli Varroni, cum jam prope aberant a Keinosa, Pater eius occurrit, illumque, nullis aut filii precibus, aut aliorum permotus obtestationibus, secum reduxit in patriam. Paulo post Carolus Serna, qui multis jam partis victoriis Sanctanderum ingressus fuerat, delusus abducitur in parentum domum. Erat illi patria Colindres, non procul a Sanctandero, unde obviam ei processerat Patruus, qui tirones comiter salutatos, et in diversorio quodam liberaliter habitos, amice prosecutus est Sanctand-

rum . Postmodum ad nepotem rediens , qui ad privatam domum diverterat , multis apud eum institit , ut parentes , quoniam tam prope aberant , salutaret . Sed Carolus iteratis illius precibus id unum constanter opposuit : Deliberatum sibi esse proficisci cum Sociis , neque facturum , ut occasio cum eis enavigandi propter salutandos parentes elaberetur . Tum Patruus : Ne timeas , inquit : ego enim tibi recipio , postquam genitores inviseris , te iterum adducturum in urbem . Hac accepta fide , roganti morem gessit , cum eoque venit in paternam domum , a qua deinde nullam potuit evadendi viam invenire : quod semper illi doluit intime , sicut etiam Sociis , quibus erat desideratissimus . Non omisit tironum antiquior , postquam certo constitit , se quoque cum Patribus consensuros , de his ad Carolum scribere : admonuitque latorem epistolæ , quem unciali conduxit argenteo , ut occasionem conveniendi sine arbitris Carolum rimaretur . Sed illius pater , qui nullum filii gressum non observabat , literas interceptit , deincepsque in eo custodiendo vigilantiam adauxit . Per veredarios Præfectus idem ad illos etiam scripsit , qui nunquam fore credebant , ut tirones venirent in portum , aut , si tandem illum tenerent , ascendere navem permetterentur . Ad Varronem item scripsit , cujus pater in discessu promiserat reducturum se filium , si certior fieret de permissa tironibus navigatione . Sed cum jam longe abesset , et instaret solvendi tempus , sperari vix poterat , ut rediret .

Hoc modo viginti solum tirones ad Collegium Sanctanderense pervenerunt , ubi religiosis induti ves-

tibus, inde alacres processerunt ad naves. Ex illis erant quatuordecim Scholastici, et sex Adjutores: quorum hic subijcio nomina eodem ordine, quo recepti fuerant in Societatem. Isidorus Arevalus ex oppido Cabezas del Pozo diœcesis Abulensis. Petrus Oterus Compostellanus. Emmanuel Cancela Pontevedrensis, ex diœcesi Compostellana. Emmanuel Camus, et Franciscus Xaverius Camus, uterque Montensis in diœcesi Sanctanderi. Gaspar Ferrerus Ontiniensis, ex diœcesi Valentina. Emmanuel Aciera Proazensis, ex diœcesi Ovetensi. Franciscus Descalzus Egelastensis, e diœcesi Conchensi. Dominicus Georgius ex oppido Santiagos diœcesis Auriensis. Josephus Oterus ex oppido S. Eulalia in diœcesi Lucensi. Franciscus Xaverius Bouzas, natus in oppido S. Stephani de Pedre diœcesis Compostellanæ. Vincentius Antonius Calvus ex Iglesiario in eadem diœcesi Compostellana. Joachimus Maestu Torralbensis, ex diœcesi Calagurritana. Julianus Mochales ex oppido Castejon in diœcesi Conchensi. Adjutores erant: Joannes de Villanova Naguizensis, ex diœcesi Pompelonensi. Martinus Firminus Ezcurra, et Emmanuel Gonzalius Pompelonenses. Andreas Martinius ex oppido Azuelo diœcesis Calagurritanæ. Franciscus Losada Carudiensis, ex diœcesi Lucensi. Josephus Alfonsus Alloensis, ex diœcesi Pompeionensi. His merito adjungi debent tres alii Scholares novitii: Rudesindus a Castro Cubelensis, e diœcesi Lucensi: Joannes Ambrosius Fernandus Ovetensis: et Mathias Lopus Salzensis, ex diœcesi Zamorensi. Qui Villagarsia, ubi per annum, aut eo amplius probati fuerant, profecti sunt Villaregium, hu-

manioribus ibi literis informandi, donec in Peruviam, ad quam designati erant, transmittendi tempus appeteret. Sed navigationem Americanam, promulgato interim exilii decreto, cum Italica commutarunt. Rogati enim a Ministro regio, vellentne in exilium ire, nullam a Rege pensionem accepturi? incunctanter affirmarunt: proindeque Villaregio profecti sunt cum cæteris Sociis, ut Carthaginem advenirent. Verum quod tironibus Villagarsiensibus Turrecremata contigit, idem his tribus accidit Albaceti. Novo Aulæ decreto jussi sunt ibi consistere, et quod abeundi consilium ceperant, majore insuper consideratione perpendere. Tres circiter menses eo loco detenti, sæpissime interrogati fuerunt a Judice, quid tandem sequi statuissent? Et cum in eadem illi sententia persisterent, demum permissi sunt Carthaginem proficisci. Consensa ibi navi, qua Procuratores vehabantur, Adjacium in Corsica deferuntur. Inde post non multos dies venerunt Calvium, ubi consederant Castellani. Ab his libenter excepti, cum tironibus, qui eodem appulsi fuerant, intermissum studiorum cursum instaurarunt: et cum iisdem in arrepto vitæ proposito, dum stetit Societas, fideliter permanserunt. Atque hoc satis erit, opinor, ad eorum explenda vota, qui de novitiorum rebus pleniorē desiderant narrationem.

Hoc etiam rogatu cujusdam hic monitum velim. Corpus Augustini Cardaverazii, qui laudabilem vitæ cursum laudabiliorē fine conclusit in oppido S. Joannis in Persiceto, milliario decimo a Bononiæ urbe, conditum initio fuit iu sepulcro Sa-



cerdotum Collegiatæ ac Parochialis ædis ejusdem oppidi, arcæ inclusum lignæ, quæ duabus obserata erat clavibus, ut in Vita dictum est Augustini. Deinde arca illa coram judice et idoneis testibus translata fuit anno 1794, repositaque in privato loculo, qui ad eum finem structus est in eodem templo prope aram S. Francisci Xaverii, in qua etiam imago colitur Sanctissimi Cordis Jesu. Illi aurem loculo impositus et lapis, in quo legitur hæc inscriptio: *P. Augustinus Cardaveraz Hispanus, Professus Soc. Jesu, innocentia vite, animi candore, virtutibus heroicis, donisque celestibus cumulatus, Obiit XV. Kal. Novembris MDCCLXX. Translatus pridie Idus Martii MDCCXCIV.* Hæc merito admonenda fuerunt, ut constaret de Sepulcro tam insignis Viri.



#### AUCTORIS PROTESTATIO.

*Quæcunque in hoc Libro referam de virtutibus, aut miraculis quorundam Virorum illustrium, ea me non alio sensu accipere, vel accipi ab ullo velle profiteor, nisi quo illa solent, quæ humana duntaxat auctoritate nituntur, ut Urbani VIII. decretis obediam, et S. R. Ecclesiæ, cujus est earum rerum iudicium, debitum præstem obsequium.*

# I N D E X

## VIRO RUM ILLUSTR IUM

*Quorum Vita in hoc Libro continentur.*



Emmanuel Pereira.	Pag. 1
Josephus Joachimus Mendizabal.	23
Ignatius Osorius.	29
Clemens Recius.	69
Marcus Gordaliza.	86
Joannes Thomas a S. Christophoro.	95
Sebastianus Mendiburus.	112
Vincentius Iraola.	136
Eugenius Colmenares.	151
Gaspar Castellus.	178
Josephus Turrianus.	194
Franciscus Xaverius Idiaquezius.	201

*Die 17 Maji 1797.*

*Vidit Joannes Baptista Morandi pro Eminentissimo, ac Reverendissimo Archiepiscopo.*

*30 Maggio 1797.*

S I S T A M P I.

*L. Ceccbelli.*

## DE VIRIS ILLUSTRIBUS

IN CASTELLA VETERI

## SOCIETATEM JESU INGRESSIS

ET IN EXILIO EXSTINCTIS

LIBER II.



EMMANUEL PEREIRA.

**I**llum ante alios Virum describere aggredior, cui priorem locum, si moriendi sors non dedisset, cæteri ob illius suavitatem morum, et perspectam in agendo prudentiam, facile concessissent. In hanc lucem prodiit Rubini, Gallæciæ opidulo, anno decimo supra millesimum septingentesimum, nono Kalendas Januarias. Cum pueritiam inter pietatis, et literarum studia exegisset, ad perfectiora vocanti Deo promptiorem aurem adhibuit. Ætatis annos sexdecim nondum expleverat, cum Societatem Jesu petiit, eamque obtinuit undevigesimo Augusti die, seculi decimi octavi anno vigesimo sexto. In tirocinio positus, ad religiosæ disciplinæ formam et animum, et corpus ita composuit, ut Superiorum vigilantia plene satisfecerit, et novitorum, etiam acutissime intuentium, oculos nunquam offenderit. Mitem, et ad pietatis opera propensam indolem jam tum exhibuit, et in cuncta tirocinii præscripta solicite intentus, præstantis tironis nomen apud omnes obtinuit, spemque fecit haud dubiam, in arrepto perfectionis cursu feliciter progressurum. Ibidem humanioribus excultus fuit literis: deindeque Philosophica studia Methymnæ, Theologica Vallisoleti cum magna ingenii, ac diligentia laude confecit. Nec assiduus in comparandis scientiis labor quidquam ei de contentione virtutum imminuit. Silentii amans, et solitudinis, atque ad omnes pudoris leges ubique compositus, pacatiorem gerebat animum ad pertrac-

tanda divina: quorum ex frequenti, attentoque usu ad virtutum studium, maximeque ad Dei amorem inflammabatur. Christum apud nos in aris commorantem singulari colebat affectu, quem iteratis, et humillimis adorationibus, aliisque grati animi significationibus expromebat. Fortuito inventum est autographum ejus scriptum, Vallisoleti, dum theologicis operam dabat, confectum; in quo magnis amoris, ac fiduciæ affectibus se, suaque omnia Jesu Cordi devovet, vota que concipit ardentissima injurias compensandi, quæ illi ab hominibus inferuntur. Eamque devotionem, quo firmior, et constantior esset, incisi sui pectoris sanguine confirmavit.

Confectis literarum spatiis, et tertia Societatis probatione peracta, ad ea, quæ probe didicerat, cum externis communicanda destinatur. Grammaticam primum, deinde Philosophiam explicuit Compostellæ, ac Segoviæ, postremoque Theologiam Lucronii docuit ad multos annos. Ubique vero, ad instituendos in scientia, et pietate adolescentes, in omnes injuncti officii partes diligenter incubuit, quas a Magistris suis jure ac merito Societas exigebat. Sui nihilominus perficiendi studiosus, omnia religionis opera, quæ aut lege præscripta erant, aut consuetudine inducta, fideliter et sedulo exequabatur. Ab exterorum consuetudine abstractus, nisi cum aliter suasisset eorum necessitas, vel utilitas, libenter domi delitescibat, his commentandis intentus, quæ discipulis prælecturus erat in ludo, vel civibus pro concione dicturus in templo. Quamquam enim erudiendæ juventuti totis incumbentem viribus inspexisses, non ideo unquam illa subire onera detrectavit, quæ in aliorum etiam commodum redundarent: ut habendi orationes sacras ad populum, ut pœnitentium audiendi confessiones, ut ægrotos, et morti proximos invisendi, eosque ad patientiam, et pium obitum comparandi. Quidquid autem illi agendum instaret, nihil gravate, nihil non alacri, ac libenti animo aggrediebatur, ut vel in ejus operandi modo jucundissima voluptas eluceret, qua ministeria omnia exercebat, quæ pro juvandis hominibus suscepisset. Eandem animi, et vultus tranquillitatem retinebat in communi cum cæteris consuetudine, in qua ita comis erat, ac lepidus, ut nunquam modestiæ, et gravitatis terminos præteriret. De his, atque aliis Pe-  
rei-

reiræ virtutibus quidam ejus in Theologia discipulus sic olim affirmabat: „Emmanuelem Pereiram eodem semper vultu, „eoque placido, et ad modestam hilaritatem composito sus- „pexi. Nunquam ira succensum in discipulos animadverti, „vel cum eorum desidiam, aliosve errores pro ratione sui „muneris coargueret. Erat proinde singulis apprime carus, „pariterque acceptus civibus, quorum multi cubiculum e- „jus, ut consilium caperent, frequentabant: multoque plures „ex omni hominum cœtu, cum sedebat in templo Judex, ad „sacrum ejus tribunal accedebant. Magno etiam apud domes- „ticos suos erat in pretio, quos de Pereiræ sapientia, deque „religiosis ejusdem moribus honorifice semper loquentes au- „divi. In literariæ palestræ concertationibus, quanquam com- „muni sapientum voce inter cæteros emineret, qui eodem in „stadio exercebantur; modestiæ tamen, atque urbanitatis le- „ges inviolate servavit, nihilque unquam egit, aut dixit, quo „vel nimium sibi tribuere, vel alios contemptui habere si- „gnificaret. Ob eam animi moderationem cæteri aliorum or- „dinum Magistri, quibus nota erat ejus ingenii vis, ubertas- „que doctrinæ, præcipuo illum amore, imo etiam honore „prosequebantur. „

Cum autem reliquis animi dotibus prudentiam, et judicii maturitatem insignem adjungeret, dignus habitus est, qui ad gubernandi munus admoveretur: in eoque per annos amplius viginti, non interrupte, neque uspiam sine ingenti laude, usque ad Societatis occasum perseveravit. Initio Collegium Legionense, Montis regii, et Lucroniense rexit: indeque ad Methymnense, ac Palentinum translatus est, quorum in utroque Societatis juvenes educabantur. Ubilibet autem domesticam disciplinam, et Societatis ministeria suis potius exemplis, quam objurgationum aculeis, quibus parcissime utebatur, sollicite promovit. Præibat ipse constanter ad ea omnia, quæ cunctis in commune peragenda erant quotidie, magnoque curabat studio, ne quis sine probabili causa eadem explere prætermitteret: negabat enim, sine his convenientem familiæ religiosæ ordinem posse consistere. Invigilabat etiam attente, ut singuli ad demandata sibi munia et tempèstive accederent, et incumberent diligenter. Quod si aliquem incuriosius agentem

animadverteret, incunctanter quidem commonebat illum officii; sed verbis adeo non indignantibus, ut magis amici monitum, quam imperantis reprehensio viderentur. Raro extra cubiculi limen excedebat, ut præsto esset omnibus sibi subditis, consilium ab eo, vel solatium exquirentibus: nullaque illum quamvis urgentissima negotia retardabant, ut patientem advenientibus præberet aurem, et optatam ingereret consolationem. Responsa ejus ut plurimum concisa erant, sed quæ rem propositam scitissime attingerent, et ad religiosæ potius, quam humanæ prudentiæ leges exacta. Commissos suæ custodiæ adolescentes, ut in spem certam crescerent Societatis, ad virtutum, et literarum studium incitabat non tam supplicii terroribus, quam opportunis, salutaribusque consiliis, et amoris vere paterni significationibus; quod vim habet acerrimam, et blandissimam persuadendi. Pœnas vero tunc fere solitus erat infligere, cum in eis noxam aliquam animadverteret, ad quam potius levitas quædam animi, vel improbitas instigasset, quam ardor ætatis. Et quamvis exactam ab eis legum custodiam, attentamque ad omnes officii partes curam exigeret; non ideo difficilis erat in his animi relaxationibus permittendis, quæ juvenes decent ingenuos, quæque prudenter a majoribus inductæ fuerant ad religiosæ vitæ jugum non utique dissolvendum, sed deliniendum. Idem etiam cum provecioribus observabat; nec renuebat ipse ad honesta id genus oblectamenta cum iisdem sic interesse, ut nemini Rectoris præsentia molesta esset, vel injucunda. Quod cum efficeret, eo etiam spectabat, ne subjecti sibi Socii aut diutius, quam par esset, aut aliis, quam ipse vellet, lusibus indulgerent.

Huic in gubernando prudentiæ mirabilem mansuetudinem, atque animi demissionem adjunxit, qua suorum pariter, et externorum benevolentiam demeruit. Cum Montem regium missus est Rector, civium animos haud parum ab illius Collegii Sociis abalienatos invenit. Præcesserant enim turbæ, in quibus aliqui per summam vim, et injuriam, nihilque religione loci deterriti, in Collegium irruerant armis instructi. In eos postea cum severe Judices animadvertissent, non defuerunt, qui severitatis ejus invidiam in ipsos Collegii Patres rejicerent, ab quorum proinde consuetudine non pauci ex primo-  
ribus



ribus recesserunt. Sed Pereira, ut dissidium hoc quamprimum dirimeret, viros illos, qui se maxime offensos existimabant, non dubitavit statim invisere, quanquam ab eis hoc urbanitatis officium præstitum sibi non fuisset. Hac ejus ingenua facilitate, verbisque blandissimis, quibus de retinenda concordia coram singulis opportunissime disserebat, ita cunctos ad veterem cum Sociis amicitiam traduxit, ut jam certatim ad eos in Collegium convenirent, illud propalam asseverantes: *Emmanuelẽ Pereira exemplo suo eos id facere docuisse, quod ipsi jam pridem ex christianis legibus efficere debuissent.* Atque ita demum per facillimam Pereira mansuetudinem non solum omnis sublata est discordia, verum etiam nova quædam, et permansura coaluit animorum conjunctio. Nimirum, ut in divinis habetur eloquiis, *responsio mollis frangit iram, et verbum dulce multiplicat amicos.*

Æque mansuetus erat, ac suavis erga illos, qui suæ suberant potestati, nihilque propemodum esse videbatur, quod pacificum ejus animum perturbaret: non quod acriore natus non esset indole, sed quia assidua repugnandi sibi contentione turbulentos animi motus rationi coegerat obtemperare. Aliquando in libellum incidit, in quo ejus operandi ratio haud parum pungenti stilo suggillabatur. Ac licet de obscuri scriptoris nomine certo sibi constiterit, non aliam ulciscendi viam præter silentium, et patientiam adivit: *Nullus quippe, agebat, propulsandis calumniis aptior, aut solidior est clypeus, quam admistum mansuetudini silentium.* Si quisquam admonitiones ejus minus libenter acciperet, atque in aliquam conquestionis vocem erumperet; tum ille vel se audisse dissimulabat, vel paucissimis verbis delinquentem ita corripiebat, ut is errorem suum et evidentius agnosceret, et promptius emendaret. Hoc modo quemdam ardentioris ingenii, qui correptionem male gratus, et obtrectans exceperat, ad saniores mentem ita perduxit, ut statim ille pœnitentia ductus, ad Pereira accurreret, ab eoque liberioris responsi veniam suppliciter sit deprecatus. Cui Rector: *Bono sis, inquit, animo: novi enim inter lapsum a vivaciore animo, vel a malitia profectum, quantum intersit.* Sic ille noverat et delinquentes corrigere, et eorundem sibi conciliare benevolentiam. Quodsi ali-



aliquem aut ab alienato ab se animo, aut suboffenso esse intelligeret, illum perhumaniter conveniebat, rogatisque offensionis causis, ad eas sincerissima respondebat fide, et quas in operando habuisset vel publici, vel privati boni rationes demonstrabat. Inde autem fiebat, ut qui paulo ante querulum adversus Rectorem gerebat animum, majorem erga illum et amorem conciperet, et venerationem exhiberet. Denique in omnibus, quas per annos plurimos gessit, præfecturis illius gubernandi ratio adeo pacifica fuit, et ad religiosæ prudentiæ leges exacta, ut quidam provinciæ Præses, postquam Peireiræ domum lustraverat, illum deinde, tanquam optimi Superioris normam, aliis proponeret ad imitandum.

His providæ administrationis subsidiis instructus, Collegium Palentinum, in quo non pauci degebant juvenes, feliciter moderabatur, cum patrios exire fines Hispani jussunt Socii. Sinistrum, nec opinatum casum perinde, quasi prævidisset, excepit, nihil ab æquabili tranquillitate dimotus, quam semper in varia vitæ hujus vicissitudine veluti peculiarem sui notam retinuit. Probe conscius, nihil in humanis esse, quod ab divina dispositione non veniat, se, suæque subditos potestati prompte, ac reverenter decreto Regis subjectit. Sed memor insuper, familiæ se religiosæ præesse, cujus ingenuos noverat mores, et cujus proinde honori consulere tenebatur; non dubitavit vel in illo abjectionis statu suam exhibere constantiam, ut vanos Ministri regii timores cohiberet. Is demandati negotii novitate percussus, non eam, quæ injuncta sibi fuerat, animi præsentiam potuit in omnibus retinere. Postquam Sociis in conclave quoddam reductis legem denuntiaverat exilii, singulos singulis stipatos militibus in cubicula sua remisit, ut ea prompte caperent, quæ Rex secum deferre permittebat, indeque in custodiæ locum sine mora cuncti redirent. Sacerdos quidam, cum ad habitaculum reverti suum non speraret, ab eo palliatus, ac petasatus exivit, rectaque ad Judicem, ut clavem traderet, contendebat. Judex vero, ut illum viatorio habitu instructum aspexit, nescio quid inde mali suspicatus, cœpit exclamare continuo: Adeste Judici, milites, in auxilium. Ad eam vocem milites ad arma convolant, eorumque duces ad stationem quisque suam accurrunt. Ac-

cur.

currit etiam Rector , cui clamoris insoliti causam interroganti, respondit Judex : *veritus, ne Patres fugam arripiant ; quoniam vidi quemdam eorum cum pallio, petaso, et baculo procedentem ; opem militum imploravi .* Tum Rector gravi vultu, constantique animo dixit : *Pone, oro te, formidinem istam . Etenim si pandi jusseris Collegii fores, si militares has copias emiseris, ego quotquot mihi subsunt, vel solo nutu continebo, nullusque pedem efferet extra limen . Quod si quisquam secus faxit, meum ipse caput devorveo .* Hac viri firmitate Judex sese continuit, et præconceptæ suspicionis veniam non semel ab Rectore petiit . Fere idem illi contigit cum eo, qui Palentinos Socios a Burgensi urbe Sanctanderum usque susceperat conducendos . Cum enim eos per viam, ne quis forte diflugeret, frequentissime recenseret, Pereira nimiam ductori solitudinem his verbis eripuit : *Noli, quaso, tot frustra itineratis censibus defatigari : nemo enim in destinatum locum non veniet . Atque id asserenti mihi, qui singulos intime novi, ne dubites habere fidem .* Sic ille, vel in tanta fortunæ commutatione, bono suorum nomini consulebat .

Cum omnibus, qui Palentia digressi fuerant, Sanctanderum ingressus, novam ibi ac multiplicem exhibendæ constantiæ, et caritatis occasionem invenit . Quo tempore Jesuitis indictum fuit exilium, nupserabat provincia Castellana Socios quindecim et octingentos, in domiciliis commorantes triginta septem, quæ per varias ejus provinciæ regiones constituta erant, exceptis admodum tredecim, qui Matriti, et Romæ, et alibi extra provinciæ fines degebant, certis muneribus destinati . Ex his, quotquot apud Callaicos habitabant, in portum delati sunt Brigantinum, inde velis in Italiam transmissuri : qui Navarram, et Guipuzcoam incolebant, Sebastianopolim : Lucronienses, ac Victorienses, cum iis, qui in Cantabris morabantur, Flaviobrigam : soli Ovetenses in proximum Gegionis portum advenerunt . Cæteri vero, qui Castellam veterem proprie dictam, et Legionense regnum inhabitabant, ubi plures, et frequentiores erant Societati domus, omnes missi sunt Sanctanderum, et intra modicos illius Collegii limites inclusi . Hinc autem, præter alias molestias, quæ diversis diverso obveniebant tempore, illæ communes erant, et quotidianæ, quæ om-

nibus ab loci angustiis inferebantur. Inter Pereiræ subditos septemdecim erant juvenes, qui Palentiæ physica condiscabant. Hi omnes cum uno Sacerdote recepti sunt in cubiculum, cujus in pavimento protensis ad quietem lectulis, vix ubi pedem poneret, invenisset. Nec vero illi pessime omnium habiti fuerunt. Novis quippe Sociorum copiis subinde advenientibus, multi in solariorum ventis pervio, quorum vis storeis ex arundine male textis arceri non potuit; quidam sub ipsas solariorum scalas; alii vel in puerorum classibus, vel in patentibus ambulacrorum spatiis pernoctare cogebantur. In his aliisque durioribus incommodis Emmanuel Pereira, cum alios passim, tum suæ commissos fidei verbis, et exemplis ad viriliter sustinendum incitabat. Quod cum alii similiter efficerent, in domo illa, ubi corpora coangustata erant undique, magna itidem erat amplitudo mentis, cordisque dilatatio ad perferendos labores, qui tum aderant, et graviore, qui prope diem imminebant, aggrediendos. Recurrebant per eos dies opportunissime sacra patientis Christi mysteria, quæ dum a singulis frequenti meditatione perpenduntur, dum ea Sacerdotes ad aram, et in quotidianis precibus recolunt, dum eadem anagnostes iteratim inter prandendum, ingentes omnibus adjiciebant animos ad exilii opprobrium constanter ac libenter subeundum.

In Italiam delati navibus, ultra annum ad Corsicam constiterunt, ibique in Cæsiæ litore, sive Calvii, durum exilii sui posuerunt tirocinium. Pereira cum primum in terram fuit expositus, eo cogitationes suas omnes convertit, ut diversorium aliquod quæreret, in quo familia sibi commissa reciperetur. Constabat hæc Sociis triginta quatuor, quibus collocandis non aliud reperire potuit hospitium, præterquam horreum, quod præsidiarii milites Galli reponendæ farinæ destinaverant. Is locus, quem nullus distinguebat paries intermuralis, patebat in latitudinem communes pedes sexdecim, in longitudinem triginta sex. Ibi et extendendi erant lectuli, et mensæ apponendæ, et focus pro cibis apparandis instruendus, cujus e fuligine, ac fumo non parum accrescebat incommodi. Hæc sub ardente Sirio cum evenirent, manentium in eo latibulo plerique pustulas contraxerunt, nonnullus intra paucos dies cor-

rep-

reptus est feбри. Accedebat his malis annonæ difficultas, et belli timor, quod paucis ab excensu Sociorum diebus inceptum, illos per duos circiter menses sollicitos habuit, ut alibi demonstravimus. Emmanuel in tanto laborum cumulo nullum perturbati, nedum concidentis animi prodebat indicium; quin etiam hilari vultu, verbisque opportunissimis omnes ad patientiam adhortabatur, commemorandis majoribus navium angustiis, aliisque præteritis incommodis, quæ jam laudabili constantia superaverant. Succrescentibus deinde per obsidionem, et Gallorum reditum ærumnis, si quem suorum afflictum animadverteret, nullum aut solliciti Præsidis, aut amantissimi Patris officium prætermittebat, ut jacentem erigeret, et ad portandam impositam a Deo crucem, sperandumque ab eodem auxilium, ac solatium animaret. Venerant per id tempus Augustam Taurinorum duo Societatis viri Subalpini, qui adnitate Sardinæ Rege, a vinculis vindicati fuerant, in quæ illos, cum aliis bene multis e Societate, Minister Carvallius Ulyssipone conjecerat. Non defuit ea occasione, qui prudenti sane consilio literas ad Corsicam mitteret, quibus possent Hispani exules, ut inter alios Pereira fecit, ad constantiam mirabiliter excitari. Quarum literarum talis erat contextus.

„ Nuper in hanc urbem advenerunt Fantinus, et Bon-  
„ joanninus e Societate Jesu, quos Rex noster pro egregia ejus  
„ in omnes sibi subditos caritate ab ergastulis Ulyssiponensi-  
„ bus erui, et in itinere liberaliter haberi curavit. Quanta  
„ inibi toleraverint, omnibus ex illorum macilento vultu, et  
„ lurido palore, vel ipsis tacentibus, apparet: simulque sua-  
„ vissimis, et integerrimis moribus, dulci atque ad omnem  
„ modestiam, et religionem composito sermone cunctis Tau-  
„ rinensibus gravissimum innocentia suæ perhibent testimoni-  
„ um. Iidem mira, et horribilia narrant de inauditis pœnis,  
„ quas Lusitani Socii adhuc in custodia detenti perferunt, de-  
„ que supernis benedictionibus, quibus illos Deus misericor-  
„ diter cumulat, et quæ proculdubio ex adjunctis præter com-  
„ munes naturæ leges evenire convincuntur. Ego ipse et mo-  
„ do, et per elapsam hiemem pulcherrimas vidi literas, ab  
„ illis carceribus emissas, prorsusque dignas primævis Ecclesiæ

„ heroibus. In eis nihil me magis recreat, quam quod illis  
 „ pro Christo vinctis communem esse videam perfectissimam  
 „ ad Dei placitum submissionem, tenerrimam in ærumnis ju-  
 „ cunditatem, tantumque durissimæ crucis gaudium, ut nihil  
 „ ardentius optent, quam vitam in ea ponere, nihil pertimes-  
 „ cant vehementius, quam ab ea viventes, et inviti deponi.  
 „ Laborum historia, quos viri illi sustinent Deo pleni, vere-  
 „ que suffixi cruci cum Christo, posteros obstupefaciet, vix-  
 „ que adducentur, existimo, ut eidem fidem habeant. Vide-  
 „ bunt in ea inculpatæ vitæ homines ad tenebricosa, et artis-  
 „ sima detrusos ergastula, quæ propter profundam ipsorum  
 „ altitudinem nullum aut luci, aut aeri aditum præbent, et  
 „ propter recentissimam ad victorum adventum substructio-  
 „ nem supra modum sic madida, ut modicum illud stramen,  
 „ quo unico utuntur lecto, intra paucos marcescat dies, et  
 „ in stercorea putrefiat: glirium immodicam multitudinem, qui  
 „ e captivorum manibus panem abripiunt, et super eorum ora  
 „ discurrunt, dum ad captandum somnum recumbunt: bestio-  
 „ las diversi generis, foetidosque vermiculos, præter eos, quos  
 „ generat humanum corpus, diuturno situ, et squalore con-  
 „ fectum: vestes putredine absumptas, et frustatim in terram  
 „ decidentes: indeque miserandam adeo nuditatem, ut præ  
 „ amore pudicitæ vel paleis opus sit contegi, vel segmine  
 „ cilicii cujusdam æruginosi, quod eis aliquando permissum  
 „ est ad operiendum: dirissimam item famem, quoniam be-  
 „ nigne se haberi existimant, cum selibram panis mucidi sin-  
 „ guli per diem accipiunt: duros, et immites custodes car-  
 „ cerum, qui custodias asperioribus modis divexant: perpe-  
 „ tuam denique noctem, cujus tenebras lucernæ tantum sim-  
 „ plicis, quæ tamen oleo sæpe deficitur, lux maligna dis-  
 „ pellit. Eorum aliqui exspoliati sunt imaginibus, et numis-  
 „ matis sacris, ut etiam codicibus divinarum precum: sed  
 „ cum ad tollendam ex eorum manibus effigiem Christi con-  
 „ fixi ventum esset, Sacerdotali constantia restiterunt, ne si-  
 „ bi unicum in adversis solatium, et incitamentum ad patien-  
 „ tiam eriperetur. Alii ulceribus sunt pleni: singillatimque  
 „ asseritur de Sacerdote quodam sene, quem nulla vestis ob-  
 „ tegit, ita esse ulcerosum, ut a vertice ad imos talos pla-  
 „ „ gis



„gis scateat. Idem, cum nec brachia, nec manus movere  
 „possit, more bestiarum edere coactus est, demisso in ter-  
 „ram capite ad capiendum cibum dentibus, et aquam lingua  
 „lambendam. Nullus ibi Medicus, nullus Sacrificii, vel Sa-  
 „cramentorum usus, nisi cum aliquis letali morbo corripi-  
 „tur: ac ne tum quidem Christi Corpus accipiunt, nisi ad-  
 „hibitus infimæ notæ Medicus, mortem jam imminere, ju-  
 „rato testificetur. Sed mirum! Cœlestis ille panis jam pene  
 „depositos sæpissime ad valetudinem revocavit: atque aliquis  
 „octies, vel decies sacrum Viaticum eo modo recepit. Un-  
 „de ajebat Medicus, cum ad eum deploratum arcessebatur:  
 „*Novi ego medicinam, qua se sanum faciet. Afferatur illi*  
 „*Viaticum.* Multi post mortem mirabiliter faciem commuta-  
 „runt, ipsique custodes carcerum, cum ad foveam cadavera  
 „raptabant, admirabundi dicebant: *Hi enim vero vultus sunt*  
 „*Beatorum.* Ex iisdem custodibus aliqui, constantiam et for-  
 „titudinem captivorum admirati, eos nonnunquam his allo-  
 „cuti sunt verbis: *Quodnam vos bipedum genus estis? Hic e-*  
 „*nim, ubi robora, et ferrum ipsum mucore, ac ferrugine cor-*  
 „*rumpuntur, vos tamen vivi, ac nonnulli etiam sani post*  
 „*tot annos perseveratis.* „

Has literas Pereira cum obtinisset, eas non modo se-  
 cum ipse tacitus recolebat, sed frequenter etiam coram om-  
 nibus, qui domi suæ erant, integras recitabat. Illisque per-  
 lectis, hanc plerumque adjugebat exclamationem: *Hi demum*  
*labores magni sunt, vereque difficiles! quibuscum si nostri con-*  
*ferantur, vix eo nomine habeantur digni, solumque laborum*  
*umbra dicendi.* Quibus, aliisque verbis peropportunitis suorum  
 erigebat animos, ne in illa calamitate conciderent. Sed quo-  
 niam foris sonantem vocem, nisi spiritus admoneat intus, pa-  
 rum prodesse noverat ad permovendum; summam adhibuit  
 diligentiam, ut intra farinariam illam cellam, ad quam con-  
 fugisse diximus, religiosa quædam vigeret æconomia, quæ  
 ad roborandam, et retinendam constantiam deserviret. A pri-  
 mo statim die tempus certum statuit, in quo deberent omnes  
 stratum relinquere, deindeque per horam cœlestium insistere  
 meditationi. Voluitque, ut ab omnibus inter induendas ves-  
 tes (quoniam omnes in eodem manebant cubiculo) alternis

diceretur hymnus *Veni Sancte Spiritus*, Litanix Mariæ Virginis, aliæque preces, quæ in tirocinio consueverant recitari. Pomeridiano tempore omnes pariter elata, et alterna voce Rosarii globulos precando percurrerant, et legentem pium aliquem librum per semihoram auscultabant. Post cœnam, similiterque ante prandium, singuli in sua facta inquirebant per quadrantem horæ: nec sinebat Emmanuel aliquem eo tempore per Cœnaculum divagari. Ante solemnia Beatæ Virginis, Sanctorumque Societatis cuncti novendiales fundebant preces, ut se ferventius ad ea celebranda præpararent. Hæc omnia, quæ dum Calvii mansit, ab omnibus, quibus ille præerat, observari constanter voluit, propterea in eum modum statuit, nequis vel propter habitaculi angustias, vel propter librorum penuriam pias illas exercitationes prætermitteret. Addebatque ipse vim magnam omnibus, cum et primus ad eas accederet, et constantem in iisdem persolvendis ostenderet accuratorem.

Non minorem adhibuit curam in domestica suppellectili comparanda, et iis, quæ ad quotidianum victum opus erant, perquirendis; quod in exigua, et paupere urbe, atque ab hostibus obsessa, plenum erat negotii. Verum ille, ut suorum necessitatibus subveniret, nulli vel industriæ, vel operæ parcebat suæ. Præter alia, quæ ad rectam suæ domus administrationem prudenter excogitavit, ipse non raro per domos, per apothecas discurrebat, ut victui necessaria compararet: quæ si invenisset, non dubitabat domum suis manibus, vel humeris deportare. Sæpe non sine admiratione, lætaque inspectantium admurmuratione visus est Emmanuel Pereira, tot jam præfecturis in Societate perfunctus, per vias Calvii aut orcam olei portans, aut aquæ hydriam, aut saccum cibariis onustum incedere. Cumque levare illum onere vellent aliqui, quod ejus canis, et meritis parum convenire existimabant, nullius quamvis iteratis precibus flectebatur, illud ridente vultu subjungens: *Equidem apud religiosos viros nullum unquam vile munus existimavi, multoque minus in præsentis nostrarum rerum statu.* Post duos circiter menses relaxata obsidione, factisque induciis, ex angusto illo, et incommodo diversorio ad ampliorem domum pertransiit. Sed et illa, redeuntibus  
pau-



paulo post Gallis, præfectis relinquenda fuit militum, et ipse cum Sociorum parte, quibus præfuerat hactenus, in parvam extra urbem domum concessit. Hæc in planitie sita erat, quæ mari alluitur ad orientem solem: ad occidentem vero, ut etiam ad austrum, et boream perpetuo montium jugo concluditur. Inde impedita ventorum agitatione, qui cæteroqui violenter intra urbem dominantur, locus ille parum salubris ab indigenis habebatur, cum præsertim aquæ, vel quæ ab æstuanti mari prosiliunt, vel quæ ab vicinis decurrunt montibus, non longe ab ea domo stagnarent. Sed Hispanis exilibus in tanta domiciliorum penuria, quocumque pateret aditus, fuit confugiendum.

Et Pereiræ quidem salus nullum in eo palustri loco passa est detrimentum. Vidit tamen cum ingenti animi dolore, quos secum eo duxerat, intra paucos dies, modo hos, modo illos febribus laborare malignis, quæ medentibus, hoc est domesticis Pharmacopolis, multum negotii, ægrotis vero maximam patientiæ materiam exhibuerunt. In ea calamitate Rectorem tantum, atque unum ex Adjutoribus ab omni contagione liberos Deus reservavit, qui cæteris opem, et consolationem afferrent. Et vero tam industrius in Rectore fuit labor, tam strenua in subveniendis infirmis diligentia, ut hi nullum sollicitæ Matris officium desideraverint. Per id tempus hæc erat illius agendi ratio. Multo mane consurgens, horarix vacabat meditationi, seque ad divinum comparabat Sacrificium, quod deinde multa cum religione peragebat, et convenienti contentione vocis, ut a decumbentibus audiretur. Gratiis ad longam moram peractis, omnes invisebat ægrotos, singulisque vel jentaculum, vel decretum in illam horam medicamentum ministrabat. Reliquis ad meridiem horis nunc iis, nunc illis aderat, non solum ut poriones daret, aut malagmata imponeret, sed etiam ut suavissimi eloquii medicina fatiscentes reficeret, prout cujusque necessitas postularet. Ad prandii horam omnibus apponebat cibos, quos ille convenienti verborum sale aspergebat. Post meridiem vero, cum ægrotantes meridiationi jam indulsissent, Marianæ Coronæ preces alta voce inchoabat, ut ii omnes, quibus per morbum liceret, præcinenti responderent. Deinde legebat aliqua, quibus pos-

sent

sent ægroti ad molestias morbi æquanimiter, et cum magno animi fructu perferendas excitari. Tum iteratis visitationibus unicuique vel potum, vel alia, quæ opus essent, porrigebat. Sub vesperum cum Adjutore illo, quem morbo immunem fuisse dixi, sternebat lectulos, matulas, et lasana repurgabat. Ambo denique inter se, quæ domi, et foris obeunda erant, ita partiti sunt munia, ut neutri cessandum esset, si tot velent infirmis (quod prorsus effecerunt) debitam curam impendere. Ad hæc autem, præter actuosam diligentiam, magna item patientia, solidaque caritate opus erat: quarum virtutum etsi adhuc Pereira multa præbuerat documenta, in diturna tamen suorum ægrotatione multo illustrius dedit specimen. Indeque non tantum apud subditos, sed reliquos etiam provinciæ Socios, qui testes indefessæ illius solertiæ fuerunt, præcipuam inivit gratiam, et venerationem.

Vix dum ex paludosa illa sede ad salubriorem locum suos eduxerat, cum ipse quoque morbi ejus sensit indicia, cujus vi, dum ministraret ægrotis, nunquam illius tentata est valetudo. Et quanquam eum non perinde, ac cæteros dixerat (Dei fortasse munere ob impensum ægrotantibus servitium) tamen ex dysenteria, in quam morbus desiit, tantam intra paucos dies et virium, et coloris habuit imminutionem, ut cadaveri similis videretur. Et qui ad aliorum sublevanda incommoda fuerat attentissimus, suorum modo negligens, neque lecto decumbere, nec medicæ peritos artis, aut ullum adhibere voluit medicamentum. Nimirum male se habere vix agnoscebat, nisi ut, abjecta propriæ valetudinis cura, confidentius in Dei manus se se projiceret. Per eos dies serio cum animo suo recogitavit de magistratu deponendo, ut impensius sibi consulere, seque ad immortalitatis aditum præpararet. Sed iis contraria sentientibus, quos adhibuit ipse in consilium, ab sua cogitatione recessit, caputque oneri supposituit gravissimo, quale semper quidem fuerat, sed in ea maxime tempestate, præfectura Sociorum.

Itaque a Corsica in eam Æmiliæ partem transvectus, quam parvus Rhenus interfluit, domum prope Bononiam jussus est regere, in quam sex et nonaginta Socii convenerunt. Ut copiosam adeo familiam bene collocaret in domo, quæ satis ampla

pla erat, sed in deserto loco sita, et a qua illa, quæ ad vitæ usum pertinent, omnia cum pulvisculo ablata fuerant, incredibilem adhibere debuit diligentiam. Statim aras sex fecit erigere, ad quas facile omnes operari, et assistere divinis quotidie possent. Lectulos etiam cum fulcris sine mora constituit, abacos, et sedilia quæsit, ac reliquam domui, quæ denuo instruitur, necessariam suppellectilem. Nulli demum aut sumptui pepercit, aut labori, ut ea nemini deessent, quæ ad vitam decenter sustentandam exiguntur. Unde tectum illud vacuum novam intra paucos dies formam exhibuit, et illius inquilini, quamvis incolendæ solitudini minime assueti, urbanam commoditatem non requisierunt. Id autem indefessæ Rectoris vigilantix, atque operosæ caritati debebatur, qui noctes, et dies de optima suæ domus administratione, deque singulorum commodis cogitabat, neque ullam in administris ferre poterat demandati muneris negligentiam. In statuenda vero, atque exigenda religiosa disciplina, consimilem conatum, et constantiam exhibuit. Certas, ut Calvii fecerat, pro quotidianis animi exercitationibus horas constituit, in quibus omnes ad precandum, et meditandum tintinnabuli sonitu evocarentur. Et quoniam modo ad pacatissimam sedem devenerant, diem unum per singulos menses designavit, in quo possent omnes orationi, lectionique sacræ, aliisque divinis rebus diutius insistere. Neminem quidem ad id cogi voluit, quod sciebat in Societatis legibus, aut inductis in universum moribus non contineri. Sed, cum scirent omnes, gratum se Rectori suo effecturos, illumque ad omnia religionis opera præeuntem animadverterent, laudabilem illum, præcipuèque utilitatis recessum pauci admodum non usurpabant.

Ad Sociorum in eas partes adventum maligni quidam rumores fuerant sparsi, qui pessimam de illis opinionem in multorum animis ingeneraverant. Et quanquam cito præconceptas illas opiniones deposuerunt, cum ipsimet curiosius observassent, Hispanos Jesuitas, utut exilii pœna multatos, cum iis, quos jam noverant, adeo moribus convenire, ut ovum ovo similis esse non posset; Pereira tamen, cui cordi semper fuerat bonum Societatis nomen, majorem in præsentia curam adhibendam sibi esse duxit, ut vel levissimas offensionum

causas amoliretur. Quod si aliqui pro humana conditione nonnunquam aberrassent, nullo personarum discrimine continebatur, quominus eos vel privatim, vel publice corripere, prout caritatis, et justitiæ leges exigerent. Neque aliquem propterea exacerbatum fuisse novimus, cum bene omnes nosset paternum Rectoris animum, qui correptionis medicinam eatenus adhiberet, ut errores emendarentur, non ut errantes affligeret, vel contristaret. Proinde nullum ibi querelæ verbum, nulla adversus Præsidentem obloquia; sed omnes potius et inter se, et cum Bononiam, quæ prope aberat, adventabant, apud alios etiam Pereiræ prudentiam, et præclaras ad regendum dotes extollebant. Quod eo admirandum est magis, quod in illam domum tam multi et ætate disparēs, et ingenio dissimiles convenissent. In eadem domo Pereira quamplurimos hospitio exceptit, qui ad revisendos amicos, et notos ex variis Italiæ provinciis advenerunt. Ac licet eorum frequentia nonnihil domesticis afferret incommodi, non ideo quemquam exclusit, sed omnes læta fronte suscepit, ac pro eo quantum præsentēs facultates sinerent, liberaliter habuit: iidemque inde abeuntes, insignem hominis caritatem, atque ad omnes comitatis numeros obeundos curam attentissimam prædicabant. Cuidam vero, qui majorem in peregrinos impensam agi objiciebat, quam ut domestici census commode sustinerent, constanti ore respondit: *Quidquid alendis hospitibus insumitur, si ex æquo in singulos nostrum divideris, unicuique tanti stare comperies.* (Hic ille summam minutissimam subducebat.) *Ob tantillum igitur sumptum hospitalitatis jura erga fratres nostros non observabimus? Ego certe tam il-liberalis esse non possum.*

Post annum Bononiam appellatus, ibi cum alias domos, tum illam administravit, quæ sub S. Aloysii nomine ab Theologiæ auditoribus incolebatur. Sed iis præclaro vitæ exemplo, atque optimis consiliis cum paucos præfuisset menses, allatum in eam urbem est decretum, quo Romanus Pontifex Societatem dissolvebat. Altissima Dei judicia reveritus est quam humiliter, simulque erga vices ejus gerentem in terris demississimam professus est obedientiam. Quamvis enim acerba sibi esset ea rerum conditio, nullum tamen questum, nullam re-

pre-

prehensionis vocem ab ipsius ore quisquam audivit. Itaque dolenter quidem, sed prompte vestem illam deposuit, quam tot annos, tot inter labores, tantoque cum amore gestaverat. Novo indutus habitu, paulo post novam quoque domum cœpit incolere, in quam cum sociis aliquot immigravit, prout Præfecti regii permiserant, qui Bononiæ pro negotiis Hispanorum exulum constituti erant. Ibi pacificos ducebat dies, ab omni mundanarum rerum tractatione disjunctus, nullumque vitæ superioris, in perpetua gubernatione transactæ, saporem retinens apud contubernales. Inter cubiculum, et templum diurnas horas ita dispertiebatur, ut præter modica spatia, quæ deambulationi dabat, et ægrotorum, vel amici alicujus visitationi, reliquum tempus lectioni, ac meditationi divinorum impenderet, et Eucharistiæ frequentandis adorationibus. Hunc tenorem vitæ plusculum ultra annum secutus fuerat, cum alios denuo lares inquirere, atque alias contubernii leges subire coactus est. Exeunte Junio 1775, Hispanus in Urbe Minister severa comminatione præcepit, ut Hispani omnes, qui de Societate fuerant, intra dies quindecim ita disjungerentur hospitio, ut terni summum sub eodem tecto habitarent, neque illi promiscue viverent, qui professionem quarti voti, et qui simplicia tantum vota emisissent. Res erat plena difficultatis, et incommodi. Nam Bononiæ conductitiæ domus postridie Nonas Majas incoli occipiunt, post quem diem difficile est vacantem invenire domum. Pro iis vero, quas Hispani eo die occupaverant, annuæ locationis pretium ad assem exsolverant, illudque repetere non licebat. In earum non paucas seni, vel octoni, aut etiam deni convenerant; tum ut majoribus parcerent sumptibus, cum idem focus, et culinaria supellex, aliaque domestica instrumenta peræque pluribus sufficient, ac paucis; tum etiam, ut senibus, et invalidis juniores, et integri deservirent. Nunc autem in conducendis, instruendisque novis ædibus et majores faciendæ erant impensæ, quam ferrent exulum modicæ facultates, et nonnulli ex imbecillioribus convenienti eorum necessitatibus auxilio destituendi, et quidam germani fratres, qui diversos in Societate gradus obtinuerant, contubernio dissociandi. Hæc tamen, aliaque multa devoranda fuerunt incommoda, quoniam iis, qui



ad præstitutam diem mandata non perfecissent, nec annualis solvenda erat pensio, et aliud quiddam gravius denunciabatur. Hispani in urbe Bononia nongenti per eos dies numerabantur, quorum aliqui opportuno tempore domicilia sibi quæsierant, quæ bini incolerent, vel etiam terni. Cæteris intra præfiniti temporis angustias difficile erat habitaculum invenire, quod suam cujusque deceret conditionem. Non pauci propterea ad nimium vulgares domos confugerunt, in quibus et fraudes, et furta perpessi sunt, atque aliqui manifestum vitæ discrimen incurrerunt, quod non nisi Dei singulari providentia declinarunt. Quæ omnia non ideo a me dici quisquam existimet, ut mortalium incusem aliquem, sed ut ostendam, quanto illos animi robore præditos esse oportuerit, qui diuturni exilii malis afflicti, et ab recenti Societatis abolitione dolentes, novum hunc, ac sane quam difficilem laborem patienter nihilominus sustinuerunt.

Talis inter alios fuit Emmanuel Pereira, qui nulla inde perturbatione commotus, habitationem cum alio Sacerdote conduxit, in qua suam vivendi tenuit religiosæ simillimam consuetudinem. Deteriorem sentiebat in dies sui corporis habitudinem, et qui nullum non diem supremum sibi esse posse crediderat, illum jam proxime instare, firmiter modo in animum induxit. Sic ille testatus est fratri suo, a quo per id tempus aliquam pecuniæ summam ab Hispania receperat, eique in hæc verba respondit: *Quos mihi numos mittis, curando meo funeri inservient, quod equidem, prout morbosus sum, et infractus, valde cominus aspicio.* Sed quanto debilius corpore, tanto erat animo ferventior in exequendis, augendisque religiosis officiis, et replicandis beatæ vitæ desideriis, quæ illi non minus antiqua fuerant, quam incensa. Dum his insistit enixius, morbus eum incessit ultimus, qui ex hydrope, et aurigine coalescere videbatur: sed cuiusmodi is fuerit, magnis illum doloribus per tres amplius menses defatigavit, quos mirabili patientia sustinuit, ac frequenti ad Deum recursu delinivit. Quamvis acutis urgeretur dolorum aculeis, preces tamen Sacerdotales, aliasque privatas exsolvere non prætermisit, donec ab iis expresso Medici mandato fuit prohibitus. Tunc ille, pro ea, qua semper fuerat, animi demissione, sese relicto

culo jumento comparabat, quod nulli jam usui, nullis est laboribus opportunum. Cum ei deinde irreparabile vitæ periculum Medici denuntiarunt, nuntium vulgo tristissimum summa animi pace, atque immota serenitate vultus excepit: nam qui mortem frequenti cogitatione prospexerat, illamque necessarium ad beatitatem aditum considerabat; dum adesse cognovit, nihil in ea novum, nihil item horridum aspiciebat. Arcessiri Sacerdotem jussit, cui solitus erat arcana sua omnia manifestare, et ad se ingredienti dixit, ne suam doleret vicem, neque ullum inde mœrorem conciperet; quoniam ipse ad ineundam æternitatis viam paratus jam erat, et accinctus. Pari atque alias tranquillitate peccatorum confessionem instituit, rogatusque ane aliquid in extremo illo tempore illius animum pungeret, ita respondit: *Si de culpis loqueris, nihil per Dei misericordiam. Illud me tantum angit, quod Societatis veste spoliatus morior. Quanquam id etiam me valde recreat, quod in caelesti patria omnes splendidiorem induiti vestem incedimus.* Deinde sanctissimum Christi Corpus accepit magna religione, atque accensæ caritatis affectibus, quos identidem per reliquum vitæ spatium ingeminavit. Frequenter etiam, et suavissime Deiparam alloquebatur, cujus clientelæ, imo etiam perpetuæ servituti sese dederat ab ipso religiosæ vitæ tirocinio Literas servitutis hujus testes qui post Emmanuelis obitum inspexerunt, perfectissimam in omne vitæ tempus Mariæ Virgini devotionem continere, flagrantemque adversus eam amoris ignem spirare profitentur. Et qui nunquam, dum viveret, clementissimæ servire Dominæ non studuerat, jam moriturus, majori cum fiducia potentissimum illius patrociniū implorabat. Sic ille supremam expectabat horam, quæ celerius, quam pro Medici opinione adventavit: in eaque pacatissime animam Deo tradidit IV Idus Decembris anni 1775, ætatis suæ sexagesimo quinto. Corpus ejus magno omnium luctu conditum est in æde S. Mariæ de Caritate nuncupatæ, quam tenebant eo tempore Patres tertii Ordinis S. Francisci.

Vir fuit Emmanuel et Deo carus, et hominibus acceptissimus. Hoc magnam partem naturæ debuit, quæ illi mitis erat, ac jucunda, ingenuæque liberalis. Illud supernæ tribu-



endum est gratiæ, cujus insinuationibus fideliter obsecutus, eam perfectionis attigit lineam, quæ suam decebat conditionem. Intra religiosæ paupertatis angustias ita delectabiliter habitabat, ut cum posset ob initam cum multis gratiam, et ob collata in plurimos beneficia, iis abundare rebus, quæ ad commodiorem cultum pertinere existimantur; vel omnia ille rejiceret, vel si quid urbanitate constrictus acciperet, statim aliis perquam libenter dilargiretur. Dum Lucronii magna totius civitatis acclamatione Theologiam discipulis prælegebat, cæterisque civibus et orationibus sacris, et audiendis confessionibus, et omni officiorum genere proderat, non pauci tam effusam hominis beneficentiam rependere desiderabant: quibus ipse alienum ab humana remuneratione animum sæpenumero objecit. Idem ille Pereiræ auditor, quem alibi ad ostendendam hujus modestiam inter literatorum plausus testem appellavimus, de hoc ejus fluxarum rerum contemptu sic loquitur: *Eandem moderati animi temperantiam aliis etiam in rebus exhibebat. Intra illius cubiculum, præter lectum, et mensam cum libris, ac sedilia quatuor, vix quidquam vidisses ullius pretii. Vestibus fere semper detritis indutus, quanti voluntariam pauperiem faceret, palam significabat.* Palentia jamjam agendus in exilium, cum cæteri aliqua sibi desumerent, quæ singulis extrahenda permittebantur, ille neque hippoperam, neque arculam cogitabat: prorsusque omnium indigens excessisset, nisi alii quædam in ejus arcam immitti curassent, quæ deinde cum reliquis exportaretur. Sanctanderensis quidam civis, dum ibi Socii detinebantur, Emmanuelem convenit, eique literas Lucronio acceptas ostendit, quibus jubebatur eidem tantum aris subministrare, quantum vel opus haberet, vel etiam vellet. Hanc adeo beneficam voluntatem sincera grati animi demonstratione rependit: de oblatiis vero pecuniis, ut ab eo, qui tum ibi aderat, audivi, vel nihil penitus, vel parum admodum sumpsit, ne beneficii largitatem fastidiose respuisse videretur. Ut candori consulere castimoniam, præter constantem in victu, cæteroque corporis cultu moderationem, duriora etiam adhibebat, quibus sensum affligeret, et animum a lubricis cupiditatibus contineret. Oculos, ac linguam non timidioris animi vitio, sed pudoris studio ab omni licentia cohibe-

hibebat, et longa cum mulieribus colloquia, quantum caritas, aut necessitas sineret, evitabat. Cum Bononiæ, ab antiquis divulsus sociis, privatam domum cum altero Sacerdote conduxit, ut omne feminarum effugeret ministerium, cum laico sibi olim subdito pactus est, ut apparatus sibi epulas subministraret, aliaque præstaret officia, quibus ipse in devexa jam ætate fungi non poterat. Quod ad obediendi perfectionem spectat, quanquam ille perpetuis fere magistratuum honoribus usus, minorem obsequendi aliis occasionem habuit; tamen, præter exhibitam eorum decretis, quibus ipse suberat, reverentem submissionem, assidua domi suæ præbebat omnibus obtemperandi documenta. Etenim, cum ea religioso viro præcipua sit laus obedientiæ, si quotidiana disciplinæ opera et prompte suscipiat, et exequatur attente, et exacte perficiat; quippe id, teste Bernardo, martyrii genus est, *illo nimirum, quo membra caduntur ferro, horrore quidem mitius, sed diuturnitate molestius*; Pereira per dies, per noctes singulas inchoandis religiosis officiis alacritatem, in obeundis accuratorem, in absolvendis constantiam adhibuit. Et quod efficiebat ipse, ab aliis etiam teneri nitebatur, eisque proinde suum illud principium inculcabat: *Si quæ nostris præscribuntur legibus, modo is, modo alius agere prætermittat, aut vero peragat oscitanter; quæ prius apta erant, facile dissolventur, sensimque bonus religiosæ domus ordo perturbabitur.*

Illud denique de Pereira dixerim, quod ii, qui cum eo diu fuerunt, unanimi sensu confirmant. Virum scilicet fuisse præclara indole, suavissima cum cæteris consuetudine, mitissimis, et integerrimis moribus, inter frequentes Doctorum acclamationes modestia singulari, in mediis obtrektorum injuriis imperturbata patientia, ad exequenda demandata sibi munera semper strenuum, erga omnes beneficum, ac liberalem, ingenio, doctrinaque præstantem, sed studio pietatis multo prætantiozem. Atque his omnibus ornamentis, quibus jam tum decoratus incedebat, cum privatus esset, ad gerendos magistratus admotus, ea superaddidit, quæ ducendæ religiosæ familiæ requiruntur. Tunc enim curam exercuit in tuenda disciplina pervigilem, eximiamque prudentiam ostendit tum in promovendis ad perfectionem Sociis, eorumque lapsibus vel præ-

præcavendis, vel reparandis, tum etiam in Collegiorum reditibus diligenter administrandis. Et quoniam de cæteris ejus prudentiæ partibus non pauca jam dedimus exempla, juvat hic unum proferre, quod illius in œconomicis providentiam ostendet. Sacerdos, qui sub Pereiræ ductu rem domesticam procurabat, quiddam magnis conatibus moliebatur, quod e re omnium fore credebat, qui magno numero in eadem manebant domo. Excogitationem suam semel et iterum cum Pereiræ proposuisset, totiesque ab eodem repulsam passus, non propterea destitit ab incepto. Tertio Rectorem aggreditur rationum pondere, ut minime dubitaret ipse (eratque proculdubio emunctæ naris homo) quin illum ad suam adducturus esset sententiam. Tum Rector, quod antea precise negaverat, paulo fusius exposuit: totque in eo incommoda latere demonstravit, ut Procurator suum statim consilium reprobaverit, simulque Rectoris prudentiam suspexerit, qui rerum adjuncta omnia tam scite attigisset, et eorum consecutiones adeo prævidisset acute. Sic ille in omnes officii sui partes invigilabat, et qui tantam ad humana negotia solertiam conferebat, in divinis utique nihilo inferiorem adhibuit. Utrumque vero ex orationis, et meditationis depromebat studio: quid enim nisi lumen acciperet, qui ad Patrem luminum frequenter, ac reverenter accedebat? Inde circumspectus erat in deliberando, in judicando prudens, et perspicax, in decernendo vero certus, atque ab eo, quod maxime deceret, plerumque non aberrans. In longa Sociorum gubernatione, quanquam ab indagandis curiose aliorum factis abstineret, omnia pro suæ mentis sagacitate perspiciebat, multa prudenter dissimulabat, quæcunque opus essent, benigne corripiebat. Ob eas, cæterasque præclaras ipsius dotes omnibus, atque iis præsertim, qui sub ejus potestate vixerunt, carissimus semper fuit, dignusque habitus, ut illius nomen posteritati commendetur.

## JOSEPHUS JOACHIMUS MENDIZABAL.



**S**ebastianopolis Vardulorum urbs notissima, et opulenta, patria fuit Mendizabali, qui susceptus in lucem est decimo septimo Kalendas Novembres, anno millesimo septingentesimo decimo tertio. Parentes ejus nobiles, et copiosi statim de christiana, et liberali filii educatione cogitarunt. Quod ut cumulatus assequerentur, postquam domi prima religionis, ac literarum rudimenta diligenter edoctus fuerat; illum Burdigalam miserunt in Seminarium, quod ea tempestate sub disciplina Patrum Societatis Jesu magna florebat laude. Ibi literis humanioribus, aliisque artibus, quæ ingenuum puerum decent, accuratissime fuit excultus, atque inter alia Gallice optime loqui didicit. Inde domum patriam regressus, de vitæ statu eligendo serio deliberare cœpit. Divitiarum, atque honorum illecebræ, quibus inter suos facile poterat abundare, nihil eum remoraturæ sunt, quominus mentem ad religiosæ vitæ inopiam, et abjectionem converteret. Solitudinis, silentii, ac pietatis amor, quibus maxime virtutibus in ferventi etiam ætate delectabatur, in eam primum sententiam impulit, ut in Cœnobio Miraflorensi Carthusianis Monachis adscribi peteret, quorum austerissimam vitæ rationem per dies aliquot fuerat expertus: remque omnino ad exitum perduxisset, nisi medicorum intercessisset judicium, qui candidati valetudinem tanto oneri ferendo imparem fore censuerunt. Propterea cogitationes suas alio traducere coactus, decrevit deinde Societati Jesu nomen dare. Sed cum id Parentibus ejus esset ingratum, et ipse neque a proposito discedere, neque illud sine eorundem venia exequi vellet, aut posset; non facile dictu est, quanta inde molestiarum procella sit exorta. Hanc ille, ut erat constanti æque, ac mitissimo animo juvenis, patientissime toleravit. Cum tamen apud suos nihil precibus, et obsecrationibus proficere videret, id consilii cœpit, quo tandem eorum

rum animos expugnavit. Quodam die, vel ut propinquorum oppugnationes declinaret, vel ut suam in arrepto proposito constantiam iisdem ostenderet, clanculum e domo sese propiciens, in proximum Lojolæum Collegium aufugit, indeque Patrem certiozem effecit, non ante ad paterna limina rediturum, quam ejus beneplacitum ad Societatis vestem induendam obtinuisset. Hac animi firmitate perspecta, Pater ægre quidem filio, quem unice diligeret, et a quo familiæ decus præclare sustinendum speraret, sed tamen libere permisit efficere, quod tanta contentione deposcebat. Itaque Josephus cum ingenti animi exultatione Socii adjunctus est postridie Kal. Majas anni miliesimi septingentesimi trigesimi tertii.

In tirocinio, in studiorum longo decursu, in docendi munere, et aliis, quæ dum in Societate vixit, exercuit; præter exactam legum observantiam, quæ constantem perfecti viri opinionem illi conciliavit; singularis in eo comitas, et affabilitas cum grata quadam humilitate conjuncta semper eluxit, qua domesticorum pariter, et externorum animos, ubi ubi degeret, sibi devinciebat. Neque suavem hanc agendi cum aliis rationem acceperat a natura; cum potius indoles ejus utpote fervida, et ignea, proclivis esset ad iracundiam. Erat utique fructus sollicitæ illius contentionis, quam ab ipso initæ Societatis exordio in compescendis pravis animi motibus, et sub rationis imperio continendis adhibuit. Nemo propterea aut abreptum ab ira, aut vultu perturbatum, aut incompositis utentem verbis Josephum unquam vidit. Quin imo semper tranquillus, et placidus, et in magnis etiam morborum angustiis, quibus diu vexatus est, immutabilis permanebat.

Ad generosum hoc, et constans repugnandi sibi studium vires hauriebat ex familiari cum Deo consuetudine, et frequenti rerum æternarum meditatione, cui præter consueta, et præscripta Sociis omnibus spatia temporis, alia etiam ipse non pauca supererogabat. Ut enim diutius agere cum Deo posset, ab hominum colloquiis, quantum poterat, abstinebat: et, nisi majorum imperium, aut aliorum caritas eum alio evocaret, intra sui cubiculi solitudinem constanter, ac libenter delitescibat. In iis etiam diebus, qui ad reficiendas et corporis,

ris, et animi vires, aut domi, aut ruri honestæ concedebantur recreationi; ipse, posthabitis ludis, aliud sibi capiebat oblectamenti genus. Nam in conclavi manens, vel sub arbore sedens, lectione librorum, quos secum domo asportaverat, recreabatur. Atque inter alia frequenter pervolutabat aurea Joannis Petri Pinamontii opuscula, cujus fundatissimam doctrinam, præclaraque monita et sibi desumebat ipse, et aliis pro temporis, ac loci opportunitate perquam utiliter insinuabat. Cum autem ad Italiam devenisset, solitudini, quam semper adamavit, multo magis indulisit. In Castro S. Petri, et in Foro Cornelii, quibus in locis maximam exilii sui partem exegit, vix unquam domo, nisi cum templum adiret, egrediebatur. Nec tamen illius mores ob assiduum solitudinis incolatum agreste quidquam, aut subrusticum redolebant: nam qui ad eum amicitiae, vel quovis alio nomine adventabant, omnes ridente vultu excipiebat, et suavissimis verbis alloquebatur, ejusque familiarem sermonem jucunda festivitas, et innocui, planeque urbani sales condiebant.

Ex frequenti piorum librorum lectione, et attenta cœlestium rerum meditatione reliquis ejus virtutibus vigor accedebat, et incrementum. Animo erat non solum ab omni elatione, mundanoque fastu prorsus alieno, sed etiam honoris sui negligenti, et proprii contemptus studioso. Ea de causa solitus erat in privatis colloquiis, quæ sibi despectui essent, intermiscere. Quam audaculus in pueritia fuisset, exaggerabat: multisque contendebat evincere, pessimum se inter fratres, atque inter condiscipulos extitisse. Nunquam e converso quidquam illi excidit, quod ad sui laudem, vel ad illustrem suorum stirpem attineret. Neque verbis tantum, sed rebus etiam significabat, quam sui, et suorum esset oblitus, potiores aliis partes concedendo, et in quotidiana congressione ita cum cæteris agens, tanquam esset omnium minimus. Cum aliquando iter ageret in Cantabriam, ad oppidum venit, in quo vir quidam nobilis morabatur, cui brevi nuptura erat Josephi soror. Vix ergo publicum subierat diversorium, a quo prope aberat illius viri domus, cum itineris socium enixe deprecatus est, ne se, dum ibi manerent, proprio cognomine compellaret: id maxime veritus, ne si adven-



tus ejus illi viro innotesceret, in domum suam divertere, et lautius, atque honorificentius haberi cogeretur. Hunc honorum, et commoditatum contemptum cum magno religiosæ paupertatis amore conjunxit: quem ex modico illius victu, vili vestitu, et reliqua vulgari suppellectile quilibet agnovisset. Cum magnis in Italia rerum temporalium angustiis premeretur post imperatam illam separationem, quam alibi diximus, multis eum amici urgebant precibus, ut ad propinquos in Hispaniam scriberet, qui ei large subvenire poterant: et fecissent, credo, libenter; siquidem Josephus primo geniti jus, quod Hispani Majoratum vocant, in eorundem commodum abdiderat. At ille nec iteratis amicorum suasionibus, nec ingenti facultatum penuria adduci unquam potuit, ut a consanguineis aliquid exigeret. Nam sua, quamvis dura, sorte contentus, et Apostolici moniti memor, dum victum, et vestitum facile parabilem haberet, commodiora non curabat, superflua vero respuebat: unde in illius obitu nihil, quod alicujus pretii esset, repertum est domi. Quantum vero a propriis ipse commodis, et honoribus abhorrebat, tantumdem aliorum famæ, et utilitati sollicitus erat ut inserviret. Qui longo tempore illius socii fuerunt, et assidui contubernales, unanimi voce asserunt, ab omni susurrationis, et obtrectationis labe non solum longissime ipsum abfuisse, sed ne in aliis quidem, quantum se penes erat, tolerasse. Propterea si quis alienas laudes etiam per jocum coram eo detereret, composito ad severitatem vultu, quam illud sibi displiceret, continuo significabat. Diligenter etiam cavebat, ne quid in communi vitæ consortio committeret, quo cæteris offensionem afferret, aut molestiam. Eo ductus caritatis studio, cum propter suæ valetudinis incommoda, aut serius cubitum ire, aut intempesta nocte surgere frequentissime cogeretur, calcis ex cannabe contextis intra cubiculum utebatur, ne somnum proxime decumbentibus interturbaret.

Ex occasione autem ejus, quam ajebam, infirmæ valetudinis, præclarum ac diuturnum patientiæ, atque aliarum simul virtutum edidit exemplum. Annis jam aliquot antequam ex Hispania decederet, ac decennio fere integro, quo in Italia exulavit, asthmatico morbo miserandum in modum con-

flictatus est, prorsus ut ab extremo vitæ periculo sæpe. minimum abesse videretur. Nocturnis præsertim horis, cum decumbendi signum insonuisset, Josephus in cubiculum, non tam ad carpendum somnum, quam ad tolerandas anhelii pectoris angustias discedebat. Siquando maturius lectum peteret, intra brevem temporis moram surgere cogebatur ob nimiam ducendi spiritus difficultatem. Frequentius proinde ad multam noctem excubabat, donec creber anhelitus, et ortus inde angor tantisper deferbuisset. Id autem ut obtineret, aut ex Medicorum consilio, aut experientia edoctus, tabaci fumo, et iteratis aquæ haustibus utebatur. Sed inde novus illi labor, nova meriti seges exsurgebat. Nam cum a divini Sacrificii oblatione nullo quamvis duro pacto vellet impediri, in horologium identidem intendebat, ne fumo hauriendo, vel aqua, mediam noctem excederet. Non raro, cum hæc, atque alia adhibita remedia nullum ei levamen afferrent, tam gravi pectoris compressione, tanta respirandi difficultate angebatur, ut in magnum vitæ discrimen adduceretur. In iis autem angustis constitutus, singulare christianæ pietatis specimen dabat. Quippe, cum ingravescente malo, in suspicionem imminentis mortis non temere deveniret, arreptam Christi Domini e cruce pendentis imaginem religiosissime adorabat, deosculabatur: et inter ferventes earum virtutum actus, quæ proxime decessuris maxime conveniunt, animam Redemptori suo quam humillime poterat, ac fidentissime commendabat.

Hoc perfunctus certamine, quod nunc ad plures, nunc ad pauciores horas, sæpius tamen ultra mediam noctem protendebatur; cum jam vis anhelationis remitteret, in lectulo decumbebat, ut fessum defatigatione corpus reficeret somno. Hic autem non longus erat, nec continens, sed frequentibus constricti pectoris angoribus, et stomachi doloribus intercisus. Et cum tot, tantisque premeretur incommodis, hilari semper, et placido vultu, rogantibus quomodo valeret, ita respondebat, ut ex ejus verbis omnes agnoscerent, quam æquo animo, quantaque suæ cum divina voluntate conformatione nocturnos illos labores toleraret, quos ille semper cum addito minusculos appellabat. Adventante jam die, atque absoluto precandi, meditandique solito penso, ad templum, ut rem

divinam faceret, accedebat: sed ob nocturnum conflictum, gressu ita lento, curvatoque corpore, ut omnibus eum obvium habentibus commiserationi pariter esset, et exemplo. Nec semel Sacrarium ingresso, opus illi erat ad scamnum paulisper consistere, donec spiritum resumeret interclusum. Postquam vero sacras vestes suspiriosus adhuc, et gemebundus induisset, ad aram consistens, et Sacrificium exorsus, nulum jam gemitum, nullum edebat lamenti signum: sed erecto corpore, et animo, debitaque gravitate servata, divinum ita peragebat mysterium, ut alius ab eo, qui paulo ante fuerat, videretur.

Cui mors fere quotidie ob oculos observabatur, consequens erat, ut constanti, atque imperterrito animo eam jam advenientem aspexerit. Imperturbabilem illam tranquillitatem, et pacem, quam in toto vitæ decursu tenuit, in postrema etiam infirmitate servavit. Ab omni penitus querimonia, ab omni que lamentatione sese continuit, quamquam magnis torqueretur doloribus; cum ei præsertim intestina, rupto peritonæo, diffluxissent: quod ille Medicis aperire non voluit, ut pudori scilicet, quem semper studiosissime coluerat, in postremo vitæ actu potissimum inserviret. Antequam ulli mens ea fuisset injecta, ipse sponte sua petiit enixe, ut mature Sacramentis Ecclesiæ muniretur. Quibus susceptis, ita placide, ac sine ulla corporis, aut animi agitatione expiravit, ut dormientis potius, quam morientis speciem referre visus sit. Facies ejus, quæ, dum ægrotaret, pallida fuerat, et macilenta, post obitum serena, et placida apparuit, multique ad demortui cadaver aspiciendum accurrerunt. Obiit in Foro Cornelii anno millesimo septingentesimo septuagesimo septimo, cum inchoasset vitæ suæ sexagesimum quartum, in ipso purificatæ Virginis Festo, quam semper eximia religione prosecutus erat. Corpus ejus ad templum, quod ibidem Societati fuerat, elatum est, et Chilenses, qui in eadem exulabant urbe, illius funus cohonestarunt.

## IGNATIUS OSORIUS.



**E**x nobilissima Osoriorum, et Guzmanorum stirpe procreatus, primam obtinuit lucem Grajali, honesto Legionensis regni loco, die decima quinta Julii, anno salutis nostræ millesimo septingentesimo decimo tertio. Parentes ejus et Grajalis Comites, et Alcantii, vel, ut appellatione vulgi utar, Alcannizarum Marchiones fuerunt: atque hujus ratione tituli ad amplissimam Hispaniæ Magnatum classem eveci sunt. Ignatii Pater, Emmanuel Perezus de Osorio, postquam in Belgio secutus erat strenue bellica signa, bonam vitæ suæ partem Vallisoleti transegit, tum juvandis consilio, et exemplo civibus, tum sublevandis auxilio miseris, tum etiam adolescentibus a multis aberrandi periculis retrahendis. Cum enim versatissimus esset in equitandi arte ( de qua etiam librum edidit, qui magnis intelligentium laudibus fuit exceptus ) nobilem Pintianæ urbis juventutem ad equorum palæstram invitabat, in qua ipse non Equisonem modo, sed Magistrum etiam morum agebat. Etenim inter præcepta domandi, ac regendi equos, quædam item admiscebat, ut imperitare sibi quisque disceret, quæ ab omnibus inviolate volebat observari. Mater vero Josepha Guzmanæ, Marchionum Montis Alegrii, et Comitum Onnatensium filia, iis omnibus fulgebat dotibus, quæ in femina suæ conditionis expeti poterant. Conjugis, et filiorum amantissima; sed ita horum diligens, ut severitatem nihilominus adhiberet in ipsorum erroribus corrigendis: erga Deum, ac divina summe studiosa: in administranda domo prudenter sollicita: clemens adversus subjectos, et in omnes calamitosos effuse benigna: erga Societatem autem adeo propensa, ut vestem, quæ vulgaris, ac plerumque pulla erat, sacro nominis JESU stemmate distinctam supra pectus gestaret. Itaque post vitam cum præcipua laude pietatis exactam, in ejusdem Societatis templo sepeliri voluit. Comes, amissa conjuge, sicut ad-

adhuc Equitibus singulari morum præluxerat exemplo, ita etiam omnibus admirandum præbuisset modo christianæ humilitatis documentum, si per alios ei licuisset. Multis enim instat, ut in Societatem, ad serviendum in humili Coadjutorum gradu, reciperetur. Quod cum Superiores in præsentium rerum statu non expedire censuissent, ipse minime conquevit, donec a supremo Societatis Moderatore facultatem obtinuit, ut in hora sui obitus albo Sociorum adscriberetur. Cum illa jam imminebat, vestem induitur Societatis, cum eadem terræ mandatur, eique solitis in Societate piaculis subventum est.

Ignatius sub talium disciplina Parentum educatus, non ad militarem gloriam, non ad vitam aulicam, quam tres alii majores natu fratres consecrabantur, sed ad humilem religiosæ vitæ conditionem vota sua omnia convertit. Vix dum pubertatem attigerat, cum sacræ militiæ sub vexillo S. Ignatii nomen suum dedit Idibus Octobris anni 1727, bene volentibus, imo etiam gaudentibus Genitoribus, licet eis carissimus esset in filiis, ac de illo Pater suus affirmaret, neminem inter cæteros majus sibi decus, et ornamentum allaturum. Quæ quidem prudentissimi senis verba is tanquam futuri augurium exceperit, qui familiæ cujuslibet splendorem non tam ex virtute militari, quam ex aliis quibusque rebus moderate, mansuete, justè, ac sapienter gestis dimetiatur, in quibus Ignatium excelluisse, deinceps ostendemus. Quo die filium Societati donavit Pater, in eo maxime amorem suum erga illam testificari se dixit, quod pignus eidem traderet, quo nullum carius, ac pretiosius habebat domi. Filius autem ad amplectendam modo Societatem animi vigorem ætati superiorem exhibuit, quo propositas difficultates, quibus deterreri posset, facile superavit. Cuidam objicienti sibi inter alia, paternæ domus commoda, præsertimque mensæ lautitias in Societate desideraturum, ita respondit: *Si modo panem, quantum satis est, habeam, cætera cujusquemodi fuerint, non admodum curo.* Cum tirocinium ea præparatione sit adorsus, minus utique mirandum erit, si statim ad amussim religiosarum legum totum se se composuit. Cæteri eum Novitii cum modestum vultu, silentii tenacem, in pietatis exercitatione compositum, et ad

viliora quæque ministeria promptum animadverterent, neque ignorarent quæ quibus commutasset, non parum ex Ignatii exemplo ad paria virtutum opera permovebantur. Superiores autem, quibus morigerus erat in omnibus, præclaram de illo spem jam tum animo concipiebant, quam suo deinde tempore cumulate viderunt expletam. Altero suæ probationis anno literis imbutus est amœnioribus, ut moris erat in tirocinio Villagarsiensis, quod olim in Romano etiam fiebat tirocinio. Tandemque absolutis biennii experimentis, nuncupatisque votis, quibus se Deo libens obstrinxit, Palentiam missus est primum, ut ibi philosophicis, deinde Salmanticam, ut theologis operaretur disciplinis. In his perdiscendis ingenium docile, peracutum, et copiosum exeruit; cui cum ille diligentiam in exercendo superadderet, primos ubique honores tulit, et primaria in utraque facultate certamina cum laude propugnavit.

Studiorum emenso curriculo, et tertia in rebus spiritus probatione peracta, Methymnam Philosophiæ Magister destinatur. Hujus gravitatem muneris ut digne sustineret, illud secum attente recogitabat: suæ traditos esse disciplinæ adolescentes, quorum ex optima in interioribus literis institutione, et Societatis decus, et aliorum deinde penderet eruditio: eosdem, velut teneras adhuc stirpes ex aprico tirocinii plantario recens avulsas, et in patientiorem modo locum translatas, facile in alterutram posse partem inflecti, nisi sedula cultoris manu recte consurgere, atque in cælum attollere capita docerentur. Inde duo sibi maxime tenenda esse colligebat: indefessam ad erudiendos discipulos studii contentionem, et ad prælucendum eis religiosæ vitæ exemplis curam non intermissam. Hoc sane postremum ita perfecit, ut cum inter discipulos ejus nonnulli Magistrum ætate superarent, omnes tamen propter castigatissimos illius mores præcipua eum observantia prosequerentur. Illud vero prius, ultra etiam quam discipuli voluissent, diligenter adeo fuit executus, ut contracto ex nimio labore morbo diuturno, a Magisterio cessare primum interrupte, deinde omnino cogeretur. Itaque cum designati cursus nondum medium attigisset spatium, alio fuit evocandus, ut affectæ consuleret valetudini, suis intime dolentibus



tibus auditoribus, quibus erat carissimus tum ob reliquas ejus dotes, tum etiam ob perspectam in docendi munere dexteritatem. Dialecticam, et pauca quædam ex physicorum libris prælegerat, in quibus omnibus concisa quædam brevitæ, et aperta nihilominus perspicuitas emicabat in tradendis recte disse-  
rendi præceptis, et arcanis naturæ reserandis. Igitur Sal-  
maniticam remeavit, cujus cœlum propitium olim senserat, ibi-  
demque, recuperatis jam viribus, Theologiæ Magister desi-  
gnatus, quæstiones de moribus per biennium explicuit. In  
his autem, atque aliis Scholæ exercitationibus tantum inge-  
nii, ac scientiæ præbuit specimen, ut a Superioribus jussus  
fuerit Doctoris lauream petere: quam ille post exquisitum  
doctrinæ suæ periculum plaudente Academia reportavit, sem-  
perque magna cum dignitate sustinuit.

Non diu post a supremo Societatis Præposito Francisco  
Retzio, ut sacram in Collegio Romano Theologiam trade-  
ret, vocatur in Urbem. Quo cum venisset, plurimorum in  
se vertit oculos, peregre adventantis vultum, et verba, ges-  
tusque omnes curiose, ut assolet, attenteque observantium.  
Et quamquam spem de illo præstantem habebant, mox tamen  
ut magisterium auspicatus est, ac reconditas intus opes ape-  
ruit, expectationem, quam de se moverat, superavit. Suspi-  
ciebant in eo cum ingenii facultate doctrinæ copiam, quæ  
tum maxime innotescebat, cum aliquoties, vel propter injun-  
ctas sibi occupationes, vel ob aliquam corporis invaletudinem,  
prælectiones suas scriptis commendare non poterat. Tunc en-  
nim ad scholam veniens, continenti, beneque ordinata dic-  
tione, perinde ac si de scripto legeret, per designatum horæ  
spatium discipulos scriptioni tenebat intentos. Erat in docendo  
brevis; sed, quod paucis concessum est, ita demum brevis,  
ut non propterea obscurus fieret. Suamque doctrinam, rejectis  
quæcunque novitatis speciem aliquam exhiberent, ex probatis-  
simis Scriptoribus eruebat. Inter cæteros amabat plurimum D.  
Augustinum, ac D. Thomam, et ex posterioribus Ductorem  
Eximium: quorum omnium egregia volumina sedulus diurna,  
nocturnaue versabat manu. Ob hanc ejus scientiæ famam,  
et notam sui generis claritatem multi omnium ordinum viri  
eum requirebant, familiaris cum illo consuetudinis appeten-  
tes.

tes. Verum ipse, ne otium sibi literarium eriperent, salutationes externorum hominum, et maxime nobiliorum declinabat, quatenus inoffensa urbanitate liceret. Inter alios Cardinalis Quirinus, ut erat omnigenæ studiosus eruditionis, cum de Osorii scriptis aliquid inaudisset, quod subtile disertivi palatum poterat titillare, quoddam illorum exemplum afferri sibi iussit, illudque libenter adeo perlegit, ut videndi Auctorem, eumque coram alloquendi desiderio sit incensus. Ignatius, licet ab id genus visitationibus abhorreret, multoque libentius ageret cum humilioribus, et plebejis, tamen Eminentissimo Præsuli, non tam suo, quam aliorum impulsu, morem tandem gessit invitus. Dum coram adfuit, multis eum benevolentiae signis humanissimus Princeps excepit: collaudaque illius docendi ratione, etiam atque etiam hortatus est, ut in doctrina divinæ gratiæ contra Novatorum errores constabilienda pergeret imperterritus. Valde etiam probari sibi dixit, quod Sanctos Hilarium Arelatensem, et Vincentium Lirinensem contra irritos nonnullorum cœnatus ab omni Semipelagianismi nota invictis rationum momentis vindicasset. Hoc enim inter cæteras magisterii sui dotes habebat Osorius: ut austeritatem severioris scientiæ utili, et opportuna eruditione deliniret. Quanquam in eo ad altiorem etiam intendebat scopum. Etenim cum inter auditores suos alumni quoque adessent Collegii Germanici, æquissimum judicabat, illos omni armorum apparatu adversus Hæreticorum incursus, quam maxime fieri posset, instructos in patriam suam remittere. De hac ejus in docendo præstantia singulari locupletissimum testimonium habeo Josephum Anguisolam, genere, virtute, doctrina, et eloquentia Cl. virum, qui olim Oserium audivit Romæ, et modo Placentiæ, ubi ipse multos erudit ad justitiam, de Magistro suo ita testatur: *Osorius disciplinam Theologicam ad eam, quam habere debebat, normam exegit: hujusque facultatis velut instaurator fuit habitus, propterea quod viam ipse aperuerit, ad quæstiones illas solide, ac dilucide pertractandas, quæ inter disertissimos illius temporis Theologos magis erant plausibiles. Omnes denique profundam ejus eruditionem cum tam solida ingenii subtilitate conjunctam admirabantur. Nonnulla ex iis, quæ tum Romæ scripserat, deinde mandata sunt*

typis, multamque apud eruditos laudem promeruerunt.

Cum hac opinione doctrinæ quatuor ipsos annos inter Romanos versatus, inde in Hispaniam rediit, ut in Academia Salmanticensi primam Theologiæ Cathedram occuparet. In eo conspicuo munere ita se gessit, ut collectam adhuc existimationem sapientiæ non modicis auxerit incrementis. Sive ille discipulis suis consuetas explicaret scholas; sive in frequenti corona Doctorum decertantibus præsideret; seu denique, modestiæ semper observantissimus, propugnatores ipse impugnaret; magna semper cum voluptate audiebatur ob ejus in docendo perspicuitatem, in respondendo nitorem, et efficaciam, in disputando vero subtilitatem: atque in hac præsertim exercitatione oppugnandi tam acer erat, et habilis ad spiculum infigendum, ut nemo illum cuperet adversarium. Postquam rude donatus est, et ab onere docendi exemptus, cætera sui gradus officia constanter, et honorifice implevit. In Doctorum conventu, cum ii de Academiæ negotiis consultabant, tantum apud eos consilio, et auctoritate valebat, ut universi nonnunquam, plerique sæpius in sententiam irent Osorii. Ab eodem Doctorum Collegio designatus, ut Carolo III, ejusque conjugii de felici eorum ad Hispaniæ thronum adventu Academiæ nomine gratularetur, legationem illam cum magno Academiæ honore, et maxima cum approbatione Regum obivit. Inde Salmanticam regressus, otium in absolvendis aliquot dissertationibus, quas Romæ inchoaverat, collocavit. Has cum vidisset P. Michael Sagardoius, qui inter prima illius Athenæi lumina censebatur, admirationem tenere non potuit. Tantum doctrinæ suceum, tantam in eis vim ad evincendum invenit. Eisdem alii quoque Salmantini Magistri, et Vallisoletani, ad quos missæ fuerant, valde probaverunt. Nec dubito, quin illæ, si per adversa licuisset tempora, publicam lucem cum doctorum acclamatione obtinuissent.

Quanquam his privatis studiis Superiorum jussu incumberebat, aliaque interim munia et domi, et foris exequeretur; tamen, pro suo nunquam cessandi desiderio, vel potius, pro sui animi demissione, nimium se feriari crederet. Idcirco Rectorem adiit, seque ad ea promptum exhibens, ad quæ non ine-

ineptus judicaretur, novum sibi onus rogavit imponi, quo posset cæteris aliqua ex parte prodesse. Rector de hac Ignatii petitione cum Ministro suo colloquens, hæc ajebat: *Osorius noster magnum mihi de meipso ruborem injecit. Minime ille contentus virtutum exemplis singularibus, quæ nobis assidue perhibet, neque occupationum territus pondere, ut mantissam ei superaddam, a me petit enixe.* Votorum compos effectus, et spiritualium rerum Præfectus designatus, accuratissime munus illud exercuit. Exhortationes domesticas, et apte dispositas, et magno cum fervore pronuntiatas habebat: cumque illi et mundi contemptus, et fama doctrinæ, et quotidiana religionis exempla multam apud audientes auctoritatem conciliarent, multam quoque vim illius verba habebant ad persuadendum. Bis etiam per hebdomadam juvenibus, et laicis meditationis argumenta suggerebat: sed antequam ad eos verba faceret, semper in æde sacra per semihoram orabat ipse, indeque lucem, et ardorem depromebat ad considerationes opportunissimas, et affectus vehementer incensos, quibus auditorum corda inflammabat. Nec vero intra privatos tantum parietes verba fecit Osorius. Sæpe in Collegii templo, in aliisque per urbem, et extra illam, orationes habuit, quæ magnum illi eloquentiæ nomen pepererunt. Quod si ei firmiora latera, vocemque pleniorum natura concessisset, nullam certe in eo perfecti Oratoris laudem desiderasses. Funebres orationes duas Salmanticæ dixit, quæ in illo Sapientissimorum hominum theatro præcipuam obtinuerunt commendationem, et typis excusæ fuerunt ibidem. Latinam aliam in obitu Philippi V, quem et sui dominum, et populi parentem, et Ecclesiæ observantissimum filium non fucatis, ac ementitis verborum pigmentis, sed nativis rerum ab ipso gestarum coloribus depinxit. Alteram Hispanicam, in qua Illustrissimum virum Joannem Ladrone[m] de Guevara Carmelitanum, illius Academix Doctorem, deindeque Burtinensem Episcopum, postquam fato concesserat, promeritis laudibus exornavit.

A laborioso docendi munere ad longe difficiliorem regendi homines provinciam evocatus, in ea gerenda major, quam antehac fuisset, omnibus visus est. Quantum ejus prudentiæ fiderent superiores, vel ex eo facile apparet, quod il-

lum nullo adhuc magistratu perfunctum, Salmantino Collegio semel, et iterum præficere non dubitarunt. Collegium illud copiosus, ac delectus Sociorum numerus incolebat, in quibus multi erant juvenes, qui theologicæ facultati operam dabant, totiusque provinciæ maximum habebatur. In illo administrando vigilantiam adeo prudentem ostendit Osorius, ut Superioribus plene satisfaceret, et inferioribus in re nulla deesset. In observandis legibus cum esset ipse apprime studiosus, neminem patiebatur esse negligentem. Inexorabilis erat in his facultatibus concedendis, quæ possent decursu temporum in aliquod disciplinæ vergere detrimentum. Et cum esset ad prospiciendum acutus, facile prænoscebat, quo restandem evasuræ forent, nisi mature provideretur. Siquid autem superiore tempore in mores jam fuisset inductum, quod sibi justis de causis non probaretur, idoneam captabat occasionem, ut illud sine offensione præcideret. His, qui Theologiam Salmanticæ recolebant, concessum olim fuerat, ut ad triclinium non in primis, sed in secundis venirent, atque etiam ut collationibus de re morali non interessent. Osorius utrumque hoc privilegium, cum primum opportunitas affuit, ipsis non repugnantibus, qui eo usi fuerant, abrogavit. Non pauci libri per cubicula juvenum decursu temporis fuerant accumulati, qui possent eorum animos ab utilioribus studiis ad amœniora, vel curiosiora distrahere. Hos ille, cum juvenes ad novam traduxit habitationem, aut Bibliothecæ attribuit, aut aliorum Patrum cubiculis assignavit. Eodemque modo alia etiam, quæ vel Societatis præscriptionibus, vel usui communiter in provincia recepto non convenirent, solícite curavit emendanda. Quanquam a curiosa longe aberat inquisitione, neque importune in domesticas involabat officinas, nihil tamen eorum, quæ domi fierent, ignorare videbatur. Illa certe apud eos, qui ei suberant, invaluerat opinio; Rectorem suum, quamvis multa dissimularet, de nullo posse celari defectu. Quoties vero correptione opus esse judicabat, eam sic adhibebat, ut non iram, non supercilium exhiberet, nedum proferret aliquid contumeliosum; sed rem simpliciter expositam ex comparatione legis, et rationis vituperaret. Quod si hi, qui culpæ affines erant, eam agnoscerent, perinde illos

los amplectebatur, quasi nihil accidisset: contigitque aliquando, ut quos pridie reprehenderat, postridie ad se vocatos perhumaniter exceperit, et portione chocolati refecerit. Sic nimirum duo illa, quæ difficile copulantur, severitatem, et benignitatem admirabili modo conjunxit.

Magistros æque, ac discipulos ad sua quemque officia diligenter incumbere, indefesso curabat studio. Nullum in juvenibus prætextum admittebat, quominus ad omnes Scholæ exercitationes et præsto adessent, et constanter in iisdem perseverarent. Unde cum in eorum aliquos nimia quædam facilitas irrepsisset egrediendi e gymnasio, dum theses publice propugnabantur, pœnam statuit in omnes, qui prædicto tempore locum desererent, nisi justam, et notoriam, non vero vulgarem, et probabilem tantum excusationem haberent. Eoque pacto malum illud, ne latius serperet, citissime compescuit. Sed qui omnes volebat exacte suo perfungi munere, nihil habebat antiquius, quam ut omnes etiam, quantum religiosa moderatio sineret, liberaliter tractaret. Multum quidem studium pro tuenda paupertate a singulis adhiberi cupiebat; cæterum quæ ad communis vitæ rationem attinerent, abunde omnibus subministrabat. Siquis autem sciret, aliis insuper indigere, quæ communem victum excederent, de suo largiter illis subveniebat. Nec solum de victu, atque vestitu, sed etiam de domiciliis commoditate suis studiose providit. Multa enim aggressus est ad Collegii ornatum augendum, quorum alia, prout animo designaverat, ad exitum perduxit, alia per temporum iniquitatem inabsoluta reliquit. Magistrorum cubicula in meliorem conformationem disposuit, eaque convenienti suppellectili decenter instruxit. Adolescentes, qui Theologiæ studebant, ex veteri habitatione ad eam Collegii partem transtulit, quæ ante aliquot annos extructa fuerat. Ambulacra duo, inferius unum, alterum superius quadratis lapidibus sectis stravit: quo in opere perficiendo non solius ornatus, sed utilitatis juvenum præcipuam rationem habuit. Hi enim, cum in eorum altero quotidianas scholarum repetitiones haberent, ex iteratis in eodem loco per semihoram deambulationibus densam lateritii pulveris nubem excitabant, quæ multum ipsorum valetudini, ut testabatur Medicus, officiebat:



bat: cui malo Osorius duriore lapidum pavimento remedium fecit. In templo duas denuo aras erexit, alteram Mariæ V. Elisabetham visitanti, alteram Apostolo Jacobo majori nuncupatam. Sacrarium etiam templi in elegantio rem formam reductum, pulcherrimis tabulis Apostolorum duodecim, et quatuor Ecclesiæ Doctorum, hinc inde dispositis, ornavit. In ejus anteriore parte concameratum loculum fecit, varia, levique sculptura decoratum, et a fronte crystallo conclusum, intra quem statuam miræ artis collocavit, quæ Christum exhibet, post dirissimam flagellationem ad resumenda vestimenta ægerime inclinatum: et expressam summi doloris, simulque patientissimi animi refert imaginem. Bini aderant ad utrumque latus Angeli, ludibria Domini sui adeo amare plangentes, ut eos siccis oculis intueri vix posses. Faciebat hæc præclarus ille Carmona, qui ad Navam Regis exortus, deinde Matriti inter celeberrimos Sculptores præcipuum nomen obtinuit. Osorium autem, in statuenda illa Domini effigie, ad primævam Salmantini Collegii originem respexisse crediderim, ut familia sua sub iisdem Christi patientis maneret auspiciis, quibus fuerat instituta. Primi enim Patres, qui Salmanticæ consederunt, ut Societatis narrat historia, Sacellum domesticum tabula picta exornarunt, quæ Jesum exprimebat, dum Pilatus eum innumeris verberibus laceratum, corona perforatum spinea, arundineo derisum sceptro, et chlamyde male tectum ignobili, Hebræorum populo ad movendam commiserationem ostendit. Hoc valde miserandum simulacrum, quod Patribus dono miserat civis quidam, ut papyraceæ sufficeretur imagini, quam ipsi pro egestate sua in Sacello collocaverant, ad extrema usque tempora religiose in Collegio servabatur.

Postquam Osorius Sacrarium ornaverat, cogitationes suas ad amplificandam, et locupletandam Bibliothecam convertit. Huic, quamvis ampla esset, spatiosum quoddam cubiculum adjunxit, in quo non multos ante annos supremum diem cluserat vir ille doctrina, et virtute conspicuus Ludovicus de Losada: ut quæ sapientiæ, ac musarum sedes fuerat placidissima, literarum esse pergeret domicilium. In eo Osorius magnam librorum copiam reposuit, quos omnium manibus teri non oportebat. Sic locum intra Bibliothecam dedit aliis quamplurimis, qui-

quibus ipse, dum Salmantino Collegio præfuit, augendam illam curavit. Siquid eo tempore, vel paulo ante prodiisset in lucem, quod ab eruditis præcipuo haberetur in pretio; siquid item ejusmodi superioribus editum seculis in Bibliotheca desiderari perspiceret, nulli vel sumptui parcebat, vel curæ, ut illud quamprimum acquireret. Nec sacras tantum, ac divinas scientias, sed humanas etiam disciplinas nova librorum copia locupletavit. De physicis, de mathematicis, de historicis, et philologis multa, valdeque selecta conquiri fecit, quibus veterem Catalogum multis adauxit partibus. Ac de his, quæ ad mathematica pertinent, non solum probatissimos Auctores, sed instrumenta quoque, præter ea, quæ jam domi erant, aptissima comparavit, quibus habiliores ad operationes suas reddidit auditores pariter, ac Magistrum. Is erat Petrus de Lacaze, qui ex Gallia profugus propter exortam ibi tempestatem in Socios, ad Hispaniam confugit, et Salmanticam missus est, ut in illo Collegio Mathesim, cujus erat scientissimus, profiteretur. Viderat ille in patria sua per celebres ejus facultatis Scholas, deque aliis per libros, vel per hominum narrationes cognoverat: et tamen idem ipse affirmabat, duabus tantum, vel tribus exceptis, nullam se nosse, quæ Salmantina delectu librorum, et instrumentorum apparatu esset instructor.

Denique, ut nihil eorum, quibus prodesse suis posset, intactum Osorius relinqueret, Villam Sandinam, quæ rusticationibus inserviebat, ampliorem reddidit, et amœniorem. Vicino coempto prædio, in quo scaturiebat aquæ vena, quæ prodesse irrigationibus poterat, illud intra Villæ muros inclusit. Ejusdem subigendo solo, quod exile, et macrum erat, confici bipalia jussit, quibus altius in terram depressis, glebæ ab imo revulsæ facilius ad Solem obvertebantur, ut illius radii vitium omne decoquerent. Præparato in hunc modum fundo, amplius quingentas diversi generis pomiferas arbores peregre asportavit, easque per multiplices ordines ita direxit, ut nihil esset ibi et uberius ad fructum, et ad pulcritudinem ornatus. Præterea cœnationem, quæ olim ibi sub dio fuerat structa, et vetustate pene corruerat, in pristinum restituit statum, vel potius de integro ædificavit. Mensas lapideas cum sedilibus item ex lapide

de in quâdrum disposuit: ad easque quaterni patebant aditus, a superiore scilicet, et inferiore parte, et a medio lateris utriusque. Fons in medio cœnaculi ad mediocrem altitudinem consurgebat: huic latices antlia vicina subministrabat, qui tubis, ac suphunculis ad summitatem fontis impulsus, inde vario neque oculis injucundo lusu in amplo cratere recipiebantur. Extra mensas columnas aliquot opportunis in locis erexit, quæ transversas per circuitum trabes sustinebant. His trabibus leviora quædam imposuit tigna, quorum pedes ad trabes affixi erant, summa vero capita leni quadam acclivitate supra fontem ita simul conjungebantur, ut coni figuram non absimilem exhiberent. Hæc autem eo tendebant omnia, ut vites, prope columnas insitæ, super trabes, et tigilla multiplici lapsu serperent, totumque cœnationis ambitum per æstivos ardores palmitibus, et frondibus obumbrarent. Ut diutius adversus ventorum, et pluviarum injurias consisterent, trabes omnes, et tigna contexit lamellis ferreis, vitumine quodam oblitis, quæ Arundæ in Granatensi regno elaboratæ, iis paulo sunt crassiores, quæ apud Batavos conficiuntur. Nesciebat enim Osorius, dum aliquid aggressus fuisset, illud pro sui magnitudine animi perfectissime non absolvere. Quod si ei per tempus lucuisset, domum etiam ejusdem Villæ, quæ nimis angusta erat et incommoda, multo commodiorem a fundamentis erexisset. Jamque materiam aliquam congesterat ad fabricam inchoandam, et ichnographiam ab Architecto descriptam Seniores Collegii Patres approbaverant. Sed opus illud, et alia multa, quæ meditabatur efficere, superveniens exilii lex præpedivit.

In Salmantini gubernatione Collegii, inque aliis muneribus, quæ commissa sibi fuerant, tantum prudentiæ specimen dederat, ut inde ad totius administrationem provinciæ sit assumptus. Nonis ipsis Januariis, anno cadentis seculi sexagesimo septimo, Præpositus Castellaniæ provinciæ fuit renuntiatus, non tam ut Socios per ipsorum domos inviseret, quam ut illos terra, marique jactatos, consiliis, et exemplis suis erigeret, atque omni, quam ipse præstare posset, ope sublevaret. In trimestri spatio, quod ab inito magistratu ad exilii usque denuntiationem excurrit, pauca quædam lustrare po-

potuit Collegia, quæ Vallisoleto non longe aberant, ubi sedes erat provinciæ Præpositis constituta. Ac primum omnium Villagarsiense tirocinium voluit inspicere, quod ea tempestate tirones numerabat circiter octoginta, quorum de numero fere viginti pro ultramarinis admissi erant provinciis. Multos hic dies substitit, tum ut copiosam illam, ac tenellam prolem agnosceret, tum etiam ut veteres Collegii Socios ad sua quemque obeunda munera, nominatimque Magistros puerorum, quorum etiam frequens ibi erat numerus, ad optimam eorumdem institutionem sollicitaret. Sed in tironibus recognoscendis curam, ut æquum erat, diligentiolem impendit. Dumque omnes singillatim alloquitur, et cujusque animum explorat attentius, multam inde læritiæ voluptatem, nec modicam laudandi Deum occasionem accepit. Videbat enim in plerisque ad studia virtutum ardorem singularem, et in eorum quamplurimis præclaras ingenii, ac naturæ dotes observabat, quibus juvandæ Societatis, atque adeo rei publicæ Christianæ promovendæ spem maximam efficiebant. Nec poterat benignam Dei providentiam non extollere, qui, dum Societatis nomen jam undique vellicabatur, tam delectam adolescentium manum ad eam pertraxisset. Hinc vero majorem in modum illius cordi doluit, cum exorta deinde procella maximam eorum partem absorbit: maluissetque illos non agnovisse, quam a persequenda vitæ via, cui semel institerant, violenter videre distractos. In magno illo adolescentium numero tres admodum invenit Osorius, quos omnino probare vix poterat: non quod in eis perversum aliquid animadverteret; sed quia in eorum vultu, et incessu, aliisque gestibus nescio quid observabat ingratum, quod deterius quidquam portenderet in futurum. Nihil ergo in præsentem contra illos statuit, quorum agendi rationem neque Rector, neque Rectoris Socius improbabant. Sed ipsi post indictum exilium, cum inter primos ad deserenda religiosa castra properassent, aliosque ad defectio-nem exemplo, et consiliis induxissent, sagacissimum Osorii iudicium confirmarunt.

Postquam tirocinium lustraverat, Zamoram primum, deinde Arevalium, postremoque Abulam venit. Et quamvis jam omnia plena essent timoribus, nihil tamen omisit, ut Socio-

rum res in his locis, prout exigebant tempora, constitueret. Dum Abula contendit Segoviam, certior in itinere reditur, Sociorum omnium ab Hispaniæ regno expulsionem promulgatam in Aula fuisse, jamque Segoviensis Collegii Patres, suis ejectos ædibus, ad Sanctanderi portum deduci. Hoc tantæ calamitatis accepto nuntio, non animo concidit: sed cum esset humilis, et magnanimus, primum altissima Dei consilia submissa veneratione adoravit, inflictamque plagam, tanquam a Dei manu profectam, patientissime pertulit, nullam in ullum hominem querelam effundens. Deinde ad eum conversus, qui sibi a secretis erat: *Verebar equidem, dixit, ne mei causa gravissimum aliquod detrimentum provincia nostra reciperet.* Et cum reponeret socius, tempestatem illam multo ante fuisse conflam, quam ipse provinciæ præficeretur, ne sic quidem ab opinione sua recessit. Ajebat enim, si minus in provinciæ administratione peccasset, alias certe in multis deliquisse, propter quæ pœnam illam sibi, suisque fratribus attulisset. Hoc nimirum est christianæ humilitatis ingenium, suis tantummodo culpis et privatas, et publicas calamitates adscribere, nullumque supplicii genus vel pro levioribus noxis sibi non deberi, firmissime judicare. Sed quoniam animi sincera demissio nullatenus magnanimitati repugnat, illud denique apud se constituit, nihil non tentandum, ut extremis malis, quacunque via posset, occurreret. Sine mora Matritum versus iter arripuit, ut simul cum P. Xaverio Idiaquezio, qui tribus ante mensibus eodem venerat, sese ad pedes Regis abjiceret, quanta contentione posset obtestaturus, ne Societatem indicta causa damnaret, sed locum daret objectis criminationibus respondendi. Hac mente Turrem usque Lodonensem processit, quæ leucas non amplius quatuor Matrilo distat. Hic obviam illi venit quidam ex domesticis gloriis suæ, Comitum de Cervellione, cordatissimæ in primis feminæ, ad quam scripserat Ignatius, ut viam sibi ad alloquendum Regem sterneret. Ab ea modo tale responsum habuit: Matrilo adeo commutata, imo etiam perturbata esse omnia, ut pro Jesuitis verba facere plenum esset alex: quotquot ibi de Societate degerent, in eisque Idiaquezium, una omnes nocte repente comprehensos, continuoque Getafium amandatos, inde

Car-

Carthaginem abducendos: si porro ipse pergere contendat, magnis se periculis objiciendum, atque accessum ad Regem certissime non habiturum. Postremum hoc verbum altissime Osorium perculit, qui cætera vel pericula, vel incommoda nihili habuisset, dum conveniendi Regis spes sibi aliqua facta esset. Nunc, quoniam eo progressus fuerat, unde citius ferre Carthaginem, quam Sanctanderum poterat pervenire, rhedarium suum cum literis ad Arandæ Comitem, qui supremo Consilio præerat, Matritum dimisit, ut viam sibi, quam tenere debebat, indiceret. Cum autem in his literis aperte significasset, optatius sibi fore Sanctanderum petere, quo audiebat majorem subditorum suorum partem convenisse; tam justis ejus optatis non gravate Comes assensit. Imo illi viatoriam remisit tesseram, in qua neque itineris terminus, neque profectionis designati erant dies; sed utrumque Osorio ad ipsius arbitrium apponendum reliquit. Tantum, qui eum bene noverat, illius tribuebat fidei, vel cum regni finibus excedere jubebatur!

Hac habita facultate, Sanctanderum reverti constituit. Sed antequam eo accederet, literas in ipso itinere ad suos dedit, in quibus, cum suæ moræ causas exposuisset, hæc ferme adjugebat. Cum sibi ab Arandæ Comite potestas facta esset, quam vellet custodiam maritimam eligendi, propterea Sanctanderensem elegisse, quod sciret maximam provinciæ suæ partem eo fuisse compulsam. Interea dum ipse adesset, si quid opus esset alicui, adiret Eugenium Colmenarem (hic erant inscriptæ literæ) quem sui vicarium ad suum usque adventum designabat. Gratias sese agere Deo quam maximas pro submissione, ac patientia singulari, quam in auscultando, exequendoque Regis edicto, usque ad Ministrorum admirationem (quod in itinere audiebat) omnes exhibuissent. Perspectam sibi esse pietatem omnium, ob quam ex præsentī calamitate proficerent, et singulorum moderationem, ut ne minimo quidem verbo quemquam externorum offenderent. Vehementer cupere, preces quotidie fundi pro Rege, pro regia sobole, pro regisque Ministris: diemque a singulis exigi religiose, dum in ea custodia detinerentur. Patere omnibus, navigationem imminere diuturnam, ac difficilem, quam



probabili mortis periculo Doctores plurimi æquiparandam esse censuerunt. Hortari propterea omnes, ut animi sui rationes inirent, utque majori cuique solatio esset, particulari, vel generali confessione conscientię navos eluerent. Se, ut brevi afforet, pro viribus curaturum: ubi adesset, qua posset ope, aut consilio, nemini defuturum. His Osorii literis magna omnibus alacritas et ad labores sustinendos, et ad ingeminanda opera pietatis accessit. Ipse per viam consolatoris officium passim exercere tenebatur. Multi enim viri graves ad eum confecti lacrymis procedebant, quos prudentisermone, vultuque tranquillitatem, et constantiam exhibente sublevabat. Sed cum venisset Turremcrematam, occasionem habuit exercendę caritatis opportuniorem. Novitios ibi reperit variis terroribus exagitatos, qui cognito illius adventu, ad eum in diversorium properarunt. Eos veluti filios amplexus est peramanter: timorem, qui eis injectus fuerat, ne a Patribus rejicerentur, eripuit: animos ad viriliter decertandum adiecit. Inde Burgos profectus, relicta, quę sibi offerebatur, melioris hospitii commoditate, in publicum diversorium secessit, ut facilius posset ægrotantes aliquot Socios invisere, qui apud Benedictinos Patres diversabantur. Postridie ad eos veniens, omnes ad unum est allocutus, et consolationem ingessit, quam poterat in præsentī. Optimis illis Monachis amplissimas egit gratias pro eorum in ægrotos impensa cura, iisdemque filios suos tenerrime in posterum commendavit. Tandem Sanctanderum ingressus, magna omnium lætitia fuit exceptus, adventuque suo illos, qui pertimuerant, ne quid ei funestius eveniret, omni sollicitudine liberavit. Advenientibus deinde Novitiis tunicam Societatis imposuit, quam violenter, ac minaciter deponere coacti fuerant: nec facile internosci potuit, religiosam ejusmodi vestem illene lætius dederit, an ipsi receperint. Antequam inde discederet, literas ab Arandę Comite accepit, quibus rogabatur, ut dimissionem a Societate concederet P. Gregorio de Iriarte, quem ipse Comes paulo ante Sociorum expulsionem ad se vocaverat, eundemque adhuc juvenem, neque ulla impeditum infirmitate, ab exilii lege voluit exceptum. Super his eo tempore multa spargebant multi, quę nos consulto prætermittimus, cum nihil exploratum

tum liquido habeamus. Osorius autem, qui nullius gratia, vel metu a sequendo recto deflecteret, quamvis jam intra custodiam illam esset inclusus, libere respondit Comiti: Quas daret ipse dimissorias literas, nullius fore roboris, ut Gregorius legitime se crederet exauctoratum: id a Pontifice Summo, vel certe a Generali Præposito Societatis esse obtinendum: itaque ad eorum recurreret alterutrum, si tuto vellet in negotio illo procedere. Postmodum conscensa navi, Ferrolium cum cæteris venit: ubi cum jam omnes provinciæ Socii convenissent, cymba per capacissimum illum portum discurrrens, singulos invisere, amplecti, de salute perquirere, de patientia, constantiaque retinenda efficaciter commonere. Inter alia, quæ tunc constituit, ut rectus in itinere maritimo teneretur ordo, singulis navibus Rectores attribuit, quibus ii subessent, qui in iisdem vehebantur. Nimirum ubique locorum prima erat Osorii cura his diligenter prospicere, quos Deus suæ custodiæ commendaverat.

Calvium in Corsica post navigationem duorum fere mensium appulsus, cum ibi difficiliora essent omnia, occasiones proinde habuit prudentiam, et caritatem suam perhibendi multo frequentiores. In primo ad illam urbem accessu non pauci Sociorum suburbanas aliquot domos, male licet materialatas, occuparunt, multoque plures in Cœnobium S. Francisci confugerunt, quod non procul ab urbe distat. Hi omnes intra paucos dies gravissimis cœperunt terroribus agitari. Nam rebelles Corsi, qui sua in vicino monte castra posuerant, ad Sociorum usque domos excurrentes affirmabant, abeuntibus Gallis militibus, quorum aliquos in Hispanorum naves conscendisse jam viderant, se Calvium occupaturos, antequam novum Genua præsidium adveniret. Jamque illorum aliqui Cœnobium Franciscanorum, quamvis Sociis esset oppletum, intraverant armati: alii prope litus aggerem extruebant imponendis tormentis bellicis, quibus ab ingressu portus advenientes naves arcerent: aliique moliebantur alia, quæ proximam indicabant obsidionem. Hæc Socios omnes, sed eos maxime habebant sollicitos, qui remanserant extra urbem. Id cum videret Osorius, non dubitavit et urbis Prætorem Gallum, et Hispanæ classis Præfectum, qui nondum e portu solverat, libe-

libere, constanterque admonere: *Alienum omnino esse, ut ipse quidem existimabat, a mente Catholici, et Christianissimi Regis, homines Societatis medios inter duas gentes relinquere, quæ acri essent bello deceraturæ.* Ad hæc Præfectus respondit: Corsos propterea undique tumultuari, quod spe dejecti essent potiundi urbe post Gallorum discessum. Gallos porro (cum et illi, qui nudius quintus naves ascenderant, revocati fuissent in arcem) non ante profecturos, quam adventarent Genuenses copiæ: quibus advenientibus, nihil profecto esse, quod Socii timerent sibi. Prætor vero, Sociorum sortem dolere se, dixit: sed quæ post discessum suum exorto bello contingerent, nullo sibi jure imputanda. Permisit tamen, ut ii omnes urbem subirent, quos ad Cœnobium, et suburbium, et sparsas ruri domos magno esse in periculo videbat.

Osorius, quoniam aliud obtinere non potuit, hac habita Prætoris facultate, suis, ut intra urbem sese reciperent, imperavit. Multi etiam e Bæticiis, cum Argajolæ, ad quam ejecti fuerant, tectum invenire non possent, Calvium itinere terrestri commigrarunt: partimque ad suburbium constitere, partim recepti sunt intra mœnia. Itaque numerabantur ibi non-genti circiter Socii, quibus excipiendis nimium quantum angusta erant Calviensium domiciliorum spatia. Id tamen, quamvis haud minimum esset malum, non æque illos sollicitabat, ut imminentis belli non vana formido. Corsi vacuefactum Sociis Cœnobium statim majori numero occupaverunt: et cum adventantem Genua triremem conspexissent, quæ militem advehebat, turbulentius circa tormentum bellicum agebantur, quod ad extrema portus erexerant. Id causæ fuit Hispano Præfecto navium, ut Corsis, misso ad eos legato, denuntiaret: si Genuensem triremem se coram hostiliter aggrediantur, non impune facturos. Conquieverunt his Corsi, quibus eorum imperator Paschasius Paulus injunxerat, ut adversus Hispanos tam milites, quam religiosos omnimodam humanitatem, atque observantiam exhiberent. Milites ergo Reipublicæ pacifice in portum, indeque in urbem sunt ingressi. Sed abeuntibus paulo post navibus, quibus Galli omnes erant impositi, Corsi conatus suos ad premendam obsidione urbem instaurarunt.

Videbant hæc Socii, seque invicem ad sustinenda obsidio-

dionis incommoda cohortabantur. Sed cum aliqui essent animo timidiore, non defuit inter eos, qui ad tristissimum illum rerum omnium aspectum usque adeo conturbaretur, ut primum ipse sibi, deinde aliis etiam persuadere contenderet, ex obligata Societati fide neminem ad subeunda tam manifesta vitæ pericula posse constringi. Etenim in magno hominum numero nullum unquam desipere, optandum quidem esset, sed vix sperandum. Multoque id minus sperari poterat in ea Sociorum calamitate, quibus, ultra ea quæ passi erant, longe gravissima impendere credebantur. Ipsi enim per eos dies audierant a Corsis, urbem magna vi tormentorum esse verberandam, seque in prima illa nocte a Gallorum discessu, vel per murorum ruinas, vel applicitis scalis, in eam irrupturos. Ac licet ab hostibus tentata irruptio exitum non habuerit, quod providenti Deo tribuendum censemus, nil tamen mirandum est, si quorundam animi ex imminentis periculi magnitudine præter morem commoverentur: quoniam in cæco illo, nocturnoque impetu, quem timebant, perdifficile fuisset Corsis suorum observare ducum imperia, ut neminem læderent Hispanorum. Neque alienum a vero fuerit asserere, inter Socios viginti novem, qui Calvii sepulti jacent, etsi nullus hostili ferro ceciderit, quosdam tamen eorum vel ex terrore belli ægrotasse, vel certe ex multarum rerum penuria, quam bellum induxerat, celerius occubuisse.

Verumtamen Osorius, cum imprudentem illam propositionem audisset, quæ a nonnullis agitabatur incaute, eidem sine mora occurrendum sibi esse duxit. Convocatisque in consilium præstantissimis viris, quorum doctrina, vitæque integritas perspecta erat inter omnes, horum gravissimum iudicium paucorum opposuit temeritati: eoque pacto perniciosam illam opinandi, loquendique licentiam, unde maxima pullulare possent incommoda, vel in ejus ortu compressit. Pauci aliquot, qui falsa illa opinione seducti, fuga sibi consulere decreverunt, sese in angustias conjecerunt iis sane difficiliore, quas declinare tentaverant, suamque præcipitem deliberationem ipsimet postmodum reprobaverunt. Cæteris, qui nulla mortis pericula æque ac turpem fugam perhorrescebant, nihil prætermisit Osorius, ut, quod in ea poterat temporum difficultate,

levamen afferret. Et quanquam initio, tumultuantibus, et urbem aggredientibus Corsis, vix aliud potuit efficere, quam ut suos consiliis, et opportunis admonitionibus adjuvaret, atque in fiduciam obtinendæ tranquillitatis erigeret; tamen antequam belli furor omnino resedisset, non pauca constituit, quæ ad commune Sociorum bonum, et privatam juvenum informationem in spiritu, et literis pertinebant.

Hi omnes, qui ad urbem in primo belli discrimine confugerant, domos sine ullo delectu, prout scilicet cuique latibulum aliquod reperire licuisset, occuparunt. Sed Osorius paucis post diebus omnes per certas distribuit domos, certosque illis Rectores designavit, ut ubique, quantum fieri posset, domesticæ disciplinæ ratio servaretur. Tirocinium quam maxima potuit accuratatione constituit, eodemque delectos quosdam viros destinavit, qui præclaris vitæ exemplis ad studia virtutum novitiis essent incitamento. His addidit Magistros rhetoricæ, et humanitatis, ut illos, qui secundum suæ probationis annum agebant, erudirent. Eos quoque, qui tertium probandi erant, in eadem tirocinii domo, sed in alio ejusdem membro collocavit: ut et se mutuis adjuvarent exemplis, et neutri aliorum exercitationes impedirent, quibus utrique pro diversa ipsorum conditione vacabant. Adolescentibus, qui per navigationis intercapedinem dialecticas, et physicas institutiones penitus excipere non potuerant, in unam congregatis domum, suos etiam Magistros adjunxit: voluitque, ut in medio Sextili, cum nondum armorum strepitus conticuisset, scholas suas repeterent, ne quam haberent in absolvendo philosophico cursu retardationem. Cæteram pubem, quæ theologicis notionibus erat imbuenda, in aliam remisit domum, eamque Doctoribus instruxit optimis: ut quoniam summa erat librorum inopia, hanc locupletissimo docentium penu suppleret. Facta ibi ad consuetam inter Hispanos diem studiorum renovatione, sacra doctrina cum magno numerosæ juventutis ardore cœpta est pertractari: paucisque post mensibus theses quoque propugnatae sunt publice, quibus multi Bæticorum Patrum adjuverunt. Sic musas, et literarias de re divina concertationes, quæ vel nunquam audiat ibi fuerant, vel diutissime ab illa urbe exulaverant, in eandem Sociorum exilium induxit.

xit. In alia denique domo nonnullos conjunxit ex junioribus Sacerdotibus, qui literarium curriculum paulo ante confecerant, ut in ea mathematicis incumberent disciplinis. Multi, quibus hæc, et his similia nunquam ab Osorio in tam magnis rerum omnium angustiis perficienda esse videbantur, postquam ea tam apte, tamque ordinate constituta fuisse viderunt, eximiam hominis prudentiam, et invictam in exequendo constantiam valde collaudarunt.

Præterea literis, et legationibus missis, multa, quæ ad quotidianum victum, et sacrorum etiam usum in ea urbe desiderabantur, aliunde curavit asportanda. Corsorum ducibus meritas egit gratias pro exhibita erga Socios obsidionis tempore humanitate: simulque ab eis petiit, ut comneatus ex interiore insula, quæ illis subjecta erat, Calvium invehi paterentur. Quod cum illi facile concessissent, non multa quidem, propter asperam locorum conditionem, sed tamen aliqua obtenta sunt, ad lacrymabilem Sociorum egestatem sublevandam. Cum deinde Labrone, et Genua, atque aliis ex locis portitores aliqui devenissent, per eos effecit Osorius, ut multa, quæ maxime opus erant, neque uspiam Calvii reperiebantur, sibi ex continenti mitterentur. Hoc modo nonnullos obtinuit libros, et copiam aliquam sacræ supellectilis, cujus ob defectum pars magna Sacerdotum ad aras operari non poterat. Varia insuper Genua comportavit ferramenta, quibus Adjutores illi, qui fabrilia tractare noverant, et fulcra compingerent sublevandis e terra lectulis, qui hæcenus super nudo solo jacuerant, et sedilia, et mensas, et alia necessaria fabricarent. Quosdam etiam ex Adjutoribus, qui pistores olim fuerant, cum Sacerdote, qui eisdem præses, collocavit in conducta domo, cui furnus inerat, ut in ea panificium exercerent. Quo prudenti consilio Sociorum indigentæ opportune providit, atque aditum vexationibus, quas antehac passæ fuerant, magna ex parte præclusit.

Neque suorum tantum, sed aliorum etiam commodis inservire, tanquam propriam sui muneris partem reputabat Osorius. Non diu postquam Galli majori copiarum numero Calvium iterum occupaverant, Marchioni Tillyo, qui arcem illam cum potestate obtinebat, certus affertur nuntius de obitu



Mariæ Leczinskiæ, Galliarum Reginæ Christianissimæ. His acceptis literis, Tillyus de persolvendis ei justis cœpit statim recogitare. Sed hærebat animo, neque rem eo, quo par erat, decore perficiendam sibi esse sperabat, cum et artifices exstruendo tumulo, et peristromata parietibus templi obducendis in egentissima illa urbe deessent. Hæc secum volvebat tacitus, cum Osorius ad eum veniens, postquam dolorem ex interitu Reginæ conceptum expresserat, æquum sibi visum esse dixit, aliquam grati animi significationem erga illam ostendere, quæ Societatem complexa fuerat amore, ac benevolentia singulari. Decrevisse itaque cum Sociis suis, quantum præsens rerum tenuitas sineret, Reginæ benemerentissimæ parentare. Probavit Tillyus Osorii consilium, multisque pietatem illius commendavit. Sed quoniam tibi deliberatum est, inquit, hæc facere, satius erit, existimo, si ambo partitis inter nos curis, eodem die parentalia regia exequamur. Annuit his libenter Osorius, qui susceptas adornandi templi partes per suos illos artifices explevit, quos paulo ante commemoravimus. Hi cenotaphium erexerunt, eique pyramidem imposuerunt justæ magnitudinis, cujus summo in apice coronam, sceptrumque regium aptissime collocarunt. Ad obtegendam vero machinam, cum alia velamina non suppeterent, partim Sociorum pallia, partim stamineas adhibuerunt telas, quas Genua pro conficiendis sibi vestibus asportaverant: iisdemque Sacellum templi maximum exornarunt. Hæc intra biduum peracta sunt, ut optaverat Tillyus. Eodem tempore nonnulli, jubente Osorio, varia carminum genera, et elogia sepulcralia latina, græca, et hebraica composuerunt, quæ ad geminam tumuli faciem, ejusque latera, et alibi per templum affixa fuerunt. Cum tertius illuxit dies, Socii a summo mane multa fecerunt Sacra, ut Reginæ pacem apprecarentur. Deinde Archipresbyter cum ministris suis Sacrificium majori cærimonia inchoavit, concinente choro Sociorum aliquot, qui suam modulandi peritiam jam alias, vel in quorundam funeribus, vel in Sanctorum solemnibus demonstraverant. Interea milites tympanorum discordantium pulsu, tubarum, aliorumque instrumentorum sonitu, et tormentorum iteratis per intervalla quædam explosionibus funerariæ illi actioni majestatem,

ac decorem non modicum adjugebant. Sacro peracto mysterio, unus e junioribus, qui theologicis vacabant studiis, laudationem funebrem de suggestu pronuntiavit, quam Tillyus, cæterique duces attente, ac libentissime auscularunt. Denique post prandium vespertinæ pro defunctis preces similiter celebratæ fuerunt cum cantu. Tillyus pro his omnibus maximas Osorio gratias egit, et orationem funebrem, inscriptiones, et epigrammata, quæ a Sociis scripta fuerant, ut ea Parisios mitteret, ab ipso postulavit.

Gallorum in Corsicam reditus Hispanorum ab eadem exitum acceleravit. Quo die solemnitas agebatur S. Ludovici Galliarum Regis, cum jam sero esset, rumor coeptus est undique dissipari, Jesuitas propediem inde alio educendos. Postridie mane tredecim haud procul apparuerunt naves Gallicæ, quæ Calvium recta contendere videbantur. Vix illæ portum intraverant, cum Prætor Sociis injunxit, ut intra eum diem naves sine mora conscenderent. Multis apud illum egit Osorius, ut conscensionem in perendinum, vel saltem in crastinum differri permitteret. Quod cum obtinere vix speraret, ad ea procuranda, quæ maxime instabant, cogitationes suas convertit. In primis ægrotos illos, qui maritimum iter inire non poterant, in eadem conjuxit domo, eique Sacerdotes duos apposuit, quorum alter Rectorem ageret, alter vero Confessarium: tres item robustos laicos, inter quos unus erat Pharmacopola; ut nihil eis vel ad animi, vel ad corporis salutem deesset. Neque his satis se egisse ratus, Comitem Cousanum adiit, qui unus inter Gallorum duces et humanissimis suis moribus, et egregiis christianæ pietatis exemplis Hispanorum animos sibi conjunctissime devinxerat. Huic curam suorum, quos Calvii relinquebat, cum Osorius commendasset: *Habebunt in me, dixit, parentem providum, matremque sollicitam: citiusque mihi cibus, quam illis deficiet.* Virum sane in paucis commendabilem! qui Martiales inter strepitus tantam erga Deum, et homines pietatem exhibere didicerat. Voluit insuper Osorius, ut adolescentes, qui philosophicum cursum absolverant, ante profectionem consuetum ingenii periculum subirent. Sed cum excederent tricenarium numerum, illos per varias Magistrorum domos ternos divisit: itaque o-

males brevi tempore profectus sui dederunt specimen. Præterea nonnullos jussit per domicilia omnia discurrere, ut monetam Corsicam, si qua esset, colligerent, et cum alia, quæ ubique recepta esset, commutarent. Alios denique misit ad naves, ut inter navarchos explorarent, cujus Regis imperio, Catholicine, an Christianissimi e Corsica educerentur? quo tandem pertrahendi? quanta esset navium capacitas? quæ victus ratio? aliaque id genus comperirent, quæ ad ulteriora capienda consilia, lucem sibi possent afferre. Hi cum rediissent, quæ ad naves cognoverant, retulerunt. Jesuitas ex communi utriusque Regis sententia ad oram Liguriæ perducendos: novos ibi ministros affuturos, qui eis commorationis locum designarent: Telone decretum fuisse, ut Jesuitæ in ratione victus perinde ac nautæ simplices haberentur: e navibus, quæ Calvium appulsæ fuerant, quatuor ad S. Bonifacii portum esse destinatas, ut commorantes ibi Jesuitas reciperent, neque ante illarum reditum cæteras profecturas esse Calvio. Id cum certo comperisset Osorius, a Prætorè Tillyo tandem obtinuit, ut præproperæ conscensionis decretum revocaret: ipseque sedatius potuit efficere, quæ ad imminuenda suorum inter navigandum incommoda excogitaverat. Præter alia multa, quæ prudentissime per eos dies fuit executus, navem aliam conduxit, quoniam eas, quæ Telone venerant, tot recipiendis hominibus nimium angustas esse cognoverat.

Post menses demum quatuordecim, quos Castellani exules inter magnos labores, nec levia vitæ discrimina duxerant Calvii, ad Ligures sub Gallorum ductu sunt deportati. Hic eos inducere conabantur Galli, ut conductis Genuæ navibus Centumcellas peterent, indeque in ditionem Pontificiam desilirent. Sed Osorius, cæterique Provinciarum Præpositi, qui Genuensi in portu aderant, constanter eorum conatibus restiterunt, et quoties de re illa sermonem ingerebant, unanimi responderunt consensu: *Nunquam se commissuros, ut sponte sua Centumcellas adirent: e Corsica non suo arbitratu, sed Gallorum jussu excessisse: iidem, quæ in mandatis habere se dixerant exequerentur, ut Socios in Genuense litus exponerent: tunc ipsos, cum alibi manere non possent, ad Pontificis ditionem itinere terrestri profecturos.* Sic enim existimabant, debitam Pontifici-

tifici Summo reverentiam minime ab se violandam, si professionem illam non sponte, sed coacti suscepissent. Ab eo consilio cum nullis artibus dimoverentur, omnes tandem, post toleratas per triginta dies in Genuensi litore gravissimas molestias, Segestam Tigulliorum devehuntur. Hic paucos conquievit dies: et cum jam singuli ad conficiendum iter unciales argenteos quindecim a Ministro Catholici Regis accepissent, per Ducatum Parmensem, et Mutinensem ad Bononiæ provinciam advenerunt. Pauci, quibus id concesserat Osorius, phaselis ad Ligurnum portum progressi, inde per Etruriam in eandem cum cæteris ingressi sunt regionem.

Antequam reliqui Socii Segesta digrederentur, Osorius Bononiam usque præcesserat, ut de ratione hospitandi eos pertractaret. Cum autem per illam anni stationem conducendis intra urbem domibus non modicæ occurrerent difficultates, per vicina Castella, et Suburbanas Bononiensium Villas domicilia perquirenda curavit, in quæ omnes quamprimum fieri posset, reciperentur. Hi Mutinam interea in varias divisi turmas adventabant: indeque ad designatum ab Osorio locum Rectores singuli cum suis subditis discedebant. In quamlibet earum domuum copiosum destinavit Sociorum numerum, tum ut religiosæ consuleret disciplinæ, quæ melius inter plures vigere solet: tum etiam, ut ex accumulata multorum pensione communibus cujusque domicilii sumptibus facilius subveniri posset: quod in illa comparandæ omnigenæ supellectilis necessitate vix aliter potuisset obtineri. Constitutis in eum modum Sociorum habitationibus, ipse in Bianchinam secessit Villam, quæ septimo ab urbe milliario sita est ad Lavinum inferius. Voluit enim exemplo suo Socios inducere, ut ruri libenter habitarent: quod ipse multis justissimisque de causis urbanæ commorationi, eo præsertim tempore, præferabat. In eadem sede amplius sexaginta Socios collocaverat, in quibus erant adolescentes circiter quadraginta, qui philosophicis ibidem instruendi erant disciplinis. Atque hujus præcæteris deligendi sibi loci, eam Osorio fuisse causam existimo, ut pubes illa, in qua provinciæ Castellanæ spes ultima vertebatur, diligentius sub ipsius oculis in literis proficeret, ac virtutibus. Ibidem aliorum curæ pari atque alibi solitudine

dine invigilavit. Ac ne quid gravioris momenti sine illorum consilio statueret, qui Consultorum munere fungebantur (cum ii procul degerent, et itinera per hiemem essent impeditissima) nonnunquam eum, qui sibi a secretis erat, cum mandatis ad eos dimisit: cognitaque illorum sententia, consultius ea, quæ in deliberationem venerant, peragenda decrevit. Castrifranchi prope Arcem Urbanam denuo academiam illam instituit, et auxit, quæ Calvii fuerat inchoata. Eo quippe non paucos misit juvenes Sacerdotes, ut eorum alii Mathesim sub designatis Magistris discerent, alii vero in græcis, et hebraicis literis perficerentur. Alia denique alibi constituit, quæ in novo illo rerum statu peropportuna erant ad retinendam domesticam disciplinam.

Postquam triennium in provinciæ præfectura compleverat, quanquam libentius privatam egisset vitam, Bononiam tamen, ad regendam Sociorum domum, compulsus est proficisci. Multi enim ab anno 1770. ex vicinis pagis intra urbem illam sese receperant, conductis opportuno tempore domibus, quæ ipsorum usui magis essent accommodatæ. Ex iis quædam Otorio fuit commendata: in eamque Socii sex et viginti convenerunt, quorum plerique juvenes erant, qui paulo ante consuetum studiorum, et probationum cursum absolverant. Ut in his conceptum jam ardorem spiritus, et amorem in literas promoveret, multa ille, quæ ad utrumque juvare poterant, adminicula suppeditavit. In primis ædiculam domi suæ constituit, quinque instructam aris, in quarum maxima divinum Sacramentum debita cum facultate, ac reverentia reposuit. Eandem decentissimo sacrificiali apparatu, et elegantibus ornavit imaginibus. Hic multas ipse ducebat horas, ceterosque, ut eodem interdiu recurrerent, hortabatur. Hic præter quotidiana de more Societatis religiosa exercitia, frequentiores, quam in Hispania fieret, habebantur exhortationes. Earum aliquas juvenibus demandabat, tum ut otium, dum commentando, et scribendo incumbunt, bene collocarent; tum ut usum aliquem caperent in exercitatione dicendi. Sed nemo plures quam Otorius habuit, cujus sermonibus sapientia plenis, cœlestique unctione perfusis, multum omnes ad terendos perfectioris vitæ tramites incitabantur. Deinde bonam librorum copiam co-

mit,



mit, qui de rebus præsertim sacris, de doctrina morum, de Ecclesiastica historia, deque aliis religioso viro dignis agebant. Ac ne illi conspersi pulvere, situque obsiti jacerent in pluteis, duos per hebdomadam domi suæ congressus instituit. In eorum altero, quod alibi quoque fiebat, de rebus moralibus agebatur: in altero disserendum erat de historia Ecclesiastica, vel de iis, quæ virum Ecclesiasticum maxime deceant. Osorius ipse, ut in omnibus, quæ cæteris præcipiebat, suo præret exemplo, dissertationes duas diligenti elaboratas studio, solidaque illustratas eruditione, in designatis diebus coram aliis recitavit: et sic illis viam aperuit, quam tenere possent in novo illo, atque utilissimo argumento pertractando. Præterea triclinium, et vestiarium ita disposuit, ut in eorum quolibet omnibus sibi subditis, quidquid opus haberent, in commune ministraretur. Credebat enim, in religiosa familia multum de contentione virtutum, ac literarum fore detrahendum, si unicuique privata sui victus, et vestitus cura relinqueretur. Nullam ideo, cum provincie præerat, diligentiam non adhibuit, ut communis vitæ ratio vigeret ubique. In hac autem Bononiensi domo ut eandem retineret, mille circiter unciales argentos, qui sibi dono missi fuerant, libentissime impendit. Nam præter illa, quæ in exornando Sacello, vestiarioque instruendo, ac cæteris utensilibus comparandis insumpserat, quædam etiam habitacula ære suo construxit, ut quo singuli commodiore habitatione uterentur, eo etiam impensius mentalibus, ac literariis incumberent exercitiis.

In ea domo placidissimos agebat dies, et illa juvenum manus sub erudito, religioso, et honoratissimo sene in studio virtutum, ac literarum nobili æmulatione procedebat, cum allatus eversæ Societatis nuntius susceptum vivendi modum coegit abrumpere. Osorius, quamvis acerbiter infortunii hujus intime senserit, Dei tamen, ejusque Vicarii decretis sese plena cum demissione subjiciens, incunctanter jussa fuit executus. Suis relictis sociis, ab illa etiam domo recessit, quam semper in deliciis habuerat. Atque hic non sine jucundo animi sensu meminisse potuit eorum, quæ ipse olim cuidam responderat. Cum videret is, qui in prædicta domo Ministri gerebat munus, Rectorem suum, quidquid pro suo qualicum-



que commodo ab amicis, et propinquis acceperat, in ea sustentanda domo consumere; illi aliquando dixit, si quolibet tandem casu domus illa dissolveretur, quas pro ea expensas fecerat, nunquam sibi esse rependendas. Sed Osorius: *His ego, inquit, ne tantillum quidem commoveor, cum sciam, Deum esse solvendo cumulatissime.* Nec vero spes eum sua decepit. Nulla enim vitæ commoda, nulla mundi hujus oblectamenta tantum illi solatium afferre potuissent, quantum deinceps expertus est, cum in alteram immigrasset domum, quæ urbi propinqua erat. Ibi ab urbanarum rerum perturbatione semotus, cum duobus Sacerdotibus, et quodam laico, quem Œconomum suæ domus constituit, tranquillam vitam duxit in silentio, et patientia, atque in aliarum usu virtutum, quas a teneris didicerat exercere.

Etenim, ut aliqua de Osorii virtutibus singillatim dicam, eminebat in eo singulare religionis studium, quo Deum, ac divina præcipuis reverentiæ signis prosequabatur. Inde ad promovendum sacrorum cultum nullis parcebat sumptibus, ut in his præsertim locis fecisse illum vidimus, in quibus aliquam Sociorum domum cum potestate administravit. Et vero Salmanticæ præter illa, quæ jam opere compleverat, alia etiam ad majorem templi ornatum excogitaverat, quæ exequi temporum difficultate præpedito non licuit. Bononiæ vero in magnis rei domesticæ angustiis nihil habuit antiquius, quam ut Sacellum pulcherrimum erigeret, in eoque sedem Christo Domino constitueret, ut et multiplici Sacrificiorum oblatione, et iteratis multorum adorationibus coleretur. Ipse quotidie multas ibi horas perseverabat precando, adorandoque Deo suo, cujus consuetudine mirifice recreabatur. Mane quippe ita mature surgebat, ut rem divinam facere inciperet, cum cæteri excitabantur a somno: et longas hiberni temporis noctes ibidem pene integras insumebat, donec ad cœnam cum reliquis evocaretur: idemque per æstatem in pomeridianis horis solitus erat efficere. Sic solidos dies vel in cubiculo volvendis libris, vel in Sacello fundendis precibus exagebat. Nec nisi raro extra limina domus egrediebatur, nonnullorum coactus obsecrationibus, qui nimium valetudini timebant suæ, nisi eam una, vel altera per hebdomadam suscepta deambulatione

tueretur. Si quando vero vehementius illum urgerent aliqui, ut frequentius exiret domo, Medicorum objecta sententia, qui necessarium hoc sibi esse censebant; ingeniosus erat de more in eorum objectionibus dissolvendis. Nam domi manens tantam in faciendo motu collocare se operam contendebat, quantam posset, si longam extra domum conficeret ambulationem. Quod ut probaret, omnia illa recensebat opera, quibus ipse, dum alii deambulatum pergerent, intra domum exercebatur. In his tamen operibus, quamvis exercendo servirent corpori, pietatem pariter, et caritatem cum humilitate conjunctam excolebat. Tunc enim et in domestico verrendo Sacello, et in detergendis, atque ornandis altaribus occupabatur: prætereaque in superioris tecti cavum sæpe conscendens, ligna inde in culinam, et fasces in caminum deportabat, ut Socii sub vesperum redeuntes, fovendo per hiemem igni præparata omnia reperirent.

Ex eodem religionis studio vota illa, quibus se Deo arctiori vinculo perfectionis obstrinxerat, diligenti accuratione servavit. Inter delicias opulentæ domus enutritus, deinde parsimoniam religiosi victus ita libenter amplexus est, tantaque constantia retinuit, quasi eidem innatus fuisset: communemque aliorum vivendi, ac vestiendi morem sic adamavit, ut nunquam aliquid illi contrarium visus sit admisisse. Postquam Romæ docendi munus absolverat, inde in Castellam rediturus, viatoriam penulam, quæ apud Italiæ Socios usitata erat, conficiendo itineri adhibuit. Sed illam, quippe ab Hispanorum usu abhorrentem, ad regni fines deposuit, ne quid in provinciam suam inveheret, quod receptis in ea moribus adversaretur. Neque illa tantum, quæ intuentium patebant oculis, sed reliqua etiam communia, et vulgaria esse cupiebat. Cum aliquando interula quadam veste indigeret, eamque satis commodam habere potuisset; quoniam ab iis aliquidatenus discrepabat, quibus induti erant cæteri, non ausus fuit illam sibi desumere. Tantum ab eleganti vestium concinnitate non solo affectu, sed opere ipso discesserat! Nihil habebat proprium, ac ne illa quidem sua reputabat, quæ legitima cum facultate obtinisset. Salmanticæ, bene libentibus Superioribus, tablinum fecerat pro faciliiori librorum, et stu-

diorum usu. Cum deinde in aliud cubiculum pertransisset, instabat ille, qui relictum ab Osorio cubiculum occupaverat, ut is tablinum suum ad novam illam sedem transferret. Id autem persuaderi non potuit Osorio, qui tablinum illud non sibi, sed cubiculo construxisse, respondit. Et hæc quidem, cum privatus esset, agebat. Postquam vero publicam aliorum curam suscepit, maximeque in illius triennii spatio, quo totius provinciæ Sociis per varias terræ, marisque plagas jactatis præfuit, indefessam ubique adhibuit diligentiam, ut communis, et pauperis vitæ ratio fideliter ab omnibus teneretur. Et quanquam aliqui domesticis legibus in ea tam notabili mutatione rerum nonnihil laxamenti dari posse censebant; ipse tamen nullis aut rationibus, aut exemplis a sententia sua discessit, semperque pro antiquo paupertatis jure tuendo decernavit. Postquam venerat Calvium, Socios omnes admonuit, ut acceptam pensionem, et peculium, si quod haberent, apud Superiores suos deponerent, neque aliquid sine venia eorundem expenderent. Contendentibus deinde Ministris, qui solvendæ ibi pensioni designati fuerant, ut eam singuli acciperent, et, ut cuique libitum esset, administrarent; Osorius eorum conatibus obstitit, religiosaque constantia respondit: persuaderi sibi non posse, hanc esse Catholici Regis mentem, ut ipse tam præcipuam officii sui partem negligeret, suisque subditis contra ea, quæ sancte promiserant, liberum pecuniarum usum relinqueret. In eadem urbe Sacerdos, qui libras aliquot chocolati secum ab Hispania deportaverat, ubi magistrum exercebat, facultatem ab Osorio petiit utendi eis in tempore probationis tertiæ, quam initurus erat ibidem. Sed cum id antiquæ consuetudini repugnaret, obtinere utique non potuit ab Osorio, qui præcise illi respondit: *In tertia probatione vel omnes, vel nullus*. Adeo erat inexorabilis in remittenda veteri disciplina. Nec vero si severitatem in hac parte cum aliis exhibuit, quidquam propterea sibi ipse indulgebat. Quidquid ex aliorum liberali pietate reciperet, quidquid item industria sua per id tempus ipse conquereret, ad sublevandas provinciæ necessitates, et indigentium procuranda commoda conferebat. Suarum interea commoditatum oblitus, si quid illi deesset, non ideo aut tristitia, aut impatientia, aut

alia

alia qualibet animi perturbatione commovebatur . *Vidi ego illum non semel* ( ait quidam assiduus ipsius comes , et secretorum particeps ) *etiam parco illo destitutum victu , qui ceteris quotidie ministrabatur , vel ob nimiam inservientium incuriam , vel ob ipsam perturbati temporis iniquitatem . At nunquam ab eo verbum ullum audiui , vel indicium aliquid observavi , quo dolorem , aut displicentiam innueret ; sed tantam potius tranquillitatem , et pacem , quæ magnam mihi moveret admirationem .* Postquam provinciæ gubernacula deposuerat , deliberatum est de rigore communis vitæ mitigando , ut quorundam desiderio fieret satis , quantum Societatis jura permitterent . Ad eam deliberationem inter alios adhibitus fuit Osorius , qui sententiam de scripto dixit , in quo multo doctrinæ pondere , ac manifestis Instituti testimoniis confirmavit ea , quæ ipse paulo ante per omnes Sociorum domos statuerat . Factoque dicendi fine subjunxit : Si quis ad ea , quæ hic ego exposui , perspicue solideque responderit , libenter ipse in contrariam sententiam ibo . Sed Osorii scripto perlecto , nemo fuit , qui responsionem illi dare tentaverit : unde nihil super his , quæ in deliberationem venerant , fuit innovatum . In extremis vitæ suæ annis nihil de paupertatis studio remisit . Defuerant illi eo tempore , quo his maxime indigebat , numeraria quædam subsidia , quæ olim sibi a beneficis remittebantur . Et tamen neque ipse aliquid fecit , neque ab aliis effici passus est quidquam , ut nobiles ejus , divitesque propinqui opem sibi aliquam subministrarent . In suburbana illa domo , ad quam recessisse diximus , lætam in re tenui peragebat vitam , de nullo unquam hominum conquerens , Deique providentiæ plene confisus . Atque ita humanarum rerum a se abjecerat sollicitudinem , ut ne pensionem quidem suam administraret , cujus curam alteri demandaverat : ab eoque solum teruncios aliquos exigebat , ut eos inter mendicos dispartiretur , quos tenero miserationis affectu prosequeretur .

Qui longo annorum cursu intimam cum Osorio consuetudinem habuerunt , nihil unquam in ejus verbis , aut factis observarunt , quod pudicitia candori vel minimum adversaretur . Testis etiam virginei sui pudoris fuit aliquando primarius quidam Eques , qui cum fortuito apud illum esset , dum

e cubili surgebat, eximiam ejus modestiam in induendis vestibus ita fuit admiratus, ut exinde præclaram, et multo quam antea præstantiorem opinionem de Osorio, deque cæteris Societatis hominibus conceperit. Cum autem in tuenda castitate adeo esset diligens, in aliis etiam ejusdem virtutis studium promovere curavit. Audierat de Virgine quadam paupere, quam ne de facie quidem noverat, decentissimas nuptias ea solum de causa repudiasse, quod vehementer cuperet virginitatem suam Deo intra religiosa claustra consecrare. Id satis habuit Osorius, ut, nemine deprecante, dotem illi conferret, sumptusque faceret necessarios, donec sacrum velum accepit in Cœnobio quodam Virginum, in quo memor semper extitit tam singularis ab eo accepti beneficii. Egregiæ indolis juvenem, quem parentum inopia detinebat, ne Sacerdotium peteret, quod digne obiturus esse credebatur, liberaliter etiam adjuvit, ut Toletum pergeret, ubi Curiam e primariis obtinuit, quam multa cum laude, multoque cum animarum fructu administravit.

Jam circa ea, quæ ad obedientiam pertinent, promptus erat, ac diligens, non solum dum ipse in minoribus esset, sed etiam cum cæteris imperabat. Si quando decretum aliquod Superiorum tantisper exequi distulisset, dum eos de probabili emersuri damni timore admoneret, interea tamen animo erat paratissimo ad eorum ulteriora jussa exequenda. Quod si illi nihilominus imperata sua urgere perstitissent, Osorius, relicta proprii opinione judicii, parebat incunctanter, atque obortis inde nonnunquam incommodis alia via occurrere conabatur. Supra singulos domorum Rectores ita invigilabat, ut eorum auctoritatem apud inferiores defenderet, sed nihil propterea de benignitate detraheret, quæ subditis deberetur. Neque frequentes quorundam ad se recursus approbabat in his præsertim rebus, quas ipsi jure suo possent decernere: unde solitus erat eos ad Societatis leges remittere, ut juxta illas rem propositam ipsi definirent. Nihil vero ad Osorii obedientiam comprobendam æque valet, ac testimonium, quod de illo dedit Franciscus Xaverius Idiaquezius, vir omni exceptione major. Is, cum provinciam Castellanam administraret, ac de successore deligendo jam ageretur, Romam ad Præ-

positum Generalem scripsit, Ignatium Osorium aptissimum sibi videri ad munus illud cum dignitate sustinendum. Commemoratisque aliis illius dotibus, de his, quæ ad obedientiam pertinent, sic affirmabat: Nullum inter eos novi, quibus ego aliquando præfui, qui mihi promptius, ac submissius, quam Osorius, in omnibus obedierit. Cum autem id scriberet Idiaquezus, jam tum, præter Burgense Collegium, Tirocinium quoque rexerat, Collegiumque Salmantinum, quorum in utroque frequentissimus erat Sociorum numerus. Proindeque ad ostendendam hujus viri obedientiam nihil dici potuit significantius. Et quoniam huc evasis oratio, paucis etiam attingam quid Osorius ipse de obedientia Sociorum sui temporis judicaret. Non multo antequam ex hac vita cederet, cum sermo de Societatis rebus incidisset, auditus est dicere: *Quantum ego ex annalibus Societatis agnovi, et ex gubernandi usu comperi, virtutem obedientiæ, quam S. Ignatius in deliciis habebat, non minus perfectam fuisse judico inter posteriorum temporum Socios, quam in diebus Ignatii fuerit.* Cujus præclaræ sententiæ pondus tanto reputandum est majus, quanto difficilior erat Osorius in his, quæ ad mores pertinent extollendis, nisi consummatum aliquid attigissent.

Cum et clarissima generis dignitate, et præstantibus ingenii dotibus inter plurimos emineret, modeste adeo, ac demisse agebat cum omnibus, quasi præclara illa naturæ dona vel penitus non haberet, vel solus ipse ignoraret. Nunquam de his ille sermonem inferebat, neque si alius aliquis intulisset, jucundam præbebat aurem: multoque libentius cum infimis, et rudioribus, quam cum Magnatibus, et Sapientibus versabatur. Dum Methymnæ Philosophiam docuit, nonnunquam recreandi animi causa deambulationem cum discipulis usque ad Collegii villam suscipiebat. Hic longus illi sermo cum aratoribus, et fossoribus, multaque cum eis de agrorum cultu, deque agriculturalium instrumentis disserebat. Cumque inde ad suos discipulos regrederetur, in has, aut his similes voces solitus erat erumpere: *Rectius, credo, mecum egissent Superiores nostri, si me potius ad villam aliquam procurandam, quam ad volvendos libros, et frequentandas cathedras destinassent.* Ita alienus erat et ab honoribus appetendis, et ab ingenii sui viribus



ribus, quod plerique solent, supra meritum æstimandis! Romæ, ac Bononiæ multi viri principes, nonnullique purpurati Patres, quibus nota erant Osorii decora, frequentem cum eo consuetudinem habere desiderabant. Sed ille, nisi aut imperio, aut necessitate coactus, nunquam adduci potuit, ut in eorum intraret limina: neque constat, adiisse unquam ad Cardinalem Spinulam, quem Romæ nactus est, et cui erat consanguinitate conjunctus. Inter illos, qui eum honoris, et amicitie causa Bononiæ conveniebant, non defuit, qui domum illi suam ad habitandum obtulerit: quam quidem liberalitatem gratissimo rependit animo, sed eadem uti penitus recusavit. Verum excellentem animi moderationem in eo maxime ostendit, quod neque honores, neque despectus, quibus non semel affectus est, illum ab exaggeratione mentis altissima, et a sua tranquillitate dejiciebant. Sæpissime a nobilioribus, et optimatibus magnis amplissimi honoris significationibus fuit exceptus: sæpe etiam perinde habitus, ac si vulgaris homo esset, planeque sortis infimæ: nonnunquam atrocibus calumniis appetitus, et insolentibus oneratus injuriis: aliquando vero parum decenter coram frequentissimo Doctorum cœtu palam insimulatus est imprudentiæ. Sed in hoc tam vario dissimilium rerum occursum æquabilitatem suam constanter adeo retinuit, ut neque inter honores elatus, neque fractus animo inter despectiones appareret. Hæc omnia pari discrimine habere videbatur: aut si quid inter duo illa extrema interesset, id erat utique, quod honoratiora, quantum posset, effugeret; viliora vero sponte sua quæreret, et appeteret vehementer. Cum in ea domo, cui Bononiæ præfuit, propter adversam temporum conditionem Sacerdotes omnes decrevissent ministerio cuiusdam operam dare, quod laboriosum erat, et abjectum, firmissime apud se statuit in eo exercendo opere cæteris exemplo suo præire: multisque aliorum suasionibus opus fuit, ut a consilio recederet, quod manifestam vitæ suæ perniciem attulisset. Quantum denique ab omni honoris appetitione distaret, quantumque sibi ipse diffideret, tunc etiam evidenter ostendit, cum provinciæ præfecturam conatus est ante diem deponere. Literas ad Præpositum Generalem dedit, quibus eum suppliciter, et enixe deprecabatur, ut alteri munus illud

de-

deferret, cui se imparem, atque ineptum esse agnoscebat. Quod ut suaderet, tam multis, atque ad speciem validis usus est argumentis, ut quemlibet alium facile in suam adduxisset sententiam. Sed Præpositus, cui jam ab eo tempore notus erat Osorius, cum illum Romæ in Theologiæ magisterio Collegam habuerat, et qui singularem ejus prudentiam in provinciæ administratione jam ante perspexerat, et collaudaverat, longe abfuit, ut rationibus ab insigni ejus moderatione perfectis assentiretur. Itaque animos illi addidit, ut onus portare pergeret, quod hactenus laudabiliter sustinuerat, nec vellet provinciam suam iis defraudare bonis, quæ ab ejus prudenti sollicitudine reportabat.

Enimvero Socios in illo magistratus sui triennio per maris undas, terræque regiones varias huc illuc ejectos, tanta prudentia gubernavit, quantam a prudentissimo quoque in pacifico rerum statu quisquam sperare potuisset. Habebat, inter alias ad gerendum imperium dotes, excelsam animi magnitudinem, quam nullæ laborum moles facile superarent: quod in illo difficillimo tempore, in quo alia ex aliis oriebantur incommoda, plurimum eum juvat ad capienda consilia, quibus prompte malis occurreret insurgentibus. Erat insuper natura mitis, et suavis, pronusque ad aliorum erroribus indulgendum, quos ob ipsam temporum acerbitatem benignius excusabat: sed æque tenax juris, ac legum, nec facilis quidquam de disciplina remittere propter cujusquam gratiam, aut metum. In scientia autem juris domestici quotidiana illius lectione ita profecerat, ut in eo esset versatissimus: solitusque erat dicere, neminem se cæteris præpositurum, qui perfectam Instituti notitiam non haberet. Sed quanquam et peritia legum, et rerum usu, et perspicuo eminebat ingenio, adeo tamen ab omni fastu, et arrogantia erat alienus, ut non modo libenter alios audiret, sed sponte ipse a multis consilia peteret, quibus posset in rebus decernendis adjuvari. Atque in his maxime, quæ gravioris essent momenti, præter eos, qui sibi a consiliis erant, quosdam etiam probatissimos viros, ut consultius rem quamque decideret, in consilium advocabat. Quos cum audisset, sententiam illam, in quam aut omnes, aut major eorum numerus adierat, novo ipse rationum pondere

dere ita confirmabat, ut prudens quilibet rerum æstimator, quod in deliberationem venerat, neque sapientius, neque majori cum æquitate decerni posse, cognosceret. His ad imperandum artibus instructus, provinciæ suæ Socios ubique locorum prudentissime rexit. Calvii præsertim, inter frequentes belli terrores, et assiduas ex omni genere molestias, domesticum religiosæ vitæ ordinem ita constituit, ut nonnulli e Bæticis Patribus, qui in Suburbio ejusdem urbis debebant, Osorii prudentiam, et constantiam sæpe suspexerint, et laudaverint. Neque illi tantum. Supremus ipse Societatis Moderator, cum ab oculato teste audivisset, quæ Calvii ab Osorio fiebant; quam exacta per omnes Sociorum domos vigeret disciplina; quanta contentione juvenes, eorumque Magistri ad studia literarum incumberent; quam apæ denique omnia essent disposita; non potuit, quin Osorium coram Assistentibus collaudaret: deindeque literas ad eundem misit, quibus illi de optimo Sociorum regimine gratulabatur. Idem Præpositus Generalis, cum Osorius, absoluto jam magistratu, in proximum Bononiæ vicum discessisset, ad successorem ejus scripsit, gratissimum sibi facturum, si Osorium juxta se haberet, quo facilius posset ejusdem consiliis uti, et vestigiis insistere, quæ ille inter administrandam provinciam adeo prudenter, ac feliciter impresserat. Bononiam ergo venire debuit, ubi Provincialis sedem fixerat, illique in expediendis, quæ occurrebant negotiis, non modicam opem tulit. Sic illa calamitas exilii, quam Osorius ipse pro sua modestia, ad laudandam superioris vitæ socordiam, evenisse sibi crediderat; ad ostendendam maxime prudentiam ejus, aliasque præclaras doctes in Sociorum commodum exercendas, dicenda est deservisse.

Multi quidem Sociorum inter singularia Dei beneficia computabant, quod in ea miseranda rerum commutatione talem provinciæ suæ dedisset Moderatorem, iis humanis, divinisque præstantem donis, quæ tum maxime requirebantur ad tempestatem illam quanto levioere fieri posset damno sustinendam. Dum ea vehementius desæviret, nemo illum turbatum vidit, multoque minus animo concidentem. Sed tunc ille in primis ad divinam implorandam opem recurrerat, iis Cœlitibus interpositis, quos frequenti religione venerabatur. Deinde

de perspicaci suæ mentis acie vias omnes investigabat, per quas posset in re qualibet ad feliciorum exitum pervenire. Tandemque in his exequendis, quæ semel ad eum finem oportuna judicasset, acerrimam adhibebat diligentiam. Nec dubitabat quoscunque homines, etiam infimæ classis, incunctanter adire, suppliciterque deprecari, quoties ab eis auxilium aliquod obtinere speraret pro suorum necessitatibus sublevandis. Omnesque adeo mansuete, et affabiliter alloquebatur, ut plerumque illorum animos sibi facile conciliaret, iidemque palam assererent, tali viro, ac tam sollicito Superiori nihil omnino posse denegari. Si quando vero, vel in avertendis malis, vel in commodis procurandis, nihil industria sua proficeret, nunquam illi caritas deerat, ut subditorum animos, quocunque modo posset, recrearet: semperque in promptu illi erant verba suavissima, saluberrimæque consilia, quibus eos ad patientiam, et constantiam erigeret inter adversa. Ut autem verbi vim adderet efficaciorum, exempla quoque dabat fere quotidiana, quibus alii ad sustinenda fortiter adversa poterant excitari. Etenim in turbulento illo præfecturæ suæ tempore passus est ipse cum omnibus, et supra omnes; siquidem aliorum labores proprios sibi ipsi efficiebat et ratio sui muneris, et suæ miserationis affectus, qui eum ad negligendam sui curam non semel adegit, ut aliorum commodis inserviret. Sed inter tot adversantis fortunæ casus nunquam ab animi æquabilitate, quæ constantem virum decet, visus est defecisse.

Eandem animi constantiam vel in extrema infirmitate, quæ molestissima fuit, ac diuturna, cum multorum admiratione retinuit. Sub finem anni millesimi septingentesimi septuagesimi sexti apoplexi, et rheumate adeo graviter laborare cœpit, ut exinde per continuos viginti menses, quos in lecto decubuit, acutissimis doloribus urgeretur. Ab eo jam tempore, cum Bononiæ Sociorum domum regebat, convulsionibus interdum perterritabatur, quas aliqui gravioris mali prænuntias existimabant, proptereaque illum hortabantur, ne tanta contentione mentalibus insisteret exercitiis. Sed Osorius per eos maxime annos divina frequentius pertractabat, et quasi præsentiret, non diu se inter homines versaturum, ferventiore in Deum spiritu ferebatur. Cum deinde vis morbi tandem erupit, multis virtu-

tum exemplis aperte demonstravit, quantum ex sua cum Deo consuetudine profecisset. Per duos circiter annos ita lectulo affixus, ut nunquam sinistro lateri posset insistere, dolorum acerbiter invicta patientia toleravit. Multi ad eum veniebant, ut aliquam in tam diuturno, ac periculoso morbo consolationem ingererent. Sed perspecta illius animi tranquillitate, perpetuaque voluntatis suæ ad Dei beneplacitum submissione, ab eo cum admiratione discedebant, multique lacrymis non poterant temperare. Qui assidue illi aderant, multo magis tolerantiam ejus admirabantur, soliti nonnunquam dicere, sese quodammodo desiderasse, ut gemitum, aut vocem doloris indicem promeret, quo facilius, et opportunius possent delinimentum aliquod adhibere. Sed Osorius acerrimi vim doloris sereno premebat vultu: et quanquam remediis uti non renuebat humanis, divina tamen præcipuo quodam usurpabat studio. Obtenta privati Oratorii facultate, unam quotidie Missam, non raro duas, ex suo lectulo audiebat, aperto semper capite, etiam si nonnullum inde incommodum experiretur. Frequenter de cœlesti ferculo participabat, ablutis prius conscientia suæ maculis ad pœnitentiæ fontem, ut uberiores ex vitali cibo fructus perciperet. His alia multa pietatis opera superaddebat, tum audiendis libris, qui de divinis agerent; tum precibus fundendis ad Mariam Virginem, aliosque non paucos de numero Beatorum; tum etiam sententiis aliquot brevibus iterandis, quibus opem a Deo frequenter, et humiliter implorabat. Inter hæc promptus erat ad exequenda Medicorum præcepta quælibet, nullamque potionem sumere recusabat, quantumvis amara esset, aut injucunda: parique submissione iis omnibus obediebat, qui ei sua in infirmitate ministrabant.

Sed cum parum medicamenta omnia proficerent, ex Medicorum consilio ad Porrectanas deportatus est thermas, ubi calidæ scaturiunt aquæ, quæ multis fuerunt proficua. Iter illud, quod vulgo triginta duo mille passus habere creditur, in oblonga lectica, cui lectulus erat inditus, sine magna difficultate confecit. Ex balneorum usu nonnihil initio visus est relevari: sed cum ea sub æstivis maxime prodesse soleant caloribus, qui jam præterierant, per quam modicum inde levamentum accepit. Propterea sequenti anno idem iter opportuno-



niore tempore instituit ex illorum consilio, qui nihil non tentandum censebant, ut tanti viri consulerent valetudini. Verrum hoc sedulum amicorum studium id tandem effecit, ut Ignatius Osorius, qui, clarissimis licet ortus natalibus, semper tamen libentius cum humilioribus vixerat, quam cum proceribus, vitam quoque in obscuro, atque humili loco finire: quod eidem pro eximia animi sui modestia perjucundum fuisse non dubito. Etenim cum Porrectam iterum advenisset, per integrum mensem ibi commoratus, nunquam ad thermas potuit accedere: et cum viribus quotidie deficeretur, animi potius, quam corporis saluti prospexit. Quod Bononiæ fecerat, hic etiam perrexit efficere, ut Sacrum quotidie audiret, divinaque Sacramenta frequenter, ac religiose reciperet. Evangelia illa cum psalmis, et precibus, quæ pro juvandis infirmis designata sunt ab Ecclesia, sæpe recitari sibi petebat, ab eisque magnum animi solatium, imo et dolorum delinimentum reportabat. Eodem modo quotidianas fundebat preces ad multos e Beatis viris, ac feminis, quibus peculiari affectu fuerat semper addictus, ut felicem per eos mortem impetraret, quam ipse vehementer cupiebat, et tranquillo, atque hilari expectabat animo. Rogatus a Parocho, ubinam, et quo modo vellet inhumari? *In quovis loco sacro, et sine ulla pompa*, respondit. Nempe, qui semper ab omni fastu abhorruerat, moderationem suam ad sepulcrum usque retinuit. Ardenter desiderare se agebat, divinis mysteriis opportune præmuniri, ut robur inde reciperet, ad viriliter in extremo conflictu decertandum: illudque tandem pro votis obtinuit. Undecimo Kal. Augusti novendiales inceptor preces in honorem Parentis, et cognominis sui Sancti Ignatii, quem semper religiosissime coluerat. Novendialibus in ejusdem pervigilio peractis, confessionem etiam peccatorum instituit, ut Eucharistiam sequenti die de more reciperet. Sed benignissimus Patronus devoto clienti præmium devotionis suæ repræsentasse videtur; et quem in longiore vitæ suæ tractu filium non degenerem habuit, in morte quoque multis sibi similem reddidit. Nam Osorius, postquam rite confessionem absolverat, graviori urgeri cœpit periculo: proptereaque sub illius noctis crepusculum sanctissimo refectus est Viatico, et paulo ante mediam noctem extremam quoque re-



cepit unctionem. Applicitis deinde poenarum remissionibus, commendataque Deo anima solemnibus precibus, cum invidenda quadam tranquillitate ultimum emisit spiritum anno Domini 1778, ætatis suæ 65, die 31 Julii, feria sexta, quam ille semper ob memoriam Dominicæ Passionis summa religione venerabatur. Atque in his tribus moriendi conditionibus omnimodam habuit cum S. Ignatio similitudinem, qui eodem die, eademque feria, et totidem natus annos obivit.

Sepultus est Osorius in Parochiali templo Porrectæ modestissimo funere, ut ipse petierat, nullaque ad ejus tumulum posita inscriptione sepulcrali. Hæc sane conspicuis clarissimi Viri meritis non fuisset indebita; sed ut perennaret ibi nomen Osorii, minus quidem erat necessaria. Quoniam apud illam gentem, quamvis modico cum ea tempore conversatus, suarum vestigia virtutum tam alte reliquit impressa, ut illas multis post ejusdem obitum annis recenti adhuc, et jucundissima recordatione commemorarent. Cæteris, qui longam cum Osorio vitæ consuetudinem habuerant, peracerbus fuit ejus interitus. Doluerunt enim omnes tantum amisisse Virum, generis splendore magnum, sed generoso splendoris hujus contemptu majorem; ingenio mitem, et placidum; mentis amplitudine ornatum eximia, qua divinas subtiliter, ac profunde pertractabat scientias, et humana solerter expediebat negotia; temperantem in lætis, in adversis vero constantia præditum singulari; qui denique omnes vitæ suæ rationes ad honorem Dei, et hominum commoda promovenda destinaverat. Sed nobis hoc malum eo tolerandum est moderatius, quod et ille, ut speramus, cœlesti jam adscriptus est patriæ, et nos in hoc ærumnoso exilio præclaris virtutum ejus exemplis ad beatam illam civitatem obtinendam possumus excitari.

## CLEMENS RECIUS.



**E**x honestis, piisque parentibus natus est IX Kalendas Decembres anni MDCCIII in regni Legionensis oppido, quod Torrecillam Ordinis vocant, eoquod subeat equestri Ordini S. Joannis. Fratrem habuit natu minorem, Bernardum Recium, qui vestigia majoris insecutus, ipse quoque Societati Jesu nomen suum dedit: et postquam provinciæ Castellanae præclaris virtutum omnium illuxerat exemplis, in Americam trajiciens, Quitenses populos ministeriis Apostolicis strenue per multos annos excoluit. Inde ad procuranda provinciæ suæ negotia in Europam regressus, post labores, et carceres impavide semper, lætanterque toleratos, Romam tandem permissus est advenire. Hic inter assidua pietatis, et caritatis opera reliquam vitam duxit, eidemque laudatissimum finem, relicto suavi sanctitatis odore, ante annos non ita multos imposuit. Bernardi acta diligenti collecta studio Gaspar Janerius Italico sermone perscripsit, Fulginæque typis edidit anno 1794.

Clemens sub Parentum, et Magistrorum vigili disciplina pueritiam suam laudabiliter egit: et cum egregiam naturæ indolem obtinuisset, christianis, elementariisque rudimentis jam bene instructus, latinam quoque linguam brevi percepit. Elucebat jam tum in puero morum candor ingenuus, unde spem multi non dubiam concipiebant illius futuræ probitatis. Nec diu ille distulit expectationi, quam de se moverat, cumulate respondere. Cum attigisset ætatis annum decimum quintum, mundanis rebus nuntium remisit, et tironibus annumeratus est Societatis Jesu mense Aprili, anno millesimo septingentesimo decimo octavo. In ea positus religiosæ perfectionis schola, modestiam, et silentium, aliasque virtutes ita didicit observare, ut vitiosa declinaret extrema, quibus aliqui professionem vitæ sanctioris austeriore, ac tetrico vultu minus gratiosam, et amabilem reddunt. Sic enim in adimplendis tirocinii officii erat

erat exactus, ut nihilominus affabilis esset omnibus, et iudicii maturitatem suis superiorem annis ostenderet. Inde ad studia literarum progressus, in his addiscendis perseverantem adhibuit diligentiam: et cum aliunde perspicuo, et experrecto esset ingenio, humanas pariter, et divinas scientias multa cum laude fuit assecutus. Eas deinde, cum Sacerdotio jam esset initiatus, jussus est aliis tradere, quod ubique cum ingenti approbatione, atque auditorum insigni fructu perfecit.

Primum humaniores literas docuit in Seminario Villagarsiensi, ubi discipulos suos in latini proprietate sermonis, in rhetoricis, poeticisque præceptis solerti, et infatigabili eruditivæ studio. Sed cum leges castigate loquendi traderet, opportune quoque instillabat recte vivendi documenta, tum sapientissimis monitis inculcandis, tum etiam exemplis integerrimæ vitæ exhibendis. Ita de illo testificatur vir quidam fide dignissimus, qui per id tempus frequenter, et intime cum eo agebat: idemque adjungit, cum ad eum ingrederetur, non semel reperisse illum perfusum lacrymis, quas non aliunde credebat fluere, quam ex ferventi, ac tenero ejus inter orandum affectu. Apud cæteros Collegii Socios, atque etiam inter incolas illius populi, externosque discipulos magna erat de doctrina, et virtute Clementis existimatio. Eandem Vallisoleti retinuit, dum ibi Philosophiam explicuit in Ambrosiano Collegio. Facta deinde solemnî quatuor votorum professione, quam emisit anno 1737, quo die cœlestis nuntius Mariam Virginem salutavit, novum inde sumpsit ardorem ad Dei gloriam, et salutem hominum promovendam. Post hæc Theologiæ Magister designatus, illam diu Segoviæ docuit cum manifesto discipulorum profectu, et communi Doctorum acclamatione. Increbuit hæc plurimum inter cives, cum orationes sacras habere cœpit in templo. Sive enim vitia reprehendenda susciperet; sive virtutes, earumque sectatores commendaret, adeo apposite utrumlibet tractabat argumentum, ut nihil aut vehementius, aut ornatius fieri posse, suis auditoribus videretur. Eamque bene dicendi laudem, ubicunque verba faceret constanter fuit assecutus: unde per universam provinciam optimi Oratoris famam semper obtinuit. Segoviæ vero ex hoc duplici concionandi, docendique munere, quod

quod eodem obivit tempore, multam sibi laborum segetem comparavit. Cum enim ad opinionem doctrinæ integritas etiam accederet vitæ, quam omnes ex religiosa morum gravitate, atque affabili cum cæteris agendi modo agnoscebant, quam plurimi veniebant ad ipsum, non solum ut conscientiam deponerent delictorum, sed etiam ut domestica, civiliaque negotia ex illius consilio ad prudentiæ, ac justitiæ leges componerent. In his audiendis, ac dirigendis multas cum indefessa patientia, et caritate ponebat horas, egregiumque reportabat industriæ, ac sapientiæ suæ fructum: qui cum ad plurimos pertineret, per Segoviensium ora faustissimo rumore, et magna Clementis commendatione ferebatur.

Quamvis notum Superioribus esset, Clementem in urbe illa et erudiendis discipulis, et juvandis omni ope animis utilissimam operam collocare; cum æque perspectas haberent singulares ad gubernandum dotes, quibus cœlitus erat instructus, eum a docendi munere ad Sociorum regimen advocarunt. Brevique omnibus patuit, electionem consultissimam fuisse, licet Clemens longe aliter pro sua humilitate sentiret. In Collegio, cui primum præesse debuit, non leves occurrebant causæ, quæ nimis arduam ac difficilem redderent illius administrationem. Sed ille prudentia, et constantia sua, divinaque adjutus ope, quam frequenter implorabat, difficultates illas ita superavit, ut ejus solertem industriam, regendique peritiam omnes cum admiratione laudaverint. Et cum ea plerumque sit Moderatorum conditio, ut inferiorum querelas omnino vitare vix possint, tamen de Clemente Recio illi etiam perhonorifice, reverenterque loquebantur, quibus, si humana spectetur infirmitas, non deerat color aliquis ad obloquendum. Adeo ab studio partium erat immunis, ut cum vel præmia, vel pœnas decerneret, nullam violatæ justitiæ incurreret suspicionem. Deinceps Collegium Compostellanum, Methymnense, Salmantinumque rexit, in quibus Societatis Juvenes ad majores scientias informabantur. Magnam in his domibus vigilantiam adhibuit, ut juvenus illa cum observantia legum exacta, quæ religiosæ succus est vitæ, strenuam quoque in acquirendis scientiis diligentiam conjungeret, illasque ad altissimos fines dirigeret, divinæ scilicet gloriæ, et salutis hominum

num procurandæ. Magnam itidem prudentiam ostendit in lapsibus, ad quos proclivis est juvenum ætas, vel provide præcavendis, vel iisdem, dum æquum erat, dissimulandis, vel denique cum res exigeret arguendis, et corrigendis. Quod cum efficeret, gravissimum adhibebat verborum genus, cujus ponderi nemo non cederet; sed tamen ita grave, ut in eo pater-na potius auctoritas, quam censoria severitas appareret.

Dum his diligenter instabat curis, provinciæ Præpositus illum ad se vocavit, ut inter lustranda Collegia consiliis ejus uteretur, sibi que ab epistolis inserviret. Hoc munus, quod magna omnium approbatione Clementi delatum est, ita ille sustinuit, ut expectationem quam de se moverat, experientia potius auxerit, quam imminuerit. Re ipsa mirabili benignitate promptum se, atque officiosum omnibus exhibebat, qui ad eum coram, aut per literas recurrerant, ut consilium ab eo peterent, vel solatium quærerent in adversis. Quin etiam, ut a viro accepimus summæ fidei, sua ipse sponte, neque alio, quam sinceræ caritatis actus impulsu, nonnunquam illis suam operam pollicebatur, quos verecunda quædam cunctatio prohibebat, ne illum deprecatores adhiberent. In alios vero ita beneficia conferebat, ut ipsi potirentur optatis, neque tamen beneficii auctorem agnoscerent: quod eo præstantius est beneficentiæ genus, quanto minus inter homines usitatum. Cæteras laboriosi sui muneris partes accuratissime implevit: et cum passim prudentiæ, ac religiosæ integritatis, aliarumque virtutum vestigia impressa relinqueret, aptissimus ubique reputabatur, cui aliquando totius provinciæ cura demandaretur.

In eadem sententiâ erant, qui de summis provinciæ rebus consultabant: sed iisdem timebant vehementer, ne Clemens pro notoria sua modestia munus illud refugeret, adhibita infirmæ valetudinis excusatione. Quanquam enim robustissima corporis constitutione hactenus fuisset, ex assidua tamen laborum contentione multum ab antiqua deciderat valetudine. Itaque, ut effugium illud, si qua via posset, homini modestissimo præcluderetur, id Consultores effecerunt, quo præclaram de ipso conceptam opinionem indicarunt. Antequam Romam pro designatione novi Præpositi Provincialis literas mitterent, a Medicis, qui frequentius Clementi aderant, exquisierunt,



runt, possetne ille munus hoc sine detrimento suæ valetudinis sustinere? Quod cum illi pro testimonio affirmassent, Consultores suffragia sua simul cum eo testimonio ad Præpositum Generalem remittunt. Præerat eo tempore Societati R. P. Laurentius Riccius, qui Clementem Romæ cognoverat, dum is inter Electores comitiis interfuit, quæ ibidem habita fuerant anno 1755, magnamque de illo jam inde habebat existimationem. Nunc ergo volens, ac libens provinciam Castellanam illi decrevit anno 1761. Atque ut spem omnem declinandi honoris eriperet, eum admonuit, nequid contra tentaret, cum certissime non esset exaudiendus. Clemens itaque, quamvis haud parum repugnante animo, *vehementerque metuens* (sic ille ad Generalem scripsit) *citius se illo munere conficiendum, quam illud ipse conficeret*, prompte tamen humeros supposuit oneri, et periculum amittendæ salutis pro tuenda obedientia facile contempsit. Dum viribus utcumque valuit, per omnes Sociorum domos religiosam disciplinam, humanarum, divinarumque literarum studia, cæteraque ministeria diligenter promovit, atque omnes paternam ejus sollicitudinem cum gaudio suspexerunt. Sed antequam triennium sui magistratus absolveret, ita ejus salus concidit, ut in eo portando onere longius progredi non potuerit. Licet enim equitationis motus, et frequens mutatio cœli multum ei prodesse potuissent, ut Medici existimaverant, ex cæteris tamen itinerum molestiis, ac præsertim ex gravissima negotiorum mole, quæ nunquam ipse perfunctorie tractabat, sed exquisita quadam perficiebat diligentia, nimium quantum debilitatus fuit viribus. Itaque cum in valetudinem suam Præposito Generali fideliter exposuisset, ab eo tandem obtinuit, ut Provinciæ curam deponeret, postquam illam communi omnium plausu per biennium administraverat. Tantam vero lætitiæ voluptatem ex abdicatione illa percepit, ut infirmo etiam corpori novus vigor accesserit, et spem multis fecerit, pristinæ restituendum esse firmitati. Et quanquam eos spes illa fefellit, Clemens tamen in longos vitam suam produxit annos; in quibus Socios, si minus publicis obeundis muneribus, consiliis certe, atque exemplis plurimum juvit.

Cæterum, ut a contractis incommodis valetudinis penitus



tus convalesceret, vix quidem sperari jam poterat in procellosis illis temporibus, quæ supremum minabantur exitium hominibus Societatis. Hanc ille medullitus diligebat, et cum variis in locis violenter impeteretur, majorem vim, ad humores sui corporis perturbandos, illæ habebant calamitates, quam ad sedandos medicamenta. Apud Hispanos quidem nondum vis eruperat tempestatis, quanquam aliqua subinde nubila consurgebant, quæ illam portendere videbantur. Quidam enim facile movebant lites, quæ multam Societati conflare poterant invidiam. Ipsi etiam Recio, dum Salmanticæ Sociis præerat, satis molestæ lites intentatæ fuerunt, in quibus expediendis, ac defendendis tantum studii, ac laboris contulit, ut detrimentum salutis suæ inde provenisse, non temere possit existimari. Sed in Lusitania graviores procellæ insurrexerant, quibus Socii vel in exilium acti, vel in arctissimas detrusi sunt custodias. Cum Vallisoletum hujus rei fama pervenit, Clemens orationem habiturus erat ad Socios, quod fieri solitum erat in pervigiis Sanctorum aliquot, ut omnes ad eorum sequenda exempla ferventius incitarentur. Accepto ergo tristissimo nuntio, quam jamjam dicturus erat orationem rejecit, novamque aliam intra brevissimum tempus composuit. In ea tenerrimum suum erga Societatem amorem, et ob recentem cladem dolorem vehementissimum, aliaque eidem argumento convenientissima tam vivide expressit, ut in auditoribus præter admirationem eloquentiæ suæ, dolorem etiam, et compunctionem, cæterosque affectus, quibus ipse tenebatur, efficaciter excitaverit. Non multo post in Gallia etiam variis modis exagitari cœperunt Socii: primumque suis sedibus, deinde regno etiam excedere coacti sunt, multique in Hispaniam confugerunt. Hæc omnia Clementis torquebant animum, nimiumque recuperandis sui corporis viribus adversabantur: siquidem affectiones animi, dum in hæc sumus concretionem mortali, ut præcipuam habent efficientiam ad roborandam valetudinem, sic etiam habent ad infirmandam.

Cum deinde Hispanis quoque Sociis indictum fuit tandem exilium, adeo erat infractis viribus, ut Ministri regii censuerint, sine imminente vitæ periculo non posse cum cæteris proficisci. Propterea Vallisoleti menses aliquot mansit inter

ter filios S. Francisci de Paula , quorum sollicita caritate recreatus , viam deinde potuit arripere , quamvis ægra semper , ac debili valerudine , ut suis fratribus adjungeretur . Vallisoleto Carthaginem venit longo satis , difficilique itinere , ibique conscensa navi , ad Corsicam appulsus est secunda die Novembris anni 1767 . Inter navigandum multa perpessus est adversa , quæ nihil tamen de illius animi constantia detraxerunt . Jam diu erat , cum assiduo tremore manuum laborabat , et accedente modo frequenti jactatione navis , vix ea per se poterat exequi , quæ ad vitæ usus maxime sunt necessaria . Sed inter tot maritimi , vel terrestris itineris incommoda non illum expostulantem audisses : quin potius dum aliquid adversi occurreret , plerumque festivum aliquod dictum ore renidenti proferebat , quod suam in perferendis malis indicabat alacritatem , et opportunum erat insuper ad spirituales aliquem fructum in adstantibus ingenerandum . His vero , qui sibi opem aliquam contulissent , prolixas agebat gratias , eorumque beneficentiam humanissimis verbis , atque intimis affectibus rependebat . Quidam ex illis , qui Clementi per id tempus inservierunt , hodieque cum admiratione commemorat et constantem ejus in laboribus tolerantiam , et altissimam animi demissionem , qua perinde aliorum erga se officia excipiebat , quasi penitus immerenti fuissent exhibita . Post decimum mensem iterum a Corsica solvit in Liguriam , indeque per Hetruriam profectus , Bononiam venit , multum ex itinerum molestiis , et suæ valetudinis incommodis afflictus .

Quibus nota esset extrema corporis macies , ad quam in Hispania redactus fuerat , vix sibi persuadere potuissent , Clementem per tot viarum incommoda Bononiam tandem fore adventurum . Sed ille sub extenuato corpore animum gerebat eximium , erectamque mentem in Deum , ad quem in omni adversantium rerum conflictu cum fiducia recurabat , ut vires sibi sufficeret ad sustinendum . Hæc eadem animi magnitudo plurimum ei contulit , ut gravissimum illud vulnus , quod ex insperata Societatis suppressione recepit , patienter , et æquanimiter ferret . Quamvis enim illam præ oculis amaret suis , divina tamen consilia profunda veneratione reveritus , nullam

interposuit moram, ut ea quæ jubebatur, expleret. Deposita Societatis veste, quam semper digne gestaverat, veterem vivendi morem, quantum sibi licebat, constantissime retinuit. Paulo supra sexennium deinde vixit, affecta semper, imo etiam debiliore processu temporis valetudine, sed animo ad pietatem impigro, atque in omnem exercendæ virtutis occasionem intento. Admonebatur enim ipsa sui corporis imbecillitate, non longe abesse diem, quo mortalem poneret sarcinam, indequæ novos capiebat animos ad mercedis æternæ meritum in dies accumulandum. In pervestigandis, ac detergendis animi maculis, quanquam diligens antehac fuerat, majorem modo conatum adhibuit, seseque totum attenta quadam inquisitione perscrutabatur, nequid uspiam adhæresceret labis, quod divinis posset obtutibus displicere. In extremo vitæ suæ anno frequentius ad se vocabat Sacerdotem illum, quem habebat conscientiæ judicem, cum eoque multa de iis colloquia conserebat, quæ potissimum juvare possunt ad mortem feliciter obeundam. Alias etiam pietatis exercitationes ferventius per id tempus exequabatur: tandemque in his obeundis pene dici potest immortalis. In ipso S. Francisci Xaverii pervigilio, dum Marianæ Rosari præces in Sacello domestico cum domesticis aliquot de more persolvit, repentina correptus est apoplexi, cujus vi torpente lingua, præcipienti respondere non potuit. Accurrunt statim cæteri, et expertem sensu collocant in strato: alius ad Medicum, alius vero properat ad Confessarium. Is in divinæ providentiæ laudem erumpens: *Crediderim, ait, S. Xaverium in solemnibus ejus Clementem nostrum corporeis absolutum vinculis secum velle deducere. Et vero ille quamoptime comparatus est ad migrandum: nam præter alia huic ingredienda via peropportuna, paucis ab hinc diebus totius vitæ noxas in sacro tribunali expiavit.* Quod autem de imminente ægrotantis obitu dixerat, haud aliter, quam ille suspicabatur, evenit. Nam Clemens in die festo S. Xaverii animam egit anno Domini 1779, ætatis suæ 76. Corpus ejus decenti funere tumulatum est in æde Sacra S. Nicolai ad viam, quæ S. Felicis appellatur.

Inter virtutes, quæ Clementis animum exornarunt, divina elucebat fides, cujus vigor dignoscebatur ex reverenti,

ac modesta corporis conformatione , qua Deum frequenter adoraturus sese sistebat in templo : ex incensa quoque aviditate , qua Sacrificium quotidie peragere desiderabat , vel , si minus id posset , eidem saltem adesse , sacrumque participare convivium , quamvis multa interim incommoda obdebiliorem valetudinem devoraret : ex íntimo denique affectu , quo in his , quæ ad divinum cultum attinent , sese constanter exercuit . Puerum Jesum , Matrem Virginem , hujusque Sponsum castissimum tenerrimo pietatis sensu prosequabatur : in eorumque honorem quotannis vestiebat puerulum , feminam , ac virum pauperes , qui Sacram illam familiam , quoad ejus fieri poterat , exhiberent . Ad solemniores B. Virginis ferias cum ferventiore spiritu celebrandas , novem sibi desumebat dies , in quibus eminentissimas ejus dotes contemplabatur , et orabat prolixius , et alia religiosi cultus opera frequentabat . Inter beatos cœlestis aulæ cives præcipuo venerabatur studio S. Ignatium , ejusque filios , qui Sanctorum adscripti sunt fastis : et eorumdem cultum apud alios etiam promovere curavit . Egregiam quoque operam contulit ad augendam inter Hispanos S. Jacobi Apostoli religionem . Nam quo tempore deliberatum est de instituendo festo Apparitionis S. Jacobi Hispaniarum Patroni , Clemens Compostellano Collegio præerat : ibique rogante Andrea Gondaro , qui Mesochori dignitate in æde principe fungebatur , lectiones , ut ajunt , secundi Nocturni omnino ipse composuit : reliquas Officii partes in eum modum , quem in Breviario Hispanico videre licet , aptissime accomodavit ; hymnis tantummodo exceptis , quos ipse Joachimo Larizio politissimi oris adolescenti , qui philosophicis ibidem vacabat studiis , conscribendos injunxit . Scio equidem , Faustinum Arevalum , quem multis mihi nominibus carum , nonnisi ægre adducor , ut in hac parte corrigam ( adeo cultis pariter , et eruditis ejus delector scriptis ) totum illud Officium in sua *Hymnodia* adjudicare Larizio . Sed quicumque Faustinum meum in eam opinionem induxerint , ii mihi de hac re tota non bene videntur instructi . Ego certe , post diligentem adhibitam inquisitionem , ut Clementi totum præter hymnos attribuam , testes habeo fide dignissimos : quorum alii sub eodem Clemente vivebant tum Compostellæ , alii de-

inde Clementem ipsum, quod hic ego posui, confirmantem audierunt. Nec verisimile est, negotium adornandi preces Sacerdotales eo tempore datum fuisse Larizio, quo is de ratione illas fundendi nihil dum noverat. Correctionem hanc spero non gravate laturum Arevalum, qui olim admonitiones meas pronis auribus, et lenissimo excipiebat animo. Quamquam cum subtili esset, facundoque ingenio, et infatigabili assiduitate, paucis admodum monendus erat, ut per amœniorum literarum spatia pede curreret inoffenso. Scilicet, quid grandior futurus esset, jam tum manifestis portendebat indiciis. Nec rursus Janerio assentior, qui Clementi nostro in Vita sui fratris Bernardi totum illud officium attribuit, ne hymno quidem excepto, qui Larizio sine dubio debet adscribi.

Valde etiam afficiebatur Clemens erga S. Joannem Chrysostomum, cujus opera libentissime volutabat: nullusque dubito, quin multum inde profecerit ad eximiam christiani Oratoris laudem, quam apud omnes obtinuit, facilius assequendam. Sed idem dolebat sæpe, quod Græcorum literas, quas olim summis tantum labris attigerat, non ita didicisset, ut posset Chrysostomum nativo sermone loquentem capere, atque aureos ejus eloquentiæ latices sincerius in ipso fonte potare. Denique singulari pietatis affectu reverebatur inclytum illum Sacratioris arcani assertorem, S. Joannem Nepomucenum. Huic in Vallisoletano S. Ignatii templo sumptuosam, et elegantem constituit aram, ad quam in ejus natali die solemne Sacrum cum panegyri celebrari curavit, dum ipse Vallisoleti permansit. Exilii deinde lege promulgata, egit cum Paulanis Patribus, apud quos aliquandiu mansisse diximus, ut illius peragendi festi curam ipsi susciperent. Conficiendæ autem doti, ex qua fructus redire possent pro sumptibus in posterum efficiendis, quidquid sibi reliquum erat, fere totum libentissime impendit, ut suæ plenius satisfaceret devotioni. Id vero fiduciæ, quam repositam habebat in Deo, luculentum etiam extitit testimonium. Nam quo tempore procul a patriis finibus propulsabatur, non dubitavit his sese adminiculis spoliare, quæ sustentandæ valerudini tot præsertim annis, et incommodis debilitatæ, multi alii omnino sibi necessaria facile credidissent. Sed ille spem suam in eo, cui cura est de omni-



nibus, solide collocaverat: ideoque inter labores varios, et ærumnas, quibus frequenter fuit exercitus, in Dei providentia tanquam filius in paterno sinu acquiescebat. Bononia sub extremis vitæ suæ annis rogabat eum quidam enixe, ut ab se aliquid pecuniarum acciperet, quod obsequii, et grati animi causa libentissime offerebat. Verum Clemens, quamvis largissimus in agendis gratiis fuerit, multisque benevolentiam illam extulerit, ut aliquid tamen reciperet, adduci nequaquam potuit.

Fiduciam fovebat caritas, qua ferventer ferebatur in Deum, ut ex ejus inter orandum suspiriis, aliisque suavissimæ devotionis indiciiis apparebat. Huc ille cogitationes suas omnes, consilia, et studia omnia diligenter intendit, ut et ipse intime Deo adhereret, et alios ad inhærendum ei qua posset cumque vii perduceret. Hinc ardor ille, quo Socios frequenter adhortabatur, ut majorum exempla secuti, et Ignatii non degeneres filii, divinam ubique gloriam solícite promoverent. Hinc etiam conatus impiger, ut in adversis rebus, quibus maxime probatur amor, se totum cum divina voluntate componeret. Nam inter diuturnas corporis infirmitates, et graviores animi molestias, quibus ob assiduas Societatis oppugnationes afficiebatur, suam in Deum mentem convertens identidem, cunctaque ab eo providentissime gubernari considerans, sese in illius manus secure, totoque conjiciebat. Neque in his malorum incursum auditus est homines ipcusare, sed omnino divinis intentus ordinationibus, quidquid sibi molestum ex aliorum vel inconsiderantia, vel malitia obveniret, patienti et constanti animo propter Dominum tolerabat. Magna etiam erat Clementis caritas erga proximos, quos doctrina, et consilio plurimum adjuisse jam vidimus. Socios vero, quibus diu præfuit, paternis visceribus complectebatur, nullumque levamenti genus iisdem indulgere renuebat, quod domesticæ non obsisteret disciplinæ. Hanc ille gravem appellabat crucem, qua Superiori non licet subditos exonerare; licere tamen dilargiri fomenta, quibus ad eam portandam promptiores redantur, et alacriores. Nunquam ex tenui Collegiorum censu retardabatur, quominus suorum, vel etiam externorum necessitatibus abunde subveniret, quoties id caritas exegisset: videntur



que largitatem suam ex inexhaustis divinæ providentiæ thesauris, quibus fidebat plurimum, aliquando compensari. Dum Collegium regebat Compostellanum, regionem illam ob nimiam annonæ difficultatem dira fames afflixit, quæ copiosos mendicorum greges compulit intra urbem. Senatus inter alia, quæ ad eam sublevandam calamitatem prudentissime disposuit, Religiosorum familias interrogavit, quid quæque posset ad egenorum sustentationem subministrare. Clemens, auditis Consultoribus suis, sententiam probavit unius, qui summam duplo majorem quam cæteri designaverat, proindeque mille drachmas donare decrevit. Id in præsentibus rei familiaris angustiis multorum movit admirationem, et Nendorum Archidiaconus, qui tenues Collegii reditus non ignorabat, eam Rectoris liberalitatem ita suspexit, ut donum eidem miserit, quod tanti æstimatum est, quanta erat summa in subsidium pauperum destinata. Nec potuit pius Clementis animus, quiu Dei quoque suspiceret beneficentiam, qui promissam indigentibus, et nondum erogatam stipem tam prompta remuneratione rependit.

De illius in regendo prudentia tam constans erat Sociorum opinio, ut quo tempore delata ei fuit præfectura provinciæ, multi sibi invicem gratularentur, neque timendum esse dicerent, ne per illud triennium legum concideret observantia. Hæc sane viguit ubique, dum ipse provinciam administravit. Quantum vero, et quam suaviter eandem promoveret in Collegiis, quibus præerat Rector, poterit ex his facile conjici, quæ de illo, dum Salmanticæ regebat Socios, quidam eorum his verbis testificatur. *Per annum, inquit, Salmanticæ vixi sub Rectore Clemente Recio, cui Socii tum suberant nonaginta. Possumque fidem facere, nunquam me quemquam illorum audisse, qui de Rectore suo conquereretur, quamvis exactam vellet in omnibus disciplinam. Nec vero reprehensiones deerant, et punitiones. Sed cum præclara ejus exempla paterent omnibus; cum ipse frequentes haberet adhortationes, divina semper unctione perfusas; cum etiam correptiones ipsæ justissima essent, et paternum spirarent amorem, nullus erat querelis locus, sed omnes ad officium fortiter, et suaviter impellebantur. Quoties aliquem de admissio commonebat errore, paucissimis agebat verbis, eaque ad caritatis, et prudentiæ leges ita*

ita dimetiebatur, ut nihil ibi neque probrosum esset, neque superfluum. Nonnunquam, verbis omnino parcens, correxit errantes. Socii duo, qui simul procedebant in urbem ad negotia domestica procuranda, tardius aliquando redibant ad prandium. His quodam die sero advenientibus obviam prodixit Clemens in ipso Collegii aditu: nec dubitabant illi, quin suam merito argueret tarditatem. Sed mirati sunt viri prudentiam, qui præteriens tacitus, satis habuit ostendere, cunctationem suam sese de industria observasse: quod et ipsis fuit pariter satis, ut promptiores essent in posterum. Ad eum in angustiis, et afflictionibus suis magna cum fiducia confugiabant Socii, nec dubitabant intimos animi recessus illi aperire, quem perinde atque amantissimum Patrem habebant: sentiebantque læti, quantum ipse polleret consilio ad recreandos afflictos, et perturbationem animi dispellendam. Inter alios quidam ad eum venit, magna animi anxietate commotus, eo quod exercendo muneri, quod sibi a Provinciali demandabatur, sese ineptum prorsus agnosceret: longamque rationum seriem exposuit, quibus evincere conabatur, officium illud sibi minime convenire. Clemens, cum omnia patienter, ac sine interpellatione auscultasset, his tantum respondit verbis: *quidquid tibi per obedientiam injunctum fuerit, incunctanter aggre- dere: ab eaque semper regi te sinas, et procul aberis ab errore.* Hoc audito responso, fatetur is, qui ab ejus ore illud accepit, omnem statim posuisse sollicitudinem, et animos nec opinato recepisse ad ejus muneris executionem, in eoque nunquam tædium, aut difficultatem expertum fuisse, quamvis illo per annos plurimos et in Hispania perfunctus fuerit, et in Italia.

Fortitudinem, et patientiam illius comitem, in aggrediendis conficiendisque rebus arduis, et sustinendis adversis exhibit. In diuturno Sociorum regimine multa sibi occurrerent necesse erat, cum domesticis, et extraneis, ad quæ superanda non vulgari pectoris robore opus esset. Sed ille nullius canis, vel auctoritate detinebatur, quominus domi vigorem legum, foris autem suorum jura constanti animo tueretur. Archiepiscopus Compostellanus a quodam Clementis subdito, cui vir alius Ecclesiasticus injuriam intulerat atrocem, per spe-

ciem conciliandæ inter illos pacis, rem exigebat, quam bono suorum nomini contrariam putabat Clemens, ideoque permit-tendam sibi esse non censuit. Datis igitur ad Archiepiscopum gravissimis, ac sapientissimis literis, illum a consilio suo resillire coegit. Et cum Præsul ipse perspecta causæ justitia, liberam Clementi reliquisset viam, ut controversiam alio pacto dirimendam curaret, adhibiti deinde Judices causam illam Rectori Societatis adjudicarunt. Salmanticæ quoque suam perhibere constantiam debuit, ut conatibus multorum obsisteret, qui contra illius Collegii jura satis molesta contentione insurgabant. Ut ea sarta, tectaque servaret, multa scripsit ipse, quæ, cum esset legum bene peritus, præcipuam inter causidicos laudem promeruerunt. Hos autem labores, et contractam inde, ut credebant multi, valetudinis ruinam constanti patientia toleravit. Nec labores tantum, et dolores, sed injurias etiam aliquando sustinuit, quibus repellendis non aliud armorum genus, quam mansuetudinem, et patientiam objecit. Civis erat in urbe quadam, qui apertas cum Societatis hominibus gerebat inimicitias. Is quodam die, nescio quam erumpendi stomachum nactus occasionem, et Socios universe omnes, et nominatim Clementem, qui coram aderat, acrioribus ac pungentibus verbis insectabatur. Clemens, qui suam facile dissimulasset injuriam, pro Societate, cujus honorem peti videbat, nonnulla cum ingenta sibi gravitate, ac moderatione respondit. Sed illius verba vehementius furorem hominis incenderunt, qui procacius in Clementem ipsum patientissime sustinentem invectus est, donec tandem infrendens, ac multa secum obmurmurans, inde discessit. Post dies aliquot, cum indignitatem audaciæ suæ sedatius considerasset, quemdam amicorum ad Clementem allegavit, ut sibi diem, atque horam præstitueret, in qua posset eum sine arbitris convenire. Cum id obtinisset, gladium, quo præcinctus erat, ad cubiculi januam in reverentiæ signum deposuit: ad eumque ingressus, multis pœnitentiæ significationibus suam ipse impudentiam incusavit, veniamque de illatis sibi, Societati que injuriis suppliciter petiit. Postmodum venit ad eum Clemens in domum suam: relictoque in procætone socio, solus cum solo longum sermonem habuit, a quo suffusi uterque

que lacrymis recesserunt, quas ab altero sincerus delicti dolor, ab altero solatium inde perceptum expresserat. Denique vir ille in suæ testimonium reconciliationis, ad augendum in ea urbe religiosum S. Ignatii cultum, legatum quoddam instante jam morte testamento reliquit. Tantum apud eum potuit efficere Clementis invicta patientia, qui vel dum petulantius impetebatur, nullam contra illum offensionis vocem emisit.

Animi modestiam, et temperantiam aliis etiam in rebus frequenter manifestavit. Cum gravibus jam afflictabatur incommodis, multam ex colloquiis, et consuetudine Sociorum reportabat consolationem. Si qui autem negligentiores essent in eo caritatis officio exhibendo, nunquam de illis auditus est conqueri. Quinimo si coram ipso aliqui reprehenderentur, tanquam minus urbanj, vel parum officii memores, statim eos ob ipsorum occupationes excusabat, vel etiam culpam in se omnem rejiciebat. *Novi enim ego, ajebat, quam fastidiosa sit infirmitas mea, quæ me difficilem reddidit, ac morosum.* Hæc autem, vel cum tranquilliore animo esset, adeo sincere iterabat, ut non alio respicere videretur, quam ut se coram Deo deprimeret, et hominibus. Erga illos, qui sibi frequentius aderant, gratissimum animum et verbis, et operibus demonstrabat, eorumque obsequia tanquam sibi prorsus indebita recipiebat. Quod si nonnunquam ex humorum intemperie insuavius aliquod verbum sibi excidisset, quod illos etiam leviter posset offendere, veniam ab eis protinus, quamvis multo inferiores essent, submisit deprecabatur. Nihil enimvero ab ejus modestissimo ingenio magis erat alienum, quam ut molestiam aliquam aliis inferret. Ipsemet intimo familiari suo ingenue testatus est, dum provinciæ gubernaculum tenuit, multo magis suæ valetudini obfuisse difficultatem placendi omnibus, et necessitatem aliquibus displicendi, quam cæteram negotiorum molem, quæ suis ubique humeris incumberebat. Et quam obtinuit restaurationem virium post depositam provinciæ curam inde sibi credidit advenisse, quod jam liber esset ab odioso illo munere corrigendi. Bononiæ cum ad aras propter salutis incommoda non posset eadem semper hora operari, juvenem ex Superioris præscripto delegit, qui sibi, dum moneretur, in Sacello domestico ministraret. Is

post non multos dies, nescio quid negotiorum prætexens, ab injuncto sibi officio recessit. Siluit humiliter Clemens, nec voluit de inurbano juvenis facto ad Superiorem referre. Sed cum hoc illi aliunde innotuisset, castigatum juvenem ad Clementem redire coegit, atque operam suam constantius in posterum polliceri. Excepit illum Clemens humaniter, atque optimis, ut solebat, consiliis instruxit: sed oblatum sibi servitium admittere recusavit: *Nolo enim, dixit, cuiquam hominum creare molestiam: nec te ab initio equidem adhibuissem, si nossem, hoc a te gravate suscipi ministerium.* Adeo erat in cavendis aliorum offensionibus circumspectus!

Denique humanarum despicientiam rerum in fideli observantia religiosæ professionis ostendit. Quod in Societatem Jesu fuisset adlectus, inter eximia Dei beneficia recensebat: atque ut dignam pro tanto dono gratiam referret, in animum induxit omnes susceptæ disciplinæ partes fideliter adimplere. Et vero a tirocinio ipso ad extremam usque vitam constantem religiosi viri opinionem obtinuit, quam apud omnes mundanarum contemptu rerum, ac divinarum studio sibi conciliavit. Promissam Deo paupertatem, parvo semper contentus, exacte servavit: ac siquid interdum in sui, vel aliorum commodum vellet expendere, peculiarem ad illud rogabat sibi fieri facultatem, amplioribus privilegiis uti non volens, quæ Superiores ei concesserant ob perspectam ejus prudentiam, et notam suæ valetudinis infirmitatem. Ad tuendum castimoniz decus, vigilem adhibuit oculorum, et aliorum sensuum custodiam, circumspectam verborum gravitatem, et asperam sui corporis macerationem, vel cum illud multis morbi incommodis satis erat debilitatum. Dum feminas alloqui necesse haberet, verecundo quodam pudore suffusus, ea paucis agebat verbis, quæ præsens negotium exigeret, et, quantum ratio permetteret, inde brevissime discedebat. Ut obedientiz supremum gradum attingeret, judicium suum imperantibus submittere studuit, etiamsi voluntatis suæ inclinationi contraria præciperent: quod in provinciz magistratu suscipiendo maxime ostendit, quo nihil erat humillimo illius animo, atque etiam saluti suæ magis adversum. Neque vero majoribus tantum, sed inferioribus etiam subiciebatur, eorumque sententiz in his, quæ  
agen-

agenda sibi essent , vel omittenda , facile consentiebat . Observarunt id sæpe contubernales sui , quorum unus Clementis docilitatem , dum Bononiæ viveret , ita describit : *Gratisimum erat , dignumque admiratione spectaculum , videre hominem ea prudentia , iis doctrina , atque honorum luminibus decoratum , qui perinde ac puer parvulus ad aliorum nutum regi se sineret , et quæcunque sibi innuerentur , prompte perficeret .* Nimirum quod longo religiosæ vitæ usu didicerat , ut alterius potius , quam suo arbitrio viveret , idem facile in cana etiam senectute retinuit . His igitur , aliisque virtutibus exercendis , ad obeundam feliciter mortem , per totius vitæ decursum , maximeque in extremis temporibus diligenti studio se comparavit ; eamque proinde pretiosam in conspectu Dei fuisse , possumus sperare .



## MARCUS GORDALIZA.



**G**rajali Legionensis diocœcesis oppido natus est Marcus anno salutis nostræ 1717, undevigesima die mensis Aprilis. Societati Jesu inter domesticos Adjutores adscriptus fuit decima septima Novembris die 1736. Dum tirocinium posuit, industriam suam, et judicii maturitatem Superioribus ita probavit, ut hi munus illi commiserint, quod non adeo facile tironibus consueverat demandari. Degebat ea tempestate in Collegio Villagarsiensi P. Joseph Felix de Vargas, vir in provincia Castellana multis conspicuus meritis, qui et illam rexerat, et alia præclara munia dignissime obierat. Idem provinciam Bæticam, Visitor ejusdem a Præposito Generali renuntiatus, lustraverat universam. Sed jam gravis annis, et brachiis impeditus, proptereaque ad plerosque vitæ usus alterius ope indigus, emeritam senectutem in ea tranquilla sede ducebat. Et quanquam ibi duo plerumque Valetudinario præfecti erant, alius pro tironibus infirmis, alius vero pro Sociis antiquioribus constitutus ( tirones enim a familiari cum veteranis congressu abstinebant ) Marcus tamen, cujus virtuti fidebat Rector, ab eodem designatus est, ut Josepho assidue in omnibus inserviret. Hac ille suscepta cura, senem quotidie induere, et exuere vestibus, cibum illi, potumque ad stas horas præbere, lectum ejus sternere, cubiculum verrere, immunda mundare vasa, cætera, quæ opus illi essent, diligenter exequi. Omnia vero gratiose adeo, et amanter exequabatur, ut ipse Joseph, postquam inde Marcus discesserat, officiosam illius caritatem, aliasque virtutes ejus cum magna ejusdem laude frequenter commemoraret.

Post exactum tirocinii tempus ad ea destinatus fuit ministeria, quæ suæ conditionis hominibus imponebantur. Itaque Coquum, et Promum egit, et rei domesticæ Procuratorem. Quidquid autem sibi fuisset injunctum, id prompte aggre-

grediebatur, et peragebat exacte. Nec rerum agendarum varietate præpediebatur, quominus debitam studio pietatis operam diligenter impenderet. Erat enim promptus in inchoandis spiritualibus exercitiis, nec properus in absolvendis: in observantia regularum exactus, erga Sacerdotes obsequiosus, loquendi parcus, laborandi studiosus, et in his quæ ageret, aut loqueretur, gravis sine offensione, modesteque circumspectus. Cum autem cæteris ejus laudibus maturum etiam judicium accederet, et expedita esset præditus mente, domesticus carus erat, magnoque in honore apud externos habebatur. Id Pintæ maxime videre licuit, dum ille Ambrosiani Collegii negotia procurabat. Redemptores vectigalium quamdam ibi controversiam adversus religiosorum Ordinum cætus super solutione portorii excitarunt. Ad eam dirimendam indicta sunt comitia, in quibus post multiplices sessiones cum adhuc sub iudice lis esset, omnes Cœnobiolorum Præsides duos sibi delegerunt viros, qui rem cum Publicanorum principe conficerent. Ex iis unus fuit Marcus noster, cujus prudentiæ, et tractandarum rerum peritiæ plurimum confidebant: atque is cum Collega suo litem illam magna cum utriusque partis approbatione composuit.

Post hæc Ludimagistri munus exercuit in urbe Legionensi, ubi assiduitate sua, atque optima ratione instituendi pueros elementis literarum, et fidei, ludum illum celebriorem reddidit, et frequentiore. Pueros inopes peculiari caritate complectebatur; eisque libros, et chartam, cæteraque ad scribendum instrumenta gratuito ministrabat. His sustinendis sumptibus munificum sibi quæsierat largitorem, virum illum clarissimum Josephum Goyrium, cujus sapientiam, integritatem morum, et sollicitum salutis animarum studium Hispania suspexit: qui, postquam Pontificales infulas instanter oblatas constantius ipse rejecerat, conceptoque voto nunquam eas recipere promiserat, renuntiatus fuit Abbas Canonicorum Regularium in Monasterio Legionensi S. Isidori. Inde ad excolendos prædicatione populos frequenter procedebat cum aliquo ex hominibus Societatis, quam diligebat impense; sed maxime cum Bernardo Roderizio, quem ad excursions sacras Socium sibi dari, relicto Collegii Sanctanderensis regi-

gimine, a Superioribus obtinuerat. Intra urbem et exemplo vitæ, et consiliorum prudentia, et sacrorum administratione omnibus mirabiliter proderat, adhibita etiam in pauperes insigni misericordia. Hæc bene nota cum esset Marco, non dubitavit pietissimum adire vitum, eique miseram multorum conditionem exponere, qui a frequentandis Scholis summa parentum egestate prohiberentur. Nec multis agendum sibi fuit verbis, ut misericordem Abbatis animum inflecteret ad pietatem. Itaque magno civitatis bono effectum est, ut et illius liberalitate, et Marci industria multi etiam ex mendiculis literas, et christianam doctrinam a teneris edocerentur.

Huic magnæ caritatis, nec modici laboris muneri sedulam Marcus navabat operam, cum jussus est in exilium abire perpetuum. Hic ille non animo concidit, sed proscriptio-nem illam non tam ut pœnam a Rege inflictam, quam ut opportunitatem a Deo oblatam aspexit, ut ferventius in sanctitudinem morum per incrementa virtutum incumberet. Et vero cum vitam adhuc laudabilem egisset, illam deinde in exilio egit multo laudabiliorem. Contra sinistros fortunæ casus patientiam semper inconcussam opposuit. Diuturnis renum doloribus, et calculorum morbo vexatus, tanta animi pace, tantaque constantia cruciatum illum sustinuit, ut, mirantibus jure merito cæteris, nunquam propterea vel decumberet lecto, vel quidquam de consuetis religiøsæ vitæ oneribus detrectaret. Exilii calamitatem, ortasque inde molestias innumerabiles adeo non indignanter tulit, ut gauderet potius frequentes sibi dari occasiones, in quibus posset aliquid pro Domino tolerare. Laboriosa quælibet, vilioraque ministeria, quæ frequenter per id tempus etiam emeritis imponebantur, prompto ille suscipiebat animo, et perseveranti exequebatur humilitatis exemplo. Calvii per plurimos menses visus est fere quotidie, ad comparandum fratribus victum, in suburbium, et continentem ei portum descendere: indeque, non sine utili multorum admiratione, per longum et asperrimum clivum in domum suam onustus gravi sacco reverti. Neque ideo cessabat domi, cum nusquam toto illo tempore reperiretur, nisi aut laboriosis intentus officiis, aut orans in templo, aut in cubiculo suo piæ lectioni deditus, aut precationi.

Con-

Constantem hanc ad incumbendum laboribus diligentiam ex nobiliore quodam studio vincendi seipsum eruebat. Cum enim acriore ingenio esset, atque ad iram, et honoris appetentiam proclivi, conatus omnes ad frangendam naturam adhibere constituit, ut ex iis unus affirmat, quibuscum Marcus arcana sua communicabat. Propterea labores sibi impositos, eosque præsertim, qui cum abjectione aliqua essent conjuncti, libenter exequebatur, ut aviditatem propriæ excellentiæ superaret. Cum ipse aliunde sedulam continendi sui curam haberet, innatamque gravitatem jucunda comitate sermonis temperaret, apud alios in familiari consuetudine lenis, et affabilis habebatur. Nec solum tumorem mentis, et vehementiorem cohibuit indolem, sed corporis etiam contumaciam vario asperitatum genere coercebat. Qui cum eo in Hispania vixerant, immites verberationes admirabantur, quibus se frequenter cædere solitus erat, et constantiam, qua id supplicii genus nunquam per statos dies intermittebat. In exilio vero, cum propter domorum angustias, et frequentiam contubernalium id sine teste non facile posset efficere, observarunt Socii, qui cum eo Rattensem incoluerunt Villam, in propinquum nemus sæpe discedere, ibique densas inter arbores abditum dira se flagellatione torquere. Frequenter etiam acuminata catena ferrea alterutrum cingebat femur: quod vel in septem ultimis vitæ annis factitabat, cum jam sui esset juris, et ab jugo religiosæ disciplinæ solutus. Per idem tempus jejunium observabat omnibus sabbatis, ut etiam in pervigiliis festivitatum Mariæ Virginis, et prima feria sexta cujuslibet mensis. His autem macerationibus frequentem adjungebat Sacramentorum usum, quo nihil efficientius ad rebelles animi, et corporis motus sub rationis imperio continendos. Itaque, præmissa diligenti peccatorum confessione, aliisque religiosis operibus, sacræ mensæ accumbebat fere omnibus diebus festis, multisque profestis, in quibus anniversaria recurrebat memoria vel Sanctorum Societatis, vel aliorum, quibus singulariter devotus erat, et prima sexta feria quorumcunque mensium in honorem Sanctissimi Cordis Jesu.

Ex divini hujus convivii religiosa frequentatione didicit

Lib. II.

m

Mar-

Marcus illius mores exprimere, qui in hunc mundum non venit ministrari, sed ministrare. Cum suam in gremium Societatis cooptationem inter singularia Dei dona connumeraret, nullam hujus beneficii auctori majorem gratiam vel habere se posse, vel reddere existimabat, quam ut Socios amaret intime, et iisdem propter Deum fideliter inserviret. Eo caritatis impulsu ductus, non solum demandata sibi ministeria, quibus cunctis in commune proderat, diligenter exequebatur; sed in privatorum etiam obsequium labores quoslibet libenter, et sponte suscipiebat. In terrestri æque, ac maritimo itinere, præsto erat omnibus, qui ejus opera uti vellent: eandemque benefaciendi aliis sedulitatem exhibuit, ubicumque locorum commoraretur. Postquam vero Societas disjecta fuerat, de laudabili juvandi alios studio nihil adeo remisit, ut illud potius auxerit, et intenderit. Inter Hispanos, qui Bononiæ tum morabantur, longævus quidam erat Sacerdos, Jacobus Salgadu nomine. Hic per amplius viginti annos infatigabilem Operarium egerat Compostellæ, ubi et voce, et scriptis libris, et assidua excipiendi confessiones constantia omne hominum genus, sed rudiores præsertim, et abjectiores ad recte vivendi tramitem compellere non cessabat. Raro prodibat domo, nisi ut animorum saluti prospiceret, vel ut interdum sapientissimum illius urbis Pontificem alloqueretur, Bartholomæum Rajoium de Losada, apud quem ob indefessam juvandi homines curam magno in honore habebatur. Ex iis autem laboribus non intermissis, et ex frequenti orandi studio, cui fuit semper multum addictus, gracillimo erat corpore, facieque admodum macilenta. Ejectus deinde in exilium, gravioribus obnoxius fuit incommodis: et postquam Bononiam venerat, cum tantum hæreret ossibus, aliena quam qui maxime indigebat ope.

Hunc ergo benemerentissimum senem, septuagenario majorem, et morbo laborantem Marcus noster ita fovendum suscepit, ut fidem illi suam obligaverit, non ante ab eo recessurum, quam mors alterutrum occuparet. Per septenii spatium, quo Salgado superfuit vita, in eadem cum illo domo habitavit: ibique omnes diligentissimi servi partes plepavit, vel potius amantissimæ matris officia præstitit; cum in



eo sibi non aliam mercedem proponeret, quam ut Deo gratum faceret, et in ægroto Dei filium respiceret: et cum aliquam a superioris vitæ laboribus vacationem sibi non immerito potuisset assumere, totum illud tempus in servitium infirmi senis libentissime dedicavit. Nec modo externa illa usurpabat ministeria, quæ ad levamentum corporis, et cubi- culi munditiam, et totius œconomiam domus pertinebant, sed alia etiam, quæ ad confovendum ægroti spiritum spectabant. Quotidie illum per aliquod horæ spatium pia lectio- ne recreabat, et cum ad aras operari non poterat, Sacerdo- tem aliquem inquirebat, qui coram ipso in privata ædicula faceret, eique divinam porrigeret Eucharistiam. Dum Salga- dus Sacrificium potuit peragere, solícite curavit Marcus, ne unquam illi consuetum deesset stipendium, quod inter His- panos, ad sublevandam ægrotantis senis inopiam, non difficul- ter inveniebat. Fortasse etiam illud a Bononiensibus nonnun- quam accepit: quod, licet mihi certo non constet, facile ta- men concesserim evenisse. Sic enim scirpiculum evellam cui- dam, qui de Marco mecum aliquando colloquens, multis il- lum laudibus cumulabat. Sed hoc in ejus correctissimis mo- ribus excipiebat, quod interdum ab ignoto aliquo, qui per errorem Sacerdotem illum existimabat ( incedebat enim, ut alii quidam ejusdem classis, approbante Cardinali Malvetio, indutus habitu clericali ) stipem pro celebranda Missa ultro sibi oblatam accepisset. Id quidem, ab alia omni adjuncto- rum consideratione sejunctum, criminatione dignum esse non inficiabor. Verum qui nosset hinc honestissimos Gortalizæ mores, inde solícitam ejus curam, ut Salgadam omni offi- ciorum genere sublevaret ( hanc ignorabat, credo, qui Mar- cum me coram reprehendebat ) nihil in eo vituperandum es- se censeret, quod oblatos sibi numos acciperet, ut eos Sal- gado traderet Sacrificium celebraturo; facta interim sponsione donanti, voluntatem suam omnino fore adimplendam.

Dum Marcus levandæ Salgadi valetudini diu, noctuque se- dulus incumbebat, sui nihilominus animi spiritualibus reficien- di exercitiis omnem arripiebat occasionem, unusque duarum referebat sororum imaginem: Marthæ, quæ Domino solícita ministrabat, et Mariæ, quæ ad illius pedes accedens, dulcis-



simis ejus verbis pacifice recreabatur. Primo mane mentali vacabat orationi, divinoque intererat Sacrificio. Deinde, curam ægroti cum religionis actibus semper alternans, Sanctorum legebat vitas, aliosque pios libros, quorum bonam habebat copiam. Quotidie preces illas fundebat attente, quas, vel a Bernardino de Bustis, ut Colinus autumat, vel a quovis alio, pio certe ac erudito auctore compositas, Ven. Frater Alphonsus Rodriguez recitabat in honorem immaculati conceptus Mariæ Virginis: easque idem Alphonsus, hortante, ac jubente Dei Matre purissima, apud alios studiosissime promovit. Dum vivebat in Hispania Marcus, Officium parvum, ut loquimur, recitabat: proindeque idem fecisse in exilio, verisimile existimo; quanquam nihil de hoc certi possum asserere. Illa per singulos dies gaudia relegebat, doloribus intermixta, quibus Deus fidelissimi nutricii sui constantiam alternis roborare voluit, et experiri. Ante prandium alia duo auscultabat Sacra, suasque actiones omnes et cogitationes attentam scrutabatur indagine, ut siquid minus rectum invenisset, prompta corrigeret pœnitentia: idemque ante nocturnam quietem agebat. Post prandium redibat in templum, in quo nudo semper capite perseverabat, quamvis longum ibi maneret spatium; donec illius jussu, qui ejus regebat animum, pileolum debuit imponere. Redeuntibus per anni cursum magnæ Matris celebrioribus festis, preces illi novem dierum offerebat, ut etiam Sanctis Ignatio, et Xaverio, atque aliis e beatorum choro, inter quos S. Antonio Patavino valde singulari addictus erat devotione.

His omnibus si frequens ejus recursus ad pœnitentiæ tribunal, et Eucharistiæ mensam, atque alia, quæ cunctis fere sunt communia, superaddantur; facile colligi poterit, Marcum per eos septem annos solidos duxisse dies admirabili religionis, et caritatis varietate intertextos. Et tamen parum habebat ille, si totos fere dies vel in templo, vel domi suæ orando, et inserviando Salgado insumeret, nisi etiam per urbem quandoque incedens, misericordiam in pauperes exerceret. Ut factu pulcherrimum erat, sic erit auditu non injucundum, quod hic vir, in exilii constitutus angustiis, ad succurrendum egenis fecit. Modicum peculium suum in ternas divisit

visit partes: primam moderato suo victui assignavit, alteram in expensas sui funeris reponebat, tertiam pauperibus erogabat. Postquam vero sufficientem exequiarum sumptibus cumulasse summam existimavit, quidquid ex tenui suo victu supererat, totum in subsidium egenorum convertit. Quantam autem constantiam in his servaret misericordix operibus exequendis, ab hoc uno illius facto discere licebit cuivis. Inter numerosam mendicorum turbam, qui Bononiæ vias obsident, quidam naturæ vitio, reptando magis, quam incedendo, per terram trahebat corpus. Miserandam hominis conditionem dolebat Marcus, quam ut pro suis facultatibus deliniret, quidam ei largiebatur quotidie. Sed cum Bononia valetudinis causa discessurus esset, tantam pecuniæ summam cuidam amicorum reliquit, quanta satis erat, ut mendico illi per anni spatium consuetam stipem in dies singulos erogaret. Ita misericordiam in pauperes non suis tantum, sed alterius etiam manibus exercebat.

Marci vitam tandiu sospitem servasse videtur Deus, quando necesse fuit, ut ægeranti, senioque confecto Salgado deserviret. Hic octogenario major Bononiæ obiit anno millesimo septingentesimo septuagesimo nono: et gratissimo erga Marcum discessit animo, qui fidem illi datam ad mortem usque, imo etiam usque ad sepulcrum plene servavit. Sed cum illum decenti funere composuisset in tumulo, non diu post cœpit ipse debilitari viribus, sensim macrescere, tandemque sanguinem sputare. Ideo, suadente Medico, profectus est Centum, cujus urbis cœlum eo morbi genere laborantibus Bononiensi benignius existimatur. Nec tamen ullum valetudinis commodum inde illi accessit. Duos paulo amplius menses in ea urbe commemoratus, supremum diem obiit ibidem VI Kal. Octobres millesimi septingentesimi octogesimi primi, expletis vitæ annis sexaginta quatuor. Qui morienti Marco astitit, literas ad quemdam Bononiam misit, quibus et mortis ejus genus, et alia quædam refert, quæ ad confirmandam virtutis ejus opinionem non parum faciunt. Earum hic exemplum subjicio, ut brevem hanc de Marci rebus narrationem absolvam. *Noveram olim, inquit, in urbe Legionensi Marcum, in quo alii semper humilitatis, obedientiæ, assiduitatis ad munus suum,*

suum, et ad omnia religionis opera, ceterarumque virtutum exempla non sine incitatione ad simile studium inspiciebant. In his vero mensibus, quos modo nobiscum vixit, magnam cum divina voluntate consensionem exhibuit, singularemque patientiam inter molestias sui morbi, quippe profectas ab ordinatione Dei, a qua ne transversum quidem unguem discedere optabat. Inde secum ipse pugnabat strenue, ut natura impetum frangeret, et a Confessarii nutibus ita pendeat, ut puerulus ab ore parentis suae. Dum ei per morbum licuit multas mane ac vespere ducebat horas in templo: cum jam foras ire non potuit, Eucharistiam e domo sua conversus in templum adorabat. Diligentem adhibebat preparationem ad percipienda sacra mysteria, qua religiose, et cum fructu suscipiebat. Haec autem, ut alia pietatis opera, eo dirigebat, ut se compararet ad mortem, quam ferebat ante oculos semper, et attenta praemeditatione versabat. Omnia sua minutissime disposuit: et se totum in Dei manus plene coniecerat, cum, illucescente vigesima sexta Septembris, gravis eum invasit insultus. Adfui ego prope, et confessionem ejus excepi. Alii statim ad Parochum, ut Viaticum, et Unctionem extremam afferret. Sed antequam ille adesset, Marcus magna animi pace, magnisque incensus desideriis adhaerendi Deo, quem sub aliena specie recipere optabat, ingeminatis actibus fidei, spei, et caritatis, et invocata S. Ignatii ope; inter suavissima cum Jesu, et Maria colloquia animam Deo tradidit, ingenti etiam inter nos tam amabilis viri relicto desiderio. Centensium quoque civium in morte Marci dolor innotuit, quorum aliqui funeri adesse voluerunt. Inter eos Sacerdos quidam mihi testatus est, ab iis, qui circumspectos, et religiosos defuncti mores observaverant, eximiam ejus probitatem fuisse laudatam, atque adeo virum virtute praestantem ab eis fuisse reputatum.

## JOANNES THOMAS A S. CHRISTOPHORO.



**I**nter illos, qui per decursum labentis seculi Societati nomen suum dederant in Castellana provincia, Joannes Thomas apud omnes, qui cum eo viverent, severus disciplinæ custos, spiritualibus addictus rebus, humilis, et studio macerandi corporis, continendique animi deditus semper audit. Propterea et mihi, et aliis visus est dignus, cui suus in hoc insignium Virorum catalogo jure merito tribuatur locus. Patriam habuit Vianam, in regno Navarræ nobilem urbem, et in vitales emissus est auras XII Kal. Januarii millesimi septingentesimi sexti. Ad Societatem id ætatis accessit, quæ bene apta erat ad ponderanda status onera, quem suscipiebat, et ad confovenda virtutum semina, quæ illius animo mandanda erant in tirocinio. Huic initium fecit anno ejusdem seculi vigesimo tertio pridie Idus Februarii, cum vitæ annum septimum decimum attingebat. Sacram illam solitudinem libenter amplexus, eam studiose coluit, totusque fuit in jaciendis solidarum virtutum fundamentis, quas deinceps per omnes vitæ gradus constanter exercuit.

Ad literarum studia progressus, ut ea feliciter et ex sententia procederent, Patronum sibi delegit Sanctum Aloysium, cui præcipuam, neque intermissam unquam professus est devotionem. Sub auspiciis ejus ad scientias cum virtutibus copulandas animum sic adjecit, nihil ut illis detractum vellet, sed potiores his partes daret, atque ita mentem humanis excoleret disciplinis, ut voluntatis culturam per sapientiæ cælestis studium pluris faciendam sibi esse statueret. Existimabat enim verissime, in studiis se maxime progressurum, si rectissimum in eis finem sibi præfigeret, et nihil propterea de religiosa perfectione remitteret. Hinc ad exercitationes omnes spiritus erat promptissimus, et in iisdem adimplendis accuratissimus. Quotidiano meditationis horarix penso non pauca

ca ex abundanti superaddebat spatia, quoniam a majoribus sibi esset permissum. Hoc autem orationis studium, quod familiare sibi fecerat ab initio, processu temporis ita retinuit, ut septuaginta jam annos natus, et eo amplius, atque in aliena domo incolens, multo mane surgeret ad orandum: ab eaque laudabili consuetudine, dum spiritum duxit, nunquam cessavit. Ex frequenti vero divinarum rerum usu ad humanas percipiendas scientias nihil adeo fuit retardatus, ut magnum potius inde adjumentum traheret, ad easdem facilius assequendas. Etenim, cum tranquillo animo, et ab inutilibus curis libero ad studendum accederet, altius in illius mente insidebant species rerum, quas pertractabat, eademque firmius hærebant infixæ. Deinde, cum otio, ac superfluis colloquutionibus bellum indixisset perpetuum, longiora sibi tempora suppetebant, quæ literariis impenderet commentationibus. Magistris denique, ac Superioribus dicto audiens in omnibus, nusquam ab eorum præscripto discedebat, eosque sedulo volebat libros, quos illi designassent: unde, rejectis curiosis, aut qui certe præsentis non essent temporis, ad ea, quæ tunc instabant, tota animi contentione ferebatur. His adjutus præsidiiis, et ingenio præditus perspicaci, primos inter discipulos honores tulit, permensisque gymnasiorum spatiis, in facultatibus, ad quas admotus fuerat, vere Magister evasit.

Quantquam doctrinæ copiam, quam Joannes ab scholis reportaverat, ob insignem ejus modestiam non omnes facile agnoscerent; Superiores tamen, qui et vim ingenii, et apparatus acquisitæ scientiæ optime noverant, postquam tertium probatus fuerat in spiritu, illum designarunt, ut juventuti Societatis Philosophiam primum, deinde Theologiam, postremo Scripturam sacram explicaret. Et cum in diuturno magisterii tempore judicii rectitudinem, studium servandarum legum, nec vulgare prudentiæ specimen exhibuisset, ætate jam maturus, ad præcipuos assumptus est provinciæ Castellaniæ magistratus. In duplici hoc munere Rectoris, et Magistri majorem vitæ suæ partem exegit: in eisque præclara reliquit exempla, quæ hic breviter ad imitandum proponimus, quibus ea perlegere placitum fuerit. Ac primum in docendi munere, cum Magistrorum regulas attente inspexisset, eam sequi viam statuit,



tuit, quam Societas a Professoribus teneri suis vehementer optabat: ut scilicet auditores ad obsequium et amorem Dei, tum in lectionibus, cum se occasio ferret, tum extra illas ita moverent, ut non minus, quam in scientiis, in probitate vitæ proficerent. His optimi Doctoris legibus semper intentus, omnem ubique adhibebat Joannes diligentiam, ut discipulis prodesset suis non modo dictandis, et explicandis, repetendisque facultatibus, quas tradebat, sed illorum etiam spirituali bono consulens perquam studiose. Id vero et quotidianis moderatissimæ vitæ exemplis, et frequentibus sermonibus efficiebat, quibus modo cunctos in aula, modo singulos privatim alloquens, ad virtutum studium adhortabatur, quo placere Deo quemque oporteret. Varios item dispertiebat libros inter discipulos externos, qui opportuni erant ad pietatis gustum in eis excitandum, vel promovendum. Cum domesticis autem singulari, nec vana quidem usus est industria, ut eis lamentabilem multorum conditionem exponeret, qui apud remotas Indorum gentes, propter Evangelicarum operarum inopiam, Dei misera ignoratione laborant. Exarsērāt olim ipse vehementi desiderio in Americam, aut in Asiam trajiciendi, ut Christum infidelibus populis annuntiaret. Sed cum transmissionem illam Superiores ei justis de causis denegassent, quod efficere ipse per se non potuit, per alios compensare constituit. In eaque procuranda compensatione felix adeo fuit, et industrius, ut ex adolescentibus Societatis, qui Compostellæ illum philosophica tradentem audierant, octo ad provincias ultramarinas enavigaverint, ubi laudabiliter per annos plurimos laborantes, Magistri sui votis plenissime responderunt. In his erat Dominicus Muriel, qui Faventix, dum hæc scribimus, laboribus semper utilibus, et strenuis, heroicisque virtutibus exercitiæ vitæ gloriosum finem imposuit, accurrentibus ad ejus tumulum multis, qui mortualis vestis lacinias, et capillos eidem præciderunt. Non deerit, credo, qui præclara Dominici gesta colligat, ut quæ ille pro Dei gloria, proque salute mortalium fecit, ac pertulit, ad commune multorum exemplum evulgentur.

Dum Joannis discipuli per Americam, et Asiam erudicendis in fide populis discurrebant, ipse interim in Europa



strenuam conferebat operam, ut saluti prospiceret animarum. Et quanquam omne hominum genus pro virili parte adjuvabat, tamen in trahendis ad Christum pueris, et adolescentibus conatum quemdam adhibuit singularem. Compostellæ, Salmanticæ, aliisque in urbibus non paucos adolescentium ad retinendam, vel ineundam optimæ vitæ rationem induxit. Valisoleti vero, ubi diutius magisterium exercuit, et ubi frequentior studentium concursus suam exacuebat industriam, multos eorum ad virtutem impensius prosequendam incitavit. Erecta pridem fuerat in Ambrosiano Collegio, ubi Joannes Theologiam, deindeque Sacros libros per aliquot annos exposuit, Scholasticorum Congregatio sub patrocinio S. Aloysii. Hanc ille, cum per id tempus eidem præfectus fuisset, ita diligenter administravit, ut incrementum addiderit, et splendorem. In primis diploma Pontificium, quod vetustate corrosus erat, fidelissime transcribendum curavit, ut et concessa privilegia, et injuncta pietatis opera facilius possent omnes agnoscere. Deinde juvenes, qui Congregationi nomen jam dederant, et quos ipse magno numero eidem fecit adscribi, frequenti exhortatione admonebat, ut cum diligenti literarum studio vitæ quoque conjungerent innocentiam. Eam porro sub auspiciis Angelici Patroni facile conservaturos, si, declinata pravorum comitum consuetudine, adhærent bene moratis, vestigiaque prementes intemerati juvenis Aloysii, frequenter ac devote divina perciperent Sacramenta. Ad ea ex Sodalitii legibus semel saltem in mense debebant omnes accedere: curabatque Joannes per diligentem, ne quis in conductam abesset diem, et ut cuncti religiose convivio sacro interessent, quod in his diebus nitidioris cultu instruebatur. Præterea in Dominica Septuagesimæ, cum frequentissimus erat auditorum numerus, S. Aloysii festum solemniter celebrabatur, adhibitis symphonicis, habitaque in ejus laudem oratione sacra, quam vel ipse dicebat Joannes, vel Magister alius, vel externorum aliquis Sacerdotum, qui gymnasium frequentaverant Ambrosianum. Denique sub finem jejunii maximi per dies octo exercebat Joannes usitatis S. Ignatii meditationibus quotquot de studentium numero, ex alienis quoque gymnasiis, ad eas vellent accedere. Conveniebant

bant autem multi in Sacellum templo contiguum, quod Deiparæ sine labe conceptæ dicatum erat, sub ejusque denominatione instituta etiam ibi fuerat altera Congregatio pro Senatoribus, aliisque civibus, cui Joannes similiter præfuit. In eo Sacello, quod bene spatiosum erat, quinque ante meridiem horas, ac fere totidem post meridiem perseverabant omnes, partim audiendis meditationum argumentis, ad quæ proponenda peculiari Joannes pollebat gratia; partim iisdem mente agitandis; partim excipiendis instructionibus, et hortationibus; partim denique auscultando anagnoste, qui librum aliquem tempori congruentem ex editiore loco legebat. Cum domum dimittebantur, commonebat eos Joannes, ne superfluis curis intenderent, nedum vanis indulgerent fabulationibus; sed eorum potius, quæ in Asceterio perceperant, memoriam taciti refricarent: domi autem, vel in templo suam quisque conscientiam accurate discuterent, ut eam deinde salutaris confessione lavarent, et melioris vitæ ordirentur initia.

His adeo prudentibus consiliis, et assidua illa novissimorum hominis tractatione, gratissima quædam pietatis æmulatione vigeat in omnibus, plerique mores emendabant, nonnullique inde ad claustra religiosa transferebantur. Duos ego novi adolescentes, ambo florentes ætate, ingenio præstantes ambo, et opibus abundantes, qui per scientiam civilis Juris, cui tum simul degentes operam dabant, haud exiguam spem honorum aiebant in pectore. Hi, cum audissent de exercitiis spiritualibus, quibus Joannes Thomas studiosos juvenes erat informaturus, ad eum sic accedere constituerunt, ut inde quemdam alterum Thomam adirent, qui prope Divi Ambrosii habitabat, et saltandi ad numerum Magister percelebris habebatur. Tædium videlicet illius sacri recessus harmonicis modis, et choreis relevare intendebant. Hac mente Sacellum primo die subierunt. Sed cum Joannem divina suggerentem audissent, et, quæ ille suggesserat, tacitis ipsi mentibus recogitassent, facile in longe aliam adiere sententiam. Inde enim digressi nihil jam de saltationibus cogitarunt: rectaque progressi domum, fenestram illam aperire noluerunt, unde frequenter cum vicinis colloquia miscere solebant. Vix etiam inter se loquebantur; sed in conclavi tacite deambulantes, in

superioris vitæ actus inquirebant, ac de ratione illam melius instituendi serio recogitabant. Tam alte, quæ a Joanne audierant monita, in eorum animos descenderunt. Tandem intra paucos dies, cum nondum alter alteri mentem suam aperte manifestasset, uterque Societati nomen dare constituit. Communicatis deinde consiliis, Joannem adierunt: factoque periculo convenienti, post non multos dies, admirante Academia, in qua celebratissimum erat utriusque nomen, in tirocinium Villagarsiense pertransierunt. Neque hunc solum fructum, sed alios insuper ex cultura nostri Joannis tum Castellana, tum etiam Americanæ ceperunt provinciæ. Nam quod initio Compostellæ fecerat, alibi perrexit efficere, ut earum novi orbis nationum causam ageret, quæ operariorum defectu in tenebris infidelitatis jacent immersæ. Si quos autem tanto idoneos operi, ad illudque a Deo instinctos invenisset, eos et consilio, et omni ope adjuvabat, ut conata perfectius, ac facilius exequerentur. Pompelone cuidam adolescenti, qui animum ad eam Indicam expeditionem induxerat, legendam dedit ( eidemque, ut aliis deinde traderet, commendavit ) Vitam Francisci de Ugalde Societ. Jesu, qui paucis ante annis in Paraquaria, dum Mataguaios in mysteriis fidei summo studio erudiebat, perfide ab iisdem fuerat interemptus. Hoc modo qui profectionem illam meditabantur, instructos volebat Joannes quanta eos manerent pericula, quantoque indigerent præsidio virtutum, propositis laudati Francisci exemplis, qui priusquam ad barbaros mitteretur, jam eo processerat sanctitatis, ut fundendi pro Deo sanguinis arderet desiderio.

Non solos juvenes, sed viros etiam, et feminas ad Christianæ vitæ tramites sive publicis, sive privatis sermonibus incitabat. In illa publice dicendi exercitatione tam longe aberat, ut inanes flosculos, et futiles quasdam sententias consecraretur, ut neque illos probaret omnino, qui grave cæteroqui sequuntur dictionis genus; sed longos in adornanda oratione dies insumunt, deindeque totidem in eadem ad verbum memoriz commendanda. Censebat enim, satius plerumque fore, si Oratores sacri præcipua tantum orationis capita mandarent scriptis, illaque secum diu, multumque medi-

tarentur : sic enimvero non difficile secutura verba , melius-  
que auditorum animis consultum iri , cum minimo inanis au-  
cupandæ gloriæ periculo . Ipse certe per eam annuntiandi E-  
vangeliî viam incedens , quam S. Franciscus Borgia in libro,  
quem de hoc argumento composuit , plurimum etiam Orato-  
ri Christiano commendavit , cum magno compendio temporis ,  
magnum itidem operæ suæ pretium invenit . Nam illius  
verba , cum ex ferventi meditationis officina prodirent , faci-  
lius auditorum animos incendebant , et quæ proferebat ipse  
cum intimo sensu , altius in aliorum mentibus infigebantur .  
Eundem tenuit dicendi morem in exhortationibus ad Socios ,  
quas alibi sæpe , sed Vallisoleti frequentius ad illos habuit ,  
qui tertiam ibi probationem , instruente Joanne , peragebant .  
Ex iis hodie quoque aliqui commemorant , in ejusmodi conciu-  
cunculis quam apposite ad conditionem audientium loquere-  
tur ; quam etiam ex animo , quæcunque loquebatur , expo-  
neret , ut firmissime illorum cordibus adhærerent . Appeten-  
te jam tempore , quo noviores illi Sacerdotes ad obeunda mi-  
nisteria Societatis in varia profecturi erant provinciæ domici-  
lia , peculiari eos cura edocebat , quid domi , quid foris , quid  
in privatis , quid item in publicis officiis præstandum sibi es-  
set , ut dignos Ignatii filios sese comprobarent . Clemens ille  
Recius , cujus virtutum specimen aliquod paulo ante dedimus ,  
cum esset ejusdem Collegii Rector , singularem Joannis dex-  
teritatem , indefessamque curam ab eo adhibitam in informan-  
dis illis Sacerdotibus ad mores Societatis , valde commenda-  
bat . Alii constantiam ejus demirabantur , qua nullum officii sui  
pondus detrectabat , neque illud vicarii cujusdam humeris , ut  
nonnulli fecerant , imponebat . Quamvis multa eum urgerent  
negotia , tamen commissos sibi Socios in Villam , quæ longe  
aberat , aut alio quolibet , deambulandi causa comitabatur ,  
ut eorum ubique consuleret utilitati . Multum erga ministe-  
rium explicandi pueris , et ignaris rudimenta fidei afficieba-  
tur ipse , aliosque similiter affici conabatur : et quos videret  
huic operi maxime deditos , nulla in re deerat , ut munus u-  
tilissimum promoveret . Francisco Gonzalio , qui Pompelone ,  
dum Theologiam ibi profitebatur , festis procedebat diebus  
stipatus puerorum choro , ad quorum voces suavissime pia

carmina decantantium, multi alii accedebant pueri, et grandiores natu; deindeque in platea consistens, explanationem instituebat Christianæ doctrinæ; liberaliter Joannes obtulit quidquid opus esset munusculis comparandis, quibus incitarentur pueri ad majorem divinæ legis notitiam acquirendam. Demum, ut ubique prodesset hominibus, ea plerumque in familiari colloquutione tractabat, quæ ad animi profectum spectarent, vel quæ certe essent cum aliqua utilitate conjuncta. Alienam vero famam se coram imminui, ferre non poterat: aut enim sermonem alio sagaciter detorquebat, aut oblocutorem graviter sui commonebat officii. Nullo unquam metu, nullius respectu continebatur, quominus pro virtute, dum veniret hæc in discrimen, acerrime decertaret.

In diuturna Collegiorum administratione ( Legionense, Palentinum, et Pompelonense, deinde Vallisoletana duo, Ambrosianum, atque Ignatianum gubernavit ) cum vigilantis disciplinæ cura prudentiam, caritatem, et largitatem in suos, in se autem austerum, et submissum agendi modum, in Deum ac divina fiduciam, et pietatem exhibuit. Errata illa candide, atque aperte corripiebat, quæ facilius propterea negligi consueverunt, quod leviora esse credantur, ac nisi sit, qui aberrantem commonefaciat, sensim ad graviora perducunt. Eratque acutissima mentis acie ad prævidendum, quo tandem defectus quidam erumperent, nisi mature præciderentur. Aliquando juvenem Sacerdotem de commissis ab eo erroribus coarguebat: et cum in illo quædam notasset, quæ aliis non magni momenti esse viderentur, reprehensionem suam hisce verbis absolvit: *Vehementer timeo, ne tandem a Societate deficiat.* Longe tunc ab infortunio illo aberat juvenis, qui peractis probationibus omnibus, ad professionem quarti voti suo deinde tempore fuit admissus. In ipso professionis die cuiusdam amico, quem denunciati sibi a Joanne periculi conscium effecerat, exuberantem animi lætitiâ aperuit, quod indissolubili vinculo Societati jam esset adstrictus. Verumtamen Joannes in ea denuntiatione, contra quam voluisset, vidit tandem se fuisse divinum. Nam Sacerdos ille post biennium deportatus in Corsicam, inde fugam inter primos arripuit, deindeque a Præposito Societatis, quantum quidem fieri poterat,



rat, dimissionem suam obtinuit. Alium quemdam adolescentem, qui segnius ad orandum mane Deum surgebat, hoc modo corripuit. Obviam illi factus, dum in Sacellum ibat, quo cæteri convenerant ad orationem, paucis admodum, sed efficacibus adeo verbis negligentiam ejus coarguit, ut ei lacrymas elicuerit. Quæ quidem lacrymæ non cito exaruerunt, neque genas tantum, sed animum quoque ad ferendum emendationis fructum irrigarunt. Unde optimus ille adolescens erga Joannem semper ob acceptas ab eo admonitiones gratissimum gessit animum, quem etiam num retinere, datis ad me literis, in hunc modum testificatur: *Ita me Joannes adjurvet ab excelsa cælorum sede, in qua regnare ipsum spero, ut me, dum viveret, suaviter ac benigne correxit.*

Correctionem privatim mallebat adhibere, quam publice: neque pœnam solitus erat imponere, sed plerumque delinquentem adhortabatur, ut a se ipse illam exigeret, quam suæ culpæ censeret accomodatam. Obtenta vero emendatione, nihil de præteritis cogitabat, nedum cum delinquentibus loqueretur: omnesque securi erant subditi, nihil sibi exprobrandum a Joanne, qui commissos olim defectus, et emendatione purgatos, perinde inviolabili premebat silentio, quasi de illis ad pœnitentiæ tribunal cognovisset. Quod si publica essent delicta, ea publice quoque reprehendere non cunctabatur, ne contagione serperent, et imitatione nocerent. In Collegio, cui tum ipse præerat, literarium habebatur certamen, in quo adebant discipuli exteri, qui Collegii adibant Scholas, eorumque Magistri. Ex iis unus propositam thesim, desumpta ab Eximio Doctore argumentatione, acriter impugnabat. Sed æstu disputationis abreptus, præscriptos modestiæ fines excessit, et quæstionis Præsidem triumphantis in morem, nec sine aliorum fastidio perurgebat. Non tulit Joannes arrogantiam illam, quam ut statim reprimeret, exultantem oppugnatorem coram omnibus ita compescuit: *Qui Doctoris Eximii doctrinam tam bene didicisti, fac etiam, ut eximiam Suarii modestiam inter argumentandum imiteris.* Ad hæc Magister ille sese continuit: et quidam ex juvenibus, qui intererant concertationi, æque sibi placuisse affirmabat Rectoris liberam coercionem, et promptam submissionem Magistri: seque inde permotum, ut



ut præclare de Societate sentiret, in qua potior haberetur modestiæ ratio, quem scientiæ. Paucis post hæc diebus Joannes Magistrum illum, ut palam ostenderet, nullum adversus eum amarioris animi vestigium retinere, secum deambulandi gratia per vias urbis deduxit: quod Magistro quidem honorificum accidit, iis autem, qui testes reprehensionis fuerant, valde fuit admirandum. Sic extrema illa duo, quæ non facile in eadem sede morantur, severitatem, ac lenitatem amico inter se fœdere noverat copulare.

Cum esset in corrigendis delinquentibus impiger, et Imperterritus, non erat tamen delictorum curiosus investigator. Quo tempore S. Ambrosii Collegium administravit, vix unquam e cubiculo pedem extulit, nisi ut Deum in sacra zdè adoraret, vel communibus functionibus interesset, vel necessarium aliquod negotium expediret. Neque aliam fere deambulationem ad relaxandum animum usurpabat, præterquam in ambulacro, quod ante cubiculum suum usque ad templi murum protendebatur. In eo loco ( quem, ut ipse frequenter commemorabat, suis gressibus, et iteratis ad Eucharistiam adorandam itionibus consecraverat magnus ille altissimæ perfectionis Magister simul, et exemplar Ven. Ludovicus a Ponte ) nonnunquam Joannes spatiabatur, precibus, ut credebant omnes, aut meditationibus sacris intentus. Cæterum in superius Collegii deambulacrum, in quo juvenes habitabant, fere nunquam ascendit, ut hi hodie confirmant, qui tunc illius suberant potestati. Eidem ab ipso Joanne audisse testantur, eos neutquam sibi gratum efficere, qui minimos quosque defectus passim ad se deferrent; cum magis timendum esset, ne inde caritas detrimentum caperet, quam ut ipse sufficienti rerum cognitione careret. In ea quippe sententiæ erat, religiosæ familiæ Moderatorem, nisi velit domi suæ tanquam in aliena domo habitare, posse non difficulter per se ipsum agnoscere quidquid rectæ suorum gubernationi conveniat: nec vero, dum quidquam alicujus momenti non eveniret, oportere frequenter uti delationum subsidio, quæ subditorum animos inter ipsos, et a Superiore quoque poterant abalienare. Ipse certe, dum opus esset, rem quamlibet caute, sed diligenter indagabat, nec minus efficaciter corrigebat.

Illud

Illud etiam Præpositi prudentis habuit insigne, ut inferioribus administris liberam in officiis suis agendi relinqueret potestatem. Exigebat utique ab eis, ut commissa sibi munera fideliter adimplerent, et proprias officii cujusque regulas observarent, in quibus descriptam habebant singuli normam rectissimam operandi. Sed quominus in re quaque gerenda rationis suæ ductum sequerentur, et consilium pro loco, ac tempore caperent, non impediēbat. Ex hac autem libertate, quam negotiorum curatoribus permittebat, non unam capiebat utilitatem. Nam et inferiorum animos sibi conciliabat, quorum solertix, ac virtuti fidere manifeste ostendebat; et ipsorum exacuebat industriam, cum eos nare sineret sine cortice, suisque luminibus uti; et tandem meliori rerum consulebat expeditioni, quæ plerumque aptius, ac diligentius pertractabantur. Siquem vero nihilominus invenisset desidiam, vel alio quovis vitio in administratione sui muneris laborantem, promptum, atque opportunum remedium adhibebat. Alicubi Procuratorem habuit, non illum quidem desidiam, aut inertem, sed qui pecuniæ nimium parceret, ac vix ea Emptori subministraret, quæ in quotidianos sumptus requirebantur. Joannes, ut huic malo occurreret, quod in detrimentum vergebat omnium, et curationem habet sane quam difficilem, relictis verborum circuitationibus, compendiarium tenuit. Pecunias a Procuratore petiit, quas Emptori deinde tradebat ipse, ab eoque rationem accepti et expensi sibi tantum reddi præcepit. Nihil ad corrigendam stricti hominis tenacitatem fieri profecto poterat efficacius.

Erga valetudine affectos quanta esset illius cura, ex hoc uno casu poterit internosci. Ædituum, dum summo mane ad orandum ibat cum reliquis, e cubiculo suo vehementer tussientem audivit. Continuo egressus, jussit eum ad lectum e vestigio regredi, curamque ipse suscepit, alterum, qui vices ejus ageret, designandi. Sed et in omnes caritatem suam, atque adeo liberalitatem, quantum poterat, extendebat. In his quidem, quæ ad communis vitæ rationem attinent, religiosasam tueri moderationem studebat. In illis vero, quæ ad suum privatum usum spectarent, liberalis et generosus erat, si quisquam alius. Multam etiam pro acceptis beneficiis gratiam habebat,

in eaque referenda nunquam sibi satis egisse videbatur. Id sæpe inculcabat Sociis, ut memores beneficiorum essent, atque illa pro virili remunerari non omitterent: hanc enim agebat Sanctorum virtutem esse, quippe quæ humilitati tanquam proprio fundamento innitatur, mutuaque inter homines caritatem accendat, et mirabiliter ad amorem Dei disponat. Ex hac animi generositate illa etiam facilitas oriebatur, qua multa sibi subditis concedebat, quæ, illæso disciplinæ jure, ad sublevanda religiosæ vitæ pondera deservirent. Atque hujusmodi concessionem nonnunquam dispensabat sponte sua, quo gratiosius erat inexpectatum recipientibus beneficium. Aliquando illas rogantibus facultates dedit, quæ parum videri poterant convenientes. Sed in his concedendis ad infirmiorum petentis animum respiciebat, eamque opportune captabat occasionem ad salutare aliquod monitum circa illarum usum insinuandum. Hoc uno suæ benignitatis præsidio difficiliorem alicujus indolem sine ullo strepitu inflexit, et quibus initio nimia Joannis suavitas videbatur, evidentius prudentiæ suæ habuerunt postmodum argumentum.

Sed quanto indulgentior in alios erat, tanto in seipsum erat austerior. Paucos, dum potuit ac vires habuit, sine flagellatione dies prætermisit. Hinc autem conjicias licet, quam frequenter ciliciis, aliisque torquendi corporis artibus uteretur, quæ majori possunt cum dissimulatione adhiberi. Solutionem legum admittere, sive privatæ illæ forent, sive communes, quantum poterat, recusabat. Contendebat olim ab eo Medicus, ut jejunium quadragenarium, quod ejus infirmæ valetudini obesse poterat, summo jure non observaret, sed carnibus vesceretur, aut ovis. At vero Joannes, qui ad aliorum sublevandas infirmitates erat promptissimus, ut in propria causa Medico assentiretur, adduci non potuit. Credebat enim, si levissimum quoddam edulii genus adhiberet, quo sine aliorum nota poterat uti, præceptum illud integre servaturum. Hujus igitur cibi subsidio esuriales illas ferias tolerare constituit. Verum aliud, quod magis mirere, tunc accidit. Juvenis, qui mensis eo tempore ministrabat, per tres dies ferculum illud Rectori non intulit, sed aliud, quod ei non æque congruebat, apposuit. Fatebatur autem ingenue juvenis ( haud  
mi.

minore deinde temeritatis suæ pœnitentiâ, quam patientiæ Joannis admiratione permotus ) illud se juveniliter, seu potius pueriliter effecisse, ut Rectoris sui virtutem exploraret. Atque, nunquam levitatem illam sibi exprobrasse, quamvis ei certo innotuisset: nec se timuisse quidem, ne alio quovis prætextu offensam illam ulcisceretur, quem sciret, privatas injurias facillime condonare. Enimvero Joannes, quanquam castigando corpori non segniter erat intentus, enixius tamen curabat animi concitationibus moderari. Longissime a cognatis, et amicis in exilio positus, quas accipiebat ab eis literas, scilicet erat usque in crastinum non resignare: ut et vehementer de his agnoscendi cupiditatem infringeret, et quæ afferrentur nuntia, seu læta, sive tristia essent, comparato prius ad utrumque animo, debita cum æquabilitate reciperet. Eodemque modo invigilabat aliis repugnandi sibi opportunitatibus, ut strenue inordinatas retunderet appetitiones.

Nec sane multam adhibere debebat operam, ut occasiones reprimendi sui extrinsecus quæreret, cum ipsum ejus ingenium in quotidiana fere certamina illum adduceret, ac præclaram reportandæ victoriæ materiem subministraret. Etenim ex quodam velut innato rectitudinis principio, quidquid rationi dissonum aut se coram fieret, aut alibi factum agnosceret, stomachum movebat Joanni, nec se facile continere poterat, quin illud pro meritis coargueret. Dum privatam agebat vitam, hujusmodi disceptationes prudenti consilio declinabat. Avertens quippe oculos ab aliorum defectibus, in se protinus descendebat, inspectisque tuberibus propriis, facile verrucis ignoscebat alienis. Sed gubernandi suscepto munere, cum errantes corrigere teneretur, præcipuum adhibere debebat studium, ne, ardentioris naturæ actus impulsu, præscriptos moderationi terminos præteriret. Eratque omnibus manifestum, quam sæpe, quantoque conatu secum ipse decertaret, ut insurgentes iræ motus cohiberet, dum aliquem objurgabat, antequam in eum aliquid statueret. Nonnunquam vero illius animus vehementiori quodam æstu ante occupabatur, quam providere ratio posset, ne occuparetur. Tunc autem, etsi nullum gestum, aut verbum ederet, quod virum gravem non deceret, quædam tamen internæ commotionis indicia in

illius vultu apparebant, quæ ardentem ejus indolem non obscure manifestabant. Hunc Joanni nævum inter egregias illius dotes reliquisse videtur Deus, ut majori sibi esset ad virtutem incitamento. Sic enim aliquibus cæteroqui sanctitate conspicuis evenisse novimus, ut vitia quædam naturæ perfecte non vicerint, quæ nihilominus ad servandam, et augendam humilitatem insigniter deserviebant. Joannes quidem eo depressus pondere, contra superbix flatus securior, ac tutior, tanquam saburra fundata navis, incedebat. Et cum aliunde adversus domesticum illum hostem, a quo frequenter lacesebatur, diligenti se meditatione præmuniret; dum in certamen descenderet, plerumque victoriam obtinebat. Si quando vero succumberet, detrimentum abunde noverat resarcire: nam et veniam petebat humiliter, et se morosum, ac deridiculum esse, aperte confitebatur.

Hanc animi submissionem in adversis etiam rebus retinuit, quibus Deus electos suos vel aliorum hominum ministerio, vel per seipsum probare consuevit. Præpositus quidam provinciæ, dum Collegium S. Ambrosii recognoscebat, nescio quid in Joanne criminabatur coram juvenibus, qui ejus curæ commisi erant. Cum in illa frequentia Præpositum serio loqui non crederet, prima objurgantis verba modesto quodam risu suscepit. Sed cum videret, extra jocum rem agi, demissis oculis, obstipito capite, atque ore compresso acriorem excepit Præpositi reprehensionem. Ex juvenibus, qui tum ibi aderant, mihi unus asseruit, nunquam deinde audivisse Joannem aliquid afferentem, ad elevandam vituperationis illius causam, vel aliquid adversus Provinciam expostulantem, de quo potius semper honorifice loquebatur. Unde credebat ipse, Provinciam in coarguendo Joanne non tam ad aliquod hujus crimen respexisse, quam ad manifestandam virtutem ejus in oculis subditorum, siqui forte essent, qui de illo sinistritus opinarentur. Quod ego tanto probabilius existimo, quanto certius aliunde compertum habeo, Provinciam illum de virtute Joannis ita præclare sensisse, ut eum aliquando virtutem sanctum denominaverit. Is calamitosam illam, atque inexpectatam ab Hispaniæ finibus expulsionem magna etiam animi moderatione sustinuit. Post denuntiatum exilii decretum,

sine



sine ulla perturbatione, atque aliorum potius, quam sui sollicitus, Judici senes enixe commendavit, quorum erat in Collegio S. Ignatii, quod ipse administrabat, et numerus ingens, et meritum singulare. Socios omnes hortatus est ad constantiam, atque ad agendas Deo ex animo gratias pro novo illo, quo eos dignabatur, beneficio. *Et quoniam mea sunt partes, adjunxit, vestris commodis, quantum possim, invigilare; nec praevidere licet quorsum eruptura sit ista tempestas; ut omnes prudenter sibi prospiciant, mea fungenda vicis facultatem unicuique facio.* Deinde inter molestias itinerum, naviumque angustias quam perfecte seipsum ad Dei voluntatem conformaret, apparebat ex ejus vultu, nullis adversorum incursibus concidente: apparebat ex verbis, quibus animos addebat Sociis, et promptiorum ad sustinendum alacritatem jucundissime collaudabat. Postquam Calvium devenerat, ubi omnia tristissima erant, et angustissima, cum quosdam lætitia exultantes, ac miros edentes risus animadverteret, in Dei laudes erupit, qui tantam in tot laboribus animi jucunditatem infunderet. Cum tandem Societatem vidit eversam, humillime coram Deo prostratus, ejusque adorabili providentiæ reverenter submissus, in eodem tenore vitæ, quatenus integrum sibi erat, perseverare constituit. Nihil ergo de studio meditationis imminuit, nihil in servando silentio, et incolenda solitudine immutavit, nihil de utiliorum lectione librorum detraxit. Nullum hominem, nullam unquam feminam ad ministeria cubi- culi admisit: et qui per id tempus non nisi ægre manibus suis uti jam poterat, alienas adhibere præ humilitatis studio detrectabat.

In gravioribus etiam morbis, quibus per longum vitæ cursum non raro laboravit, et humilem, et patientem, et ad omnes inservientium, et medicantium nutus promptum sese perhibuit. Nam cum esset legum observantissimus, dum bene valebat corpore; nihil, dum male haberet, de his adimplere prætermittebat, quæ præscripta erant infirmis. Nullam perhibens propriæ voluntatis inclinationem, ab iis omnino se regi sinebat, ad quos cura sui corporis spectabat: aperteque in omnibus ostendebat, morbum perinde, ac sanitatem ipsam e Dei manibus se grate recipere. Aliquando Medici ab illius



strato recedentes, heroicam ejus patientiam, imperturbabilem pacem, et perfectum cum divina voluntate consensum ita sunt demirati, ut eum præstantibus sanctitate viris adæquaverint. Vallisoleti cum graviter ægrotasset, omnem Collegii administrationem Ministro suo commisit: sibi enim ajebat, eo tempore nihil aliud incumbere, quam ut Ministro, et qui sui curam agerent, in omnibus obediret. Nec secus deinde præstitit, nihil ipse concupiscens, ac nihil eorum renuens, quæ sibi ministrabantur; sed in id solum intentus, ut suavissimæ Domini providentiæ se totum cum fiducia, et tranquillitate committeret. Laicus, qui multas noctes ad illius lectum excubias egit, primam ægrotantis curam fuisse ait, ut nemini molestiam importaret, et a se beneficii loco peteret, ut noctem, quasi solus esset, ita secure transigeret. Adeo sui commodi neque rationem habebat ipse, neque ab aliis haberi desiderabat.

Bononiæ demum, ubi postremus eum morbus occupavit, cum invicta patientia, atque humili subjectione, insignem quoque pietatem exhibuit. Quo die quintum et septuagesimum vitæ annum explebat (is erat dies Apostoli Thomæ solemniter consecratus anno 1781, cujus etiam gerebat nomen, eumque proinde singulari cultu prosequabatur) primos morbi sensit insultus. Arcessiti Medici inter alia suæ artis subsidia, cantharides illi apponi decreverunt, quibus nullum fere horribilius est pharmacum. Sed qui hoc Joanni applicuit, dolorem, quem infligere natum est, multis partibus auxit. Cum postridie ad medicandam plagam accessit, quam venenatæ bestiolæ nativa sua fecerant acrimonia, emplastrum illud, revulsa jam cute, iterum super vivam carnem imposuit. Quantum id ad irritandum dolorem valeat, cum vel sola recordatio extereat, nemo non videt. Et tamen Joannes tormentum illud, deindeque molestam plagarum scarificationem, cæteraque cruciamenta morbi patienter adeo pertulit, ut qui circum aderant, serenum illius vultum, tanquam tranquillū indicem animi, jucunda cum admiratione suspicerent. Sive alimenta sumenda essent, sive potiones hauriendæ, sive aliorum esset convertendus, suas propensiones oblitus, ad voluntatem ministrantium præsto erat in omnibus. Dum acrioribus dolorum stimulis pungeretur, dulcissima Jesu, ac Mariæ nomina reve-

reter ingeminabat : rursusque ridentem induebat faciem , quasi nullum aliud requireret in afflictione sua solatium . Nec dubitare licet , quin præsentem illi opem in eo discrimine S. Aloysius benigne contulerit , cujus cultum non solum in Hispania , sed etiam in Italia curaverat promovendum . Imaginem ejus , Romano penicillo depictam , quam secum in omnibus peregrinationibus tulerat , et hierothecam , quæ reliquias immaculati Juvenis continebat , in sua pretiosiore supellectile numerabat . Illam sorori suæ legavit , in Azcoithiensi Cœnobio S. Crucis pridem Antistitæ ; quippe qui rectissime judicaret , effigiem modestissimi Aloysii nusquam posse opportunius , quam inter velatas virgines collocari : hanc autem illi dono reliquit , qui sibi propinquam mortem annuntiavit . Unde etiam evidenter apparet , quam longe a timore mortis abesset , qui denuntiationem illam eo pignore munerendam voluit , quo nihil habebat carius . Hoc accepto nuntio , divinis communiri mysteriis petiit , quæ omnia deinceps religioso animo , ac tenero pietatis sensu cum recepisset , tranquillus in expectatione remansit . Aliquot ante obitum horas , cum ei rationis usum vis morbi ademisset , salutationem tamen Angelicam apte , devoteque pronuntiabat : donec tandem spiritum Deo reddidit decima sexta Januarii die 1782 . Honorifico elatus funere , jacet in Parochiali templo S. Nicolai ad viam S. Felicis . Omnibus ejus mors doluit , quos præclaris virtutibus fideli sibi conjunxerat amicitia . Sed eisdem solatio fuit non exiguo concors illorum testimonium , qui Joanni in extrema hora astiterunt : quorum ea vox erat unanimes , mortem ejus appetendam potius sibi visam esse , quam timendam , cum illam nulli angores animi præcessissent , sed contra serenitas tanta , ut initium æternæ beatitudinis præsigire videretur .

## SEBASTIANUS MENDIBURUS.



Oyarzum nobile oppidum in Vardulis, quos recentiori vocabulo Guipuzcoanos dicimus, Sebastianum huic mundo dedit anno septingentesimo octavo supra millesimum, secunda die Septembris. Parentum ejus pietas, ut ex fructibus arbor, poterit ex indole filiorum agnosci. Cum enim liberos quinque suscepissent, unus tantum ad familiæ columen domi remansit: alii duo masculi, Sebastianus, et Petrus, totidemque feminæ religiosam in claustris vitam hujus mundi deliciis prætulerunt. Petrus ætate minor, quod præbere cœperat sub genitorum cura specimen innocentia, procul ab ipsorum oculis constitutus, idem luculentius exhibere perrexit. Missus Villamgarsiam, ut latinis literis operam daret, inter multos, qui eodem erudiendi causa conveniebant, ita pietatem coluit, ut studentium exemplar haberetur, a quo possent omnes pueritiæ laudabiliter exigendæ normam desumere. Coram eo contubernales ejus nihil inverecundum, aut procax audebant efficere, vel effari: non quod timerent, ne sua nomina ad Præfectum studiorum deferret, sed quia eos modestus pueri aspectus, et ingens probitatis ejus opinio continebat. Postmodum Societati Jesu nomen suum dedit: et qui adhuc innocentem vitam duxerat, deinceps pene duxit Angelicam. Sic certe unanimi consensu sentiebant omnes, qui Petrum in tirocinio, deindeque in Collegiis habuerunt socium. Ab iis, quæ singularia videri possent, abhorrens, sese ad communem agendi modum omnino conformabat: eo demum contentus, si, quæ agenda sibi erant cum cæteris, ipse singulari modo perficeret. Sed quanquam ab ostentatione virtutis longissime aberat, omnes tamen ex modestissimo vultu, actionum gravitate, et comitate verborum, illius animi decora, quæ sub aspectum venire non poterant, conjiciebant. Eminebat ex ejus ore plus fere quam humanus pudicitia color, atque omnis

nis ejus agendi ratio nescio quid sanctitatis spirabat, quo mirifice capiebantur omnes, et ad eum amandum, peneque venerandum incitabantur. Magister alterius ordinis religiosi obvium illum habuit, dum intrabat ad salutandum quemdam Sociorum, a quo ante ullam salutationem quæsitivè instanter: *Ecquis, precor, est iste juvenis, quem hic proxime offendi? Enimvero sanctum oportet enim esse, cujus solo conspectu hasi ego veneratione suspensus.* Sed quem alii magno in honore habebant, ipse sibi vilis erat, ac nullius pretii, omnemque despiciendi sui captabat occasionem. Quæstionem, quam erat publice propugnaturus, cum Magistro suo agitabat, qui ut occurrentem illi nodum explicaret: *Fingamus, dixit, animam tuam ad me transiisse.* Vix hæc audivit Petrus, cum exclamavit statim: *Jesu bone! si quod ais, Pater, accideret, quam improbam haberes ipse animam!* Par humilitati obedientia, cujus tam multa, et illustria dedit exempla, ut perfectioribus in hac parte jure merito possit annumerari. Par etiam orandi studium, et servandæ disciplinæ constantia, a qua deflectentem vidisse, nunquam ejus æquales meminerunt. In ipso ætatis flore ob insignem ejus virtutem renunciatus fuit præter morem Præfectus clarissimæ Congregationis, quæ Salmanticæ instituta erat pro Scholasticis Academiæ. Hic in juvandis animis nullum ex iis laborem refugiebat, quibus onerari operarius robustissimus potest: quin etiam per ætatem expeditiones sacras ad Saiaguenses, et Batuecos suscepit. At operi dum insistit ardentius, labori succubuit strenuus juvenis, quem acerba mors sustulit ætatis anno trigesimo sexto, volventis seculi septimo et quinquagesimo. Domesticis, et extraneis lacrymas excivit interitus Petri. Nonnulli opifices eo die a labore cessarunt: alii defuncti pedes, et manus religiose deosculabantur: aliquis capillos illi præcidit, tanquam pretiosum pignus reverenter asservaturus. Multi Sociorum, quas olim tractaverat vestes, sibi certatim deposcebant. Multi etiam cives eorum petierunt aliquid, quæ viventi Petro inservissent: nec defuit, qui pro solemniori funere sumptus obtulerit, negans, tam sancti viri corpus vulgaribus exequiis efferri oportere. De præclaris Petri virtutibus plura in eis literis continentur, quas prelo excusas ad Castellæ Sicos dedit Clemens Recius Salmantini Collegii Rector.

Sebastianus et sanguine , et moribus frater germanus Petri, sicut illum nascendi conditione diu antecessit, ita etiam moriendi tempore longe est subsecutus. Quid in pueritia gesserit, quibus usus sit præceptoribus, nihil certi possumus statuere. Sed enim qui omnem vitæ cursum ita peregit, ut receptam in Baptismo gratiam nunquam amisit ( eo attestante, cui Sebastianus sexto ante obitum mense totam vitæ seriem aperuit ) eum necesse est et pueritiam, et adolescentiam, et ætates reliquas cum attentissima innocentiae cura transigisse. Hanc ut in loco tutiore collocaret, religiosam vivendi formam amplecti constituit: factaque matura deliberatione, demum ad Societatem accessit Nonis Septembribus anno 1725. Ad tirocinii culturam cum animum spinis vitiorum liberum, et purum sceleris attulisset, in eo, velut in sponte feraci solo, insitæ virtutum plantæ radices egerunt altius, et lætissime germinarunt. Suspiciebant in eo noviti cæteri, ut eorum quidam etiam num superstes confirmat, fervorem animi in Deum, promptam et exactam spiritualium rerum tractationem, atque odium maxime, quo se sancte oderat, et corpus suum asperrime divexabat. Ab his optimis initiis inter studiorum occupationes nunquam descivit. Longum ac difficilem discendi laborem ita virtutis contentione temperavit, ut illum neque tædio victus abrumperet, neque rursus inanis gloriæ cupidine assumeret; sed tantum placendi Deo causa, et juvandi olim homines desiderio sustineret. Hac diligenti cura gravioribus bene instructus scientiis, ad splendida exercenda munera evasit idoneus, quæ delata illi fuerunt deinde. Sed ut eadem cum profectu animarum obiret, multum ei contulit tertius ille probationis annus, quem alumni Societatis, excusso jam academico pulvere, in secessu spiritali ponebant. Ibi enim Theologiæ, quam recenter in Scholis audierant, mysticam adjugebant scientiam: eamque condiscere jubebantur non solum ex libris, sed præsertim ex frequentiore meditationis usu, et cultu solitudinis, in qua facilius divini vox auscultatur Spiritus. Ibi arma illa versabant assidue, quæ maxime opportuna erant, ut et seipsos perfectius vincerent, et alios deinde ad superandas hostium insidias peritius erudirent. Et cum Sacerdotes illi novelli multa jam studiorum decursu

in-



inspexissent, quæ tirocinii tempore ob teneriorem adhuc ætatem vix bene noverant, fiebat plerumque, ut unus ille tertix probationis annus uberiores virtutum fructus, quam integrum tirocinii biennium proferret. Mendiburus certe opportunitatem illam tam avide arripuit, ex eaque tantum animi ardorem deprompsit, quanto sibi opus erat, ut per vitam reliquam perfectioni suæ, et æternæ multorum saluti indefesso adlaboraret studio.

Pompeionem principem Navarræ urbem adire jussus, ibi docendo, concionando, sacras per diœcesim et extra illam excursiones ineundo, aliisque industrii operarii laboribus per annos triginta desudavit, ulterius etiam conatum infatigabilem provectorus, nisi supervenisset exilium. Docendi munus, juxta Societatis leges, a latinis literis inchoavit: in eisque tradendis, teneros puerorum animos non magis literarum scientia, quam pietate in Deum imbuendos curabat. Itaque sæpe de diligendo Deo, de obeundis Christianæ vitæ officiis, fugiendoque peccato et privatim, et publice cum discipulis sermonem habebat. Merito enim credebat ipse, si timorem Dei suis auditoribus instillasset, et literis duros operam studiose, et alia omnia, quæ illos propius attingerent, expleturos. Sed ludi negotium, et quæcunque alia domi agenda occurrebant, angustior Mendiburo campus, pro insatiabili laborandi studio, videbatur. Consentientibus igitur Superioribus, et Episcopo Francisco Ignatio de Annoa summe gaudente, constituit per æstivas ferias ad montanos Navarræ tractus, aliosque diœcesis populos quotannis excurrere, quibus ignota plerumque est vulgaris Hispanorum lingua, et sola Cantabrica utuntur. Propter sermonis hujus difficultatem, qui nimium quantum distat a cæteris per Hispaniam, imo etiam per universam Europam usitatoribus, et aliquam cum Hebraico habet affinitatem; non multi erant Sacerdotes, qui orationes habere ad populum, et expeditiones sacras suscipere auderent. Mendiburus, etsi a teneris eam linguam didicerat, modo tamen, ut omnibus prodesse posset, qui eadem utuntur, varias ejus dialectos penitus nosse contendit. Cantabrice autem loquuntur et Cantabri proprie dicti, et Guipuzcoani, et Alavenses, et qui Navarram incolunt superiorem, et inferiorem. Ut peculiare cujusque pro-



vinciæ idiotismos perfectius disceret, præter accuratam privati studii diligentiam, illos e discipulis suis frequenter interrogabat, qui possent, ad exorta solvenda dubia, aliquam sibi lucem afferre. Hac animi demissione, et exquisita commentandi, scribendique assiduitate illud demum adeptus est, ut universim apud eas gentes consummatus Cantabricsi sermonis Magister, et perfectus haberetur Orator. Cum aliquando Azcoithiæ verba faceret, ubi multi sunt nobiles, et eruditi viri, pendebant omnes ex disertissimo dicentis ore, neque unquam credidisse affirmabant, posse suam ipsorum linguam tantum eloquentiæ ornatum admittere. Quidam autem eorum ingenio, et eruditione celebris dixit, Ciceronem latine non magis proprie, et elegantius fuisse locutum, quam Mendiburus cantabrice loqueretur. In cæteris magni Oratoris dotibus actio ejus erat excellens. Decoro fuit aspectu, procero corpore, beneque conformato: et quamcunque rem vellet significantius exprimere, eam non solum verbis, sed manibus etiam, ac totius corporis gestu in auditorum animos, atque adeo in eorum oculos ingerebat. Ad Suessitanos per multos dies orationes habuit: et cum illorum plerique interdum laboribus intenti essent ruri, vel domi, ne cujusquam obsesset commodis, concionem sub noctis crepusculum convocabat. Pronum erat, ut hominibus ex diurno labore defatigatis somnus eo tempore obreperet, qui etiam otiosos occupare solet, dum concionibus intersunt. Tamen in tanta auditorum multitudine, quantam ad eum diem nusquam alibi habuerat, nullus visus est, qui dormiret. Id Mendiburi socius, qui rem non immerito mirabatur, illius præclaræ actioni tribuebat, in qua nullum se ait vidisse præstantiorem. Hanc auditores illi, duplici ad suggestum accensa face, distinctius poterant observare: itaque conjectis in Oratorem oculis, cujus tanta erat ad excitandam attentionem facultas, arrectis etiam auribus et animis auscultabant.

His ad bene dicendum adminiculis, quæ natura, vel arte comparaverat, alia etiam accedebant, quæ ad faciendam fidem, et auctoritatem sibi conciliandam, plurimum habebant momenti. Nam et vitæ integritas, orta quæ inde sanctitatis opinio, et indefessa juvandi omne hominum genus sollicitudo,

et

et insurgentes adversus conatus suos oppositiones, quas imperterritito superabat animo, magno illi adjumento fuerunt, ut copiosum ex laboribus suis fructum reportaret. Jam inde a primo in Pompelonense Collegium adventu præcipuam religiosi viri existimationem vel inter suos obtinuit. Quæ deinde apud externos tantum invaluit, ut multi eum non nisi addita sancti appellatione nominarent: alii, dum gradiebatur per urbem ( quod perraro efficiebat ) ad fenestram, vel januam accurrerent, ut prætereuntem avidi, ac venerabundi conspicerent. In locis, ad quæ annuntiandi Evangelii causa mittebatur, perspecta ejus modestia, et gravitate, totiusque vitæ ratione moderatissima, facile erat omnes ad præclare de illo sentiendum permoveri. Qualem vero teneret in missionibus agendi modum, argumento esse poterit, quod eum alicubi fecisse novimus. Multo mane consurgens, integram meditationi horam nunquam non impendebat. Sacris deinde operabatur in templo, quod efficiebat semper exacte, ac reverenter: parique reverentia in actione gratiarum ad longam moram perseverabat. Post hæc domum regressus, precum Sacerdotalium partem aliquam exsolvebat, dum modicum jentaculum apparabatur. Quod si tempus audiendi confessiones jam incepisset, inde templum repetens, omnibus omnium ordinum viris, ac feminis patientes præbebat aures, et lingua salutifera medebatur. Absolutis confessionibus, in ipso templo per quadrantem horæ suam ipse conscientiam discutebat, ac tum demum in hospitium revertebatur, ut cibum, et quietem caperet moderatam. Post prandium psalmodiæ reliquum pensum absolvebat, rursusque pro sacro tribunali sedens, ab eodem paulo ante consurgebat, quam ascenderet in suggestum. Orationes in missionibus haberi solitas bene didicerat, easque ad ingenium suum, et ad conditionem auditorum optime accommodaverat, superadditis non paucis, quæ maxime utilia erant, ac propemodum necessaria: unde cum egregia sacri Oratoris laude magnam itidem industriæ suæ retulit utilitatem. Sed inter multorum plausus multos etiam habuit obtrectatores, qui frequentes illi patientiæ, constantiæque perhibendæ præbuerunt occasiones. Neque homines tantum, sed etiam maligni Dæmones ab inceptis eum conati sunt deterrere.

In-

Inter machinationes alias, quibus illi molestiam, ac terrorem injicere tentaverunt, non infrequenter, dum ab uno in alium locum sereno cœlo contenderet, derepente densissimæ excitabantur nubes, quibus omnia concussum iri videbantur. Id ipse Diabolicis tribuebat artibus, quoniam minaces illi nimborum apparatus, ostensa Crucifixi imagine, figuratoque crucis signo, protinus evanescebant. Quod cum sæpe fuisset expertus, nihil hujusmodi præstigiis retardabatur, quominus in destinatum locum ire pergeret sine metu.

Cum expeditiones illæ sacræ, quas per ætatem susceperat dum Grammaticum agebat, magnis essent fructibus nobilitatæ, visum est Superioribus Mendiburum ab ea statione non remove, in qua simul cum profecto discipulorum tantum afferebat animis emolumentum. Itaque post triennium cœpit ibidem Philosophiam explicare, quod per integrum sexennium cum laude fecit, non interruptis propterea feriarum tempore Apostolicis in montana præsertim loca excursionibus. Cum jam prope erat, ut munus illud absolveret, contendit Illustrissimus Gaspar de Miranda, qui Annoræ ad Cæsaraugustanam metropolim evecto Pompelone successerat, ut Mendiburus Theologiam in eadem urbe doceret. Cupiebat enim vehementer, ne unquam populis curæ suæ commissis, qui Cantabrice, seu Vasconice tantum sciebant, tam strenuus deesset operarius. Provinciæ Præpositus, cui tum Antistiti optimo gratum per omnia facere non licebat, præcipuam votorum ejus partem explevit. Mendiburum ad regale Collegium Lojolæum, quod in eadem diœcesi situm est, Concionatorem destinavit, certus eundem remittere Pompelonem, cum primum sese opportunitas exhibuisset. Hæc non diu fuit expectanda, nam insequenti anno ad eam urbem rediit, Theologiæ Magister designatus. In eo munere, quanquam ad omnes, ut antea fecerat, infatigabilem curam extenderet, peculiari tamen studio in discipulos suos invigilavit, ut literis, et bonis moribus diligenter informarentur. Etenim cum felicem reipub. statum a recta juventutis institutione pendere fateantur omnes, eos potioribus curis erudiendos esse juvenes existimabat, qui viam ad Sacerdotale munus ingressi (quales ii plerumque sunt, qui animum ad divinas scientias applicuerunt)

runt ) deinde sacrorum futuri sunt administri, et animarum duces constituendi. Hos ergo omni ope, atque opere nitentur et sacris bene imbuere disciplinis, et ad honestioris vitæ formam inducere, ut ad populorum in divinis rebus eruditionem Magistri evaderent habiliores.

Sed excelsus Mendiburi animus, et incomparabile promovendæ virtutis studium non satis habuit discipulis prodesse suis, nisi et omnibus beneficeret, qui Scholas illas venturis etiam temporibus frequentarent. Sub clientela S. Aloysii Congregationem Scholasticorum instituit, eamque ad promovenda literarum, ac virtutum studia tam opportunis legibus communivit, ut, si nihil aliud Pompelone molitus esset, illa tantum immortale sibi nomen peperisset. In ea erigenda Congregatione illuc etiam respexit Mendiburus, ut spectacula de medio tolleret, quæ adolescentibus illi studiosi nonnumquam exhibebant, per speciem quidem, ut S. Aloysii memoriam celebrarent; sed re potius vera, ut oculos civium passerent satis ingenti sumptu, nec modico studiorum detrimento. Multos enim impendebant dies, ut eos apparerent ludos, in quibus aut equestres habendi erant per urbem decursus, aut agitandi vituli, aut in scenam mittenda fabula, aut aliud quiddam simile ad oblectamentum populi perhibendum. Difficile erat, considerata gentis indole, consuetudinem illam, quod tentatum fuerat olim incasum, penitus abrogare. Sed Mendiburus eam abolere non desperabat, si prius ingenuos Navarræorum animos ad pietatis studium excitasset. Sequestro Aloysio cœlestem imploravit opem, et adolescentes omnes, qui majoribus facultatibus operam dabant, sub finem jejunii verni ad exercitia S. Ignatii per dies senos invitavit. Ipsa sacratissimi temporis opportunitas ad acceptandum invitamentum adjovit: et Mendiburus, ut vim adderet exercitiis, Philosophiæ, ac Theologiæ Magistris persuasit, ut eorum singuli haberent ad juvenes exhortationem, quæ proprias cujusque diei clauderet commentationes. Omnia Mendiburo ex animi sententia successerunt. Juvenes attenta rerum æternarum meditatione, et Magistrorum cohortatione vehementi tam generosos spiritus ad meliora sequenda conceperunt, tantoque incaluerunt amore virtutis, ut unus e senioribus Collegii Pa-

tri-

tribus, nunquam se simile quidquam vidisse, fateretur. Hoc animi habitu comparatos facile Mendiburo fuit ad ea, quæ meditabatur, adducere. Omnes uno ore libenter consenserunt non solum de Congregatione formanda, sed etiam de accipiendis conditionibus, quæ sibi vellent imponi. Eaque statim rogata lex est: *Nequa profana spectacula in posterum eduntor; sed anniversarius Aloysii dies quam maxima poteris solemnitate quotannis in templo celebrator.* Aliæ deinde latæ sunt leges, ad optimam juvenum institutionem ordinatæ, quæ typis editæ omnibus, dum Dialecticam inchoabant, distribuebantur; ut quæ initio prudentissime decreta fuerant, ab iis, qui denuo adveniebant, fideliter observarentur.

Constituta in eum modum anno 1752 Aloysiana Congregatio Pompelonensis jucundissimos virtutum fructus, dum Societas in Hispania stetit, progerminare non desiit: earumque bonus odor non tantum intra Scholarum ambitum, sed etiam per civium domos, atque adeo per multas regni urbes placidissime spargebatur. Illi enim juvenes Magistris suis diligenter obtemperantes, ad studia literarum incumbabant attente, atque in templis frequenter conspiciebantur, agitandis mente divinis, fundendisque precibus cum insigni reverentia Numinis occupati. A divino colloquio digressos, haustus inde quidam pietatis sapor, et egregium modestiæ decus prosequabatur, quo cæteros ad amorem virtutis, vel taciti, permovebant. Quanquam verbis etiam, et manibus inserviebant aliorum commodis, tum sublevanda mendicorum inopia, tum etiam ægrotis in Nosocomio visendis, et consolandis. Præter privatam Sacramentorum frequentiam, unicuique ab animi ductore concessam, cuncti singulis mensibus in Societatis templum conveniebant stata die, ut simul acciperent Eucharistiam. Id tam præclaro religionis exemplo peragebatur, ut numerosa circumstantium turba mirabiles ad pietatem stimulos inde sibi sentiret infundi. Nec deerat inter cives, qui communionem sacram in eandem reservaret diem propter uberiores devotionis sensus, quos ab eo modestissimorum juvenum conspectu reportabat. Sicut autem Mendiburus statuendæ Congregationi ab exercitiis S. Ignatii initium desumpserat auspiciatissimum, sic etiam ad illam conservandam, et promovendam



dam iisdem utebatur auxiliis. Quotannis eodem tempore, eodemque modo, quo factum erat initio, juvenes sacris meditationibus exercebantur: et cum ad eas multi etiam ex omni ordine viri postmodum admitterentur, crescebat in annos singulos et meditationum fructus, et numerus iisdem exerceri cupientium. Itaque quod ad privatam studentium utilitatem fuerat institutum, in commune reipub. commodum redundavit; cum sacrum illum secessum magna consecuta sit morum reformatio. Neque illud hic adjungere prætermittam: Mendiburnum, in ea stabilienda Congregatione, fecundissimum posuisse plantarium, ex quo novella virtutum germina frequenter ad amœniora septa transferebantur, ubi lætiores ferebant fructus. Multi enim juvenum ex diligenti divinorum usu animum sensim ad celsiora erigebant, supernorumque luminum capaciores effecti, perfectionis tandem incendebantur studio. Unde illa jam vulgo invaluerat opinio, ab Scholis Societatis Pompelonensibus triginta minimum adolescentes singulis annis ad varias Religiosorum familias pertransire. Hæc omnia cum videret Franciscus Xaverius Idiaquezius, qui biennio ante Sociorum expulsionem Collegium illud pro suo Præpositi munere lustrabat, Magistros hortabatur impense, ut Congregationem illam fovere pergerent, *qua nihil est, dixit, in Collegio Pompelonensi præstantius*: cum tamen aliæ insuper essent Congregationes, quæ multam inter cives commendationem obtinebant.

In illius agelli cultura, ex quo tam læti veniebant fructus, libenter Mendiburnus perseverasset, nisi jam antea decretum fuisset, ut Congregationem Aloysianam unus e tribus Theologiæ Professoribus semper administraret. Nunc ergo docendi solutus onere, Congregationem, et Cathedram in alterius transmisit curam; sed in urgendo religioso Aloysii cultu nihilo fuit minus diligens. Ipse tam intimo affectu Angelicum Juvenem reverebatur, ut nihil fere nisi sub ejus auspiciis aggrederetur: illius fidei res suas omnes magna cum fiducia commendabat: ad eum in periculis, in adversis quibuslibet recurrebat. Quocumque iter ageret, sacras ejus Reliquias secum deportabat, easque collocabat super aram, dum mysteriis divinis operabatur. Ad promovendum vero inter alios



S. Aloysii cultum, præter adhibitæ ubique frequentes adhortationes, illius Vitam Italice scriptam a Virgilio Cepario, et Hispanice jam pridem redditam, denuo cum additionibus edendam curavit. Libellum etiam recudit ad religiose celebrandos sex illos Dominicos dies, qui proxime natalem ejus diem præcedunt: aliumque ad novendiales fundandas preces ipse composuit. Prodigiosæ illius farinæ, per Aloysii merita divinitus multiplicatæ, bonam semper habebat copiam, eamque largiter impertiebatur; tum ob singularem fiduciam suam; tum etiam ob iterata beneficia, quæ per ejus usum a Deo concessa viderat, et manu sua sæpe palpaverat. Huic denique religioso Mendiburi studio tribui etiam ex parte debent pretiosa illa dona, quibus ara S. Aloysii duobus ante exilium mensibus fuit exornata. Nempe statua ejusdem Aloysii, intra loculum crystallinum pulcherrime collocata, cum duplici lychnucho pensili, quæ vir honoratissimus Vincentius Mutiloa suis expensis elaboranda curavit: et Rosarium ex globulis confectum aureis, filoque innexis similiter aureo, quod nobilis femina Teresia de Alava animo donaverat pietissimo.

Postquam Theologiæ magisterium absolverat Mendiburus, regendam suscepit Congregationem Sacerdotum, et aliam quæ Schola Mariæ dicebatur. Prima sub illius ductu Collegarum numero notabiliter crevit, et numerum æquabat fervor ad injuncta pietatis opera peragenda. Etenim, quem ad informandos Sacerdotii candidatos tam attentum fuisse conspeximus, ad eos exhortandos, et perficiendos, qui sublimem illum apicem jam attigerant, consequens omnino erat, ut esset attentissimus. Totus erat in excogitandis premendisque viis omnibus, quibus Sacerdotes illos ad sanctitatem morum suæ conditioni convenientem promoveret. Et cum apud ipsos multum Præfecti sui valeret auctoritas et exemplum, in admitteendis consiliis ejus magna erat cunctorum consensio, et singulorum in exequendis diligentia. Nonnulli ob frequentiore cum eo consuetudinem, atque intimam familiaritatem, passim discipulorum nomine a multis appellabantur: horumque vitæ integritas, et notissima in rebus omnibus circumspectio, maxima erat Mendiburi commendatio. Dum is Guipuzcoam

sacris excursionibus circumibat, quidam illorum Tolosam veniens, multorum in se vertit oculos: et cum ignotus ibi esset, nonnulli viri Ecclesiastici ex modesta hominis facie, et gravitate vere Sacerdotali, quemdam esse de discipulis Mendiburi pro certo statuerunt. Nec vero aberrarunt illi; nam erat de familiaribus ejus intimis, et inter omnes diœcesis Parochos spectatissimus. In Congregatione altera, quoniam Sodalium numerus augeri non poterat, quem illius auctor Hieronymus Durarius ad septuaginta duos definitum voluit, nullum omisit laborem Mendiburus, ut observantiam legum, et ardorem ad virtutis opera retineret. Illud quidem tum Pompeione, tum alibi communi omnium sermone vulgatum erat, quicumque nomen Scholæ Marianæ dedissent, eos ad Christiani hominis formam mores suos exigere, atque in his, quæ ad Dei servitium spectant, non perfunctorie, sed tota animi contentione versari. Mendiburus ergo, ne unquam cœtus ille ab antiquo vigore deficeret, præter assiduam in promovendis ad virtutem Sodalibus diligentiam, ad obstruendos etiam aditus invigilabat, unde posset disciplinæ languor obrepere, ac præclarum Scholæ decus obscurari. Quoties in decedentium locum novi conscribendi erant alumni, hoc inter alias conditiones in eis maxime requirebat, ne ratione sui muneris ita essent impediti, ut ad consueta Scholæ exercitia prompte, constanterque adesse non possent. Nullum quippe Sodalitium debita pietatis laude florere posse judicabat, si vel pauci Sodalium in explendo officio essent indiligentes, quos facile erat, ut alii deinde paulatim imitarentur. Et cum omnibus nota esset hæc Mendiburi vigilantia, impensius curabant singuli morem eidem gerere, tum propter venerationem, qua illum prosequerentur, tum etiam ut laboribus grati essent, quos pro ipsorum spiritali commodo suscipiebat. Itaque vigeat in Schola illa non secus, atque in alio Sacerdotum cœtu, magna colendæ virtutis æmulatio, unde optimus exempli boni odor in cives cæteros emanabat.

His aliæ non leves accedebant curæ. Præter impensam audiendis pœnitentibus operam fere quotidianam, eos diligenti studio instruebat, qui ad exercendum piis commentationibus animum adventabant. Hi frequentes ex omni classe

conveniebant per quadragenos jejunii dies, sicut etiam in quatuor anni temporibus Clerici, qui sacris erant ordinibus initiandi: omnesque pro diversa cujusque status conditione ad perfectionem vitæ diversis excitabat adhortationibus. Ad hæc in Dominicis diebus Quadragesimæ conciones plerumque habebat in Parochiali templo S. Saturnini ad servos, et ancillas, quibus nota erat sola lingua Vasconica: nec pauci ad eandem promiscue intererant, qui, licet Vasconice loqui nescirent, loquentes tamen sufficienter intelligebant. Sed inter urbanas occupationes ruricularum, quos impense amabat, non poterat oblivisci. Etenim quos magisterii sui tempore solitus erat invisere, vacationem adeptus muneris, eosdem non erat relicturus. Quotannis duos minimum menses suis profectio-nibus destinabat, ut Apostolicis extra urbem insisteret ministeriis. Atque ut alii solent per æstivas, vel autumnales ferias ab strepitu discedere urbano, ut ruri liberiores respirent auram, ille etiam operosas, quas domi habebat, aliquandiu abrumpebat occupationes; non quidem ut cessaret alibi, sed ut graviores alias, sibi vero valde quam jucundas assumeret. Nulla enim re magis recreabatur, quam laboribus pro salute animarum susceptis, quorum fructum capiebat uberem in excursionibus, quas faciebat in pagos, et castella, atque etiam in alias per diocæsim urbes. Ubique autem tanta contentione laborabat, ut constantiam ejus alii demirarentur, nec satis caperent, quomodo tanto oneri vires illi suppeterent; cum præsertim expeditionem aliam ex alia sine ulla interspiratione susciperet.

Initio, vel propter fervidiorem indolem, et ætatem nondum rerum usu bene confirmatam, vel propter solitam nequitiam Diaboli, qui divini verbi Præcones mille artibus insectatur; multi fuerunt a multis contra Mendiborum rumores disseminati. Volebat ille, pro ferventi suo in Deum amore, non solum peccata tollere, sed peccatorum etiam radices evellere, atque omnem peccandi occasionem, quantum posset efficere, penitus amoliri. Ac multis quidem in locis conata sua perfecit, inductis populi Magistratibus, ut in ea sedulo invigilarent, quæ possent aliquam moribus adducere corruptelam. Sed cum in eo frequentes occurrerent difficul-tates,

tates, in multorum offensionem incurrit, qui Mendiburum arguebant imprudentiæ, ac novarum rerum molitorem appellabant. His parum commotus fuisset, cum sciret eam esse Apostolici ministerii conditionem, ut qui strenue pro Dei causa laboraverint, male apud multos audiant; nisi animadverterisset aliunde, prædicationis suæ fructum ex conflata sibi invidia, tanquam ex Diabolica fraude præpediri. Destitit ergo ab urgendis quibusdam cœptis, quæ, licet utilia essent, minus tamen erant necessaria: conciliatisque paulatim animis, copiosiore exinde laboris sui fructum collegit. Ad se accedentem populi cum gaudio suscipiebant, ac discedentem prolixa gratiarum actione, imo etiam veneratione prosequabantur propter perceptas illius opera utilitates, et observata virtutum ejus clarissima exempla. Hoc modo Navarram lustravit universam, et maximam Guipuzcoæ partem, quæ Pompelonensi paret Antistiti: nec solos Cantabrigi sermonis adibat populos, sed oppida etiam, et urbes; in quibus linguæ Castellaniæ vigeat usus. In his locis per annos triginta unum multa eum fecisse constat, multaque perpassum, ut diocesim illam ad Christianarum legum formam componeret, atque ad insignem pietatis cultum excitaret. Quod si fuisset diligentior aliquis, qui peregrinationum ejus comites, cum adhuc viverent, consulisset; non pauca sine dubio sciremus, quæ supra communem illam famam singularem Mendiburo adderent commendationem.

Nonnunquam extra diœcesis Pompelonensis fines excurrit, ut divini verbi semen spargeret: et ubique sui similis semper apparuit. Anno 1757 missus est Arnedum Rivogici urbem, ut eam concionibus, aliisque Societatis ministeriis per quadragesimam jejuniorum excoleret. Socius ei datus ad missionem illam Franciscus Xaverius Buelta, qui paulo ante Sacerdotium inierat: proptereaque indecorum ætatis suæ reputabat, si in aggrediendis, sustinendisque laboribus, Mendiburum jam senescentem æquis passibus non sequeretur. Hac nobili tactus æmulatione, mandatam sibi provinciam constanter usque ad finem sustinuit. Idem tamen fatetur ingenuè, vix capere posse, in tam diuturna laboriosaque occupatione quomodo vires sibi suffecerint. Mense Martio cum accensa  
later.

laterna petebant templum, ut salutarem Hostiam offerrent: deindeque solidum diem confessionibus excipiendis, habendis que concionibus ita erant distenti, ut pauca essent momenta reliqua, in quibus sibi suisque rebus vacare possent. Tanta erat civium, et advenarum frequentia, tantique in omnibus ad pœnitentiam motus, ut Sacerdotes, ac seniores populi assererent, nil unquam his simile contigisse ante illos quadraginta annos, in quibus semper duo Sociorum missi fuerant per idem tempus in eam urbem. Præterea honesta femina, ad quam ambo suis alendi expensis diverterant, cum videret quanta civibus bona ex eorum sudoribus obvenissent, nihil admodum neque pro facto sumptu, neque pro mercede pacta voluit accipere. Sed enim generosam hospitis largitatem Mendiburus haud minore dono rependit. Quidquid illi solvendum erat, in erigenda Congregatione sub nomine SS. Cordis Jesu totum impendit; depicta ejus imagine, obtentoque diplomate Pontificio, datis etiam legibus, aliisque perfectis, quæ ad integram ac legitimam illius institutionem requirebantur.

Inde ad Autolenses, qui prope absunt, cum pertransisset, eos iteratis concionibus ferventissimis ad emendationem morum accendit. Expiatisque illorum animis, sine ulla intermissione laboris alteri se adjunxit socio, qui eum alio evocabat. Laurentium Uriartem Rectorem Collegii Lucroniensis magnis urgebat precibus Episcopus Calagurritanus, ut ad urbem Calcidam, quæ altera est Episcopi ejusdem sedes, missionem sacram susciperet. Is ergo, cum pro sua animi demissione tanto operi se imparem reputaret, Mendiburum accivit socium, a quo ea, quæ sibi deerant, supplenda esse sperabat. Orationes habuerunt in templo maximo, ubi aderat honorabilis Canonicorum cœtus, cui vim eloquentiæ suæ quam maxime probavit uterque Orator. Innotescebat hæc omnibus ex dolore, atque aliis animi sensibus, quibus percussi erant auditores, de quorum frequentissimo numero vix unus credebatur esse, qui peccata sua ad pœnitentiæ tribunal non detulisset. De socio suo narrabat deinde Rector, subtristem se aliquando fuisse, cum eum dicere incipientem audivit; quippe non eo ardore, quem fama vulgaverat, præditus sibi esse videretur. At vero, ut in oratione procedebat, ita exarsisse,



atque ita omnia inflammasse, ut vel sibi sacrum quemdam horrorem incusserit. Postquam deferbuit Confessionum æstus, Rector ibidem mansit tantisper ad colligendas reliquias messis: Mendiburus Pompelonem rediens, primo die Navarretum ante prandium advenit, quod inde abest millia viginti octo. In opulenti viri domum exceptus, qui eum dies aliquot apud se habere desiderabat, nullis adduci precibus potuit, ne post prandium iter suum pergeret. Lucronii etiam expectabant illum Socii, ut qui tandiu pro eo Collegio laboraverat, in eodem conquiesceret aliquandiu. Sed ille ab ea urbe deflectens, Vianam usque processit: et quanquam eo venit denso imbre madidus, postridie tamen primo diluculo Pompelonem versus contendit, declinatis semper his domibus, in quibus eum libenter, ac liberaliter exceperant.

Cum primum ab expeditionibus sacris in suum Collegium revertebatur, omnia religiosæ disciplinæ subibat onera, nec solvi volebat legibus, aut aliqua indulgentia uti, quæ debita proculdubio est diuturno labore defatigatis. A prima die surgebat cum reliquis ad orandum, cæteraque obibat promptus et publica, et privata quotidianæ vitæ exercitia. Sed et longo annorum cursu familiare illi fuit sesquihoram minimum ante alios e somno surgere, ut majora deinde spatia suis occupationibus inveniret: quem morem non ideo prætermittebat, quod diutius, aut enixius in excursionibus laborasset. Nimirum una erat Mendiburo requies, laboribus alios accumulare labores, vel quos ei majorum imposuisset imperium, vel quos ipse ad suum, et aliorum spiritale commodum desumebat sponte. Sive enim domi maneret, sive foras egrederetur, omnia sua consilia, et studia in Dei honorem, atque hominum salutem referebat. Hoc juvandi homines incensus desiderio, nonnullos scripsit libros, ut posteriorum utilitati deserviret. Edidit Cantabrice compendium doctrinæ Christianæ a P. Gaspare Astete conscriptum: librum etiam a se compositum de cultu Sacri Cordis Jesu: et tres alios, in quibus varia congescit argumenta, quæ Parochis magno usui erant, ad populum in solemnioribus anni festis erudiendum. In eundem finem scripserat, et jam prelo paratum habebat copiosum Gatechismum tribus tomis distinctum, cum ejectus est in exilium.



lium. Neque ideo spem amisit illum aliquando sub alterius saltem nomine divulgandi, quippe qui suam in eo gloriam non quærebat, sed divinam tantum, et profectum animarum. Verumtamen nunquam potuit Catechismum illum in lucem emittere, quamvis multa cum incredibili diligentia tentaverit. Alia etiam opera ejusdem generis, quæ partim Cantabrice, partim Castellane composuit, similiter inedita reliquit.

His domi, aliisque laboribus intentus, constans erat in cubiculi colenda solitudine, a qua non eum quidquam facile removisset, præterquam obedientiæ, vel caritatis impulsus, vel etiam religionis studium, quo frequenter ad visendum in templo Dominum incitabatur. Ab hominibus vero invisendis longo tempore abstinuit, donec ratione munerum, quæ sibi demandabantur, nonnullos civium convenire cœpit, ne notam incurreret inurbani. Sed ejusmodi visitationes et infrequentes erant, et breves, et sermonibus pietatem redolentibus sine fastidio conditæ. Quanquam ut ad pietatem moveret omnes, satis erat Mendiburum vel nihil loquentem intuëri. Per urbem aperto incedebat capite, demissis plerumque oculis, incessu gravi, totoque corpore tam modeste composito, ut animum ad superna sublatum, et cum Deo familiariter agentem iudicaret. Externorum convivia, dum manebat in Collegio, recusabat; nec domi gustabat quidquam extra designata refectio- ni tempora. Cœnam vero jam diu sibi interdixerat, antequam iret in exilium, in quo ne tum quidem ab ea consuetudine recessit, cum in obsidione Calviensi Sociorum prandium oryzæ ferculo elixæ aqua sine conditura alia, et pane nautico fiebatur. Quo tempore Theologiam profitebatur, ictero laborare cœpit, a quo nunquam plene convaluit. Cum autem morbum illum irritari frigida expertus fuisset, et vino non nisi modice admodum uteretur, deinceps aquam calefactam igni semper adhibuit: quod in æstate præsertim oportet ei nimium fuisse fastidiosum. Huic cibi, et potus moderationi duriores adjunxit castigationes corporis, ut melius castimoniæ candorem tueretur. In exilium profecturus, licet alia reliquerit, secum tamen adduxit cilicia quædam hirsuta, aliaque cuspidibus intexta ferreis, et flagella, quæ post illius obitum inventa, non otiosa fuisse indicabant. Nihil aut in vestibus,

aut

aut in cubiculi supellectili, aut in cæteris ejus rebus apparebat, quod a perfecta religiosi viri paupertate descisceret. Remuneraciones pro concionibus accipere non volebat: atque ut longius ab eo periculo abesset, constituit orationes Panegyricas non habere, pro quibus decreta esset aliqua compensatio. Neque alias id genus orationes dixisse constat, nisi quas ei Superiores demandarunt. Vir quidam primarius, cui Mendiburus in extremis adfuit, ut gratæ memoriæ monumentum aliquod exhiberet, chocolati aliquot pondo, et nescio quid aliud eidem reliquit: nulla tamen ratione, ut aliquid acciperet, ab eo potuit impetrari. Tabaco non utebatur, neque colorato muccinio, sed candido contentus erat, quod tribuebatur omnibus in commune. Ex librorum editionibus nihil in sui commodum derivavit: si quid inde percepit, totum in Dei gloriam, et Sanctorum cultum, et animarum salutem creditur impendisse.

Inter alia, quæ ad augendum honorem Dei egit, singulari usus est diligentia in promovendo cultu Sacratissimi Cordis Jesu. Id in suggestu, et tribunali pœnitentiæ, id in publicis, ac privatis colloquiis inculcabat, ut omnes ad inexhaustum illum fontem compelleret, unde copiosi, ac suavissimi gratiarum latices scaturiunt. Per Navarram, et Guipuzcoam innumeras pene Congregationes erexit, quas solitus erat iis aggregare, quæ institutæ jam erant sub denominatione Sanctissimi Sacramenti, ut se juvarent invicem, et ad pietatis æmulationem accenderentur. Annis aliquot antequam discederet ab Hispania, monuit eum pia femina, ut in his fundandis Congregationibus properaret, quoniam futurum erat, ut id deinde non posset efficere. Fidem admonenti habuit, quippe cui Deus futura quædam, longeque absentia non semel dignatus est revelare. Itaque operi promovendo institit, quod, superveniente postmodum exilio, diutius urgere non potuit. Ipse in cultu divini Cordis delicias suas habebat repositas, variisque religionis actibus amorem, quo in illud ferebatur, manifestabat. Novem continuos dies per menses singulos illius dicabat cultui, ut etiam primam feriam sextam cujusque mensis. Præter reverentes Eucharistiæ adorationes, quas domi manens sæpe iterabat, dum iter ageret, ac templum aliquod pro-

cul aspiceret, in hunc, aut consimilem affectum erumpebat: *Adoro te, Domine, tibi que me totum offero, et immortales ago gratias pro donis, que a sanctissimo Corde tuo recepi, præsertim in augustissimo altaris Sacramento.* Divinis quotidie operari ne Calvii quidem, ubi summa erat difficultas, nisi morbo impeditus, prætermisit. Recurrentibus præcipuis Christi mysteriis, præcipuum quoque adhibuisse studium, ut ea memori animo recoleret, ex his licebit arguere, quæ fecit Sebastianopoli, proxime ejiciendus ab Hispania. In illius urbis Collegio, et in Collegii angustissimo spatio conclusi fuerant Guipuzcoani, Navarræique Socii omnes, dum instruerentur naves, quibus transvehendi erant in Italiam. Nemini ad templum patebat aditus: solumque post iteratas per dies aliquot preces permissum est, ut in Sacello interiore rem divinam facerent, et in eodem sanctissimum Sacramentum asservaretur. Huc sæpe accedebat Mendiburus: et adveniente feria quinta sanctioris hebdomadæ, cum duobus e suis intimis, qui libenter illi assenserunt, vigiliæ acerbissimæ illius noctis ita divisit, ut semper eorum aliquis ante aram assisteret. Sed longiorem noctis partem sibi reservavit, in eaque magnis doloris, et commiserationis affectibus prosecutus est Dominum, et sanguineo sudore madentem, et a discipulis derelictum, et ab inimicis crudelissime habitum, et innumeris saturatum opprobriis.

Ex hac Passionis Domini, cæterorumque beneficiorum ejus attenta meditatione tum alios virtutum fructus, tum maxime constantiam in laboribus reportavit, quam nullæ res difficiles, neque diuturnæ calamitates exilii perfregerunt. Dilectus inter suos, et a civibus honoratus, vitam Pompelone agebat juvandis intentam animis, cum decreta fuit Hispanæ Societatis proscriptio. Doluit eam universa civitas, quæ Sociorum erat benevolentissima: multique Mendiburi præsertim doluerunt desiderio, inter quos fuit Episcopus Miranda, qui eo moderatore spiritus utebatur, et ab eodem auxilium ingens sperabat in ultima vitæ clausula, quam longæva ætas, et infirma valetudo jamjam imminentem denuntiabant. Mendiburus ad exequenda jussa Regis constanti se animo accinxit, et sereno vultu demandatam profectionem arripuit. Quanquam vero communis ubique locorum fuit prompta hæc animorum

ad obediendum Regi submissio, quiddam tamen in Mendiburo singulare habuit, si negotia, quæ præ manibus habebat, spectaveris. Etenim præter Catechismi editionem, quam propediem erat inchoaturus, novi templi molitionem in Collegio Pompelonensi, et Exercitiorum domum in eadem urbe medietabatur. Utrique operi perficiendo copiosam ei numerorum summam obtulerant amici duo propter insignem de illius virtute conceptam opinionem. Ad structuram templi multas cum labore multo superaverat difficultates: sed tandem cum expedita essent omnia, de admovendo manum operi jam agebatur. Exercitiorum constituendæ domui multo graviora intercesserunt obstacula: fortasseque malus Dæmon, gravem inde perniciem sibi extimescens, omnes vaferrimi ingenii vires ad impediendam substructionem illam intendebat. Erigenda enim erat domus, ubi Exercitiorum ipse auctor Ignatius, dum strenue pro tuenda urbe dimicat, æneo globo percussus concidit: quo in loco sacra quædam Basilica jam pridem in honorem ejus fuerat structa. Id, credo, et invidi hostis acrius urebat oculos, et Mendiburi diligentiam exacuebat impensius. Ut is facilius ea expediret, quæ maxime obstare credebantur, Matritum profectus fuerat cum literis, in quibus Magistratus urbis, atque ipse arcis Præfectus Bernardus Oconor Phalius pro testimonio affirmabant, ædificium illud nihil obfuturum esse propugnaculo arcis, quod a Regina nomen habet. His literis, suaque adjunctis efficacissima industria, rem illam pro votis absolvit: ad eamque feliciter efficiendam, præter iterata cum aulicis colloquia, multam in divina ope imploranda perhibuit diligentiam. Imperialis Collegii Socii, inter quos bonum suæ virtutis odorem reliquit, de Mendiburo dicebant, in templo, ubi sæpe coram Domino prosternebatur, et ante aram Virginis Boni Consilii negotia sua, ut bene procederent, pertractare. Sed Pompelonem vix dum regressus fuerat, cum ad conatus familiæ cujusdam religiosæ, quæ illa ædificatione violari sua jura contendebat, omnia fere sunt abrogata, quæ Matrity obtinuerat Mendiburus. Hic ergo in angusto spatio, quod sibi relinquebatur, domum ædificare constituit. Dum hæc cogitat, pia illa femina, de qua paulo ante meminimus, certiozem illum reddidit, Asceterium eo tempore

non esse ædificandum ; deinde vero melius quam pro hominum opinione constituendum . Nec multi abiere dies , cum Mendiburus , quippe jam inclinatis Societatis Jesu rebus in Hispania , jussus est ab ea construenda domo penitus abstinere . Promulgato deinde universalis exilii decreto , perinde , ac si prænovisset , illud excepit : et quæcunque pro Dei honore , atque animarum salute peragenda susceperat , cum prompta divinis ordinationibus submissione reliquit .

Cum primum extra mœnia urbis evasis , preces Lauretanæ Virginis præcinere occœpit , easque inter militum , et lictorum arma tam sereno vultu , et pacato animo absolvit , quasi ad annuntiandum Dei Verbum proficisceretur . Berastegui , quod postremum est Navarræ oppidum , populus convenerat in forum : et animosiores aliquot juvenes , solícite de Mendiburo inquirentes , ut illum conspicati sunt adventantem , in ejusdem laudes magnis clamoribus eruperunt . Conterruit hoc milites , et satellites , timentes scilicet , ne populus ille quidquam pro liberandis exulibus attentaret . Sed resedit eorum timor , cum Mendiburus juvenes illos nutu quodam ad silentium ædegit . Postquam in portum venit , Exercitiis S. Ignatii ad maritimum iter se comparavit . In longo autem exilii cursu vitam egit inter libros , et colloquia divina ita partitam , ut hæc perpetua illius occupatio dici possit , quantum quidem eidem licuit per incidentes rerum casus , quorum aliqui fuerunt turbulentissimi . Tunc enim ad consolandos , et erigendos Socios accurrebat , ut in accessu ad Corsicam , in descensu ad litus Calvii , in hujus obsidione , aliisque durissimis laboribus , qui per ea tempora frequenter occurrerunt . Atque ad erigendos aliorum animos , paternam curam , ac beneficam providentiam rememorabat , qua Deus in afflictis rebus adest , et ab imminetibus malis eos gaudet eripere , qui de immensa sua bonitate confidunt . Itaque facile illi fore vel inter nuda illa saxa de necessariis sibi providere , et inter ingruentes calamitates , præsentissimaque pericula salvos , et incolumes conservare . Sic ille disserebat pro ingenita animi magnitudine , quam divina fovebat gratia , et solida illius virtus ad usum pro temporum opportunitate revocabat . Cætera solitudinis assiduus cultor , Deo vacabat , et studiis , quæ semper ad animarum pro-



profectum referebat . Hoc incitatus promovendæ pietatis desiderio , scripsit in exilio : Lectiones sacras pro Dominicis , aliisque Domini , et Sanctorum festis : Conciones pro novenis diebus ante solemnitatem Corporis Christi , ac S. Xaverii , et Commemorationem Defunctorum : Exercitia S. Ignatii multiplici commentationum genere illustrata . Hæc omnia , et his alia quædam affinia tam diligenti accuratione scribebat , quasi proxime in lucem essent emittenda : quod licet efficere non potuerit , in eo tamen laudandus est maxime , quod tantum sibi traditum non sepelierit , et longum exilii otium honestissime collocaverit .

Postquam venit in Æmiliam , aliquandiu prope Bononiam habitavit , ab instituta ratione vitæ nunquam digressus , et a Superiorum voluntate regi se sinens , dum Societas mansit . Hac autem deficiente , intra urbem sese recepit , in eaque novam sibi solitudinem fabricavit . Ad viam S. Felicis parvam domum conduxit , in qua ad postremum fere spiritum mansit , ut ab omni mundanarum rerum tractatione disjunctus , ita etiam ab studio privatæ commoditatis abhorrens . In victu , et in vestitu , atque in habitatione ipsa strictiorem , quam antea , paupertatem servavit . Neque id dura necessitate coactus fecit , sed nobiliore motus impulsu , quo vilia quæque et aspera amplectebatur , pretiosa vero , et commodiora pro Dei amore respuebat . Nec volebat pro dicendo Sacro stipendium accipere : et quæ ab Hispania nonnunquam ei remittebantur , omnia inter egentes Sacerdotes distribuit . Alia vero subsidia , quæ interdum ab amicis , et benevolis accepit , ita pauperibus impertiebatur , ut aliquid ad emendos libros , vel ad pios usus reservaret , nihil tamen insumeret in lautiore victu sibi comparando . Ad S. Mariæ de Caritate , cum primum fores aperiebantur , promptus quotidie aderat : templumque ingressus , horam dabat sacræ meditationi . Missam legebat graviter , reverenter , et exacte , sine fastidio tamen audientium : gratias Deo attente , cumulateque agebat : indeque domum reversus , in ea legendo , scribendo , præcando perseverabat . Posterioribus annis Sacrum multo mane faciebat in Oratorio , quod , obtenant facultate , domi suæ constituit . Aliquoties prodibat domo , vel ut tantisper extra urbem spatia retur , vel ut intra illam tem-



templa quædam inviseret, eaque præsertim, in quibus exposita erat imago sacri Cordis Jesu. Ipse etiam unam ex his imaginibus in quodam templo collocavit: sed quanto lætius id fecerat, tanto ægrius deinde, nescio cur, jussus est eam tollere.

Huic insistebat vivendi formæ, cum ineunte anno 1782, quasi eum postremum sibi fore præ sagiret, de peculiari ad mortem præparatione serio cogitavit. Exercitia S. Ignatii ante festum Virginis Purificatæ diligenter peregit. Et quanquam alias, dum his vacabat exercitiis, solum præcedentis anni lapsus in confessione aperiebat, nunc totius vitæ seriem Sacerdoti detexit, atque animum exquisitiore indagine repurgavit. Nullam tamen mortalem culpam in longo annorum septuaginta quatuor spatio ex ejus confessione Sacerdos ille apprehendit: quod et singularem Dei misericordiam, et pervigilem Mendiburi diligentiam in explendis divini obsequii partibus æque demonstrat. Deinde de rebus suis, tanquam proxime decessurus, prudenter, ac religiose disposuit. Vestes, et alia quædam e modica suppellectili, post mortem suam pauperibus eroganda reliquit: neque illorum oblitus est, qui secum in eadem domo vixerant, eique ministraverant. Hæc bene valens effecit, neque ullo pertentatus indicio gravioris morbi, quem non nisi post quintum fere mensem incurrit. Medio enim Junio Sacerdos, quem habebat a confessionibus, sub vesperum ad eum de more veniens, ut confitentem audiret; sedentem intra cubiculum reperit, sui que satis compotem; sed adeo viribus destitutum, ut e loco movere pedem non posset. Accitus statim Medicus inter fomenta languenti admoventi corpori, salutarem animi cibum jussit etiam afferri, eademque nocte roboratus est sacro Viatico. Deinde visus est paulatim vires resumere, et antequam malum gravius invalesceret, translatus est in domum aliam, ubi commodius ipse haberi posset, et facilius a ministrantibus inserviri. Hic denuo ingravescente morbo, ad extrema devenisse credebatur, ideoque omnibus decedentium præsiidiis munitus est, semperque ad ejus lecti caput Sacerdotes diu, noctuque adfuerunt. Sed tamen, mirante Medico, ultra dimidiatum mensem cum morbo luctavit: quo tempore rursum Christi corpus accepit iis amoris, reverentiæque affectibus, quos illi singularis pietas erga divinum  
illud

illud mysterium suggerebat. Dum in lecto jacuit, multi ad eum inserviendum constanter accurrerunt: omnesque Mendiburi patientiam suspiciebant, magnanimumque silentium, quo dolores, cæterasque morbi molestias tolerabat: perfectam cum Dei voluntate ad quælibet perferenda conformationem: pacem item, atque immotam animi serenitatem, qua mortem accedentem aspexit. Hæc illum tandem incessit pridie Idus Julias, quæ octava dies erat post festum S. Firmini Episcopi, et Martyris, Patroni diœcesis Pompelonensis, totiusque regni Navarræ: quem Mendiburo viventi, morientique adfuisse, dubitare non licet, ut labores ei rependeret, quos susceperat pro juvandis animis suæ clientelæ commendatis. Illud etiam observarunt aliqui, Mendiburum paulo ante diem festum Purificationis Mariæ, sub cuius mysterii titulo Congregationem Aloysianam primariæ Congregationi Romanæ aggregaverat, præparationem ad bene moriendum inchoasse. Unde credibile reputarunt, eam illi mentem a purissima Dei Matre injectam fuisse, quæ fidelibus ejus servis, inter alia continua beneficia, hanc maxime singularem gratiam impetrare solet, ne illos mors occupet imparatos. Perillustris femina Gentilis Oretti de Arnoaldis, cujus cæteras egregias dotes pietas, et prudentia superabant, Mendiburi morte cognita, cui viventi per annos aliquot ad sacrificium Missæ liberaliter vinum ministraverat, nonnihil eorum, quæ reliquerat, postulavit in memoriam tanti viri, quem ipsa singulari veneratione prosequatur. Obtenoque sigillo Christi confixi, quo Mendiburus usus fuerat, hoc illa pectori applicitum subtus thoracem gestavit semper, donec extremum diem clausit.

## VINCENTIUS IRAOLA.



**B**easaini natus est in Guipuzcoa tertio Nonas Majas, anno 1738. Quamvis in lustrali fonte denominatus fuerit Antonius Vincentius, deinde tamen solo Vincentii nomine ab omnibus appellabatur. Et ipse, dum grandior esset, vel sola sui nominis recordatione ad frenandos naturæ motus incitabatur, id sibi frequenter inculcans: *Vince te, Vincenti*. Hujus virtutes adolescentis Marchionibus de Valmediano, Hispaniæ Magnatibus, usque adeo probatæ fuerunt, ut illum in domum suam invitaverint, ut impuberes ipsorum filios et domi, et foris comitaretur, ac teneros eorum animos exemplis morum optimis imbueret, consiliisque prudentibus informaret. Id ille cum magna genitorum approbatione, parique utilitate naturæ effecit. Sic enim eorum invigilabat institutioni, ut neque innocuos ipsorum lusus fastidiosus interturbaret, neque ad ea dilabi permetteret, quæ generosam eorundem conditionem dedecere: ac semper cum juvenili quadam gratia prudentiam vere senilem ita conjunxit, ut incertum esset, nobiles illi pueri an magis illum amarent, an vererentur. Cum eis deinde Vallisoleto profectus est, ubi intra Collegium S. Albani hospitio recepti, operam latinis literis in Ambrosiano dederunt: ipseque ibidem philosophica instauravit studia, quæ jam inchoaverat Cæsaraugustæ.

In Guipuzcoam regressus, de vitæ statu eligendo deliberavit. Atque ut rem summi momenti ea, qua par est, diligentia perpenderet, divinis meditationibus, quibus jam tum assuetus erat, diutius voluit insistere. Per dies aliquot S. Ignatii vacavit Exercitiis, quæ illis sunt utilissima, qui consultant de vitæ genere deligendo. Meditationibus, ac precibus nonnullas etiam adjunxit afflictationes corporis, quas jam per id tempus usurpabat, ut majus de cælo lumen acciperet ad id considerate statuendum, quod Deo gratissimum esset, sibi que

maxime conveniret. Spem habere poterat minime dubiam pingue quoddam Sacerdotium obtinendi, quo vitam in patria degeret satis commodam. Verum nihil ideo remoratus est, quominus supernis impulsibus obtemperaret, quibus ad amplectendum vitæ genus incitabatur, in quo posset multorum æternæ salutis naviter adlaborare. Atque id potius fuit, quam desiderium mundi hujus pericula declinandi, quod eum tandem impulit, ut Societatem Jesu peteret, signanterque provinciam aliquam Indicam, in qua suam laborandi pro Christo sitim expereret. Generosum hunc animum hauserat ex frequenti literarum lectione, quas Missionarii Societatis e remotissimis mundi partibus ad amicos in Europam mittebant. Perspectisque fructuosis laboribus, quos ubique pro Dei gloria, et animarum bono suscipiebant, ad illorum sequenda vestigia vehementer exarserat. Et quamquam aliorum suasu ab hac missionis Indicæ petitione destitit, tamen quod in animo cogitaverat, non ita abjecit, ut nollet illud urgere, cum primum opportunitas occurrisset. Obtenta Præpositi facultate, ut Castellanzæ provinciz Sociis adscriberetur, iter Villagarsense, quod erat passuum ducentorum millium, pedibus decrevit agere, ut virium suarum ad profectionem Indicam periculum faceret, ac fortasse etiam ut S. Stanislaum Kostkam imitaretur, cujus gesta non ignorabat, cum esset in Sanctorum legendis Vitis, præsertimque Societatis, bene versatus. Sed illorum jussu, qui super eum potestatem quasi patriam habebant, ab hoc etiam debuit conatu recedere.

In tirocinium cooptatus anno 1764, vigesima prima Junii, S. Aloysii consecrata solemnibus, illum æmulari studuit in elevatione mentis ad Deum, in reprimendis naturæ motibus inordinatis, et in exacta regularum observatione. Præsentis Dei memoriam tutissimam reputabat viam, eandemque brevissimam ad affectiones animi componendas, declinandos errores quoslibet, et in singulis actionibus divinæ Majestati placendum. Societatis legibus velut totidem adminiculis ad obtinendum perfectionis culmen utebatur, ideoque vel in minimis custodiendis erat exactus. In adulta jam ætate ad omnes tirocinii mores se ita composuit, ut adolescentulis par esset in animi simplicitate, et majorem, quam habebat, maturitatem

judicii, ad exsequenda omnia promptius, perfectiusque conferret. Habuerat in patria consuetudinem cum P. Augustino Cardaverazio: et quæ tum ab optimo sene, et expertissimo virtutum Magistro didicerat, multum ei deinde profuerunt ad religiosæ vitæ cursum et recte ineundum, et constanter persequendum. A tirocinio Methymnam venit, ut tertium Philosophiæ curriculum inchoaret, quod tamen ibidem absolvere non potuit. Nam quinto post mense longiorem alium, multoque difficiliorem ingressus est laborum cursum, in Italiam cum Sociis omnibus relegatus. In eo itinere suas esse partes duxit cæteris inservire, nullumque detrectare ministerium, quamvis arduum, ac vile, in quo posset suam erga fratres caritatem exercere. Calvii autem inter alia caritatis, ac demissionis officia, munus purgandi latrinam sibi desumpsit, quod in eo rerum statu non nisi cum insigni patientiæ, atque humilitatis exemplo poterat exerceri: nam sordes immixtæ in dolium ad mœnia usque deportandæ erant, indeque in mare projiciendæ: neque enim alia ibi erat ratio domesticæ munditiæ procurandæ. Id vero adeo non fastidiose exequabatur, ut constanti, ac diligenti cura in eo labore perseveraverit.

E Corsica in continentem Italiam transmissus, theologis studiis initium dedit Panzani, Bononiæque finem imposuit: ac sicut eis tota animi contentione semper incubuit, ita copiosum diligentis suæ fructum percepit. Multam eo tempore operam posuit in lectione sacræ Scripturæ, adhibito selectorum Interpretum subsidio, multaque inter legendum annotabat ex iis præsertim, quibus misericordia in pauperes, et caritas erga cæteros homines commendatur: quarum illam, dum sui juris erat, liberaliter exercuit; hanc vero per omnes vitæ gradus diligentissime coluit. Valde illi familiare fuit ad aliorum obsequia currere, quamvis ea non sine proprio præstanda essent incommodo: sed illa sponte adeo, gratioseque præstabat, ut nihil jucundius evenire sibi posse videretur. Dum Panzani degeret, curam suscepit excitandi eum a somno, qui cæteros erat excitaturus: aliæque id genus libenter subibat onera, ut alienæ serviret utilitati. Cum multa de linguæ vitiis, ac de facili verborum lapsu legisset in libris sacris, singulari ad custodiam oris usus est diligentia: omnes-

mnesque in illius sermonibus observabant affabilem comitatem, et attentam, ne quem verbo læderet, circumspectionem. Siquis vero aliquam ei molestiam intulisset, cum illo omni officiorum genere ita decertabat, ut non solum aversi animi suspicionem tolleret, sed eidem quoque persuaderet, strictæ amicitix vinculo sibi esse devinctum. Secundum sacros Codices maximo in pretio habebat summarium Constitutionum Societatis, Exercitia S. Ignatii, eorumque Directorium. Admirabilem Exercitiorum librum, eidemque addita commentaria diligenti evolvebat studio, atque ut pleniorum eorum intelligentiam assequeretur, frequentem de his sermonem inferebat. In Constitutionibus observandis tantam adhibuit diligentiam, quantam is, qui et studiorum socius, et consiliorum ejus particeps erat, hisce verbis protestatur: *Vincentius Iraola vivum mihi nostrarum legum exemplar videbatur: diuque in studiorum tempore, ac deinde cum eodem versatus, nullam ab eo memini fuisse unquam violatam; quamvis non raro ardentior mea indoles, in Theologiæ, et Scripturæ quæstionibus agitantis, illius patientiam, ac modestiam satis acriter perurgeret. Ad eam observantix perfectionem obtinendam multum incitabatur ex divinæ præsentix recordatione, quam ab tirocinio fovere cœperat, ac deinde alere non prætermisit. Silentio, ac solitudini, quatenus integrum sibi esset, constanter deditus, quoties inde ad alia quævis opera evocaretur, adeo intentus erat animi, et corporis motibus componendis, ut facile nosceretur, Deum ubique præsentem intueri. His ad sublime Sacerdotii munus bene comparatus, illud ex obedientia suscepit ab Episcopo Britonoriensi anno 1770, die 17 Junii, quæ secunda erat Dominica post Pentecosten.*

Absolutis jam studiis, missus est Castrumfrancum, ut tertiam ex jure Societatis probationem subiret: atque in eodem loco ad extremum vitæ diem perseveravit. Quoniam juvenes, qui probandi erant ibi, consuetis olim ministeriis exerceri non poterant, Vincentius non unam tentavit viam, ut ardenti juvandi animos desiderio aliqua ex parte satisfaceret. Ac primum pauperibus immixtus, qui frequentes ad Sociorum domum, ut eleemosynam acciperent, stata hora quotidie conveniebant; nunc hos, nunc illos in rebus fidei, Christiani-



que hominis officiis instruebat, eisque salutaria consilia ad vitam recte instituendam dilargiebatur. Deinde veniam a Superiore petiit, ut, cum tertiæ probationis juvenes deambulatum prodirent, ipse cum altero ad ægrotantium rusticorum domos posset excurrere. Quod cum obtinuisset, infirmos invisebat agricolas, verbisque suavissimis solabatur, ac rationem, qua fructum e morbo caperent, edocebat. Dum autem iidem juvenes recreationi vacabant domi, bonam illius partem, annuente Superiore, tribuebat ipse meditationi. Præterea, eodem caritatis impulsu ductus, per dies festos ad militare nosocomium Urbanæ arcis progrediebatur, ut Missam coram ægrotis militibus gratuito celebraret: neque illum ab hoc itinere deterrebant aut hibernæ nives, aut frigora, quæ nimium rigida eo anno acciderunt. Cupiebat etiam vehementer Archipresbytero illius oppidi suam operam polliceri, ad instruendos in templo pueros, cum ii Dominicis diebus per varias tributi classes in fidei rudimentis erudiebantur: vel certe ad legendum librum aliquem e suggestu, dum populus, finita jam catechesi, donec Vesperæ inchoarentur, expectabat. Sed cum hæc propter difficilem temporum conditionem Rectori suo non probarentur, statim ab incepto recessit, perindeque acquievit, ac si conata perfecisset. Ad aliud vero misericordiæ opus agrediendum, nullam repulsam tulit. Obierat quidam infans, quem sepulcro inferre, absente tunc Vespillone, nemo alius audebat. Cum id Vincentio innotuisset, Rectorem adiens, facultatem ab eo facile obtinuit, ut adjuvante alio Sociorum, munus illud sepeliendi mortuum obiret, quod tantopere in sacris literis commendatur. Ac fecisset quidem, nisi, quo tempore in templum venit, Vespillo etiam supervenisset, qui ei meditati operis perficiendi occasionem præripuit.

Tertium probationis annum jam pene absolverat, cum indicta Societatis abolitione, mutavit habitum, in quo semper modestiam cum decore Sacerdotali retinuit. Cæterum e veteri agendi ratione nihil admodum immutavit; nisi quod, ab regulari disciplina jam liber, frequentior in templo aderat, nunquamque sacris functionibus non intererat, quæ in eo celebrarentur. Domi suæ vel Scripturam sacram, vel Ecclesiasticam historiam, vel Theologiam morum tanta versabat assidui-

duitate, ut in his omnibus peritiam adeptus sit non vulgarem : atque in paucis etiam temporum spatiis, quæ necessariæ dabat animi recreationi, nullum præ iis jucundius argumentum cum amicis pertractabat. Neque id eruditionis ostentandæ causa efficiebat, aut ob eam, quæ in sciendo est, honestissimam voluptatem; sed propter alium altiorem finem, quem in animo volvebat suo, et qui deinde aliqua ex parte innotuit. His nempe studiis eo respiciebat, ut habilem sese redderet ad animarum salutem utiliter procurandam, tum Sacramentis administrandis, tum etiam divini verbi prædicatione exercenda. Eadem de causa multum studium contulit ad Italicam ediscendam linguam, et proprietatem cognoscendam dialecti Bononiensis, quam ut facilius assequeretur, opportunam ibidem nactus est occasionem. Abeuntibus alio juvenibus, quibuscum hactenus Castrifranchi degerat, ipse in eadem domo remanserat cum Sacerdotibus provectoribus, qui pridem in Societate professionem emiserant. Ab eis postmodum ex novo decreto separari jussus, ad quemdam accessit Italum, qui fuerat ex Adjutoribus Societatis in provincia Veneta, modoque sedem fixerat Castrifranchi, ubi libenter Vincentium nostrum in contubernalem admisit. In quotidiana cum eo, ac domesticis consuetudine, atque in sermonibus, quos inter visendum ægrotos cum popularibus conserebat, multam brevi notitiam vernaculæ linguæ comparavit. Post hæc, ex illius consilio, quem in conscientiæ arbitrum delegerat, facultatem obtinuit Romæ, ut posset ab Episcopis ad excipiendas confessiones adhiberi: ac tandem Archiepiscopus Bononiensis post prævia pericula potestatem illi concessit, ut in Archipresbyteratu Castrifranchensi confessiones audiret.

In eo exercendo munere, duo sibi præstituit observanda, a quibus deinde nunquam recessit. Primum, ne munuscula propter auditas confessiones acciperet, neque illam quidem pecuniam, quæ stipendii nomine pro dicendo Sacro ea sibi occasione offerretur. Alterum, ne unquam illorum adiret limina, qui peccata sibi confiterentur; nisi aut infirmi essent, aut ab eis nominatim arcesseretur ad agendum de rebus animi; cum alia quævis negotia pertractare non vellet. Quoties pedem efferret domo, vel tendebat in templum recta, vel in

ægroti alicujus ædes, vel interdum etiam in agrum, ut cum antiquis sociis ad brevem horam spatiaretur: quanquam ab eorum comitatu in ultimis præsertim annis sæpissime discedebat, ut ægrotantes ruricolos visitaret. Nusquam constantius perseverabat, quam in destinata confessionibus sella, in qua jam inde ab initio quatuor, aut quinque perstabat horas per eos dies, in quibus frequens populus ad solemniora festa accurrebat. Deinde vero frequentiam confiteri expetentium assiduitate sua sic ille auxit, ut in plerisque diebus festis multas continenter horas pro tribunali sacro sedere cogeretur. Nam præter Castelli incolas, cum Vincentii caritas circumquaque breviter innotuisset, multi etiam e vicinis pagis, atque alii, qui Mutinensi ditioni suberant, ac Nonantulæ, ad illum pro exoneranda conscientia deveniebant. Aucto notabiliter numero pœnitentium, Missam in diebus festis sub auro-ram celebrabat, ut diutius audiendis insisteret confessionibus. Atque ita huic instabat operi, ut non illud abrumpere; jentandi causa, quod ne aliis quidem diebus solitus erat efficere: solumque per brumæ frigora, quæ non parum ejus valetudinem immutabant, jentaculum interdum desumebat ex Confessarii sui jussu, cujus ductum in omnibus sequebatur. Nonnunquam e templo redibat domum, cum designata prandii hora jam præterierat: ac tunc humiliter orabat socios, ut sero adveniendi vellent ignoscere; non enim sustinuerat quosdam agricolarum ab se rejicere, qui venerant ex longinquo, et non æque bene pasti, atque ipse, toto mane dum aures eis præberet, jejuni expectaverant. Ex occasione Missionis sacre, quæ per id tempus eo loci fuit habita, infatigabilis ejus labor in administrando pœnitentiæ Sacramento vel ipsis Missionariis admirationem injecit. Ex iis unus, qui confessiones hominum in Oratorio quodam publico simul cum Vincentio excipiebat, indefessam ejus constantiam demirabatur: ad eamque alludens, facete deinde agebat, se tantum non enectum ab illo fuisse; quia, cum videret eum ad multas horas in sua sede perseverantem, non audebat ipse locum deserere, quamvis longo labore defatigatus. Sed Vincentius non tantum in sede sacra, verum etiam domi suæ audiebat non paucos, qui ad eum veniebant noctu, ut peccata sua confessione expiarent.

rent. Veniebant autem in quolibet anni tempore, maximeque in Paschalibus festis, et oppidani diversæ classis, et arcis Urbanæ milites, quos omnes libenti animo exceptos, beneque instructos, sic dimittebat, ut denuo ad eum reverti non detrectarent. Denique in hujus ministerii exercitio adeo strenue, atque utiliter laboravit, ut frequentiam Sacramentorum apud eum populum auxerit non solum in diebus sacris, sed in multis etiam profestis, in quibus Mariæ Virginis festivitates, aut quorundam natalitia Sanctorum aliquo peculiari cultu ibidem celebrabantur. Idemque fiebat in prima feria sexta cujusque mensis, quæ ipsius industria jam ibi habebatur religioni dicata Sanctissimi Cordis Jesu, cujus pictam imaginem in templo curaverat collocandam.

Decursu temporis, consentiente Ministro regio, licuit tandem Vincentio cum Hispanis exulibus habitare, a quibus antea discedere coactus fuerat. In illo nacti sunt amabilissimum socium, ac pene dixerim servum ad ministeria quæque promptissimum. Continuo suscepit ipse curam administrandæ domus: et quidquid laboriosum, vel abjectum occurreret efficiendum, sponte ille aggrediebatur, expediteque perficiebat. Siquis autem aliquo valetudinis incommodo afficeretur, ad ferendum auxilium ita erat promptus, ut nihil fastidio haberet, seu medicanda forent ulcera, sive alia quævis officia essent obeunda. Unde agebat quidam, videri sibi Vincentium sensibilem quamdam animi voluptatem in tractandis infirmis, eorumque infirmitatibus sublevandis invenire, in eoque jucundissime delectari. Erga illos porro de populo, qui morbo corripiebantur, quanta esset ejus caritas, paulo ante vidimus. Sed postquam Confessarii munus obire cœpit, multo frequentius ægrotantium subibat tecta, ut illorum necessitatibus subveniret. Neque ab iis tantum evocabatur, qui bene valentes, apud ipsum confiteri consueverant; sed ab aliis etiam, qui nunquam acciderant ad ejus pedes, audierant tamen a domesticis, vel amicis quantum ex Vincentii consiliis in simili vitæ discrimine profecissent. Aderat ille omnibus incunctanter, et post auditam eorum confessionem, quamvis procul in agris degerent, iterum, ac sæpius revisebat, diuque ad lectum illorum sedens, dulcissimis sermonibus recreabat,

et

et, si quidem ea indigerent, stipem etiam aliquam conferebat. Non defuerunt aliqui, qui hac ejus benignitate nonnunquam abuterentur. Contigit illi non semel, ut sub horam satis incommodam ad subveniendum alicui ægroto solícite vocaretur. Et cum e vestigio de more accurreret, in familiam miserrimam incidebat, quæ propter leve domestici alicujus incommodum illum ad se vocaverat, ut egestatem suam coram agnoscens, eam subsidio aliquo sublevaret. Vincentius et pauper erat, et amantissimus paupertatis: sed cum insigni etiam esset misericordia, teneri non poterat, quin aliquo modo egenorum inopiæ succurreret, vel recisis quibusdam sumptibus, quos nemo alius superfluos duceret, ac plerique necessarios existimarent. Ex illa vero facile ignoscenda fraude, quam aliqui ad extorquendam ab eo stipem interdum adhibuerunt, nihilo cunctantior effectus est, quominus ad infirmorum domos, cum primum admoneretur, accederet. Illud utique molestum sibi fuit, et acerbum, quod a nonnullis in periculo mortis expetitus, morem eis gerere non potuerit, cum extra territorii essent fines, ad quos sua confessiones audiendi facultas restringebatur. In his fuerunt duo, qui eum iteratis urgebant precibus, ac palam fere protestabantur, nisi adesset ille, neminem alium ad expiendam delictorum conscientiam adhibituros. Vincentius ad eos veniens, prudentiæ, atque industriæ suæ vim omnem exeruit, ut eos a proposito dimoveret, tandemque illis persuasit, ut Sacerdotem alium, prout debebant, accirent: ac repetitis deinde visitationibus, repulsam, quam eis dederat, plenissime compensavit. Cæterum intra terminos Castrifranchi pauci admodum fuerunt, sub ultimis præsertim annis, qui Vincentium ad extremam horam non advocaverint, et quibus ille desideratam opem constanti caritate non tulerit.

Hic fere perpetuus labor excipiendi confessiones, et ægro-  
tis opitulandi, nullum otium Vincentio relicturus esse videbatur, ut aliis rebus animum posset intendere; cum præsertim debili potius esset, quam robusta valetudine. Aliud tamen aggressus est opus, quod illi novam occupationum seriem adduxit. Sub optimi Sacerdotis disciplina simplicem canendi modum voluit ediscere: quem cum brevi tempore suffi-

ficienter edoctus fuisset, Choro deinde intererat psallendis Missis, ac Vesperis, aliisque functionibus celebrandis, quæ satis frequentes sunt Castrifranchi. Aderat etiam publicis supplicationibus, et cum ad infirmos sanctissimum Viaticum defereretur, vel in templo impertienda erat populo benedictio: sæpeque in aliis ejusmodi ministeriis vices gerebat Capellani absentis, aut aliter impediti. Quicumque illum tam multiplici officiorum varietate fungentem intuerentur, infatigabilem ejus constantiam poterant admirari, qua laborum omne genus pro juvandis animis, et pro divino cultu exercendo libenter amplectebatur. Sed qui propius Vincentii animum introspiciebant, inexplabile desiderium admirabantur, quo æstuabat ille, ut Dei nomen, et gloriam latius aliquando vel apud remotissimas gentes promoveret. Ab eo jam tempore, cum Societatem ambire cœperat, id illum in votis habuisse diximus: eamque mentem, postquam in exilium venerat, adeo non deposuit, ut frequenter de missione Indica verba faceret, aliosque ad eandem expetendam inducere conaretur. Quantum quidem penes ipsum erat, ad Rusiam usque, si licuisset, pedibus iter agere non dubitasset. Cum audisset etiam nonnullos, qui de Societate fuerant, ad Sinas enavigasse, de aggreudiendis mathematicis studiis egit, ut quæ faciliorem sibi aditum ad regionem illam poterant aperire. Sed cum eorum, quæ præ cupiditate plurimum Dei causa laborandi tentabat, nihil e sententia succederet, cogitationes suas omnes ad Americanam missionem convertit, quam verisimilius existimabat fore, ut aliquando posset obtinere: itaque relicto omni alio consilio, ad illam sese studuit diligentissime præparare. Huc igitur potissimum spectans (præter alia quæ in eundem finem effecit) laborem illum Ecclesiastici addiscendi cantus in ætate jam adulta suscepit. Audierat enim, et canendi usum, et quidquid ad sacrarum cærimoniarum attinet dignitatem, prodesse quamplurimum ad deliniendos Americanorum animos, eosque in obsequio Numinis continendos. Eadem de causa munia illa omnia, quæ Parochi propria sunt, ejusdemque Vicarii, diligenter perdiscere, ac frequenter exercere conatus, ut ea deinde facilius, perfectiusque obiret, siquando voti sui compos efficeretur. Quod si desideria, dum



efficacia sunt ac sincera, non immerito factis annumerantur, sperare quidem liceat, Vincentio mercedem obtigisse Apostolicæ professionis ad barbaros, quam concupivit ardentem, ac nihil, ut eandem aggrediretur, pro virili parte prætermisit.

Quoniam vero in illius ministerii exercitio, cui vehementer inhiabat, nulla re magis adjuvandum fore noverat, quam solidarum ornatu virtutum, his comparandis, et excolendis non intermissam curam adhibuit. Quantam ad perfectioris vitæ studium, dum inter Socios viveret, contulerit diligentiam, in superioribus vidimus. Deinde autem ab antiquo vivendi more vix quidquam, præter habitum immutavit. Eadem illi examinandæ conscientiæ cura, pios legendi libros, meditandi per horam mane, vel certe vespere, quoties id propter confessionum frequentiam stato tempore non fecisset. Idem etiam studium domandi corporis, quod iteratis excipiebat verberibus per hebdomadam, dum liceret sine arbitris facere, sæpiusque cilicio, vel catella ferrea perstringebat. In ciborum usu erat parcus: sed in reficiendo animo salutari orationis pabulo admodum liberalis. Præter matutinam meditationis horam, frequenter in templo proluxe orabat antequam ad invisendos ægrotos iret, aut postquam ab eo, vel simili caritatis opere revertebatur. Ad peragenda S. Ignatii exercitia, quæ quotannis peragere nunquam prætermisit, de industria quærebat maxime opportunum tempus, in quo nullus recurreret dies festus, nisi Dominicus, ne confessionibus, aliisve functionibus sacris ab orandi studio præpediretur. Et tamen expletis octo diebus commentationum, alios duos superaddebat, ad compensanda, ut ajebat ipse, exercitiorum intertrimenta, quæ propter occurrentes alias occupationes plerumque solent intervenire. Hæc autem ad orandum propensio tanto erat in Vincentio laudabilior, quanto minus solatii, supernæque dulcedinis in exercitatione illa sentiebat. Ipsemet familiari suo fassus est ingenue, semper in oratione, vel fere semper ariditate laborare, nullumque suavitatis gustum sensibilem experiri: sed major ille ardor, adjunxit, et promptior animus, quem sentio deinde ad quælibet opera pro Dei servitio aggredienda, incitamentum est mihi maximum, ut orationi magis, magisque insistam, et opportunitates vacandi Deo

Deo diligenter arripiam. Quod saluberrimum prudentis viri exemplum illi utinam æmularentur, qui meditationis usum, nisi consolationibus ac lacrymis diffuant, tanquam parum fructuosum, nimisque difficilem abijciunt!

In his, quæ ad religiosa vota spectabant, adeo nihil indulgendum sibi esse duxit, ut suam potius diligentiam intendisse videri possit. In externo vestiendi modo cum honestissimis, ac probatissimis ejusdem loci Sacerdotibus conveniebat. Sed quæ latebant intus, neque intuentium oculis obijciebantur, propria erant pauperis, et ejus, qui molliorem cultum, ac delicias omnes aversaretur. Posteriores cujusdam vestis partem, qua dorsum, et brachia ultra cubitum obtgebantur, ex tela adeo rudi confici voluit, ut qui eam post Vincentii obitum vidit, cilicio parum absimilem reputaverit. Superfluas apud eum vestes non invenisses. Nam quæ sufficienter pro ratione status sui jam inservierant, atque interdum eas etiam, quibus adhuc decenter uti poterat, pauperibus largiebatur: ac pro sua erga illos misericordia, sæpe etiam inter socios rejectanea quærebat vestimenta, quibus multorum necessitati subvenit, vel ut defunctorum cadavera involverent, vel ut propriam obtegerent nuditatem. Illius quoque lectus, cæteraque supellex moderationem in omnibus, et paupertatis amorem indicabant. Cubiculi ornatus unica Crucifixi imago, et pauci aliquot libri, quorum plerique multo jam usu detriti. Ad castitatem tuendam, præter frequentem orationis usum, et corporis afflictationes, tantam in vultu, et in verbis præferebat modestiæ gravitatem, ut satis ea esset cæteris ad pudorem componendis. Hæc autem modesta gravitas tum eminebat maxime, cum suscepto Confessarii munere, feminas erat allocuturus: ante enim, nisi quadam inevitabili necessitate compulsus, ab earum colloquiis abstinebat. Deinceps vero, quoties verba cum eis faceret, severitatem potius, quamvis ab ejus ingenio alienam, quam familiaritatem exhibebat: nec pluribus, quam opus esset, rem quamque agebat, neque deinde in alicujus intrabat domum, nisi ut morbo laborantes visitaret. Quod ad obedientiam attinet, Archiepiscopi jussa reverenti semper submissione suscepit, ac plena executione complevit. Quem elegerat conscientiæ moderatorem, tanquam Dei

gerentem vices considerabat, eique propterea sine ulla tergiversatione vel in rebus, quæ voluntati suæ repugnarent, ut in moderandis castigationibus corporis, aliisque similibus obtemperabat. In omnibus, quæ ad templi servitium spectabant, ita morem gerebat Archipresbytero, ut is inter cunctos, qui tum ibi degerent, Sacerdotes nullum fortasse promptiorem ad nutus suos haberet: multumque proinde Vincentii opera, in his, quæ occurrerent, utebatur. Inter æquales etiam, et inferiores parce admodum propriæ libertatis jura exercebat. Ad aliorum quippe arbitrium in rebus licitis ita se finxerat, ut ea non raro faceret, quæ sponte sua libentius omisisset: neque alia inerat efficiendi ratio, nisi ut actiones suas ad aliorum placitum accommodaret.

Nulla fere magis elucebat in eo virtus, quam animi æquabilitas in adversis, quæ non aliunde proficisci poterat, nisi ab illius studio singulari, ut voluntati divinæ, cohibita naturæ propensione, in omnibus consentiret. Quam multa cum cæteris, et quam acerba rulerit ante adventum in Italiam, deindeque in Societatis excidio, quam ille diligebat in primis, cum satis aliunde constent, non attinet hic fusius exponere. Alia insuper singillatim perferenda sibi fuerunt, tum ex decreto separationis, propter quod ab Hispanorum contubernio abstinere diu debuit, tum etiam ex officio Confessarii, quod ipse ultro suscepit. Id ansam præbuit scelerato cuidam homini peregrino, ut per speciem peccata confitendi, usque ad interiora domus, atque adeo intra Vincentii cubiculum introiret. Ut solus cum solo mansit, atrociter eum urget, terribilesque intentat minas, nisi statim largam sibi opem concesserit, quæ sublevandæ necessitati suæ sit satis. Vincentius, cum aliam evadendi viam non inveniret, et ab ignoto, ac perverso viro prudenter timere posset quidquid ferociter minabatur, nonnullos illi donavit aureos, quibus improbum æruscatorem tandem a se dimisit. Non æque graves, sed mitissimo illius cordi nimium acerbi fuerunt labores alii, quos ob eandem causam aliquando sustinuit: ut cum viam leucarum aliquot pedes arripuit, ut solatium afflictæ cuidam familiæ quamprimum afferret. Nunquam vero his, aut similibus adversis casibus ab animi tranquillitate dejectus est, quam in  
ejus

eius vultu cæteri, velut internæ pacis indicem, suspiciebant. *Supra decennium, ait quidam, cum Vincentio commoratus, frequenterque cum illo agens, nunquam eum memini ab animi æqualitate, atque amabili moderatione defecisse, quam eidem natura ipsa indidisse videbatur; nec poterat non esse fructus eximie cum Dei voluntate consensionis, et contentioris studii, quod ipse ad rebelles animi motus comprimendos adhibuerat.*

His virtutum ornamentis instructus, operosam Castrifranchi ducebat vitam, cum, ineunte vere millesimi septingentesimi octogesimi tertii, ampliorem explendæ caritatis materiam invenit. Sæviebant in oppido per id tempus malignæ febres, quæ multos indigenarum ad vitæ discrimen, non paucos ad sepulcrum usque adegerunt. In ea calamitate omnes animi, et corporis vires intendit, ut strenuam ægrotantibus operam subministraret. Nullo vel labore, vel periculi metu deterritus, aures confiteri volentibus libenter accommodabat, decessuris constanter aderat, omnesque frequenter invisens, dulcissimis colloquiis ad molestias morbi æquanimiter sustinendas adhortabatur. Et quamvis eorum aliqui, utpote facultatum egentes, incommodas ædes incolerent, quas fætidus infirmorum halitus multo reddebat incommodiores; ipse tamen, stimulante caritate, quæ omnia sustinet, nullum loci squalorem refugiebat, nullam horrebat sordium fœditatem, ut benignissime miseris assideret. Inter ægrotos vir quidam erat pauperrimus, sine conjuge, sine liberis, ac propinquis, et in miserrimo tugurio jacens, quod suile potius appellari poterat, quam hominis habitaculum. Huic peculiari studio Vincentius adfuit, cæteris passim mirantibus, qui posset tandiu gravissimum illius loci fœtorem tolerare. Accitus e vicinia quidam, ut supremam infirmi voluntatem suo testimonio confirmaret, olidum habitationis ejus putorem ferre non potuit: indeque sese proripiens, eximiam Vincentii constantiam suspiciebat, qui graveolentiam illam tam longo tempore sustinisset.

Sed Vincentii valetudo fervorem animi, et caritatis suæ vires non exæquabat. Itaque, postquam ægroto illi, quem dicebam modo, et quibusdam aliis qui postmodum ægrotarunt, tanta inservierat alacritate, ut ministerium illud in de-  
li-

licii habere videretur; ipse quoque virus noxium hausit, et contactus eodem morbo, sese tandem coniecit in lectum. Non ita vis febris patuit initio, ut Medicus recuperandæ valetudinis spem bonam illi non fecerit. Sed spem omnem vitæ sic ille abjecerat, certamque imminere mortem adeo sibi persuaserat, ut eidem Medico, cantharides præscribenti cum iterata valetudinis promissione, responderit: *Bene habet: fiant sane quacunque jusseris, ut morituro mihi novum hoc tormentum ad majus patientiæ meritum superaddatur.* Ac revera, cum ab arte medica nullam curando corpori opem reciperet, divinis Sacramentorum auxiliis religiose susceptis, spiritum Creatori suo reddidit Nonis Junii 1783, anno quinto et quadragesimo postquam illum acceperat. Sepultus est in Parochiali templo S. Mariz, cujus dignissimus Archipresbyter D. Hyacinthus Steganus, ut extinctum Vincentium vidit, cum intimo animi sensu exclamavit: *Maluissem equidem, nunquam tam amabilem agnovisse virum, quam illum tanto cum dolore amisisse.* Idemque deinde ad amicum scripsit, Vincentium, ut sancte vixerat, sancte itidem mortem oppetivisse. Inter incolas Castrifranchi, aliosque circum populos magnum sui desiderium, gratissimamque memoriam reliquit, ut qui nullis unquam laboribus, nulli suo incommodo pepercisset, ut omnibus benefaceret. Nam et vitam ipsam pro fratribus infirmis posuit, et qui mortem inter infideles barbaros pro fide subire desideraverat, tandem inter Catholicos, et in pacatissimo religionis sinu victima caritatis occubuit.

## EUGENIUS COLMENARES.



**P**ræclari hujus viri res gestas paucioribus, quam ipse vellem, absolvam paginis: non quod ille multa non fecerit, quæ copiosam poterant scribendi materiam subministrare; sed quia his morte præventis, qui diu cum eo familiariterque vixerant ab initio, plurima illius facta non ita comperire licuit, ut in publicam possint lucem emitti. Verumtamen ex aliis, quæ ab idoneis accepta testibus, hic ego referam, qualis ille, quantusque fuerit, non levis a quoquam fieri poterit conjectura. Novembri mense anni millesimi sexcentissimi nonagesimi quarti ortus est Eugenius in Legionensis diœcesis oppido Balmæo, quod intra vallem situm est Liebanensem. Domi suæ pro parentum illustri genere liberaliter educatus, cum jam pueritiam excesserat, missus est Villamgarsiam, ut latinis literis excoleretur. Ad majora deinceps progressus, divino quodam instinctu permoveri cœpit, ut penitus res, ac spes abdicaret mortales, relictisque parentibus, et propinquis, se totum religiosæ disciplinæ jugo in Societate submitteret. Hoc vehemens desiderium cum Superioribus exposuisset, iidemque debitis probassent experimentis, annumeratus fuit Sociis pridie Nonas Apriles anni 1714. De illo tirocinii sui biennio, deque toto studiorum tempore nihil compertum habeo, quod hic possim narrando commemorare. Sed qui reliquum diuturnioris vitæ cursum ad nostram usque memoriam ita peregit, ut constantem perfecti viri opinionem apud eos obtinuerit, inter quos degeret; verisimile omnino fuerit, et ad ingrediendam virtutis semitam impigrum fuisse, et in eadem persequenda cœlestibus perfusum benedictionibus, ut novos progressus faceret, donec designatam a Deo sibi metam perfectionis attingeret.

Probationum, et studiorum spatia omnia cum laudabiliter percurrisset, ad exercenda ministeria Societatis egressus, Gram-



Grammaticam Abulæ docuit. Inde Villamgarsiam rediit, ut iis e Societate adolescentibus, qui alterum probationis annum cum studiis humanioribus conjungebant, Rhetoricam, et Poeticam explicaret. Gratissimum illi fuit ad id muneris destinari, non quidem ob eam jucunditatem, quam ex literis caperet amœnioribus; sed ut torporem animi excuteret, ut ajebat ipse, perspectisque cominus tironum exemplis, ad fervorem spiritus convalesceret. Nec modicum inde credendus est profecisse, qui munus illud hac animi comparatione suscepit. Ineunte jam autumno anni 1727, Philosophiam interpretari cœpit Segovix, quod ibidem per sexennium effecit. In eadem urbe professionem quatuor votorum emisit anno 1731, quo die in cœlum evectæ Matri Virgini gratulamur. Toto autem magisterii sui tempore tantam ad informandos doctrina, et virtute juvenes diligentiam adhibuit, ut Scholis frequentiam et splendorem addiderit, atque usum Sacramentorum magna ex parte promoverit. Anno proxime antecedenti nullus in Collegium illud advenerat ad Dialecticam auscultandam. Eugenius vero non solum auditores habuit, sed plures etiam habebat sub triennii finem, quam habuisset initio: quod evenire sine multa Doctoris commendatione non potuit; cum plerumque illorum non pauci, qui Logica perceperunt, deinde vel tædio victi, vel ad alias facultates digressi, reliquam Philosophiæ doctrinam facile prætermittant. In posteriore autem triennio discipulorum ejus numerus triplo fere fuit major, quam in priore. Longe enim lateque pervulgata erat fama constantissimæ illius assiduitatis ad erudiendos, et exercendos discipulos, quibuscum horas quatuor cum dimidia ducebat quotidie in Scholis, prætereaque nunquam disputationibus non intererat, quas iidem in feriatis, ac festis diebus inter se invicem conserebant. Neque hic tantus docendi labor quidquam eum ab audiendis confessionibus retardabat: imo etiam indefessa ejus perseverantia in ministerio illo exercendo tam multos ad perceptionem Sacramentorum in Collegium adduxit, ut ægre pateret aditus ad Sacrarium per aulam eidem proximam, beneque spatiosam, in qua virorum confessiones excipiebantur. Denique illius vitæ ratio, dum Segovix, atque Abulæ mansit, ad sanctioris disciplinæ leges ita erat conforma-

mata, ut Sociorum quidam, post viginti ferme annos ad utramque illam urbem adveniens, recentem adhuc virtutum ejus famam invenerit.

Philosophiæ cursum semel atque iterum emensus, socius datus est Rectori Villagarsiensis, ut eum in instituendis tiro nibus adjuvaret. Illius enim Collegii Rector, cum simul esset Magister Novitiorum, qui modo sexageni, vel septuageni, modo plures, nonnunquam supra centum numerabantur, alterius indigebat ope Sacerdotis, quocum gravissimas tirocinii curas divideret. In eam solitudinis partem vocatus Eugenius, multam adhibuit operam, ut Novitii omnes cum devotionis dulcedine mortificationis conjungerent acrimoniam. Et cum ea, quæ suadebat verbis, persuaderet exemplis, vigeat ibi cum pietatis studio præcipuus quidam ardor in atterendo corpore, in edomandis cupiditatibus, atque omni mundana vanitate contemnenda. Per annos quinque in occupatione illa strenue versatus, Palentiam deinde venit, ubi Theologiam aliquandiu tradidit: in eaque tradenda, discipulis prævit suis non magis doctrinæ lumine, quam morum integritate. Perfunctus autem docendi munere, cum jam multam prudentiæ, aliarumque virtutum præbuisset experimenta, ad Sociorum gubernationem adhibitus, ab anno labentis seculi circiter quadragesimo usque ad sexagesimum tertium perpetuos in provincia Castellana gessit magistratus. Ab Auriensi Collegio, quod primum administravit, ad regendum Legionense pertransiit, ubi magno in honore fuit apud Illustriss. Joseph Lupianum, qui tum Episcopalem illam sedem occupabat. Renuntiatus deinde Rector Villagarsiensis, in formandis ad Societatis leges moribus Novitiorum annos septem perseveravit. Præfuit etiam Collegio Salmantino, duobusque Vallisoletanis, quæ sub Sanctorum Ambrosii, et Ignatii auspiciis erecta fuerant. Provinciæ designatus Præpositus, illam per triennium rexit, eandemque per intervalla quædam temporum semel, iterum, ac tertium cum vicaria potestate gubernavit.

His de conspicuis Eugenii muneribus breviter commemoratis, quam digne illa gesserit, quantoque cum comitatu virtutum per omnes vitæ gradus incesserit, non ita paucis poterit expediri. Tota Eugenii vita duobus quasi cardinibus ni-

tebatur: oratione scilicet, et mortificatione, a quibus multi alii justitiæ fructus eidem feliciter provenerunt. Hac enim mirifice adjutus est, ut declinaret a malo; illa vero, ut in exequendo bono constanter perseveraret: quæ duo certissima sunt principia, ut in excelsum virtutis culmen proveharis. Ab orandi exercitatione frequenti, peneque assidua, non facile propter incidentes negotiorum moles distorquebatur Eugenius. Inter difficultates itinerum, quæ in Hispania sæpissime suscepit, ut universam Provinciam iteratis lustrationibus circumiret, antelucano surgebat tempore, ut meditationi vacaret, et præparationem divino præmitteret Sacrificio. In Collegiis autem frequenter interdium noctuque templum ingrediebatur, et procidens coram Domini tabernaculo, ibidem diu cum profunda veneratione perstabat. In Italia vero longas orando ducebat horas, vel in Sacello domestico, in quo divinissimum Sacramentum asservabatur, ubi etiam Sacerdotale pensum abjectus in genua persolvebat; vel in suo cubiculo, ubi clauso ostio Deum sæpe deprecabatur cum clamore valido, vehementibusque gemitibus, quos aliquando, qui ad januam aderant, cum suavissimo animi sensu perceperunt. Diem denique pene integrum extrahebat orando mente, vel voce, vel pios legendo libros, qui pabulum orationi subministrarent, et maxime Ven. Ludovici a Ponte meditationes. Cum enim delicias suas omnes in familiari cum Deo consuetudine collocasset, confabulationes hominum, et quidquid eum ab cœlestium contemplatione avocaret, sedulo, quoad poterat, evitabat; salvis tamen omnibus caritatis, et religiosæ urbanitatis officiis, quibus nunquam satisfacere prætermittebat.

Inter Eugenii scripta, quæ in scriniis ejus inventa sunt, postquam vita concesserat, schedæ aliquot erant, non tam vetustate diuturni temporis, quam frequentissimo earum usu valde detritæ. Commendaverat his chartis præclara quædam decreta, seu voluntatis suæ proposita, quæ inter meditandum statuebat, ut se ad omnes perfectæ vitæ numeros conformaret: ac ne unquam ex animo exciderent, memoriam eorum creberrima lectione renovabat. Ex iis adversariis, in quibus ephemerides annorum octo continentur, cum multa alia verisimiliter interciderint, illud inter alia constat: Eugenium per

singulos menses diem unum sacris commentationibus impendisse, in quibus ea decernebat, quæ ad insequentem usque mensem agenda sibi erant, ut digne coram Deo ambularet. Similiter in longioribus dierum octo exercitiis, quæ quotannis peragebat Octobri mense, nonnulla statuebat in annum proximum observanda, ut quotidie in perfectionis via progredere-  
 tur. Inde etiam constat præter matutinam meditationem, aliaque pietatis opera quotidiana, solitum fuisse mentali orationi vespertino quoque tempore insistere: multamque adhibuisse operam tum præparandis meditationibus, iisdemque ad examen revocandis, tum etiam cohibendis evagationibus mentis, dum preces divinas solveret, et Rosarium B. Virgini recitaret. Ut paucis dicam, omnia fere, vel certe plurima ejus proposita totidem incitamenta sunt ad bene orandum, ad rectam in agendis intentionem habendam, ad erigendam mentem in Deum, ad timorem, et amorem Domini jugiter excitandum. Quod ut manifestius pateat, operæ pretium erit hic pauca quædam exscribere. *Conabor, inquit, intentionem meam frequenter inter operandum ad Deum pure dirigere.... Divinam immensitatem præsentem mihi exhibebo, meque intra illam semper, et in conspectu Dei esse, ut omnia, quam perfectissime possim, efficiam... Sæpe per diem repetam: o momentum, a quo aternitas!... Intra cubiculum manens, illum esse posse locum recogitabo, in quo a Domino judicer... Tunc maxime, cum extra domum solus incedo, vel domi etiam, quando nihil aliud instet agendum, cogitationem defigam in beneficiis creationis, conservationis, et gubernationis: Deumque agnoscam meum esse Patrem, Pastorem, Medicum, et Magistrum... Recolam etiam beneficia Domini, quæ in opere redemptionis, et sanctificationis nostræ includuntur... Matutinis horis justorum aternitatem in cælis quater in memoriam revocabo, quaterque vespertinis reproborum in inferis aternitatem: addamque mane quatuor actus amoris Dei, ac vespere totidem doloris actus pro peccatis... Examen particulare usque ad alia Exercitia erit de eliciendis actibus amoris Dei, et sanctissimæ Humanitatis ejus, quoties e cubiculo egredior, aut revertor in illud... Præparationem quam accuratissimam possim orationi præmittam, illamque postmodum examinabo: et quenquam id hactenus agere studui, idem tamen*

*boc anno diligentius efficiam.* Multa his valde affinia ex commentario illo possem depromere: sed hæc satis erunt, opinor, ad Eugenii assiduitatem in orationis studio comprobendam.

Frequentis, et attentæ meditationis præsidio illud tandem fuit assecutus, ut alius ab eo, qui a natura effectus fuerat, videretur. Ab hac enim habuit biliosam, et ardentem corporis constitutionem, quæ proinde facilis erat ad iracundiæ flammam concipiendam. Sed proclivitatem illam, cæterosque turbulentos motus animi cum divina ope ita devicerat, ut demum ad optatissimum tranquillæ mentis statum deveniret, qui et in illius sereno vultu, et in moderatissimis ejus actionibus elucebat. Eam tamen obtinere pacem non potuit sine multorum labore certaminum, in quibus ne vinceretur, strenue ac viriliter decertavit. Cum florentem adhuc ætatem ageret, nescio quid contumeliosum ei quidam objecerat, quod nimium quantum valeret, ad commovendam Eugenii bilem. Is vero concitatum iræ motum, et vindicandi honoris læsi cupidinem tanta contentione cohibuit, ut usque ad animi deliquium venerit: quippe violentam adeo refrenationem cum natura ferre non posset, prius devicta concidit, quam in aliquid indecorum contra imperium voluntatis erumperet. Hujus autem conatus, quem ad debellandas cupiditates impigre adhibuit, ea demum fuit merces, ut deinde affectiones suas sub potestate haberet, illasque facile, quocunque ratio suadebat, impelleret. Salmanticæ contendebat ab eo juvenis vacationem studii cunctis Theologiæ auditoribus obtinere: sed illam ad exorandum afferebat causam, quæ plane frivola erat, neque religiosæ disciplinæ admodum consentanea. Explosit eam Eugenius, vultu ad severitatem ita composito, ut juvenis expavesceret, jamque ipsum petitionis puderet suæ. Id satis Eugenio fuit, ut ipse quoque aliam statim personam indueret: repenteque posito supercilio, mitissime affatus est juvenem, et illius agnita simplicitate, benigniter a se dimisit. Hanc sane mirabilem facilitatem, qua suorum affectuum habenas quasi ad arbitrium adduceret, vel remitteret, sæpe alias notarunt aliqui, cum in ejus vultu, prout varia exigebant tempora, nunc amabilem, jucundamque lætitiâ, nunc severam animad-

madverterent gravitatem. Quamvis enim rigorem, ut verum Christi decet discipulum, sibi potius assumeret, quam in alios exerceret; quotiescunque tamen pro tuenda legum observantia opus erat, nullo personarum respectu, nulla cujuslibet auctoritate deterritus, austeriorem adhibere medicinam non dubitabat.

Sed frequenter in aliorum erroribus corrigendis ita sibi moderabatur, ut multum benignitati concederet, vel cum acriori locus erat objurgationi. Tirocinii Magister designatus, pomeridianæ intererat recreationi, sub cujus finem aliqui Novitiorum procidebant in genua, ut siquid in aliorum oculis deliquissent, ab iisdem coram Magistro fraterne commonerentur: quod erat et exercendæ humilitati, et reformandis tironum moribus, sane quam opportunum. Quidam ergo jam annis grandior culpam admiserat, levem illam quidem, sed quæ tironem Societatis non leviter dedeceret. De hac in consessu illo cum publice accusaretur, vehementer extimuit, ne Rector in se graviter animadverteret, aut fortasse etiam res suas sibi habere decerneret. Sed Eugenius, accusatione audita, satis habuit hæc dicere: *Jam diu est, cum frater hic excessit a pueris, proindeque facile agnoscet, in eo, quod ipsi objicitur, nec cæteris bono exemplo esse, nec sibi quidquam utilitatis acquirere. Ætatem habet, judicioque non deficitur: spero itaque nullam iterum offensionis causam suis fratribus prabiturum.* Hic suavis corrigendi modus tantum apud Novitium valuit, ut ei vires addiderit ad inceptum vitæ cursum diligentius persequendum, magnamque de Superiore suo ingesserit opinionem, qui subditorum animos, vel cum delinquerent, tam apposite sibi noverat conciliare. Eadem usus benignitate, juvenem alium, qui fœdus prolapsurus erat, ad saniolem mentem reduxit. Hic studiorum tempore, remissa paulatim animi sui custodia, multum a se ipso discesserat: et cum esset æqualibus importunus, ac majoribus parum obsequens, tandem dimissionem petiit, hujusque arrepti consilii certiolem fecit Eugenium, qui provinciam eo tempore administrabat. Non magna pietate dignus primo quidem aspectu poterat existimari, qui sua sponte ad eam processerat temeritatem. Et tamen Eugenius, nulla indignatione commotus, sed potius paterna tactus miseratione,



suavissimis et amorem spirantibus verbis illi respondit, atque ita scite depinxit periculum ruinæ, cui se ultro committebat, si datam Deo fidem violaret, ac respiceret retro, postquam manum miserat ad aratrum, ut juvenis, factorum pœnitens, novos induere mores promiserit, omninoque conquieverit. Sæpe alias, cum asperioribus potuisset uti remediis, facilem se præbuit, et clementiam prætulit severitati, ne forte, dum aliorum imbecillitatibus mederetur, ipse interim vel ira, vel indignatione, vel alio quovis animi morbo corripereetur. Hanc assiduum continendi sui curam multis confirmare possem, si proposita illa transcriberem, quibus ipse aditum præcludebat cogitationibus quibuslibet inutilibus; actionibus, et occupationibus, quæ minus apte caderent in religiosum virum; recreationibus, et oblectamentis, quibus abstinere se posset sine caritatis, aut obedientiæ, aut alterius transgressione virtutis, atque etiam sine ulla nota singularitatis, a qua semper longissime abfuit: omni denique verbo, quod aliorum posset honorem deterere, vel famam etiam levissime maculare. Sed hæc summatim attigisse sufficiat, ut ad illius externam, quam dicunt, mortificationem deveniam.

Perpetuum suo corpori bellum indixerat, illudque flagellis, ac ciliciis, aliisque servilibus modis ad ætatem usque senilem asperrime divexavit. Per annos undecim, quos in tirocinio vixit, vel Rectoris socius, vel ejusdem tirocinii Rector, sese fere quotidie, beneque prolixè flagellabat. Atque hoc supplicii genus bis etiam assumebat in pervigiliis festivitatum omnium B. Mariæ Virginis, Apostolorum, aliorumque Sanctorum, et quoties Novitii ad Eucharistiæ mensam accessuri essent, quod in Dominicis, et in plerisque diebus festis efficiebant. In frequentibus per Hispaniam itineribus, quæ ad inspectandam provinciam in longo Præfecturæ tempore suscepit, secum instrumenta pœnalia circumferebat, quibus affligeret corpus, quamvis multis ex itinere laboribus defatigatum. Neque illa militiæ spiritalis arma deponenda censuit, cum in exilium missus, innumeras ubique molestias tolerare debuit, quæ voluntarias afflictiones non modo compensare poterant, sed multis etiam partibus superabant. Crespelani prope Bononiam aliquandiu commoratus, cum intra domum, propter inhabi-

habitantium Sociorum multitudinem, locum cædendi se flagris non inveniret, hiberno tempore in domesticum hortum per mediam irrumpens nivem, ante diluculum procedebat: ibique in remoto loco corpus suum et crebro verbere, et rigidissimo frigore macerabat. Tantus in longævo sene vigeat ardor spiritus! nam cum hæc faceret, annos jam excesserat septuaginta quatuor. Paulo post Bononiam ingressus, ubi reliquam vitam duxit, cum jam fere octogenarius esset, nihilo secum agebat mitius. Hora tertia post noctis medium consurgens, quando cæteros altum dormire poterat existimare, in se adeo acriter desæviebat, ut curiosior aliquis, quem cupido semel incessit explorandi plagarum numerum, quibus se ipsum cæderet, tercentas illa vice dinumeraverit. Neque id satis habens, bis etiam quibusdam diebus, in aliis ter sese flagellis percutiebat. Ciliciis etiam et plurimis, et nimium horridis in Hispania utebatur. In his unum erat in thoracis similitudinem conformatum, quod illius corpus circumundique complectebatur: aliud ad instar zonæ, quo lumbi præcingi poterant: et quoties hoc adhiberet, devexo et incurvo corpore procedebat. Pedes quoque nonnullis diebus torquebat udonibus cilicinis, ut fama erat, dum Collegio præerat Villagarsiensi. Ibidem tirones aliquando ducens per clivum Torozii montis, defectionem animi passus est: diloricatisque vestibus, ut liberio-rem spiritum duceret, ciliciis inventus est coopertus. His tamen frequentius uti consueverat a primo mane usque ad prandium: multisque diebus ita eorum aculeis constringebatur, ut non nisi ægre posset incedere, manusque tumentes, et faciem libidam exhiberet, cum tamen a prandio et expeditius graderetur, et nativum colorem ostenderet. Denique instrumenta illa, quæ cruciando corpori excogitaverat, talia erant, ut qui ea fortuito quondam potuit inspicere, deinde vel sola eorum recordatione inhorresceret. Hæc autem, vel iis similia frequenter exercere non cessavit Eugenius, donec in decrepita senectute jussus est austeritati pristinæ modum imponere.

Ut austerus erat in plectendo corpore, sic erat in eodem cibando moderatissimus. Prandium ejus, dum viveret in Hispania, levioribus ut plurimum constabat escis, quæ vel præludia erant cœnæ, vel secundis mensis apponebantur.

Por-

Portionem vero carnis, quod præcipuum erat ferculum, pene integram relinquebat: solum tenuissimam gustabat micam, ita illam versans in lance, ut assidentium oculos facile luderet, eisque large prandere videretur, nisi attentius animadverterent. Postquam in Italiam venit, ut imperantium cederet voluntati, de his vesci non recusabat, quæ cæteris in commune ministrabantur; parce tamen semper, ac moderate. Cujus parsimoniæ id esse poterit testimonio, quod ipse Bononiæ in commentariolo scribebat, quando jam annos duodecoginta numerabat: *Cœnam ita deinceps moderabor, ut dimidium panis, et obsonii, aut eo etiam amplius relinquam. Quæcumque illi apponerentur, nullo discrimine habebat, neque hoc magis, quam aliud edulii genus arridere palato significabat: nunquam etiam de cibo conqueri auditus, quod frigidus, vel durus esset; modico, vel nimio sale respersus. Nihilo indulgentior erat in aliis commoditatibus suo corpori concedendis, aut in eo ab ingruentibus temporum injuriis defensando. Per hiemem, quamvis glacie, ac nivibus algerent omnia, nunquam sedere voluit ad focum: et vix tandem adduci potuit in ultima senectute, ut igniferum admitteret vasculum ad manus calefaciendas, quas ei vis frigoris miserabiliter exulcerabat. Similiter æstivo tempore nullam calori declinando, vel auræ captandæ adhibebat diligentiam; sed longas in cubiculo ducebat horas, longamque cum Deo habebat consuetudinem, cujus amore curam sui commodi negligebat. Quoties vero in templum, vel in alicujus ægroti domum prodiret, lanceo amictus ibat pallio grandi pondere, quod nunquam cum leviore alio, sibi liberaliter oblato, commutare voluit. Denique in ipso lecto, qui recreandis mortalium membris ex diurno labore defatigatis inventus est, duritiem, et incommoditatem studiose consecrabatur. Illa erat multorum, quibuscum vixit in Hispania, pervulgata opinio, neque sindones, neque ullum aliud stragulum ad dormiendum, per annos plurimos adhibuisse; sed in simplici culcita, neque detractis vestibus, solitum fuisse decumbere. Cæterum asperitates aliquas, quæcumque illæ fuerint, intra lectum usurpare consuevisse, compertum habemus ex ipsius Eugenii verbis, qui annos natus septuaginta septem, in adversariis suis scripsit: *Exercere per-**

*pergam asperitates in lecto, ciliciis, et flagellis uti omnibus diebus, exceptis diebus festis sub praecepto, ut hactenus feci. Tam constantem in rebus arduis perseverantiam retinuit! Quot horas somno concederet, liquido explorare non potui. Sed ex multorum testimonio habeo, modicum semper in dormiendo fuisse: nunquam extra lectum inventum non esse ab eo, qui Socios in Collegio excitabat: quod si is interdum suo deesset muneri, ab ipso Eugenio, dum Rector esset, subito expergefatum, vel signum editum ad surgendum: ac demum in Italia quoque longas egisse vigiliis. Et vero, qui lectum habebat incommodum, qui coenabat parce, qui orandi, et affligendi corporis adeo studiosus erat, is quidem multum dormire non poterat.*

Longe tamen Eugenius aberat a quorundam spirituum hominum conditione, qui graves sibi poenas infligunt; sed quæ aliunde adversa contigerint, non æque patienter ferre didicerunt. Imo vero studium vincendi sui, et cupiditatibus obsistendi, nulla in re magis evidenter manifestabat, quam in tolerandis laboribus, et molestiis, quibus a Deo, vel ab hominibus exerceretur. Dum Aurix Collegium regeret, morbo correptus est molestissimo: in eoque tam eximium patientiæ dedit exemplum, ut primarius quidam civis, qui pariter ægrotabat, cum Medicum narrantem audiret, quo pacto Societatis Rector in infirmitate se gereret: *O me felicem, exclamaverit, si consimilem patientiam haberem!* Calvii quoque, ubi Medici, medicamenta que deerant, cum graviter ægrotasset, tum alia incommoda, tum etiam acerrimum ardorem, quo interne urebatur, cum admirabili pace, insignique patientia toleravit. In posterioribus vitæ annis, in gravescente jam ætate, diu jacuit in lecto, neque propterea de veteri tranquillitate quidquam amisit. Facilis ad arbitrium eorum regi, qui meritissimi senis vitam sedulo fovere studebant, quidquid illi decernerent, quamvis molestum sibi esset, dicto citius exequabatur. Sive multi eum inviserent, sive solus relinqueretur, æquo vultu ferebat omnia, nullumque fastidii signum, nullam querelæ vocem, quomodocunque haberetur, emittebat. Rogantibus, quomodo valeret? bene sibi esse, ajebat semper: tandemque postremum diem ob-

it, quin aliquis ab ejus ore cognoverit, num aliquo dolore conflictaretur. Labores alios, quos in longioris vitæ cursu sæpe illi occurrisset necesse fuit, magna animi æquabilitate sustinuit. Itinerum molestias, et hospitiorum incommoda, quæ non raro perpessus est per annos fere quinque, quibus Provinciam administravit, hilari semper vultu excipiebat. Quamvis multa illi deessent ( ut is affirmat, qui Eugenium eo tempore comitabatur ) nihil unquam desiderabat: sed cum omnia providentissime a Deo disponi recogitaret, nullum erat incommodum, quod lætanti animo non sustineret. Nonnunquam in diversoriis exceptus fuit, in quibus magna erat rerum omnium inopia; et in eorum aliquo tria tantum inventa fuisse ova, quibus cœnarent viri quatuor, qui simul agebant iter; deindeque super pavementum noctem illam ducere necesse fuit. His tamen incommodis adeo non offendebar Eugeni- us, ut potius Deo perinde ageret gratias, quasi liberalissime tractaretur. Quin etiam inter adversa gaudere, facile ab ejus sociis deprehendebatur; cum eos hilari vultu allocutus: *Patienter sustineamus, ajebat, et qua Deus nobis offert, libenti animo recipiamus; quandoquidem nox una, vel meridies cito pertransit, etsi pro votis non omnia contingant.*

Verum hæc levia poterunt existimari, ut quibus tantum vis inerat affligendi corporis, quod ipse nunquam indulgenter habere consuevisset. Graviora procul dubio fuere, quæ ipsius animum pervaserunt, ac, nisi Deo intime conjunctus esset, insanabili mœrore confecissent. Labores inquam, et calamitates, quibus ab initio sui magistratus afflictam in variis locis vidit Societatem Jesu. Hanc ille amabat ardentè, bonumque illius nomen, ad promovendam salutem animarum, ubique florere desiderabat. Dum vires habuit, nervos omnes contendit, ut eidem fideliter inserviret, seque filium ejus minime degenerem exhiberet. Postquam ita consenuit, ut ministeria exercere vix posset, quam primum ex hoc mundo abire desiderabat: *quoniam Societati* ( sic ille in commentario suo scribebat anno 1771 ) *parum, aut nihil prodesse jam possum, nisi ut eam diligam, magnoque in pretio habeam, quod hactenus, Deo sit gratia, semper effeci.* Cum igitur Societatem illam, quam tanto amore prosequeretur, variis in regnis acriter

ter impugnari videret, dubitari nullo modo potest, quin conceptus inde dolor altissime in ejus visceribus inhæreret. Non tamen propterea conquestus est, neque ullam unquam aversi animi significationem adversus quemquam hominum visus est edidisse. Sed conversa in Deum mente, sine cujus nutu nihil aversi contingere cogitabat, pacifice solebat dicere: *Deus hæc videt, Deus hæc patitur: patiamur ergo nos quoque ab ipsius blandissimis manibus, quocumque velit, adduci; ipse enim novit, quid maxime nobis expediat.* Ac ne tum quidem, cum tandem eversa est Societas, lamentum aliquod ab Eugenii labiis excidit, aut animi perturbationem aliquam indicavit: imo vero quosdam, in quorum contracto vultu dolor apparebat inflicti vulneris, prudentissima solatus est oratione. Talis denique patientia erat Eugenii, atque ita voluntatem propriam exuere, divinamque sequi didicerat, ut nulli eum sinistri casus deicerent, sed imperturbabili pace in adversis æque frueretur, ac prosperis.

Hic tantus cum Dei voluntate consensus, et tam æquabilis inter acerba quæque tranquillitas, sine vera cordis humilitate, atque humanarum despicientia rerum constare utique non potuisset. Utrumque hoc decus assecutus erat Eugenius, qui paupertatem spiritus ita decrevit amplecti, ut et mentis elationem effugeret, et tenui victu semper esset contentus. Nullum in eo verbum, nullusque gestus deprehendebatur, qui fastum animi, vel arrogantiam aliquam redoleret. Ad occultandam virtutem diligenter intentus, quidquid in aliorum oculis ageret, ita semper efficere conabatur, ut speciem novitatis effugeret, neque ullam singularitatis notam incurreret. Quamquam, ut erat in communi servanda lege exactissimus, quanto diligentius assimilari cæteris studebat, tanto magis illius perfecta vitæ ratio ab omnibus notabatur. De præclaris, quas sæpe obierat, præfecturis nunquam sermonem ingerebat, nisi aliqua necessitate compulsus: multoque minus ea commemorabat, quæ sibi apud audientes possent opinionem virtutis ingenerare. Ut imitem illam dissimulare austeritatem, qua sese jugiter excruciat, in quotidiano congressu, et familiari cum cæteris consuetudine non solum affabilis omnibus, sed jucundus, ac festivus erat; nec jocos liberalibus uti, aut etiam, si ab aliquo rogaretur, lusum honestum ludere detrectabat:



prorsus ut nullam iis, quibus ignotus esset, austerioris viri suspicionem injiceret. Dum familiariter cum aliquo ageret, siquid novum, aut insolens occurrisset, solitus erat femur sibi dextra percutere, illudque reficere frequenter; quasi vellet eo gestu conceptam inde admirationem exprimere. Id tamen, ut constanti vulgatum erat fama, ideo efficere credebatur, ut catellarum acumina, quibus femora perstringebat, altius comprimeret, ac tum maxime dolorem irritaret, cum se ridentem coram cæteris exhibebat. Sed qui erat in familiari colloquio hilaris, ut virtutis effugeret ostentationem; postquam inde recesserat in conclave, demississime coram Deo prosternebatur, ejusque misericordiam et clementiam magnis gemitibus implorabat. Breves aliquot gravissimasque sententias descripserat in adversariis, ut earum frequenti recordatione ad operandam salutem suam cum timore debito incitaretur. Nonnullas hic exhibebo, plurimis prætermissis, quarum alias aliis mensibus consueverat ruminare. *Horrendum est incidere in manus Dei viventis. Ite maledicti in ignem æternum. Si pœnitentiam non egeritis, omnes similiter peribitis. Non intres in iudicium cum servo tuo, Domine. Patientiam habe in me, et omnia reddam tibi.* Procul quidem aberat ab elatione, qui frequenter his verbis, aliisque similibus indicabat, quanto Dei timore concuteretur.

Ex eadem animi demissione ad amplectendam paupertatem, et moderationem in omnibus retinendam excitabatur. Non in vestitu solum, et cubiculi ornatu, qui simplicissimus erat, sed in cæteris etiam rebus indicabat, quantum ab omni superfluitate abhorreret. Nonnullis commoditatibus, quæ religiosum virum non dedecent, si modo vellet, frui potuisset facile; sed illis sese privabat protinus, ut inter alios liberaliter dispertiret. Dum agebat iter ad lustrandas Provinciæ domos, librum tantum divinarum precum, flagellaque cum ciliis mittebat in manticam, de cætero comæatu nihil plane sollicitus: ac ne teruncium quidem ferebat secum, neque curiosius inquirebat, anne aliquid superesset de modico illo subsidio, quod in itinerum sumptus Collegia singula subministrabant: hanc enim curam, ut id genus alia, in viâ comitem rejiciebat. In his profectionibus difficile adducebatur, ut

con-

conviviis adesset virorum principum , ac nobilium , qui eum in domos suas instanti prece invitabant . Unde , nisi gravior aliqua urgeret causa , frugaliorem cum comitibus in diversorio mensam semper lautitiis divitum præferebat . Et cum ad eo esset in declinandis propriis commodis studiosus , erat tamen in elargiendis rebus suis liberalissimus . Quod si eorum aliquem , qui sub ejus potestate rem domesticam administrabat , sordide parcum animadverteret , non poterat , quin vitium hoc improbaret , et merita reprehensione corrigeret . Exilii tempore , vel cum sui juris erat , nihil de paupertatis amore remisit . In domibus , quas Bononiæ incoluit , habitacionem minus commodam eligebat , ac semel tantum propter orbitum cujusdam contubernalis ad aliam commodiorem pertransiit . Modici peculii curam apud amicum reliquit , qui sibi , quæ opus essent , subministraret . Siqua illi vestis subtilior , aut elegantior adduceretur , eam constantissime recusabat , aliamque crassiorem , et vulgarem tanta contentione deposcebat , quanta hi solent , qui voluntariam in deliciis habent paupertatem . Fibulas nectendis calceis adhibere non voluit , eosque quibusdam e corio ligulis semper adstrinxit . Cum vellet aliqui quemdam Eugenii benevolum admonere , ut seni benemerentissimo largius succurrere dignaretur ; simul hoc ille sensit , literas ad eundem misit , ac nequid pristinae superaderet liberalitati , cum id sibi satis superque esset , admonuit . Nil demum efficere prætermisit , ut se paupertatis amantem , atque in omnibus vere pauperem exhiberet .

Nec minorem adhibuit curam in aliis virtutibus , quas voti religione promiserat , excolendis . Pulcherrimum castimonie florem , ut ab hostium incursione defenderet , horribili spinarum sepe circumdedit , modesta animi demissione , tanquam altissima munivit fossa , eidemque vigilem orationis custodiam apposuit . Erat inde perspicax in periculis prævidendis , cautus in declinandis , in actione decori tenax , in sermone vero eximie circumspectus . Ab omni verborum levitate sic abhorrebat , ut eam vel in alterius ore ferre non posset . Adolescentem , qui recens venerat in Societatem , et ab ea tandem discessit , cum scurriliter coram paucis jocantem audisset ; quamvis id puerili potius inconsiderantiæ , quam malitiæ

tix posset adscribi; tamen coram Novitiis omnibus tam acri, ac vehementi reprehensione coarguit, ut consuetum corripienti modum excessisse videretur, et quotquot præsentés aderant, ingenti terrore perculerit. In obedientix virtute ad eum perfectionis gradum ascendit, ut non solum majoribus, et quibus conscientix committebat arcana, fideliter obtemperaret; sed inferioribus etiam, in quibus vel modica tantum auctoritatis residebat species. Qui ejus curandæ valetudini longo tempore incubuit, cum insigni Eugenii laude testificatur, ad omnes suos nutus perinde illum sequacem habuisse, ac si puer esset parvulus, qui parentis arbitrio, quocumque ipsa velit, facillime ducitur, ac reducitur. Videlicet, quod ab infantia religiosæ vitæ didicerat, idem ad extremam usque senectutem retinuit.

Excelsam moralium virtutum molem firmissimo fidei superstruxerat fundamento. Ut eam fovet assidue, multus erat in sanctissimis religionis nostræ veritatibus meditandis. Nam et inevitabilem moriendi semel necessitatem, et extremi terrorem judicii, et scelerum fœditatem ac pestem, et sceleratis decreta supplicia; et his contraria bona, virtutis honestatem, ac præmia frequenter secum ipse recogitabat, ut ad implendam omnem justitiam vehementius accenderetur. Sæpe etiamolvebat animo æterni Numinis immensitatem, cujus oculis patere omnia considerabat, ut se ubique ad Dei reverentiam excitaret. In commentariis ejus passim videre licet, quam diligenter proponeret intentam habere mentem, sive rem divinam ageret, sive preces funderet Sacerdotales, quas propterea flexis plerumque genibus exsolvebat, sive alia pietatis opera exequeretur. Prodebatque sese in illius facie, totaque corporis habitudine intimæ venerationis affectus, quo Dei majestatem reverebatur. Spem quoque habebat firmam obtinendi promissam recte factis retributionem: atque ut illam aleret, sæpissime revocabat in mentem suavissima Christi verba, quibus olim in magna Josaphatæ Vallis panegyri justos evocabit ad palmam: *Venite benedicti Patris mei, possidete paratum vobis regnum a constitutione mundi*. Inde autem fiebat, ut ad obtinendam coronam incorruptam, quam sperabat, viriliter ac legitime decertaret, et tamquam pugil strenuus ab iis abstineret, quæ ipsum

ipsum in agone impedire possent, aut remorari. Hinc etiam inter labores, et arumnas, quas frequenter passus est in exilio, vires desumebat ad sustinendum; propositoque sibi æternæ mercedis præmio, duriora quæque constanter, jucundeque perferebat. Antequam e litore Hispaniæ solveret, hanc animi comparationem ad toleranda libenter incommoda intuitu supernæ remunerationis ostendit. Detentis Sanctanderi Sociis, dum naves ad profectionem apparabantur, eorum plerique propter loci angustias, et hospitem multitudinem in protensa super pavimento culcita decumbebant. Eadem Eugenio sors obtigit, aut eam potius sibi ipse delegit, quippe cui novum non erat incommodiore in lecto dormire: alioqui enim maximis honoribus perfuncto seni, cui etiam provinciæ Præses vicem suam detulerat, dum eodem veniret ipse, fulcrum aliquod, quod strato supponeret, non defuisset. Igitur quadam die prope chorum templi sternendo super terram lectulo adlaborabat, cum præteriens quidam Socius hæc ait: Parce, quæso, laborem istum assumere, benigniusque tecum agas, amabo; non enim deerit aliquis fratrum, qui te hoc onere levatum velit. Cui Eugenius respondit placide: *Solacium verum, laborumque levamen in cælesti tantum expectandum est patria*. Scilicet beatam illam requiem sic anhelabat, ut inter vulgares etiam occupationes eam facile recogitaret.

Sed in nobili Eugenio pectore primas tenebat caritas, quæ ipsius animum cum Deo, et hominibus ita conjunxerat, ut illum pene jugiter amplexari videretur; iis autem pro suarum facultate virium largiter beneficeret. In superioribus non pauca dedimus, quæ amorem ejus in Deum satis clare demonstrant. Nam impensa longis meditationibus tempora, indefessa repugnandi voluptati, atque etiam voluntati suæ constantia, ut divinæ quam aptissime conveniret, aliaque his multum consentanea, virum indicant summo bono adhærentem, eidemque placendi studiosissimum. Quædam iis modo subnectam, quæ præsentis materiam argumenti propius attingunt. Incomprehensam Dei bonitatem, et effusam erga homines beneficentiam contemplatus, magnis incitabatur stimulis, ut eum toto corde diligeret, et quæ illi grata esse cognosceret, operatione compleret. Inter innumerabilia Dei beneficia, illa frequen-

quenti consideratione tractabat, quæ ad reparationem humani generis, et animorum sanctificationem spectant. Hinc vero in auctorem, et assertorem salutis nostræ Christum Jesum quanto amore inardesceret, non facile verbis expresserim. Ipsemet in illo diario, quod sæpe commemoravimus, nonnullum ardoris hujus indicium satis reliquit expressum. In autumnalibus feriis anni 1776, cum exercitia S. Ignatii de more exegisset; ut eximiam Domini caritatem, quam forte per eos dies consideraverat, altius in sua mente reponeret; inter alia, quæ deinceps agenda sibi esse decrevit, hanc Pauli sententiam octies per dies singulos iterare constituit: *Christus factus est nobis sapientia a Deo, et justitia, et sanctificatio, et redemptio.* Quod gratissimo cum animi sensu dum sæpius ingeminabat, vicem etiam reddebat amori, quo Dominus tam pretiosa nobis dona promeruit.

Huc etiam pertinet, nec in postremis Eugenii laudibus reponendum, quod sacratissimi Cordis Jesu cultor non indiligens fuerit. Præter iteratas in templo, beneque prolixas adorationes, nullum abire sinebat mensem, quin illi tributum novendialium precum exsolveret. In Italia, dum felicissimam obtinuit sortem, ut Eucharistiam domesticos inter parietes haberet, eam opportunitatem tam avidè arripuit, ut ægre ab eo loco discederet, in quo thesaurum invenerat inæstimabilem. In ipso Sacelli aditu his verbis, quæ in suo leguntur diario, ad reverentiam, et amorem Domini excitabatur: *Cor meum, dilige, et inflammare in amore dulcissimi Cordis Jesu: et in ardoribus sacris immergere, qui purificandis animis ab eodem erumpunt.* Qui hac animi præparatione ad rogam illum divinum tam sæpe accedebat, quantum inde retulisse oportet incendium! Nulla unquam occupatione, nullus incommodi, vel molestiæ causa, quæ plane non esset insuperabilis, a quotidiana Sacrificii oblatione cessavit. Huic autem peragendo longam præmittebat meditationem, quotidie animam ad pœnitentiæ tribunal tanta compunctione repurgabat, ut gemitus et suspiria, qui prope aderant, exaudirent. Jamvero, cum ad perennem sanctitatis fontem tam frequens recurreret ac sitibundus, superfluentem ab eo donorum copiam reportabat, quibus in diem ejus animus reficiebatur. Inde enim hausit  
man-

mansuetudinem, et modestiam, quæ illum valde amabilem, vereque humilem reddiderunt: inde ipsius caritas novum concipiebat ardorem: inde lætitiâ, et pacem traxit, quæ inter gravissimos adversantium rerum concursus immota consisteret: inde etiâ, quod fere majus est, atque omnes in Eugenio maxime suspiciebant, constantiam illam desumpsit, qua perfectionis semitam ita percurrit, ut neque progredi cessaverit unquam, neque ab ea in opposita extrema deflexerit. Nunquam enim aut multiplices negotiorum occupationes, aut frequentes incommoditates itinerum, aut infirma salus, provec-taque senectus; non item honoris, aut despectionis vicissitudo, quam expertus est coetus ille, in quo ipse conspicuum adeo locum obtinebat, et quem supra vitam amabat suam; non denique alia quælibet prospera, vel adversa vicilem ejus animum frangere, constantemque in persequendo bono conatum debilitare potuerunt. Postquam Italiam attingit, innumeris terra marique laboribus exantlatis; quando et perpessæ zrumnæ, et ætas jam devexa jure quodam exigere videbantur, ut arma illa suspenderet, quibus suo corpori vim inferebat, vel saltem ut ea rarius tractaret ac mitius; nihil indulgendum sibi esse duxit, et quod pridem contra se certamen inierat, novo cum ardore redintegavit. In cæteris religiosæ perfectionis numeris adimplendis contentionem nihilo minorem adhibuit. Quidquid in Dei cultum, et animi profectum susceperat exequendum, admirabili explebat fidelitate. Cum diem integrum in quolibet mense sacris meditationibus Æstinasset, et aliquando morbo impeditus, id efficere non potuisset; sequenti mense biduum dedit illi secessui, ut plene, quod semel promiserat, adimpleret. Quicumque demum in ejus breviculo inspiceret, quam diligenter se ipse excitaret ad precandum attente ac devote, atque ad perfectionis apicem in omnibus operibus attigendum; proculdubio Eugenum in studio virtutis negotiatori simillimum reputaret, qui lucris diu, noctuque intentus, nullam augendæ rei occasionem omitteret, vel potius ingenuo filio, qui per omnia placere patri studeret. Tantum ex assidua vitæ, ac passionis Domini, et afflictissimi æque, atque amantissimi Cordis ejus meditatione profecit!



In eadem divini Cordis schola mansuetudinem, et misericordiam erga homines didicit. Illius gravitas ita erat temperata comitate, et sermonis affabilitate condita, ut sibi aliorum animos facile conciliaret: neque longa opus erat cum eodem consuetudine, ut, Eugenium diligere omnes, et ab omnibus diligere, agnosceretur. Ut autem verbis et vultu benevolentiam indicabat, sic etiam beneficentiam, dum occasio et facultas ferret, liberaliter exercebat. Nihil ei gratius, nihil erat jucundius, quam de tenuitate sua beneficium aliquod in ceteros contulisse. Erga illos vero, quos indigentia rerum premeret, ita erat misericors ac benignus, ut eorum inopiam detractis etiam sibi necessariis aliquando sublevaverit. In Segovien- si urbe pauperem discipulum per triennium aluit, misso ad eum quotidie quidquid fere sibi apponebatur ad prandium. Sed insignis ejus caritas in egenos nusquam magis, quam in regione Vaccæorum eluxit, dum ibi Collegium regeret Villagarsien- se. Annus inciderat tanta calamitate funestus, ut mul- ti divitum ad tolerandam vitam ægre frumenta reperirent, in- opes autem miserabili egestate laborarent. Eugenius, ut ur- genti succurreret necessitati, primum quibusdam prædiorum dominis tantum frumenti commodavit, quanto vel alendæ fa- milix, vel seminandis agris indigebant, ea solum lege, ut tan- tundem redderent post novam messem. Deinde multorum in- digentiam, qui honestæ conditionis erant, ideoque mendica- re erubescabant, submissis noctu panibus relevavit. Postremo statuit, ut mendicorum nemini, qui ad Collegii januam ac- cederet, consueta panis et pulmenti eleemosyna denegaretur. Non defuit, qui hæc decernenti proponeret, non ita uberem Collegii proventum esse, ut subveniendis sufficeret egenis om- nibus, qui in tam universali annonæ difficultate ad peten- dam stipem e vicinis populis convenirent: satisque proinde fore, si eleemosyna Villagarsix tantum pauperibus erogaretur. Sed pius Rectoris animus, qui erga miseros paterna ge- rebat viscera, non ideo potuit a proposito dimoveri: divi- næque providentiæ fidissime innixus, quidquid in apotheca frumentaria repositum erat tritici, mensurari jussit ac dividi, partemque unam Sociis et Collegii servis, aliam pauperibus partem designavit.

Cum

Cum brevi per omnem circum regionem Eugenii caritas innotuisset, numerosæ adeo confluebant pauperum turmæ, ut plerumque unoquoque die festo medimna tritici vigintiquatuor, in profestis autem diebus quatuordecim absumerentur. Tritici medimnum in illis locis pondus habet ut plurimum librarum centum, libra vero continet uncias sexdecim. Cum igitur tam notabilis quotidie impensa fieret, Collegii Procurator, et agrariæ rei Præfectus denuo Rectorem conveniunt, eique timores suos indicant, ne Sociis annona deficeret, si deinceps in pauperes tanta esset frumenti copia expendenda. Audivit eos benigne Rector, simulque admonuit, ut meliora de Dei bonitate sperarent: quidquid in pauperum alimoniam insumitur, quæstum esse, non sumptum: nec vero unquam pertimescendum, ne illos divina largitas deserat, qui liberales fuerint in egenos. Perrexit ergo decretam nihilominus exercere misericordiam, quamvis frequentissimus accursus pauperum nihil per duos menses fuerit imminutus. Sed cum scire vellet, quantum tritici esset reliquum, iisdem administris injunxit, ut illud iterum dimetirentur. Atque hic manifeste cœpit agnosci, quanto jure Rector assereret, Deum ab hominibus liberalitate se superari non sinere: quam etiam verum sit illud Christi Domini verbum: *Date, et dabitur vobis*. Etenim ille ipse Curator agrorum, qui primum metiendo tritico interfuit, et quidquid expendendum tradebatur Pistori, in rationum librum referebat exacte; cum eidem remetiendo adesset, tantam frumenti accretionem invenit, ut eam singulari Dei beneficentiæ crediderit attribuendam: tum quia consuetum excedebat naturæ modum, tum maxime quia in acervo illo tritici, qui pro eleemosynis assignatus erat, incrementum fuit duplo majus, quam in altero, qui pro domesticis fuerat reservatus. Ut primum hæc rescivit Eugenius, Procuratori domus, et agriculturæ Præfecto vehementer commendavit, ut eam rem altissimo silentio involverent. Sed postquam ille necessitati concessit, ab istorum altero nos ipsi accepimus, quæ dicta sunt, et quæ dicenda supersunt. Non enim unam, sed multiplicem etiam in præsentia a Deo habuit Eugenius egregiæ suæ caritatis retributionem.

Eodem anno fere omnes Villagarsiensium vineas acris

quædam pruina decoxit. Sed in Collegii vineis raræ admodum exaruerunt vites, et copiosa per autumnum vindemia provenit. Ovium insuper, et equarum fœtura triplo numerosior fuit eo anno, quam in superioribus fuisset. Nempe illud Eugenio Rectori concessit Deus, quod olim Magnus ille Basilius promiserat populo, si misericordiam adversus pauperes exhiberet: *Si duo tibi sint panes, inquit, ad fores autem rogator adsit, prome illi alterum. Dans vero, manus in cœlum tolle, dicque pia hæc, et benigna verba: Unum panem, quem vides, Domine, do meo periculo; sed ego tuo mandato meum commodum posthabeo... Novi tuam bonitatem, tua potentie confido, quod non diu tuam gratiam differes; sed brevi, cum tibi placuerit, affatim tue magnificentie dona patebunt. Quod si feceris, ac dixeris; non dubium, quin panis hic, quem ei hæc dabis angustia, agricultura semen, ac copiam suppeditabit, multumque tibi ex terra fœnoris reddet divina gratia conciliator.* Hæc Basilius docuit; hæc fecit Eugenus: eo fere tantum discrimine, quod non panem unum, sed unum tritici acervum cum periculo familiæ suæ, ut credebant aliqui, inter catervas pauperum liberalissime dispertivit. Et cum Dei bonitatem optime nosset, ejusdemque potentie fideret indubitanter; dum oculos in cœlum tollit, et manus protendit ad pauperem, meruit fiduciam, et largitatem suam a Deo mirabili augmento tritici, atque abundantioribus vini, ac pecorum proventibus compensari. Ipsi etiam homines ad rependam Eugenii caritatem præclaro grati animi exemplo properarunt. Albescebant maturæ jam ad falcem hordeaceæ segetes, quarum erat in Collegio Villagarsiensi copia non modica: sed messoribus, qui peregre expectabantur, tempori non advenientibus, gravis incesserat timor, ne tam læta spes frugum maxima deperiret ex parte. Id cum adverterent agricolæ Villagarsienses, in quibus aliqui erant honestissimæ conditionis, illius beneficentiæ memores, qua usus erga eos Eugenus fuerat per hiemem, ad metendum Collegii hordeum sponte sua per æstatem convolarunt. Atque hoc difficile opus tanta susceperunt contentione, ut ab incepto non destiterint, donec illud post dies amplius quindecim absolverunt. Frustra cum eis actum est sæpe, ut meritam mercedem acciperent: neque enim

enim aliud operæ pretium quærere profitebantur, nisi ut acceptis a Rectore beneficiis aliqua ex parte responderent. Ægre quoque ab eis obtineri potuit, ut terna per diem prandia, quæ illis jussu Rectoris apponebantur, admitterent; cum ea tantum esca cibari contenderent, quæ pauperibus ad januam quotidie ministrabatur. Sed in eo certamine vicit Eugenius, qui omnes eodem ciborum genere, quo vescebantur Socii, majore licet quantitate, dum tenuit messis, exceperit. Tantum illius ardens caritas novit efficere: tantasque habet illa vires ad Dei pariter, atque hominum gratiam demerendam.

Hæc autem, ut præclara sint valde, mea tamen sententia inferiora sunt aliis, quæ non semel tantum, sed frequenter fecit Eugenius. Et enim generosi animi virum, cui facultates non desint, erga miseros liberalem esse, non adeo insuetum, atque admirandum est, ut munificentia hujus exempla, si minus quotidiana, frequentia tamen non suppetant. Sed beneficium erga illos esse, qui tibi molesti fuerint, hoc enimvero rarum est, peneque divinum. Eum præterea, qui divinæ contemplationi multum sit deditus, et austerioris vitæ rationem inierit, illius otii jucunditatem abrumpere, et ab instituta severitate decedere, ut aliorum inserviat commodis, præcipuam habet in caritatis exercitio commendationem. In his ergo Eugenius præstantiam amoris sui quam maxime demonstravit. Quanquam erat ab studio partium abhorrens, et in conferendis honoribus non personam, sed virtutis et æquitatis jura respiceret; tamen magistratus sui tempore nonnullum, quantum potuit, ad altiora promovere curavit, quem sciebant aliqui, nihil tale ab Eugenio fuisse promeritum. Inter multa, quæ sæpe in alios contulit beneficia; dum Bononiæ degeret, quemdam, qui sibi olim abunde molestus fuerat, tanta est liberalitate prosecutus, ut is Eugenii benignitatem suspiceret, eamque apud amicos prædicaret. Ad hæc, quamvis in austeritate vitæ sectanda ita esset diligens, ut propterea sibi non pauca interdiceret, quæ virtuti minime repugnabant; ea tamen non recusabat efficere, ut aliorum cederet voluntati. Cum decrevisset scrupis non ludere, exceptionem illam adhibuit, quæ in ejus legitur commentario: *nisi*

rogatus ab aliquo fuerim. Malebat enim nonnihil de proposito rigore remittere, quam aliquid in rebus licitis aliorum precibus denegare. Si quando Sociis minuta aliquod recreationis tempore apponeretur, aderat ipse incunctanter, omnique severitate deposita, convivium illud, quod fovendæ caritati serviebat, placidissimo vultu, jueundisque sermonibus exhilarabat. Jam is, qui mutæ conciliandæ unioni adeo studebat, in præcavendis quæ possent eandem lædere, vel dissuere, multo erat studiosior. Plurima in adversariis reliquit, quæ sollicitam ejus curam ostendunt, ut ne quid diceret, vel efficeret, quod offensionem aliis, aut molestiam afferret: quorum hic ad aliorum exemplum pauca quædam exhibeo: *De rebus nostris quid novi afferatur, non quaram. Siquis ultro mihi aliquid enarraverit, de hoc ulterius, nisi forte rogatus, verba non faciam: idque simpliciter, ac sine additamentis exponam, præsertim cum aliquid intervenerit, quod possit aliorum famam deterere . . . Hoc erit peculiare præsentis anni examen, nullum ut verbum scienter proferam, quod aliquem possit præsentem, vel absentem offendere . . . Sermonem de aliorum mendis ipse non inferam: si fuerit ab alio illatus, vel silebo, vel potius ea, utcumque possim, excusabo.* Denique, ut præsentis argumento finem imponam, vir quidam integerrimus, magnæque fidei, qui supra decennii spatium cum Eugenio vixit, eique diligenter in extremis adfuit, hæc inter alia testificatur: *Innocentissimus erat Eugenijs, deque cæteris ne cogitare quidem sinistre noverat. Ab illius ore neminem improbum deprehendissas, cum nollet unquam aliquem verbo ledere.*

Immutabilem hanc tenens in decurrenda perfectionis via constantiam, quanto magis ad metam appropinquabat, eo illustriora dabat virtutum exempla. Gravioribus afflictus incommodis valetudinis, et annorum oppressus pondere, dies agere cogebatur vel affixus lectulo, vel intra cubiculi fines inclusus. Ad eas tamen redactus angustias, vitam illam vivebat, quæ abscondita est cum Christo in Deo, quæque tanto pretiosior in divino conspectu est, quanto minus humanis obtutibus splendere videtur. In diuturna illa commorans solitudine, placidissimos ducebat dies, ut ab humanarum rerum cupidine alienus, ita divinis contemplandis, ac deside-

randis intentus. Ecquis vero satis digne possit exequi verbis amabilem mansuetudinem, et animi tranquillitatem, quæ serena ex facie, dulcissimis verbis, et compositis ejus actionibus emicabat? Nullus moeror in vultu, nulla frontis contractio, nullum apparebat in eo supercilium. Inter illos enim, qui ad Eugenium per id tempus conveniebant, quis eum subtristem aliquando vidit, aut ab ejus ore lamentum aliquod, vel asperiozem aliquam vocem excepit? aut quis illa notavit morositatis indicia, quæ senioribus inculpatæ cæteroqui vitæ non raro adhærescunt? Profecto, si non alia virtutum ejus argumenta superessent; ad eminentem perfectionis gradum, quem attigit, agnoscendum, satis deberet esse imperturbata illa, sanctaque lætitia, et inconcussa pax animi, qua fruebatur, quæque sine assidua honesti ac decori contentione, sine diuturno repugandi sibi labore, denique sine cunctarum stipatione virtutum in hoc ærumnarum loco non obtinetur. Sed humanæ fragilitatem vitæ, quam sæpe recogitaverat, in pæcifico illo recessu attente meditabatur, diligentemque operam dabat, ut in transitu, quem proximum judicabat, bene instructus inveniretur. Sic patet ex iis literis, quas undecimo Kal. Octobris anni 1781 dedit ad nepotem suum Josephum Vincentium Lamadridium, in Abulensi Canonicorum cœtu Doctorali, quam vocant, dignitate fungentem: *Quamvis annos natus sim octoginta septem, quos proximo Novembri complebo, melius tamen quam pro atate mea valeo. Sano sum adhuc, satisque robusto capite, ut preces ad Deum pro me fundam, proque propinquis meis, quod efficere quotidie non desino, et ut me ipse comparem ad moriendum; cum procul jam abesse non possit magnus hic discessus a tempore ad aternitatem. Et quoniam ob altissima Dei judicia non aliud modo instat agendum, æquum est, ut huic negotio, quod tanti interest, curam meam omnem impendam.* Hoc erat Eugenii studium in ætate illa, in qua plerique hominum, qui ad eam venerint, de fovenda valetudine, deque protrahendis vitæ finibus, solícite, ut plurimum, agere consueverunt.

Placuit tandem vitæ, mortisque auctori Deo repetita servi sui vota exaudire, illumque ad promeritam laborum mercedem evocare. Paucis admodum diebus postquam nonage-



simum ætatis annum attingerat, quædam in eo apparuerunt vicinæ mortis prænuntia, quæ longa potius senectus, quam alterius vis morbi excitaverat. Demumque in postrema luce anni 1783, sub ipsum noctis crepusculum, perceptis rite Sacramentis, inter Sacerdotum, aliorumque adstantium preces, magna animi tranquillitate spiritum Creatori suo reddidit, cui tot annos tanta cum fidelitate servierat. Hic fuit pretiosus vitæ finis Eugenii Colmenaris, cujus in obitu ea nonnulli ediderunt venerationis signa, quæ solent viris sanctitate conspicuis exhiberi, retentis sibi religionis causa, quæ ipse, dum viveret, frequenti usu pertractaverat. Sepultus est in æde sacra S. Nicolai ad viam S. Felicis, intra arcam inclusus ligneam, quæ in eminenti loco, ut cupiebant multi, collocari non potuit. In eadem arca repositum est elogium, quod hic subjicio, triplici oclusum tubo, quorum intimus erat vitreus, medius ex ferri lamina, extimus autem plumbeus.

D. O. M.

EVGENIO . FRANCISCO . DE . COLMENARIBVS  
 ELAPSI . PROXIME . SECVLI  
 ANNO . NONAGESIMO . QVARTO  
 IN . HISPANIA  
 AD . BALMÆVM . OPPIDVM . VALLIS . LIEBANENSIS  
 IN . LEGIONENSI . DIÆCESI . NATO  
 LABENTIS . DECIMOQVARTO  
 CASTELLANÆ . PROVINCIE  
 IN . SOCIETATEM . ADSCRIPTO  
 TIRONIBVS . AD . EIVS . INSTITVTA . COMPONENTIS  
 COLLEGIIS . QVAMPLVRIMIS . GVBERNANDIS  
 IPSI . DENIQVE . PROVINCIE . NON . SEMEL . REGENDÆ  
 PRVDENTIA . EXEMPLIS . OPERA . ÆDIFICANDÆ  
 ANNOS . MVLTOS . ADSCITO  
 VIRO . DEI . ECCLESIE . RELIGIONIS  
 OBSERVANTISSIMO  
 JVGI . ORANDI . DEVM . STVDIO  
 CRVCIANDI . SVI . INEXPLEBILI . DESIDERIO  
 HVMLITATE . OBEDIENTIA . SINGVLARI  
 DE-

DEVOTIONE . AC . PIETATE . SEMPER . ALACRI .  
HVMANARVM . CONTEMPTIONE . RERVM  
MIRA . SVAVITATE . MORVM . AD . OMNES . PRÆDITO  
QVI . POST . INGENTES . TERRA . MARIQVE  
EXANTLATOS . LABORES  
AC . FIRMA . PACE  
NEDVM . CONSTANTIA . TOLERATOS  
PRIMUM . CORSICAM . HINC . BONONIAM . EXVL  
SECUNDIS . ÆQVE  
ET . ADVERSIS . REBVS . SIBI . CONSTANS  
VNAMQVE . DEI . VOLVNTATEM . INCLAMANS  
ANNO . AB . EMISSA . PROFESSIONE  
QVINQVAGESIMO . SECUNDO  
AB . ABOLITA . SOCIETATE . AMPLIVS . DECIMO  
VIRTVTIBVS . CLARVS . OPINIONE . SANCTVS  
IN . EADEM . VRBE . VITA CESSIT  
PRIDIE . KAL . JAN . ANNI . MDCCLXXXIV .  
PROVINCIAE . CASTELLANÆ . SACERDOTES  
MOERENTES  
P . P .

## GASPAR CASTILLUS.



**G**aspar, innocentis vitæ juvenis, ortum habuit Bernardis, Segoviensis diœcesis oppido, reparatæ humanæ salutis anno millesimo septingentesimo quadragesimo sexto, die vero decima quinta Februarii. Parentes ejus, quibus non deerant facultates, et pietas suppetebat, filium, ut divinis legibus, humanisque literis melius imbueretur, in Collegio quodam Segoviensi collocarunt, cujus alumni Societatis gymnasia frequentabant. Ibi educationis, quam domi habuerat optimam, promptum dedit specimen, et cum inter æquales affabilis, atque urbanus esset, morigerusque Magistris, brevi cunctorum sibi animos conciliavit. Sed illa erat laus pueri præcipua, quod in scholæ pariter, ac templi functionibus obeundis tantam, et tam constantem exhibebat diligentiam, ut cæteris condiscipulis, teste Magistro suo, magno esset exemplo. His autem literarum, et pietatis occupationibus sedulo intentus, divini vocem Spiritus, ad perfectiora illum invitantis, libenter auscultavit, et sine cunctatione sequi constituit. Religiosam in Societate Jesu vitam cum vehementer cuperet profiteri, multis apud Deum, et homines precibus institit, ut voti compos efficeretur. Quod cum obtinisset decimo quarto Kal. Aprilis, decurrentis seculi anno sexagesimo quarto, diem illum faustissimum semper habuit, et castissimum Deiparæ Sponsam præcipua religione perpetuo coluit, quod in ejus festa luce Sociis fuisset annumeratus.

Magnam tirocinii partem adversa usus est valetudine. Initio tertianis febribus laboravit, quæ longo eum tempore afflixerunt: deinde molesto ægrotavit pustularum morbo, qui gravioris in adolescentia solet esse periculi. Sed his diu conflictatus incommodis, non propterea in percipienda religiosæ vitæ disciplina fuit tardior, neque inde commune illud multorum detrimentum contraxit, ut ex languore corporis langu-

guidior etiam evadat animus ad pietatem. Quod minus poterat in aliis tirocinii laboribus exercendis, dum jacebat in lecto, id patientia, et mansuetudine, promptaque in exequendis mandatis obedientia compensabat. Cum deinde pristinae redditus est valetudini, nihil efficere prætermisit, ut ad instituta vitæ leges se totum accommodaret. Quamvis esset ingenio acer, et vehemens, idem tamen dulcis erat, ac lenis: cohibito namque naturæ impetu, ne quemquam læderet, eodem, ad impigre aggrediendum quæ agenda occurrerent, utebatur. Et in explendis quidem majorum jussis non modo erat promptus, et constans; sed et simplici mentis assensu, et sincera vultus hilaritate multam obsequiis addebat commendationem. In familiari vero cum æqualibus consuetudine facile sibi benevolentiam aliorum adjungebat propter morum ingenuitatem, et sermonis gratiam, qua sæpe de rebus sanctis jucundissime loquebatur. Quoties autem cum Deo colloqueretur, apparebat ex ejus vultu, et externa supplicis reverentia, quanta cum animi contentione, ac fervore spiritus divina pervolveret. Ab eoque attentæ meditationis studio, cui valde addictus erat, vires desumebat ampliores ad comprimendos animi motus, et conterendam contumaciam corporis, quod frequenti asperitatum usu excruciebat. His, aliisque tirocinii exercitationibus edolatus, ad offerenda Deo vota processit, quæ sicut exuberanti gaudio concepit, diligenti quoque fide servavit: eademque usus est diligentia in præceptis, et consiliis illius primæ institutionis per omne vitæ spatium retinendis.

Sub ætatem anni 1766 missus est Compostellam, ut operam Philosophiæ daret. Sed vix studia illa inchoaverat, cum longè peregrinandum illi fuit, antequam eadem posset absolvere. Captus III Non. Apriles insequentis anni, ut in exilium cum cæteris amandaretur, majorem habuit exercendæ patientiæ, constantiæque perhibendæ opportunitatem, quam arcana philosophica speculandi. Pridie ejus diei multus tota urbe rumor increbuerat, ex insperato adventu militum exortus, quorum profectionem alii alio pro sua quisque opinione referebant. Plerique tamen expeditionem illam adversus Collegium Societatis susceptam fuisse suspicabantur, id-

que non pauci amicorum Sociis eodem die persuadere conati sunt. Sed quem securum innocentia reddit, neque ulla delicti conscientia premit, imminentium comminatione malorum non facile perterrefeceris. Nemo unus fuit, quem iterata certi periculi denuntiatio commoveret, omnesque diem illum suis intenti officiis, ut consueverant, exegerunt. Nullus occultandis libris, aut comburendis scriptis impensus labor: nulla condendis aliis quibusque rebus adhibita diligentia, ut impense suadebat externorum aliquis, nequid forte inter scrutandam domum inveniretur, quod justam habere posset criminationem. Verum, cum nihil ejusmodi lateret domi, neque aliud quidquam Socii, attente omnia circumspicientes, animadverterent, quare militares illæ copiæ in ipsos directæ fuissent; nullis trepidantium amicorum obstestationibus adduci poterant, ut timerent, ne illa cuderetur in se faba; nisi si cuiquam per summam injuriam insontes calumniari libuisset. Illo igitur die sine perturbatione transacto, cum tempus nocturnæ quietis advenit, in sua cubicula tranquille singuli discesserunt. Sed milites eadem nocte Collegium ante diluculum obsident, et appetente jam hora, qua surrecturi erant Socii, januæ tintinabulum crebris pulsationibus quatiunt. Janitor, antequam aperiret, de militari strepitu, quem observaverat, Rectorem monuit. Is cum Ministro domus ad januam venit, eamque pandi jubet. Sublatis repagulis, subito irrumpunt armati milites, cum eisque primarius urbis Magistratus, quem ibi Assistentem vocant, et Scribæ aliquot, forensesque ministri. Rector, dum Assistentem deducit in cubiculum, paucis ab eodem didicit, quo tandem respiceret adventus ejus, et inusitatus ille militum apparatus. Interea excitantur Socii, et, in Rectoris cubiculum quamprimum veniant, admonentur. Dum eo properant, per medios incedunt milites, qui ballistas suas cuspidibus præfixas habentes, omnes Collegii aditus, omniaque occupaverant ambulacra. Numerabat eo tempore Collegium Compostellanum Socios quadraginta tres: sexdecim Sacerdotes erant, quorum duo tunc aberant, Scholastici quindecim, ac duodecim Adjutores. Omnes e cubiculo Rectoris in Sacellum domesticum processerunt: quo cum ingressi essent Præfecti militum, et Notarii; Assis-

tens,

tens, qui medius sedebat omnium, propterea venisse se dixit, ut Patribus decretum regium indiceret, quod, in reverentiæ signum, æquum erat, ut stantes cuncti auscultarent. Surgit ipse: consurgunt omnes: recitatur decretum, cujus hæc erat summa: Decrevisse Regem ab omnibus suæ ditionis finibus Societatis homines amandare, ut populorum tranquillitati prospiceret, aliisque de causis, quas in regio suo pectore reservabat.

Ad terribilem, nec opinatam hujus fulminis explosionem, nullus fuit inter Socios, qui plene sui potens non fuerit: nullum cuiquam excidit verbum, quod debitam Regi observantiam, et promptam mandatis ejus obedientiam non indicaret. Videbant illi quidem inflictæ pœnæ durissimam conditionem, et annexam eidem gravissimam ignominiam. Sed exilii acerbitatem ea maxime cogitatio deliniebat, quod hominum Societatis ( ut vel in ipso suarum institutionum limine habebant ) proprium esset, diversa loca peragrarè, et vitam agere in quavis mundi plaga, ubi majus Dei obsequium, et animarum auxilium speraretur. Quod si modo divinam gloriam, et animarum salutem agendo, et operando promoverè non æque possent, patiendo certe, ac sustinendo, non nihil effecturos esse sperabant. Ut vero infamiæ notam æquiore animo ferrent, ex intimo conscientiæ testimonio non parum erigebantur, cum nihil sibi essent conscii, quod tantam in se potuisset arcessere calamitatem. Gaudere quinimo poterant de præclara, quam præ manibus habebant, opportunitate summum illum christianæ perfectionis apicem attingendi, ad quem eniti S. Ignatius cunctos disciplinæ suæ alumnos his gravissimis verbis adhortabatur: *Diligenter animadvertant oportet ( magni faciendo, summi que momenti id esse ducendo in conspectu Creatoris ac Domini nostri ) quantopere juret ac conferat ad vitæ spiritualis profectum; omnino, et non ex parte abhorre ab omnibus, quæ mundus amat et amplectitur; et admittere et concupiscere totis viribus quidquid Christus Dominus noster amavit, et amplexus est. Quemadmodum enim mundani homines, qui ea, quæ mundi sunt, sequuntur; diligunt et querunt magna cum diligentia honores, famam, magni nominis existimationem in terra, sicut mundus eos edo-*  
ret;



cet; sic qui procedunt in spiritu, et serio Christum Dominum nostrum sequuntur, amant, et ardentem exoptant, quæ iis omnino contraria sunt; indui nimirum eadem veste, ac insignibus Domini sui, pro ipsius amore, ac reverentia: adeo ut, si sine offensione ulla divinæ Majestatis, et absque proximi peccato foret, vellent contumelias, falsa testimonia, et injurias pati, ac stulti haberi et existimari (nulla tamen ad id per eos data occasione) eo quod exoptant assimilari, ac imitari aliquo modo Creatorem, ac Dominum nostrum Jesum Christum, ejusque vestibus et insignibus indui: quandoquidem illa ipse propter majorem profectum nostrum spiritualem induit, nobisque exemplum dedit, ut in omnibus, quoad ejus fieri poterit, divina gratia aspirante, eum imitari et sequi, cum vera sit via, quæ ducit homines ad vitam, velimus. His eruditi sublimis sapientiæ documentis, quæ sæpissime legerant in earum summario Constitutionum, quæ ab omnibus erant observandæ, facilius potuerunt Socii Compostellani constantiam, et mansuetudinem in durissimo illo conflictu retinere.

Quo firmiores autem in eodem animi sensu perseverarent, et ampliores a Deo vires obtinerent ad insurgentium laborum pondus æquabiliter sustinendum, statim post denuntiatum exilium de altaris Sacrificio cogitarunt. Sed Assistens, qui multam cæteroquin humanitatem, et clementiam erga Socios exhibuit, iisdem ut Sacrum eo die facerent, permittere non posse, respondit. Longam deinde ab Aula missam protulit instructionem, in qua Sacrarium occupare jubebatur, et Bibliothecam, et Tabularium, et alias officinas, quarum proinde claves postulavit, et Excubitores apposuit. Interea quamdam Scribæ formulam confecerunt, ex qua legem exilii Sociis indictam, ab eisque acceptatam fuisse constaret, illamque omnes ad unum Socii suo quisque nomine subscripserunt. Nemo erat in tot adversis, qui animum ærumnis immersabilem non exhiberet, aut divinæ voluntati non sese submitteret. Gaspar Castellus, cæterique adolescentes, qui philosophica studia paulo ante inchoaverant; de relinquenda patria, de amittendis parentibus et cognatis nihil solliciti, ea tantum de causa commovebantur, quod suis spoliati libris, inceptum studiorum cursum non possent persequi. Edixerat enim Judex, ne quis

librum ullum extraheret præter codices precum Sacerdotalium, et libellum aliquem, qui de rebus ageret spiritualibus. Quod si eis philosophicum Ludovici Losadæ Cursum, quo utebantur in scholis, secum asportare licuisset, maximi beneficii loco habituros esse confirmabant. Hæc ipsorum vota cum Emmanueli Luengo Magistro suo significassent, non dubitavit is de ardenti desiderio discipulorum ad Assistentem referre. Hic autem, audita juvenum laudabili petitione, lacrymas continere vix potuit: et cum cognovisset, eorum neminem ad solvendas divinas preces teneri, æquum esse duxit, innocuis annuere optatis, et, quos ferre auebant, libros benigne concessit: *Hi enim*, dixit, *Breviaria sunt juvenum studiosorum*. Hac accepta gratia, incredibiliter lætati sunt omnes, et ad reliquos exilii sui labores ita erant animis comparati, ut incommoda omnia susque deque habituros esse sperarent. Tam paucis contenti erant, ut læti viverent inter multarum rerum inopiam.

Dum hæc domi fierent, magna erat tota urbe animorum commotio. Archiepiscopus Bartholomæus Rajoius, quem vir quidam de Sociorum expulsionem certiore reddidit, hoc accepto nuntio, semianimis corruit. Et quanquam linquentem animum paulo post revocavit, mœrore tamen ita confectus erat, ac perturbatus, ut quos eo die decreverat initiare, in diem alium rejecerit. Deinde duos e cœtu Canonicorum allegavit ad Patres, qui verbis suis dolorem, quem ex eorum infortunio ceperat, testarentur: simulque per eosdem centum aureos duplos illis dono misit. Innocentes pueri, qui literarium ludum frequentabant, inter primos fuerunt, qui Sociorum exilium suis lacrymis prodiderunt. Cum enim multo mane ad Scholam de more convenirent, illamque oclusam, ac pro foribus excubantes milites offendissent, inde in domos suas conterriti, plorantesque remearunt. Subito innumera Civium, ac populi multitudo Collegii viciniae affusa est circumundique, quorum alii rei novitate obstupentes, alii valde solliciti, ac pene furore conciti videbantur. Ne quid gravius accideret, quod in tanta multorum agitatione timendum erat vehementer, inductus videtur Judex ad concedendam civibus facultatem, ut Socios alloquerentur, iisdemque valedicerent.

At-

Atque initio quidem non sine delectu aliquo primores admittebantur; procedente vero die, omnes fere Compostellanæ nobilitatis familiæ ad salutandos Socios vel per se ipsæ, vel per amicos, aut familiares suos accesserunt. Nec postremi fuerunt in hoc humanitatis officio adimplendo, qui Collegii terere limina non erant soliti, neque Sociorum amicissimi putabantur. Quam vero profusis lacrymis, et quanta cum Societatis commendatione vim doloris sui, ac desiderii acerbitatem expresserint universi, non facile illud exequi verbis possim, neque id enarrare modestiæ patiuntur leges. Sed ab illorum certe animis, qui tum præsentis fuerunt, gratam prolixæ adeo benevolentis recordationem nulla unquam delebit oblivio.

Pridie Non. Aprilis cum albescebat jam dies, parati omnes erant ad profectionem. Antequam domo discederent, quoniam templi aditu prohibebantur, ad cancellos, unde prospectus erat in templum, acciderunt cuncti, Deumque suppliciter adorantes, largiorem ab ipso rogarunt benedictionem, ut calamitates, quas animo præcipiebant, constanti virtute sustinerent. Hinc egredientibus obviam occurrit Philippus Diezius, Collegii Janitor, qui baculo innixus ægre senile trahebat corpus, ideoque ab exilii lege fuerat absolutus; quanquam postmodum magno cum ipsius gaudio cæteris obtinuit aggregari. Nunc abeuntes Socios tenerrime complexatus, tanto mædebat fletu, suamque ita dolebat vicem, ut planctum omnibus excitaverit: et qui pridie multorum lacrymas civium sicis oculis spectaverant, ad illius modo senis lamentationes, quod in exilium ire prohiberetur, a ploratu abstinere non valuerunt. Adeo est ad ciendos animos opportunum in pulchriora generoso studio contendere! Cum paratæ jam essent mulæ in cavædio Collegii, sine mora in eas ascendunt: et præcedente militum manu, a tergo sequente alia, et ad latera duobus etiam ordinibus militum collocatis, ac perstreptibus tympanis, iter in Corunniensem urbem instituunt. Sed quas præterituri erant vias confertissimus populus ita occupaverat, ut milites æque, ac Socii lento gradu procederent, atque ab ingruente undique multitudine premerentur. Pridianæ illæ doloris intimi significationes passim exaudiebantur, multique non solum lacrymis, sed clamoribus etiam incondi-

tis

tis tristissimam suam sortem, Sociis abeuntibus, deplorabant. Non pauci per medios militum ordines irrumpentes, neque illorum mucronibus perterrefacti, ad Socios usque penetraverunt, ut eis ultimum vale dicerent, et manus suffusi lacrymis oscularentur. Ipsi adeo milites in illa tam frequentis populi commotione vehementi nihil severius agendum sibi esse duxerunt, ne acrius fortasse concitatam plebem exagitarent. Fortunatæque Deo placuit, ut ne quid luctuosius fieret, quod et Sociis ingraticissimum fuisset, et ipsi populo perniciosum. Nec modicum ad continendos animos juvat tranquillus, et hilaris Sociorum vultus, quem patriis expulsi finibus præ se ferebant, quique ad imminuendum mœrorem intuentium faciebat plurimum: circumspectus item loquendi modus, quo suam ipsi calamitatem omnibus, qui ad se accederent, patienter ferre significabant: denique indignationis plena objurgatio, qua unum, et alterum represserunt, qui, velut ebrii doloris impetu, seditiosa quædam verba coram ipsis proferre ausi fuerant. Hoc modo Sociorum ab urbe discessus sine tumultuatione peragi potuit, et inter publicam ignominiam notam multam etiam habuit honoris, et amoris publici testificationem.

Postquam mille amplius extra urbem passus processerant, et plerique de populo, aut plorando et incedendo defessi, aut Sociorum adhortationibus inducti, regressi fuerant; milites, qui haud parum erant solliciti, respirare cœperunt. Tunc Centurio, cæterique Prefecti militares, cessante jam tympano, comiter accesserunt ad Patres, quibus non aliam habuisse causam illius bellici apparatus ostentandi confirmarunt, nisi ut populo terrorem incuterent, quem sciebant ita fuisse proclivem ad insurgendum, ut proxima nocte nonnihil turbarum excitaverit, sed feliciter esse cohibitum. Post hæc Præfecti militum perhumaniter habuerunt Socios, quod et alibi, pro generosa ipsorum indole, alios etiam novimus effecisse. Cum venissent ante meridiem in vicum Poulum, ibidem eo die constiterunt. Postridie, antequam viæ se darent, Sacro interfuerunt, faciente Rectore Laurentio Uriarte, qui omnes Christi Corpore communicavit. Inde processerunt in vicum alium (Corralem vocant incolæ) ubi eis ad-

juncti sunt duo illi Sacerdotes, quos abesse Compostella diximus. Hi erant Theodorus Cascagedus, et Franciscus Saleisius Morchonus, qui diocesim illam ad Archiepiscopi nutum, cujus alebantur expensis, sacris Missionibus excolebant. Quo die capti erant Socii, miserat ad eos Rector certum hominem cum literis, ut in Collegium e vestigio reverterentur. Has illi literas, cum de loco, in quem missæ fuerant, discessissent, nusquam acceperunt. De iis tamen, quæ Compostellæ, atque alibi fierent, certiores aliunde redditi, abruptis ministerii sui functionibus, in eam urbem subito convolarunt. Cum abiissent jam inde Socii, recta illi ad Assistentem accedunt, ab eoque petunt, ut de se libere pro arbitrio suo decernat. Noctem ibi commorati, sub novæ lucis ortum Corunniensem viam arripiunt, cupidique suorum subeundi sortem Sodalium, ad eos Corrali læti perveniunt, et cum iisdem Corunniam illa nocte ingrediuntur. Multi alii per Hispaniam, qui forte domo aberant, cum Societas proscriberetur, parem animi constantiam exhibuerunt: mirabanturque ubique populi novum illud reorum genus, qui, cognita suorum clade, non fugam arripere, non latebras quærere, sed Judicibus seipsos sistere, atque in exilium abire festinabant. Ex iis ego, ut alios prætermittam, Sacerdotem commemorare non desinam, cujus fuit in adoriendis periculis, licet ea majora essent veris, fortitudo animi valde singularis. Vallisoleti, dum in Collegio S. Ignatii exilium Sociis indicebatur, deerat inter alios Hieronymus Obesus, qui Collegii ejus negotia procurabat, quorum causa paulo ante extra urbem profectus fuerat. Sed eo die revertentem, et quæ dómi suæ acciderant ignorantem, amici a suscepto itinere retrahere conabantur, exposita lamentabili suorum calamitate, oblataque ope, ut eam tutissime declinaret. Id ille indignum reputans, ad omnem potius subeundam aleam paratum esse, respondit. Tum quidam de intimis, cui aut vulgi error, aut imaginandi vis propria imposuerat, ad S. Ignatii omnes ad unum Socios capite plecti, indubitanter asseruit. Cui Hieronymus: *Ego etiam, inquit, cum fratribus meis desidero jugulari*: subditisque calcaribus mulæ, gressum accelerat in Collegium, ut servicem offerat cultro, quem amicus imminere sibi, falso qui-

quidem, sed omnino asseveranter affirmaverat. Hujus tam intrepidi animi exemplum apud illos non facile inveneris, qui testimonio conscientiae suae, atque honestati causae diffidunt.

Compostellani, caeterique per Gallæciam Socii detenti sunt in Collegio Corunniensi, dum reliqui ex aliis provinciae Castellanae domiciliis in proximum Ferrolii portum convenirent. Sesquimensis intra custodiam illam inclusi, eam tenuerunt rationem vitae, quae religiosos decebat viros, ne inter tot adversa deficerent. Primo mane surgentibus prima erat cura divinam implorare opem, et animos ad viriliter sustinendum unius horae meditatione firmare. Deinde incruento aderant Sacrificio, quod initio paucioribus, postea vero ad iteratas ipsorum preces pluribus conficere permittebatur. Sed in tanto Sacerdotum numero cum sacrificare omnes quotidie non possent, horum non pauci salutarem Hostiam de celebrantis manu accipiebant: quod Scholastici etiam, et laici frequentius solito factitabant. His omnia illa accedebant pietatis exercitamenta, quae in Collegiis de more peragebantur: et cum graviores modo essent, quae urgebant undique difficultates, majora quoque, ad eas superandas, quaerebantur ab omnibus adjumenta. Vix unquam deerant in superioribus templi choris, qui mane, ac vesperi Christum Dominum adorarent, ab eoque profusis lacrymis, ardentibusque suspiriis auxilium peterent praesentibus necessitatibus opportunum. Frequentes erant novem dierum deprecationes ad Coelites, ut cunctis potenti ope succurrerent, et ea cuique dona impetrarent, quibus maxime noverant indigere. Illa enim tam saeva, quam improvisa tempestas id universim inter Socios visa est effecisse, ut in se ipsi descenderent, et ferventiori studio ad asylum confugerent orationis. Gaspari Castillo, dum ibi mansit, consuetum et jucundum erat saepe ad templi foros accedere, ubi mente, et corpore supplici suam in conspectu Dei animam effundebat: indeque redibat alacer ad literarias occupationes, vel quascunque alias fideliter obeundas. In ea quippe tot hospitum, et militum multitudine, quamvis perexigua esset colendis literis opportunitas, tamen adolescentes illi, qui Philosophiae initium dederant Compostellae, intra conclave quoddam remotum, quod eis ad dormiendum obtigerat, cer-



tas dabant horas studiis, et ibidem Magistri sui prælectiones audiebant. Ab eodem etiam in sermonis Italici rudimentis erudiebantur, ut, juxta regulas S. Ignatii, regionis ejus linguam addicerent, ad quam erant propediem, ut vitam in ea degerent, deportandi. His dediti occupationibus, inter illius custodiæ angustias lætos ducebant dies, et quam ostenderant in aggrediendo exilii itinere alacritatem, in eadem ad prosequendum illud perseverabant.

Undevigesima die Maii, cum cæteri provinciæ Socii ex variis Cantabrici maris portibus Ferrolium appulissent, illi etiam qui Corunnæ manserant, ad eundem portum adnavigarunt. Congregatis ibi omnibus, de his inter se quærebant a vide, quæ in Collegiis, et in itinere contigissent. Et quamquam multa narrabant multi de Ministrorum diversa ratione operandi, quorum alii mitius, alii severius rem gesserant; de præclara militum, qui eos deduxerant, humanitate; de populorum lacrymis, et insigni benevolentia; illud tamen jucundissimum fuit agnovisse, omnes ubique Socios submisso, promptoque ad obsequendum animo regium exilii decretum auscultasse, ac neminem eorum ob alicujus imputationem criminis uspiam fuisse retentum. Paratis igitur animis ad sequendum Dei nutum per infamiam, et bonam famam, nono Kal. Junias Hispaniæ relinquunt oras, provectique secundis ventis, litora Tyrrheni maris post dies viginti duos attingunt. Sed Præfecti navium, acceptis Roma novis mandatis ab Hispano Ministro, in Corsicam obvertunt proras, Sociosque in ea insula, ut alibi demonstratum est, ad Calvii litus exponunt.

Castillus noster, qui per instabiles maris undas constantem, et pacificum retinuit animum, cum ad eam venisset urbem, inter belli tumultus philosophica instauravit studia: quæ tamen, nova deinde peregrinatione suscepta, nec in eodem loco confecit. Sequenti anno a Gallis, qui Corsicam occupaverant, in Liguriam devectus, inde in Pontificiam ditionem transit, ubi Philosophiam absolvit, et Theologiam Bononiæ didicit. Per id tempus Sacerdos consecratus est ab Episcopo Britonoriensi: deincepsque per annos circiter quindecim, quos Bononiæ degit, ab exactæ vitæ normæ, quam hactenus

tenus secutus fuerat , nulla vel temporum , vel eventorum varietate discessit . In perficiendi spiritus curam intentus , consuetas meditationes , binamque conscientię discussionem attente per dies singulos exequabatur : quorum illud ad inserendas virtutes animo , alterum ei proderat ad vitiosa , quę in se deprehenderet , resecanda . Inter libros , quibus ad perfectionis incitamentum utebatur , nullum fere terebat frequentius , quam Ven. Berchmansii Vitam , Hispano sermone compositam a P. Joanne Lojola , qui eidem appendicem adjunxit , in qua Bernardum Hoyos , insignis innocentię juvenem , tamquam geminum Berchmansii exemplar depingit . Castillus utriusque gesta legebat assidue , atque ut eorum mores exprimeret tam in externa corporis , quam interna mentis compositione , magno connitebatur studio . Hinc elucebat in eo ad res divinas propensio singularis , quas , cum frequenter exerceret , reverenti semper animo pertractabat . Latentem in Eucharistia Deum , et intemeratam Virginem ejus Matrem multis quotidie salutationibus , ac devotę servitutis officiis reverebatur . Sancto Aloysio Patrono suo , aliisque cęlestis Curię civibus multa quoque cum multo pietatis sensu deferebat obsequia . Quotannis , etiam post abolitam Societatem , commentationibus S. Ignatii pręcipuo quodam fervore per octonos vacabat dies , in quibus animum generali confessione repurgabat : parique diligentia easdem per triduum iterabat meditationes in mensibus Januario , et Junio . Singulis pręterea mensibus , omnia alia cura seposita , diem unum spiritualibus destinabat exercitiis , ut se ad bene moriendum prępararet : quem diem culparum exactissima confessione claudebat . In his pręsertim diebus pręclaras concipiebat deliberationes , quas consignatas literis , et a ductore suo probatas , vel interdum etiam correctas , deinde diligenter exequabatur cum notabili progressionem in exercitatione virtutum .

Dum Societatis suberat disciplinę , quęcunque ageret , quęcunque item cuperet , aut cogitaret , ad Superiorum placitum , atque ad instituti regulas omnia exigere conabatur : eximiamque reputabat religiosi hominis felicitatem , cui Deus certissimam agnoscendę voluntatis suę viam per imperantium vocem ostendit . Propterea cum , deficiente deinde Societate ,

suavissimum obedientiæ jugum deponere coactus est, non modicum inde mœrorem contraxit, quod jam sibi relictus, tutissimam illam ad perfectionem semitam premere ultra non posset. Neque ante ægritudinem illam abstersit, quam ex amici consilio statuisset moderatorem animi eligere, cui sponte sua in omnibus, quæ ad progressum in virtute pertinent, obediret. Hoc accepto consilio, studia sua omnia ex illius sententia moderabatur, quem consiliarium sibi delegerat, nequid in re aliqua nimis, vel nequid etiam minus efficeret, quam rationis, et prudentiæ leges exigerent: eademque via ex animi evadere angustiis, ad quas præ desiderio emendatissimæ vitæ nonnunquam adigebatur. In cultu corporis, et habitaculi ornatu munditiem, ac decentiam sic adamabat, ut simul paupertatis amorem ostenderet, pretiosa quæque, ac minus necessaria rejiciens. Sed quamvis ab omni superfluo sumptu abhorreret, erat tamen in his, quæ conditionem decerent suam, minime sordidus: ac mendicis etiam, pro facultatum tenuitate, liberaliter subveniebat. Cætera austerus erat, atque ab obsequio corporis, indulgentiaque remotus. Eam tenuit in cibo, et potu moderationem, ut vinum gustaret nunquam, cibum autem ita desumeret, ut quamvis mensæ accumberet largioribus instructæ dapibus, suum ille servaret modum, lautioribusque relictis, vulgaria tantum, et quæ palato minus ariderent, attingeret. Jejunus veniebat ad prandium, et pro cœna solum intybum, aut simile aliud olusculum assumebat. Chocolato, tabacoque abstinuit: et ultra præcepta jejunia, alia etiam ex devotione observabat. Addebat his omnibus graviores corporis macerationes ex Confessarii permissu, qui nimium ejus fervorem continebat, ne id genus asperitatibus pro eo, quantum ipse cuperet, uteretur. Sed quod ab illo impetrare non poterat, majore utique fœnore redimebat, superandis voluptatibus, atque etiam voluntate frangenda. Inexpiable suscepto bello contra inordinatas animi appetitiones, multam ad eas debellandas diligentiam adhibuit. Præter occasiones, quæ ultro sibi occurrerent, alias de industria quærebat ipse, in quibus sibi vim inferret, devictis adversitatibus, atque omni proclivitate naturæ superata. Ad hanc vincendi sui curam particulare dirigebat examen, ex quo præclaros capie-

piebat fructus aliarum etiam virtutum, quæ ab illa propriæ voluntatis, ac iudicii expugnatione nascuntur. Quapropter eminebat in eo animi modestia non affectata, promptum ad aliorum commoda obsequium, aperta quædam simplicitas, et mira in familiari consuetudine affabilitas, qua unus deliciæ omnium et amor erat.

Singulari dignum est nota laudabile illud studium, quod in referenda beneficiis gratia collocabat. Multorum longo ordine habebat descripta nomina, qui de se aliquando bene essent meriti. Pro his multa ipse offerebat Sacra, multaque ab aliis, persoluto stipendio, curabat offerri; ut eorum singulis, si vitalibus adhuc fungerentur auris, perseverantiam in justitia precaretur; si vero defuncti jam essent, perpetuam pacem. Miserat in album illum avos, et genitores suos, aliosque consanguineos, et affines: multos item, qui sibi peculiare aliquod contulerant beneficium, in quibus censebat eos, quorum opera Societatem adire obtinuerat: nec omittebat illos, qui erga se male erant animati, quorum proinde offensiones videtur inter beneficia computasse. Alium etiam confecerat catalogum personarum, quas Deo speciali cura decreverat commendare. Tales erant Superiores ejus, et Confessarius, Magistri omnes, quos aliquo habuisset tempore, Condiscipuli etiam, et quotquot contubernales sui fuerant intra Societatem, et extra illam. Horum omnium cum ingenti amoris, et grati animi affectu meminerat tum aliis in precibus, tum in Missæ sacrificio, quod plerumque ad meridiem peragebat. Ad offerendum illud accuratissime parabatur, deindeque in gratiarum actione, cohibitis sensuum evagationibus, diu perstabat. Etenim cum mundo corde, ac decenti virtutum ornatu ad convivium sacrum accederet, suavioribus utique pascebatur deliciis, et fructum inde trahebat uberiores. Quotidie ad pœnitentiæ Sacramentum accedens, tantam adhibebat inquirendis, aperiendisque defectibus diligentiam, quanta posset in exactissimo tirone desiderari. Talis denique illius erat vitæ innocentia, ut qui annos sexdecim familiarissime cum eo egit, atque omnia ejus arcana cognoverat, certum sibi esse affirmaverit, Gasparem nunquam eo processurum, ut peccatum non modo leve, sed ne ullum quidem ex levioribus sci-

enter, ac plena cum deliberatione committeret.

Eam porro instituerat rationem vitæ, quæ illum a multis impingendi periculis liberaret. Postquam longum, et laboriosum studiorum cursum absolverat; cum eodem fere tempore Societas desiisset, neque prioris disciplinæ legibus teneretur; non eam occasionem arripuit, ut indulgentius secum ageret, atque aliquid de veteri studendi contentione detraheret. Quæ in Scholis per superiores novem annos audierat, ita modo retractanda suscepit, ut, facta distributione temporis, partem humanioribus literis, partem philosophicis, ac theologicis quotidie daret. Sed in ea Theologiæ parte, quæ ad mores attinet, diligentius immorabatur: et quæ privato studio didicerat, coram aliis deinde proponere, agitareque consueverat, ut penitius eadem caperet, ac firmitus retineret. Hæc omnia studia in eum referebat scopum, ut instruendæ juventutis, et animarum salutis procurandæ, si quando ferret occasio, habilem se redderet administrum. Et quanquam ea ministeria propter adversam temporum conditionem exercere non potuit, ipse tamen copioso assiduitatis suæ fructu non caruit. Nam et otium, vitiorum fomitem, constantissime declinabat, et, cum studii laborem ad honestissimum placendi Deo, juvandique homines finem erigeret, quotidianis virtutum accessionibus ornabatur. His itaque literarum deditus occupationibus, et ad perficiendi spiritus curam semper intentus, vitam in exilio agebat non modo innoxiam, sed aliis etiam amabilem, et jucundam; cum vitæ mortisque arbiter Deus in ipso ætatis robore ad se illum evocavit. Annos quadraginta natus, et quinque menses, diem supremum obiit Bononiæ, magno sui desiderio, nec minori virtutum exemplo relicto.

Dum in lecto jacuit, solitæ pietatis, aliarumque virtutum actus, quibus per vitæ cursum assueverat, ferventius exercuit. Quotidie labes animi confessione sacra expiabat, magnunquæ inde solatium, ed ad dolores tolerandos vigorem eruebat. Contubernalium officia, qui ei diligenter aderant, multis rependebat grati animi significationibus; cum se indignum duceret, cui vellent tam exquisita caritate inservire. Et quamvis omnes, qui ad se accederent, comiter, grateque acciperet; gaudebat tamen vel solus, vel cum solo Confessario  
relin-

relinqui, ut diutius cum Deo ageret, et in his, quæ ad bene moriendum juvant, intentius exerceretur. In medicamentis, ac potionibus recipiendis, cæterisque morbi molestiis nec levissimum edidit perturbationis indicium: nam qui afflictiones per anteriorem vitæ decursum patienter ferre didicerat, postrema suæ virtutis tentamenta constanti sustinuit animo, atque omnibus patientiæ singularis exempla reliquit. Cum invalisset vis morbi, facillimum fuit eum de imminente periculo commovere: ipseque admonitionem illam pacifice, ac lætanter excepit, quippe qui vitam ad felicem obtinendam mortem ordinaverat. Communitus igitur ultimis Sacramentorum auxiliis, seque integre, ac plena cum fiducia in Dei manus conjiciens, cogitationes suas, studiaque omnia in cælo defixit. Ferventes iterabat virtutum actus, et suavissima Jesu, ac Mariæ nomina sæpius cum tenerrimo affectu repetebat. Crucifixi tenens imaginem, in illius aspectu, quem vivens sequi studuerat, jam moriturus dulcissime recreabatur. Dominum adorabat, amplectebatur, osculabatur: et in sanctissimis ejus plagis delicias suas, et spes omnes repositas habere protestabatur. His diu inhxrens affectibus, et ardenti videndi Deum inflammatus desiderio, tandem deliquium mentis incurrit; donec viribus, ac sensibus destitutus, dum ejus anima solemni prece commendabatur, illam auctori suo placide tradidit VI Kalend. August. MDCCCLXXXVI. Gasparis exuvix terræ mandatæ sunt in Bononiensi templo SS. Gervasii et Protasii: sed memoriam virtutum ejus nulla unquam apud eos obruet oblivio, qui jucundissima illius usi sunt consuetudine.



## JOSEPHUS TURRIANUS.



**J**osephus a Turre, sive Turrianus, natus est in Navarræ Urbe Cascante VIII Idus Majas, anno millesimo septingentesimo. Cum adhuc materno gestaretur in utero, Patrem amisit: et Mater cum prole ipsa in ejusdem partu grave vitæ periculum subiit: unde filio deproperanda fuit gratia Baptismi, quam ipse mature acceptam magnis deinde accessionibus cumulavit. Accessit huic alterum divinæ providentiæ beneficium. Postquam puero rationis lumen affulserat, conscientiæ labeculas prima vice confessus est P. Hieronymo Dutario, qui solitus erat in Turrianorum domum divertere, dum iter ad expeditiones sacras per illam urbem haberet. Præstantis hujus viri consiliis in timore Dei, et amore pietatis instructus, cœpit a tenera ætate præbere religionis, et aliarum virtutum exempla: et quo imbutus initio fuerat sapore virtutis, eundem in longos vitæ annos servavit semper. Eodem tempore ad studia literarum admotus, in latinis ita profecit, ut quidam ipsius Patruus de promovendo illo ad Sacerdotalem statum cogitaverit. Possidebat is pingue Sacerdotium, quod abdicare in nepotis gratiam statuit, et Roma facultatem jam obtinuerat pro abdicatione illa exequenda. Sed Mater alia omnia meditabatur, filiumque ad tractanda negotia domus, et promovendum familiæ decus destinabat.

Josephus vero, inter opposita Matris, et Patruus vota, neutri adduci potuit ut consentiret: relictisque omnibus, quas offerebat ei mundus, commoditatibus, ad Societatem Jesu confugit, in qua receptus est V Kal. Octobris anni millesimi septingentesimi decimi octavi. Probationum, et studiorum cursu laudabiliter emenso, Sacerdos consecratus fuit ab Episcopo Salmantino, annos jam natus viginti septem. Ea dignitate auctus magis incaluit ad procurandam salutem animarum, et earum præsertim, quæ in remotioribus mundi plagis cœlestis pabuli

pabuli misera egestate laborant. Hunc animi ardorem Præposito Societatis exposuit, ab eoque petiit ad transmarinæ regiones mitti, ut inter illas gentes aliquam industriæ partem collocaret, et auxilio maxime destitutis manum porrigeret adjutricem. Facile potitus esset optatis, nisi aliorum preces apud Generalem intercessissent, ne Turrianus extra provinciam amandaretur, in qua necessariam illius operam judicabant. Tanta erat inter Superiores provinciæ suæ de Turriani virtutibus existimatio. Nec multo post aliud quiddam non valde dissimile contigit, quod præclaram hujus viri opinionem apud eos, quibus intime notus erat, ostendit. Postquam Abulæ literas tradiderat humaniores, Segoviam missus est, ut Philosophiam in urbe illa explicaret. Quod per triennii spatium tanta omnium approbatione perfecit, ut cum inde Pompelonem ad iterandum Philosophiæ cursum adire juberetur; Segovienses Socii supplices ad Provinciam literas miserint, ut Josephum ab eo loco non removeret, ubi discipulorum auxerat numerum, et multam Collegii Scholis addiderat commendationem. Annuente Provinciali, docere perrexit in eadem urbe, in qua etiam professionem Votorum quatuor emisit in festo Purificatæ Virginis die millesimi septingentesimi trigesimi sexti. Post hæc Socius datus est Magistro Novitiorum: in eoque munere non minus suæ, quam illorum augendæ perfectioni sedulo incubuit. Deinde Theologiam docuit Methymnæ, Burgis, et Legionem: semperque ad ingenii, et doctrinæ laudem, constantem assiduitatem adjunxit in explendis omnibus officii partibus, et in cæteris Societatis ministeriis naviter exequendis. Cum idoneus ad omnia esset, post magisterium cum plausu exercitum, Legionensi Collegio cum vicaria potestate aliquandiu præfuit. Postmodum renunciatus fuit Rector Collegii Portevedrensis, postremoque Auriensis, in quo administrando diutissime perseveravit, donec tandem obtinuit anno hujus seculi sexagesimo quinto ab onere regendi alios exonerari. Dum munus illud sustinuit, sicut ipse tenax erat domesticæ disciplinæ, ita illam a cæteris exigebat. Apud externos vero propter doctrinæ, ac virtutis famam magno semper in honore fuit habitus. Auris præsertim, ubi longos permansit annos, multam inter cives inivit gratiam: et ejusdem urbis Antistes Augustinus de

Eura, ex sacro Augustinianorum Ordine, tanto eum habebat in pretio, ut nihil fere alicujus momenti nisi de Turriani consilio in diœcesi sua decerneret. In eadem urbe novam domestici templi aggressus est molitionem, in qua promovenda multis adjutus fuit largitionibus amicorum.

In communi Sociorum expulsionem, cum et senio, et morbo impeditus esset ad abeundum, translatus est in quamdam ejusdem urbis religiosam domum, et intra Valetudinarii celam inclusus, ad quam nulli civium, aut Fratrum permittebatur accessus, nisi laico tantum, cui demandata erat cura ægrotorum. Sed illud Josepho nostro fuit longe acerbissimum, quod nullis unquam precibus Cœnobii Præsidem potuit inflectere, ut se sineret ad sacram Eucharistiæ mensam accumbere. Enimvero quorundam religiosorum hominum nescio quis error invaserat mentem, ut Socios a Rege in exilium actos perinde habendos esse censerent, ac si Vaticano quodam fulmine, sive anathemate percussi fuissent. Verum hæc paucorum fuit absurdissima opinandi ratio, multique alii commissos sibi Socios religiose, ac benigniter exceperunt. Josephus, recuperata post menses aliquot valetudine, in exilium cum suis fratribus abire contendit: conscensaque Corunnæ navi, Adjacii portum tenuit in Corsica. Quos ibi dies egit, in templo magis habitabat, quam domi: nam mane fere integrum, magnamque pomeridiani temporis partem in eo perseverabat, auscultandis Sacris, fundendisque precibus, et piis intentus meditationibus. Transmisit inde in Liguriam, navigio impositus Gallico, in quo cibandus fuit pane nautico, et carne salita. Id inter cæteras navigationis molestias, quæ in multos protrahenda fuit dies, non leve incommodum afferebat seni jam edentulo, neque admodum firma gaudenti valetudine. In continentem demum expositus, ingenti labore ad Bononiæ suburbia pervenit: ac primum Crespelani habitavit, deinde in Castro S. Petri, postremoque Medicinæ, Profectis vero in longinqua sociis, quibuscum ibi aliquandiu vixit, Mexicani, qui sedem in eo loco fixerant, certatim Josephum invitarunt, ut in aliquam ipsorum domum diverteret. In hoc laudando certamine caritatis palmam tulit Antonius Frenerus, qui paulo ante, dum Societas manebat adhuc, Socios ibi rexerat Mexicanos. Modo autem, ut

in excipiendo Turriano cæteris præferretur, omnes eloquentiæ vires explicuit, cujus olim præclarum specimen dederat in multis per novum Orbem excursionibus Apostolicis. Is ergo Turrianum, quem omnes propter amabilissimos ejus mores hospitem habere cupiebant, intra domum suam octogenario majorem accepit, eumque dum vitalem spiritum duxit, omnibus prosecutus est humanitatis officiis. Josephus ipse, qui multis jam afflictus erat incommodis senectutis, et gravioribus deinde fuit oppressus, Freneri caritatem, qualem filius a matre sua sperare vix posset, ultra quadriennii spatium expertus, perpetuis eam laudibus extollebat.

In quotidiana cum sene optimo consuetudine virtutum ejus pretium manifestius novit Frenerus, qui Josephum propter ordinatissimæ tenorem vitæ, in eodemque servando constantiam, cum viris sanctitate conspicuis, ac nominatim cum Ven. Joanne Berchmansio comparandum existimabat. Et postquam illum composuit in tumulo, literas ad amicos Bononiam misit, quibus eos de Josephi obitu, deque præclaris ejus virtutibus, quas ipse propius inspexerat, et ex adversariis a Josepho relictis cognoverat, certiores reddidit. Fecit ergo Antonius Frenerus cum sene Turriano, quod magnus olim Antonius cum seniore fecerat Paulo, cujus vitæ sanctitas ignota latuisset mundo, nisi eam ille vulgasset. Neque ulla hic a nobis de Josepho Turriano facta esset mentio, nisi Freneri literas haberemus, e quibus ea mutuati sumus, quæ ad Josephi vitam, et mores spectant. Is igitur divinarum rerum meditationi sesquihoram quotidie dabat: eamque consuetudinem, a primis initam religiosæ vitæ incunabulis, inconcusse adeo tenuit, ut ab ea nunquam neque per maris undas, neque per itinerum molestias, neque etiam per decrepitæ senectutis incommoda dimoveretur. Constanter etiam semihoram vel in provecta ætate ponebat in legendis Thoma Kempensi, Alphonsoque Rodericio: quod cum efficere in extremis vitæ annis non potuit, per alterius ministerium hanc animi desumebat alimoniam: eodemque modo Psalterium B. Virginis ab alterius ore auscultabat. Erga Passionem Domini mirifice affectus, assidue illam meditabatur, semperque animum ad eam meditationem pridiana Villacastini lectione præparabat. Pari devotionis affectu prosequabatur divinum Eucharistiæ mysterium,

rium, in quo jucundissime delectari videbatur. Dum Medicinæ potuit extra domum efferre pedes, coram augustissimo altaris Sacramento flexis genibus, vultuque modestissimo cernebatur in templo, a quo non ante meridiem discedebat. Nunquam illud omisit explere, quod pridem firma inductione animi statuerat, et in commentario reliquit scriptum, ut diem unum per singulos menses sacris impenderet meditationibus. Has pariter per dies octo quotannis exequatur, vel cum eversa jam erat Societas, et ipse annos excesserat octoginta. In extrema senectute continuum dici potest in Turriano fuisse orationis studium. Nam totos fere dies tractandis ducebat sphæruis precatoriis, et mysteriis Redemptionis nostræ contemplandis. Per duos circiter annos, quibus affixus fuit lecto, nihil majori curabat solitudine, quam ne unquam ab ipsius abesset latere icuncula, quam habebat, Christi pendentis e Cruce, et Rosarium Mariæ Virginis. In eo recitando tam assidue versatus fuerat, ut cum jam mentis usum mali vis imminuisset, sindonis oram prehenderet inter digitos, tanquam Rosarii globulos ad preces percurreret numerandas. Nihil ei gratius, quam de Mariæ laudibus audire, atque inferre sermones; cujus etiam festivitatis celebrandis novendialia præmittebat obsequia: quod pariter efficiebat in solemnitatibus Christi Domini, sanctissimi Patriarchæ Josephi, ac S. Ignatii, aliorumque Sanctorum, et Angelorum.

Affligendo corpori semper erat intentus, ut qui hostem illud crederet infensissimum, cui perpetuum bellum indixerat, et nunquam indulgenter habere decreverat. A primo tirocinii tempore ad ætatem usque senilem indefessus fuit in ciliciorum usu, quorum acuminibus per maximam diei partem excruciebatur: et quæ Frenerus post illius obitum reperit, nimis erant horrida, pungendoque corpori sane quam opportuna. Tribus per hebdomadam diebus flagellis se cædebat immitibus vel in postremis vitæ annis, ut testes erant, qui vicinam incolebant domum, ad quorum aures verberum strepitus adveniebat. Gustandi sensum propter assiduum eidem repugnandi studium pene jam amiserat, delicatioremque cibum, siquando illum sumere cogeretur, perinde sibi ajebat sapere, ac si paleas manderet, vel stupam. Quamvis alta nix caderet, geluque rige-

rent



rent omnia, non ideo appropinquabat ad ignem: neque lectum calefieri sibi permisit, nisi admodum raro, ut aliorum iudicio cederet, qui necessarium id esse contendebant. Patientiam in tolerandis adversis, et infirmitatibus perferendis admirabilem habuit. Ulceribus afflictus in dorso, per trimestre spatium dolores inde pertulit acerbissimos, præter illos, quos addebat Chirurgi manus, qui nonnunquam ad vivum resecebat: nec magis propterea lamentabatur, quam si truncus cæderetur, aut lapis. Novendecim menses, jubente Medico, jacuit in lecto, in quo dici vix potest, quam gravibus exercitus sit incommodis. Et tamen inter dolorum aculeos tranquillus semper, et placidus, atque ab omni alienus impatientiæ significatione permansit. Nec solum a querelis abstinuit, sed neque ullum petebat mitigandis doloribus delinimentum: ac ne cibum quidem ipsum, ut Frenerus credit, si forte illi defuisset, postulasset. Hoc modo celebratum illud axioma, *Sustine, et abstine*, quod melius in meditatione Christi patientis, quam in Epieteti schola perdiscitur, numeris omnibus adimplevit.

Inde paratior erat ad insidias Dæmonis, et carnis illecebras superandas. Quanquam in hoc belli genere non admodum decertandum sibi fuisse videtur. Ipse enim ingenue fassus est aliquando, naturæ quodam instinctu feminas aversari, neque ullam circa illas cogitationem minus puram habuisse. Quod non tam naturæ donum, quam Dei credendum est beneficium, aut illius constantiæ præmium in austeritate vitæ sectandâ. Nec vero securior factus ea quasi immunitate discriminis, minorem in avertendis periculis cautionem adhibebat. Feminarum colloquia, nisi omnino necessaria essent, declinabat: ac tum demissis in terram oculis, nec plura, quam res exigeret, loquebatur. Cum easdem erat in tribunali sacro auditurus, asperum circumdabat corpori cilicium. Quæ omnia ex codice illo constant, in quo leges, quas ipse sibi indixerat, scribebat. Religiosam quoque paupertatem servavit exacte. Vilioribus gaudebat indui vestibus, et quæ jam essent aliorum usu detritæ: caligas, ut vere pauper, gestavit interdum panni centonibus interpolatas. Numerorum in Italia pretium vix creditur agnovisse: solitus enim erat ærosam monetam cum argentea permiscere, dum peculium curabat ipse, quod brevi post tempore alteri



alteri tradidit administrandum. Vir denique fuit Turrianus, in quo virtus egregia cum eccellente doctrina, profunda humilitas cum ingenti multorum honore, incensus pietatis affectus cum diuturna negotiorum occupatione, simplicissima morum innocentia cum ingenio perspicaci certasse videatur. Longum vitæ cursum religiosissimo fine conclusit, receptis magna cum devotione Sacramentis, atque iis omnibus adjunctus auxiliis, quæ possunt ad felicem obtinendum exitum desiderari. Ingravescente jam morbo, divina Hostia publice fuit exposita apud Carmelitanos Patres, et in Parochiali oppidi templo, multaque celebrata sunt Sacra pro felici ægrotantis morte. Postquam ejus anima commendata fuit Deo, adstantibus pluribus Sacerdotibus, quorum unus convenientes temporis affectus suggererat, illam Creatori suo tradidit in die festo S. Xaverii 1786, hora tertia matutina cum quadrante, annos natus octoginta sex, et menses fere septem. Defuncti corpus amabilem retinuit vultum, multique intuentium S. Philippi Nerii expressam referre imaginem affirmabant. Pro illius anima quotquot erant Medicinæ Sacerdotes rogati sunt eodem die offerre Sacrificium. Postridie vero, convocatis etiam circumvicinis Parochis, et Sacerdotibus, solemnes celebratæ fuerunt exequiæ. Josephi cadaver (quanquam ipse cœmeterium optaverat pauperum) in sepulcralem illatum est arcam, quæ in Parœcia constructa est pro illius oppidi Sacerdotibus. Hæc omnia Frenerus diligentissime curavit, qui suam erga Turrianum beneficam amicitiam usque ad sepulcrum, et ulterius extendit.

## FRANCISCUS XAVERIUS IDIAQUEZIUS.



**N**ullam huic qualicunque operi aptiorem coronidem impositurum existimavi, quam si ejus viri res gestas postremo loco exponerem, qui me, quamvis multa reluctantem, ad illud impulit aggrediendum. Etenim, cujus hortatu aliorum scripsi facta, illum præterire non debui: cum is præsertim fuerit Idiaquezius, qui, etsi moriendi conditione posteriorem locum occupet; vivendi tamen, agendique præstantia vel inter primos possit non immerito connumerari. Quoniam vero cæteris aliquanto hæc longior futura erit narratio, placuit illam ( immutata paululum, quam adhuc tenui, scribendi ratione ) certis quibusdam sectionibus distinguere, ut et meliori rerum ordini, et majori legentium inserviam commoditati.

## CAPUT I.

*Francisci ortus, et prima educatio.*

**F**ranciscus Xaverius, illius magni Indiarum Apostoli et cognominis, et consanguineus, Parentes habuit Antonium Idiaquezium de Corduba, et Elisabetham de Garro et Xaverio, Duces Granatæ ad Egam, Lojolæ Dominos, Xaverii Comites, Hispaniæque Magnates ex primo ordine. De clarissima nobilissimorum conjugum prosapia si tantum dixerò, a Peruvix Imperatoribus, et a Regibus Navarræ originem suam ducere, nihil opus est eam pluribus commendare. Fuscè illam explicant P. Petrus Calatayudius in epistola nuncupatoria, qua primum Doctrinarum tomum eidem Granatæ Duci dedicavit, eruditusque Trincadus in genealogia Regum, et Principum Europæ. Propius ad rem nostram accederet de præclaris utriusque virtutibus nonnihil commemorare, ut ( quod Ambrosius ait ) *veluti transmissa immaculatæ puritatis heredi*

*ditas in iis, quos volumus laudare, præcellat.* Sed hunc etiam laborem nobis Galatayudius idem præripuit, qui Vitam Ducis Antonii accurate perscripsit: eamque typis editam, Proceribus imitandam proposuit, ut ab eo discerent, quid Deo, quid sibi ac suis, quid item aliis tam in civili administratione, quam in professione militari deberent. In eadem Elisabethæ virtutes identidem indicantur, quæ se fidam Marito sociam addebat ad multa religionis opera pariter exercenda: et insignem domesticæ curæ navabat operam, tum educandis instruendisque liberis, dum tenelli essent; tum etiam matronis, puellisque et ancillis moderandis, quas illustri suæ pietatis exemplo ad frequentanda divina excitabat, et in labore manuum pro cultu, et ornatu templorum augendo, una secum exercebat.

Per aliquot a conjugio annos Pompelone in primaria Navarræ urbe commorati sunt Duces. Ibi Franciscum Xaverium, primum fœcundæ sobolis germen, et amplissimæ ditionis heredem susceperunt vigesima quarta Februarii, anno millesimo septingentesimo undecimo: ibidemque solemniter vitalibus ablutus est undis in Parochiali æde S. Laurentii. Erga templum illud piam animi propensionem retinuit semper Franciscus, qui deinde jam grandior, in variis ad eam urbem projectionibus solitus erat religiose illud invisere: eaque occasione notarunt aliqui, post adoratam Eucharistiam, ad Baptismi accessisse fontem, multaque cum ardenti pietatis sensu impressisse crateri oscula, in quo regenerationis accepit gratiam, quam prudenter existimamus illæsam usque ad obitum conservasse. Hoc idem ex illius vitæ decursu, quem describendum suscipimus, comprobabitur. Non diu post infantis ortum Parentes ejus ad urbem pertransierunt Stellam, in eaque posuerunt sedem, intra cujus fines Granata est, quam fluvius Ega circumluit, et a qua præcipuum familiæ decus denominationem accepit. Hic prima fuit Ducis cura Sacerdotem probatissimæ vitæ perquirere, cui tuto institutionem filii committeret. Quem cum invenisset ad votum, sub illius disciplina puerulus divinæ rudimenta doctrinæ, primasque literas tanta contentione didicit, quanta posset ab adulto, eoque valde diligenti adhiberi. Absolutis quippe scholis, et a Præcepto-

re dimissus, non ille statim ad ludicra, non ad pueriles ne-  
nias, quod plerique solent, revertebatur: sed sponte sua in  
aliquem discedens angulum, ubi non posset ab aliis interpel-  
lari, quæcunque a Magistro didicerat, secum ipse recolebat  
attente. Id Elisabethæ Duci gratissimum erat, quæ tantam in  
ea ætatula diligentiam multis etiam post annis non sine admi-  
ratione commemorabat. Verum ut in hominibus ad præclara  
natis, quo quemque ingenium ferat, vel prima solet ætas non  
obscure portendere, jam tum illa pusionis assiduitas indica-  
bat, suam olim mentem in literis habitaturam, et viri curas  
inter libros esse consumendas. Eodem tempore altioris imbi-  
bit initia sapientiæ, qua Deum agnoscere, diligereque cœpit,  
ac revereri. Ab ipso enim grandævo accepimus, dum puer  
esset, edoctum a Matre fuisse rationem eliciendi fidei, spei,  
et caritatis actus; illosque frequentissime, præeunte Matre,  
iterasse. Quantum vero in cœlesti hac scientia deinde profe-  
cerit, ex iis, quæ dicenda sunt, apparebit.

Cum jam ferebat ætas, Pater ejus Vicecomitem Zolinæ  
( hoc titulo filius primo genitus Granatensium Ducum distin-  
guebatur ) ad Collegium nobilium Burdigalense misit, ut in  
eo sub disciplina Patrum Societatis Jesu literis humanioribus,  
aliisque bonis artibus erudiretur. Ibi Latinam linguam, et  
Gallicam perfecte didicit, earumque notitia magno illi usui  
fuit semper ad plurimorum conscientias cum Deo reconci-  
liandas. In illis vero liberalibus ludis, quibus eo loci gene-  
rosi adolescentes ad militarem, et urbanum usum exerceban-  
tur, quantum quidem profecerit, non æque constat, cum de  
his nec loqui amaret ipse, neque maximo haberet in pretio.  
Id tantum ab eo audivimus aliquando, in juvenili ætate liben-  
ter in equitatione fuisse versatum, magnamque in flectendis e-  
quis habuisse animi recreationem. Nec voluptatem solum, sed  
peritiam quoque in hac arte habuit: quam deinde ita retinuit,  
ut vel senex expedite in equum ascenderet, eidemque dex-  
terime imperitaret. Verum in his multo fuit eminentior, quæ  
ad intimam hominis culturam spectant. Rhetoricam, et poe-  
sim studiosissime coluit, egregiosque in utraque progressus ef-  
fecit. De illius in oratoria facultate præstantia opportunior  
alias incidet sermo. De poesi autem hic ea dicam, quæ ab

ejus Magistris, aliisque coævis accepta, ad nos usque per idoneos testes pervenerunt. Dum Burdigalæ mansit, his ornatus honorum insignibus incedebat, quæ victoribus in literaria palæstra concedebantur: et quoties tentandi ingenii causa Convictoribus argumentum scribendi-carminis proponeretur, præcipuæ semper laudes, et prima plerumque præmia Vicecomiti Zolinæ deferebantur: e quibus præmiis librariam suppellectilem non modicam, lectissimam certe, ab ipso reportatam novimus, atque assiduo usu satis tritam. Sed enim ad poeticum ejus comprobandum œstrum, aliorum testimoniis non admodum indigemus, quando nos ipsi non pauca vidimus, quæ divitem illius venam, et perenni rivo dulcissime fluentem demonstrabant. Multi sunt hodie superstites, quibus licuit varia ejusdem poemata inspicere, in quibus venustissimos, et nunquam non urbanos sales suspexerunt. Ex iis quidam, cujus est istarum rerum gravissimum judicium, de Francisco nostro sic loquitur: *Illaborata quadam facilitate fundebat carmina, cum et latine sciret optime, et fecunda polleret vena, qualem adhuc ego non vidi, quamvis multos in Hispania, Gallia, et Italia egregios Poetas agnoverim: eademque facilitate in præsi Castellana feliciter utebatur.* Hæc tamen nihili pendebat ipse: suaque celebrantibus carmina lepide opponebat facetum Galli cujusdam dictum, qui Poetas cum bacillorum lusoribus comparabat. Non ille propterea Musas in juvenilibus præsertim annis non colebat impense; cum et Magistris, ita volentibus ac jubentibus, in omnibus esset obsequens, et ab ea exercitatione, qua jucundissime tenebatur, fructum etiam caperet multo præstantiorem. Intentus quippe amœnioribus studiis, quæ semper sine ulla pudoris offensione tractabat, ab aliis longe aberat oblectamentis, quæ nata sunt ad innocentiam juvenum corrumpendam. Et cum aliunde divina frequentaret mysteria, variisque insisteret juxta Collegii leges Christianæ vitæ exercitiis, augebatur in dies suæ pietatis ardor: crescenteque supernarum amore rerum, cœpit jam tum terrena omnia fastidire vehementer. Antequam inde discederet, prima sensit ad amplectendam Societatem incitamenta, multisque apud Magistros institit, ut suæ vellent annuere petitioni. Negarunt illi sine libero Parentum consensu fore unquam

quam Sociis annumerandum. Nec vero, si consensum obtinisset, apud se illum retinere, æquum existimabant. Quamvis enim propter eximias ingenii, et naturæ dotes, moresque amabilissimos eum mire diligeren, magnumque allaturum sibi esse decus agnoscerent; tamen Societati, si quidem ad eam aliquando accederet, utiliorem in Hispania fore judicabant.

Ab optatis eo tempore his de causis exclusus, cum deinde ad paternam domum reverteretur, Sociis Burdigalensibus, quos ipse vicissim amabat plurimum, pro accepta ab eis institutione gratias egit amplissimas: et spem intus alens, facilius in Hispania votorum summam assecuturum, minus ægre a Magistris discessit, et Stellam ad suos lator advenit. Sed inde Matritum a parentibus paulo post mittitur, ut eorum, quæ jam noverat, inter æquales suos specimen daret, et ab iisdem mores, atque usus condisceret Aulicorum. Digna enim vero nobilissimi juvenis exercitatio: sed quæ recenter a tranquilliore vitæ ratione divulso non modicum poterat facessere periculum innocenti. Agebat tum annos circiter duodeviginti, præclarissimæ domus heres, egregia oris ac totius corporis forma, quam semper debita proportione retinuit, atque his animi ornamentis excultus, quibus in urbanissimo congressu facile posset eloquentiæ, poseosque floribus eminere. His majora illa accedebant. Propatrum Matriri habebat Joannem Idiaquezium, Comitem Salazaris, quem Philippus Rex V, cui gratus erat in primis, postquam illum in diuturni belli periculis Legati munere apud se habuit, nunc Ferdinando filio, Asturum Principi, Magistrum morum, et cubiculi Præfectum dederat. Per illum Franciscus facilem ad Regiam accessum habuit, et cum frequenter inter ephebos Principem salutaret, brevi apud ipsum singularem obtinuit gratiam. Optimates etiam pronepote Comitis Salazarii, quem sciebant in intimis esse Regis, honorifice habebant, atque omni officiorum genere prosequabantur. Hæc omnia, si humanis tantum obtutibus inspiciantur, prænobilem, ac divitem juvenem, inter mundi hujus illecebras, velut auratis compedibus irretitum, prorsusque a religiosæ vitæ consiliis abductum habitura fuisse videbuntur. Sed clementissimus, immensæque potentia Deus, qui olim Hebræorum juvenum vincula iisdem flammis,

qui-



quibus devorandi credebantur, absumpsit, et fornacis ardentis ignem lenissima temperavit aura; nunc quoque Francisci laqueos, quibus non ille adstrictus, sed circumdatus tantum erat, mirabili dissolvit modo, et in majorem libertatis occasionem convertit.

Dum Matrity degeret, quamvis ad eas urbanitatis leges, quæ conditionem suam decebant, esset attentus, tamen ab ineundæ Societatis proposito ita non recessit, ut potius rationem vitæ instituerit, quæ proxime ad religiosam accederet. Divina, quod adhuc fecerat, reverenter ac pie frequentabat, indeque trahebat vires ad exercenda virtutis opera, et innocentix pericula declinanda. Ab illis animi recreationibus semper abhorruit, quæ manifestam plerumque ruinam juvenibus attulerunt. Nunquam, ut ab eo jam sene audivimus, aut auscultandis comœdiis, aut aliis theatri spectaculis interfuit. Pro his aliam mentis usurpabat a gravioribus curis avocationem. Præstantissimos quosque Poetas Latinos, et quosdam etiam Hispanos legebat domi, vel ruri: et quæ legeret, adeo feliciter retinebat, ut familiarem deinde sermonem opportunis Poetarum dictis exhilararet. Non tamen indiscriminatum legebat quoslibet, cum ab eis cane pejus et angue refugeret, qui vel prætextata effutiunt verba, vel, servato sermonis decore, profanos nihilominus amores ex professo persequuntur. Hispanorum eos versabat maxime, qui de rebus agunt bellicis, ut Gerardum Lupum, et qui utilia, vel certe innocua tractaverant argumenta, et in primis affinem suum, Principem Scylacæum, in Castellana poesi tum natura, tum arte nemini secundum. Venationi quoque, et equorum palæstræ aliquam dabat operam, ut eis morem gereret, quorum regebatur imperio. Sed inter venandum, vestigia S. Francisci Borgiæ, cui etiam sanguine conjunctus erat ( Joannes enim S. Francisci filius Laurentiam de Lojola duxit, filiam Beltramni, qui nepos ex fratre fuit S. Ignatii ) magna sequebatur ex parte. Contra exundantem malitiam seculi ut animum obfirmaret, pios legebat libros, quorum doctrinam perniciosis vitiosorum hominum principiis opponeret tanquam antidotum præsentissimum. Inter alios frequentissimeolvebat libellum inscriptum *Cogitationes Christianæ* Dominici Bohursi Soc. Jes., cujus vi-

ri nomen propter scripta opera, stilique proprietatem, et elegantiam, qua ea scripta sunt, celebratissimum erat in Gallia. Hoc autem ejus opusculum Vicecomiti Zolinæ sic placuit, ut illud inter Aulæ occupationes latinis Elegis susceperit convertendum: et, quod mirere magis, dum venatum prodire cogeretur, bonam hujus carminis partem inter silvas, ac dumeta composuit. Relictis quippe non raro venationis comitibus, dum hi persequendis feris insistunt, ipse condendis verbis, quibus impiorum configeret dogmata, subter aliquam arborem occupabatur. Opus hoc, Auctoris manu pulcherrime conscriptum, vidit olim Josephus Petiscus, illudque ad perfecti Elegiaci carminis leges exactum esse asserit, ac tot fere in eo Elegos contineri, quot Ovidius in libris de Ponto, ac de Tristibus complexus est.

Quantum vero Xaverius ex hac pia lectione, et scriptio-  
ne profecerit ad superandas Aulæ blanditias, atque hominum benevolentiam parvi præ divina pendendam, non semel excelsa animi magnitudine demonstravit. Cum frequenter adesset Principi, cui propter ingenuos mores, et amœniorem literaturam acceptissimus erat, non pauca blandissimi amoris indicia ab eodem accepit. Recurrente S. Xaverii solemnitate, Franciscus cum aliis aderat coram Principe, qui humanissime ad eum conversus dixit: *Diem festum S. Xaverii felicem tibi deprecor, Idiaquezi.* Honorificam adeo salutationem debitis ille grati animi significationibus, ut æquum erat, rependit. Continuo reliqui certatim Aulici eandem illi felicitatem optare, singularemque gratulari benevolentiam, quam ei exhibuerat Princeps: nonnulli deinde, nominatimque Dux Albanus, tentare multa, ut sese in ejus intimam amicitiam insinuarent. Ipse vero ab hac ridentis fortunæ prosperitate nullum animi fastum, nullam aut superbiam, aut arrogantiam contraxit: quin potius inter frequentes aliorum plausus hæc secum tacitus reputabat: *Nisi apud Principem aliquantula valerem gratia, tot mihi benevolentia signa cateri non exhiberent: At non ideo ego alius ab eo sum, qui paulo ante eram.* Alias in ipso Epiphaniæ Domini die sacro sedebat ad mensam Princeps, quem nobilissima circumstabat corona Juvenum, et Optimatum, in quibus etiam Zolinæ Vicecomes intererat. Huic Prin-  
ceps

ceps gustandum dedit pretiosi calicem vini, quod appositum sibi fuerat in secunda mensa. Multis gratiarum actionibus Vicecomes excepit singularem hanc humanissimi Principis dignationem. Sed statim, ut ipse post cuidam ex intimis affirmavit, hæc illi subiit altissima cogitatio: *Immensum quanto major illa sit gratia, qua me sæpe dignatus est Deus, qui suum pretiosissimum sanguinem toties mihi præbuit in Eucharistia.* Vel inter ipsas Aulæ delicias adeo ingeniosus erat, ut mentem in Deum tolleret, eamque a mundanis, quas tractabat, rebus converteret in cœlestia.

Interea multis urgebat Patrem, ut adeundæ Societatis facultatem sibi concederet aliquando. Sed quanto instabat ille vehementius, tanto dulcioribus blandimentis mundus eum illicere conabatur. Ab ipso Comite Salazario, quo nemini Matriti erat carior, non malitiosam quidem, sed fortissimam sustinere debuit oppugnationem. Is jam a Philippo Rege, pro singularibus in eum meritis, Ducis Granatæ ad Egam denominationem acceperat, et inter primos Hispaniæ Proceres fuerat annumeratus: et quoniam ætate jam proventus nullam susceperat prolem, potestatem illi Rex fecerat, ut utramque illam dignitatem ad aliquem agnatorum pro arbitrio suo transferret. Quodam igitur mane Vicecomitem ad se vocat, eumque leniter apprehensum manu, ac prope lectum sedere jussum, in quo ipse propter senectam manebat adhuc, multis docere incipit, Idiaqueziorum familiæ quanta essent decora. Quæ cum eloquenter non minus, quam veraciter exposuisset: „*His*, inquit, *vetèribus* tux domus insignibus novum ego gloriæ splendorem adjungam. Decrevi enim, si modo aliqua tui generis te tangit cura, duplicem illum spectatissimum honoris gradum, quo me Rex pro insigni sua liberalitate honestavit, tibi, dilecte fili, relinquere. Neque his tantum ornamentis, sed aliis etiam, fortasse majoribus, augendus eris. Nam si animum vel leviter ad benevolentiam illam adverteris, qua te Princeps Ferdinandus amplectitur, vides ab herede Regni quanta tibi sint, et quam non inaniter speranda. Noli ergo, fili, noli tuis commodis adversari. Imo vero noli Deo ingratus esse, qui te ad hunc fortunæ apicem non sine causa perduxit: sed iis te humanis, divinis

„ que

„ que cumlavit donis , quibus possis et tueri quæ parta sunt  
 „ tuis , et quæ tibi advenient denuo , prudenter christiane-  
 „ que administrare , ac sine salutis tuæ discrimine multorum  
 „ profectibus *inservire* . , Hæc gravissimi senis oratio quem-  
 cunque alium non modice permovisset : Vicecomitem vero a  
 suscepto proposito dimovere non potuit . Itaque , cum egisset  
 Propatruo gratias , aliosque dixisset sibi esse fratres , in quos  
 prolixam adeo beneficentiam poterat exercere ; altissime de bene-  
 ficio illo disseruit , quod jam tum a Deo acceperat , cum amplec-  
 tendi religiosi status primam sibi mentem injecit : deinde obliga-  
 tionem exposuit , qua tenetur homo Deum ad perfectiora vo-  
 cantem sequi . Utrumque autem multo rationum pondere ita  
 perspicue demonstravit , ut prudentissimus senex , nihil ausus  
 ultra contendere , negotium illud ad Vicecomitis remisit ge-  
 nitorem . Is filio scripsit , ut domum , relicta Curia , repeter-  
 ret ; non tamen existimaret , factam ei propterea renuntiandi  
 seculo potestatem .

## C A P U T I I .

*Societati post maturam deliberationem adjungitur . Tiocinium  
 in ea ponit , et literis informatur .*

**N**on ea mens erat optimo Francisci genitori , cum illum  
 revocavit ab Aula , ut consilium ejus jure , vel injuria  
 disjiceret , quamvis aperte cognosceret , quantus domui suæ  
 accessurus esset splendor a primogenito filio , quem sciebat  
 plurimum in eadem Aula valere . Volebat tamen diligenti con-  
 sideratione perpendere , illane deserendi seculi cogitatio ab in-  
 stinctu divino fueret , an potius a puerili aliqua levitate or-  
 tum haberet in filio . Sed cum esset pectoris pleni recto , be-  
 neque nosset neminem in propria causa judicem esse incor-  
 ruptum , noluit ejus rei judicium sibi desumere . Filium ita-  
 que per viros aliquot tentari voluit extra Societatem , et in-  
 tra illam , quorum probitati , ac scientiæ fidebat ipse quam-  
 plurimum . Inter externos præcipuus erat Cl. Firminus Lu-  
 bianus , in Cathedrali æde Pompelonensi Prior , cujus respon-

sa propter integritatem morum, et doctrinæ copiam, velut oracula in Navarræ regno, atque alibi per Hispaniam excipiebantur: imo usque ad exterarum etiam gentes ejus fama pervaserat, ut videre licet in Hagiographis Bollandianis ad vigesimam quintam diem Septembris, ubi præstantissimum eruditione virum collaudant. Ex domesticis autem primus fuit P. Petrus Calatayudius, qui regionem illam per id tempus sacris excursionibus peragrabat, de cujus etiam virtutibus præclaram Dux, nec immeritam conceperat opinionem. Is ante omnia Vicecomitis animum diligenter exploravit, illiusque desideria, omni partium studio seposito, ad christianæ prudentiæ leges expendit. Deinde, ut periculum ejus faceret in his ministeriis, quæ, in Societatem adlectus, aliquando esset obiturus, ad aliquas eum expeditiones comitem secum adduxit. Jubebat illum interdum cum erecta Crucifixi effigie supplicantium ducere agmen, nunc præesse puerorum gregi, nunc secum ad convocandos cives per vias urbis incedere: quæ omnia prompte, submissequè aggrediens, cum magno quoque salutis animarum studio peragebat. Nonnunquam ejus opera in gravioris momenti rebus usus est Petrus. Nam interpretæ ille, quem is adhibuit in itinere Pompelonensi, ut peregrini hominis confessionem exciperet (quod in illius Vita diximus) Vicecomes Zolinæ fuit. In his autem experimentis, et in colloquiis maxime, quæ sæpe cum illo privatim habuit, cognovit Petrus vocationem adolescentis legitimam, atque a Deo profectam esse. In eandemque sententiam Consultores reliqui unanimi suffragio convenerunt.

Dux ergo, cum manifestam Dei voluntatem aspiceret, desideratam filio concessit veniam, eumque liberali ac generoso animo Domino consecravit. Neque segnius propterea illum amare perrexit, sed propensiore deinceps affectu, et quadam pene veneratione ob ipsius virtutes est prosecutus. Idem in Matre contigit, quæ semper de primogeniti filii rebus omnibus et sublimiter sentiebat, et honorifice loquebatur. Hac superata præcipua difficultate, levioris negotii fuit cæteras superare. Vicecomes, quæ jam sibi ut majori natu obtigerant, et quæ in posterum sperabat, servatis legum formulis, Ignatio fratri suo cessit, qui post eum proxime natus erat. In ea

renuntiatione contendebat Prior Lubianus, ut Franciscus quædam exciperet, vel certe pensionem aliquam designaret, quæ sibi per annos singulos, dum vitam viveret, solveretur. At ille constanter conditionem omnem rejecit, nullam asserens curam de temporariis rebus velle suscipere. Quibus ad necessitatem vitæ indigeret, a Societate subministranda sibi esse sperare. Quod si aliquid deesset interdum, velut sequelam religiosi status reputaturum, quem propter Deum amplectebatur. Post hæc litteras misit ad provinciæ Castellanz Præpositum Emmanuelem de Prado, cujus responsum post Francisci mortem inter alia ejus scripta repertum est. Illudque propterea tam diligenter servasse credimus, ut sæpe consolationem animi regustaret, quam inde perceperat, quod jam in filiorum ejus numero censeretur; sic enim illum Præpositus appellabat: simulque ut identidem incitaretur ad rependendum sanctitate vitæ beneficium illud insigne, quod ipsi Deus concesserat, ut obsistentes vocationi suæ tam multas superaret difficultates; de quo etiam ab eodem Præposito admonebatur. His habitis literis, et Parentum benedictione suscepta, iter in tirocinium, comitante Petro Calatayudio, lætus ingreditur. Cum autem Palentiam devenisset, vel quia Provincialem ibidem reperit, vel quia is Palentino Rectori suam detulerat vicem, in eo Collegio annumeratus est Sociis decima nona Februarii millesimi septingentesimi trigesimi secundi, quinque admodum dies antequam ætatis annum vigesimum primum expleret.

Pretiosas libenter exutus vestes, indutusque libentius vulgarem habitum Societatis, ad tirocinium Villagarsiense processit eodem comite Calatayudio, cujus virtutes et in hoc itinere, et alibi perspectas, semper ille suspexit. Ut se tironibus vidit immixtum, lætitiis incessit omnibus, et exuberantem animi voluptatem cum pectus non caperet, eadem per oculos exundabat et vultum, ut quidam illorum ait, qui tum ibi degebant simul. Ad omnia ejus loci onera subito submisit humeros, nullaque cupiens immunitate fungi, perinde haberi gaudebat, ac cæteri. Motus animi, et corporis ad modestiæ normam componere diligenter studuit. Promptus erat ad fundendas preces, aliasque tironum exercitationes obeundas: loquendi



adeo parcus, ut in his etiam horis, quæ honestæ concessæ erant recreationi, audire alios, et interrogare mallet, quippe humilitatis ubique studiosus, quam eosdem suis tenere colloquiis. Quotiescumque tamen de mundana vanitate opportunus sermo incidisset, tunc enimvero, parce loquendi morem oblitus, disertissimus erat in ea despicienda, et variis modis exhibilanda; contraque solidissimis religiosæ vitæ bonis magnifice prædicandis. Hunc mundi contemptum ab initio tirocinii sic animo insevit, procedenteque tempore adeo studiose coluit, ut is proprius vitæ suæ color, et peculiaris quædam nota fuerit, qua facile inter cæteros dignosceretur. Nihil jam tum amabat ardentius, quam quæ essent cum abjectione aliqua, et paupertate conjuncta. Cum ad vestiariam mitterebatur, ut tunicam, aut aliud quodlibet mutaret indumentum, quod vilius et inelegantius esset, hoc sibi aptissime omnium cadere, illudque obtinere a Præfecto vestium enixe contendebat. Hodiedum quidam e coævis memorat, Franciscum in tirocinio sæpissime talarem gestasse tunicam, quæ brevior justo erat, multo jam detrita usu, ad eamque proxime accedens, quam laici tirones induebant. Eadem contentione abjectissima quæque ambiebat officia, in quibus ille, tanquam ad ea natus esset, jucundissime versabatur.

Ut in hoc humilitatis studio majores progressus faceret, non parum illum Josephus Sartolus Collegii Rector, et tirocinii Magister adjuvit. Imponebat ei contemptibilia ministeria, quæ servorum propria sunt, ut fastum omnem extingueret, siquis ei forte adhæsisset; neque unquam deinde erubesceret, quoties ad aliorum prodesset commodum, viliora quælibet in luce publica, atque in oculis mortalium amplecti. Præterea, ut insitum cuique excellendi desiderium facilius superaret, variis eum deprimebat modis, et quandoque asperioribus in speciem verbis coram cæteris alloquebatur. Aderat cum novitiis Rector pomeridianæ recreationi, in qua eorum aliquis, indicto silentio cæteris, narrabat exemplum aliquod e Sanctorum Vitæ depromptum. Deinde alii, prout cuique a Superiore data esset venia, breves aliquot sententias præferebant, quæ essent et recitato exemplo, et perfectioni morum accomodatæ. Hic ergo Idiaquezius aliquando dixit,  
de-

debere nos juxta Spiritus Sancti monitum omnia opera nostra cum excellentia facere. Sed Rector, quasi arguere illam vellet, quod ad honoris titulos allusisset, quos manens inter suos haberet, non sine pungenti verborum tono: *Heus tu!* inquit: *Vide, quaso, anne satis esset, si ea cum Dominatio-  
ne faciamus.* Percalluit tiro, quippe nihil ingenio tardus, Magistri verba quorsum respicerent: suaque illum persuasit humilitas, ad conterendam superbiam hujusmodi correptionibus indigere. Sæpe alias in consimilem modum probabat eum Magister, ut in sui despectione cresceret, et ab inanis gloriæ cupiditate abhorreret. Hanc Magistri sui peritiam in tironibus edolandis laudabat sæpe Franciscus, eumque singulari amore semper est prosecutus, a quo sibi tot obvenisse commoda profitebatur. Nec minori habebat in pretio Joachimum Iturcium, qui tum socius erat Magistri novitiorum, et quem vix unquam Franciscus sine commendatione nominabat. Utriusque industria florebat in tirocinio Villagarsiensi religiosæ perfectionis studium; cum prior ille ad subigendos animos, et juveniles frangendos spiritus præcipuam curam intenderet; alter vero austerioris vitæ exemplis omnes ad edomanda corpora provocaret, ac ferventioribus larga manu concederet, ut communibus tirocinii rigoribus alios etiam adjungerent ultra debitum. Hos inter Idiaquezius erat, qui blandissimis adhuc deliciis innutritus, implacabile modo bellum suo intulit corpori, quod ciliciis, ac flagellis cruciabat fere quotidianis, magna cibi parsimonia, frequentibusque jejuniis, incommoda super nudos asseres cubatione in his præsertim noctibus, quæ sumptioni præcederent Eucharistiæ, immissis quoque lapillis intra calceos, aut id genus offendiculis, quæ plantas pungerent incedenti. Quid autem illi asperitates hujusmodi, cæterique labores effecerint, paucis explicat Julianus Fonseca, qui tirocinium eodem ponebat tempore: *Franciscum Xaverium,* ait, *cum tirocinium ingrederetur, nitidum, elegantem, pulchrum, et pingui decenter corpore vidisse me, memini: sed idem devenit brevi macilentus, pallidus, et exilis propter ardorem insolitum, quo suum statim cursum arripuit, assiduumque conatum, quem in macerando corpore, in orandi studio, et in exsistanda præsentis Dsi memoria, quantum Superiores sinerent, collocabat.*

Pri-

Primo anno probationis eo, quem diximus, modo peracto, in altero ad Seminarium pertransiit, quod situm erat intra tirocinii septa: in eoque novitii latinæ linguæ præceptis recolendis, addiscendæque rhetoricæ ita incumbabant, ut propterea spiritualium rerum curam non intermitterent. Novum hoc onus Francisco nostro leve admodum, imo etiam jucundum videri posset, ut qui pridem fuerat ad omnem humanitatem affatim eruditus, et in ea cum ingenti voluptate versatus. Et tamen gravissimum illi fuit, eoque pondere videtur uti voluisse Deus, ut ejus animum altius in christiana humilitate fundaret. Qui ei Magister obtigit, nimius erat in exigendis Grammaticorum regulis, ad quas essent latinæ voces singulæ referendæ. Franciscus præceptiones illas non ignorabat, sed cum eas extra Hispaniam didicisset, ubi alia erat docendi ratio, non facile poterat præcepta reddere (iisdem saltem concepta verbis) quæ Magister a discipulis reposcebat. Non raro, præcepti loco, Auctorum allegabat usum, *Quem penes arbitrium est, et jus, et norma loquendi*, ut rectissime ait Horatius. Sed Magister, cum ea in discipulis suis vellet, quæ deinde ipsi pueros docturi erant in Collegiis, Franciscum præceptiones illas jussit addiscere, quæ tunc erant in usu pro inferioribus Scholis, et scriptionum themata illi proponebat, quæ solebant incipientibus assignari. Ita qui sæpe inter primos fuerat in Seminario Burdigalensi, nunc idem in Villagarsiensi coactus est esse in postremis. Illud etiam ad augendam abjectionem accessit. Cum jam grandior esset, nova illa rudimenta non æque prompte memoriæ commendabat, ac reliqui condiscipuli, qui eadem antea didicerant, et modo facilius recolebant. Fiebat inde, ut non tam expedite, atque apposite responderet interroganti Magistro, qui propterea sinistram de ingenio novi discipuli opinionem concepit, eumque ineptiorem ad literas judicavit. Id cum Rectori significasset, multis hic apud Magistrum institit, nullam ut industriam prætermitteret, sed patienter in instructione sui discipuli peculiarem etiam diligentiam adhiberet. Franciscum hæc omnia pro ipsius sagacitate penitus latere non poterant: sed inustam sibi rudioris ingenii notam cum insigni humilitate sustinuit, donec Deus, cujus est humiles exaltare, ab hac eum ignominia liberavit.

Post

Post aliquot demum menses, quibus patienter tulerat dejectionem, inexpectatus quidam eventus errorem Magistro eripuit, spemque Rectori auxit, ad Societatis ministeria Franciscum maxime idoneum fore, si ad prudentiæ, atque aliarum virtutum laudem, quarum dabat jam specimen singulare, subsidium adjungeret literarum. Adveniente quadam earum solemnitatum, in quibus rhetoricæ auditoribus latina oratio, vel carmen aliquod indicebatur, Magister in eum diem scribendi carminis proposuit argumentum. Sed cum Francisco nihil privatim, ut solebat alias, imperasset; quæsit is, dum ab schola dimittebatur, num ipse quoque injunctum illud poema esset cum cæteris compositurus. Ut libeat, respondit ille subridens: vel poema, vel quodcumque aliud efficias licet. Hac usus facultate Franciscus, Elegiam bene longam brevi composuit tempore, eamque Magistro tradidit corrigendam. Vidit hic, aptissime constare omnia, neque invenire aliquid potuit, quod ad puritatem stili, et metri leges non esset exactum. Dubitabat propterea vehementer, anne illud Francisci opus esset, an potius ex Auctore aliquo desumpsisset, quem ad manum haberet modo, vel fortasse olim fideli memoriæ commendasset. Affirmante vero Francisco omnia se proprio Marte fecisse; Magister, qui de ingenua probitate discipuli præstantius multo sentiebat, quam de illius literatura, nullius jam plagii metuens, neque plura percontatus, ad Rectorem properat lætabundus, ac rem pene miraculo adscribens: En, ait, pulcherrimam Elegiam, quam Idiaquezius noster valde præter opinionem meam composuit. Ex consilio Rectoris jussit eum deinde rhetoricam orationem scribere, quam in triclinio de more coram omnibus pronuntiaret. Hanc etiam pari facilitate composuit, ac tot eloquentiæ luminibus adornavit, ut postea Magistri jussu plures id genus fecerit, quamvis eas non esset ipse habiturus. Quin etiam, cum eo tempore Magister literas annuas provinciæ scripturus esset, quæ tertio quoque anno Romam mittebantur, magis fidens stilo discipuli; quam suo, id negotii Xaverio delegavit: quod ille accuratissime, atque opinione citius expedivit. Hoc modo in literis non minus, quam in virtutibus bene probatus, expleto jam tirocinii biennio, tria simplicia vota, quæ Religiosum eum reddebant,

magna animi exultatione concepit. Eadem paulo post solemnī ritu nuncupavit, emissa Professione ratione, ut ajunt, Majoratus: quo tempore, ut aliquam læti, et grati animi ederet significationem, pretiosa quædam vasa, lancesque argenteas dono dedit Sacello maximo tirocinii, quæ in solemnioribus festis ornandæ aræ, et Sacrificio cum majori apparatu celebrando deserviebant.

Medio Octobri anni 1734 Philosophiæ cursum inchoavit Methymnæ, ubi parum initio abfuit, quin eandem tardioris ingenii notam incurreret, quam paulo ante subierat. Ex condiscipulis nonnulli partem aliquam illius facultatis jam ante attigerant, quam Societatem ingressi fuissent: et hos quidem minime mirandum est promptiores Francisco fuisse, qui novitius in arte illa erat. Alii cum ipso Dialecticam tum incipiebant, in quibus erant quidam adolescentuli, quos ardentior ipsorum indoles vehementius incitabat ad disputandum. Hos inter apparebat inferior, cum ætatis, ac judicii maturitas cunctatiorem illum redderet, nec de his vellet importune disserere, quæ nondum penitus introspexisset. Hinc autem in scholarum repetitionibus, et collationibus, cum non æque intrepide, ut cæteri, disceptaret, inertior aliquibus videbatur, ac tantum non apud eos *bos mutus*, ut olim Div. Thomas, audiebat. Sed non multi abierunt menses, cum tandem mugire cœpit: tantumque ingenii acumen, et soliditatem ostendit, ut facile cæteris antecelleret. Magister ejus, qui præclare de Francisci habilitate sentiebat, aperte fassus est aliquando, neminem auditorum tantum sibi negotium exhibuisse pro dissolvendis objectionibus, quæ ab eo contra dictata sua vel publice, vel privatim proponebantur. Propterea sub triennii finem, cum ex more designandus erat, qui Philosophiæ certamen maximum sustineret, partes illæ Francisco demandatæ sunt, qui eas cum externorum Doctorum plausu, ac domesticorum egit approbatione. Atque ut pietatem cum doctrinæ eruditione conjungeret, prolusionem eo die habuit ad sanctissimum Cor Jesu, pro cujus tuendo cultu multa deinde scripsit vel in ultima senectute.

Post hæc venit Salmanticam, ubi quadriennii spatio sacris addiscendis scientiis toto pectore incubuit. Biennium deinde

inde posuit in iisdem recolendis : quo etiam tempore Theologicas theses in illius Academiæ luce, magna omnium acclamatione propter doctrinæ ac modestiæ specimen, bis propugnavit. In eadem urbe Sacerdos consecratus est ab Episcopo Sancio Granado, qui potestatem ei fecit confessiones sacras audiendi, verbique divini prædicandi. Utrumque hoc munus ibidem exercere cœpit anno 1741, in eoque deinde infatigabili contentione, ac magno cum animorum fructu laboravit. Sub idem ferme tempus, vel certe antequam studiorum curriculum absolvisset, ingentes sensit stimulos ad petendam missionem Indicam, ut vestigiis insistens magni Avunculi sui S. Francisci Xaverii Christum barbaris gentibus annuntiaret. Super his ad Præpositum Generalem scripsit, suum transmittendi ad Indos exponens desiderium, illiusque adimplendi facultatem postulans; certus interea id incunctanter amplecti, quod Deus per Vicarii sui vocem indicaret. Dum responsum Roma expectabat, orandi materiam ab illis Petri ad Christum verbis desumpsit: *Domine, si tu es, jube me ad te venire super aquas*. Id ipse cuidam aperuit, qui eandem professionem meditabatur, et illius consilium exquirebat. His autem verbis orabat Deum, ut, si ab eo descenderent inflammata illa desideria, per Superiores suos efficeret, ut ipse ad orientis, vel occidentis Solis plagas super immensi maris aquas adveniret, ubi sanctissimum ejus Nomen, et fidem Catholicam promulgaret. Nec dubitare utique licet, quin accepta Deo fuerint illius vota, quamvis ea perficiendi potestatem non obtinuerit. Voluit enim Dominus ut in hoc veteri mundo alia sibi exhiberet obsequia.

### CAPUT III.

*Humaniores docet literas, Philosophiam, et Theologiam,  
in qua Doctoris detrectat lauream.*

**E** mensis jam scholarum spatiis, Vallisoletum mittendus erat juxta receptum provinciæ morem, ut tertiam in Collegio S. Ignatii probationem haberet. Sed quoniam interdum eo-



rum aliquis, qui studendi finem fecerant, Villagarsiam destinabatur, ut novitios, inter quos et ipse tertium erat probandus, humanitatem, ac rhetoricam edoceret; id negotii Francisco delatum est, qui eidem cumulate satisfecit. In beata illa solitudine, a qua procul aberat mundanarum rerum strepitus, ad propriam animi perfectionem, et accuratam institutionem discipulorum peculiari quodam incubuit studio. Et hinc quidem pristini fervoris memoriam repetens, quo ipse olim in eadem domo religiosæ tramites vitæ aggressus fuerat, ad intendendum illum incitabatur. Aliunde vero tironum contemplatus exempla, quæ suis quotidie oculis obversabantur, minime decorum existinabat, si ab eis superari se sineret, quos et ætate, et spiritali cultura tam longe superaret. Cum iis ergo aderat meditationibus sacris, et animi discussionibus, cæterisque piis exercitiamentis, quæ pro novitiis secundi anni, quorum Magister fuerat designatus, sic eo loci ordinata erant, ut sine pietatis dispendio tempus eis suppeteret ad humaniores literas recolendas. Intererat etiam cum novitiis omnibus pomeridianæ, ac nocturnæ recreationi; ubi nunc suos ipse defectus coram Superiore, cæteris auscultantibus, accusabat; nunc etiam, siquid ab aliis notatum in eo fuisset, palam sibi objici audiebat. Similiter cum tironibus multa alia exercebat humilitatis officia, seu verrenda esset domus, seu purgandæ patinæ, seu foret sedentibus ad mensam ministrandum, vel eorundem pedes deosculandi. Quæ omnia non perfunctorie, vel oscitanter, multoque minus gravate peragebat; sed ut qui nosset illarum actionum pretium, et Christum vel in minimis suis fratribus intueretur. Conciones etiam interdum habuit in templo: et in festis quibusque diebus multus erat in excipiendis puerorum confessionibus, qui Collegii Scholas frequentabant, et in quorum tractandis animis præcipuam habebat dexteritatem.

In suorum autem instructione discipulorum sic adlaboravit, ut eos non solam proprietatem singularum vocum, sed venustatem etiam, et elegantiam latinæ orationis, latinæque poeseos edoceret: ut ipsi postmodum eadem docerent alios, et in tractandis gravioribus disciplinis emendate loqui discerent, atque etiam, dum res posceret, ornatuorem, et amœ-

nio-

niozem adhibere sermonem. Quoniam vero adolescentes illi, quos susceperat informandos, non tam in forensibus causis, quas nunquam essent acturi, quam in sublimioribus erudienti erant argumentis, quæ ad Dei obsequium, et animorum commodum pertinerent: huc præsertim in tradendis rhetoricæ præceptis collineavit. Dissertationem scripsit, quam discipulis suis vulgari sermone dictavit, ut eam ipsi per partes latinam redderent, ac dum stili exercendi causa diutius in eadem versanda detinerentur, altius quoque in ipsorum animis insideret. In ea legitimam exponebat sacri suggestus elocutionem, et Oratoris Christiani quænam sint partes: quid is in dicendo tenere debeat, quid item fugere, si cum dignitate, atque auditorum fructu suum velit munus implere. Propterea perversum quorundam morem exagitabat, qui flosculis inanibus intenti, virilem, et unice illius loci dignam deserunt eloquentiam. Nec minus reprehendebat eos, qui sublimiorem consecretantur dicendi modum, quem ingeniosi vix capiant, et qui communem populi captum excedat: quibus proinde merito tritum illud accommodaveris: *Ni parcant animi sensa, tacere potes*. Illos pari arguebat jure, qui futiles ac putidas argutias adhibent, quæ potius ad aucupandum imperitorum plausum, et cordatorum movendum stomachum, quam ad animos in bonum permovendos efficiunt. Denique in eos acriter invehebatur, qui pro confirmandis, quas tractaverint, rebus, aut Virgilium, aut Plautum, aut alium quemlibet e profanis allegare malunt, quam gravissima Scripturæ sanctæ testimonia. Dissertationem illam non pauci cum fructu perlegerunt. Quemdam ego commemorare possem, qui florilegus initio fuerat in concionando. Sed cum fortuito deinde in eum tractatum incidisset, errorem agnovit suum, seque ipse ita retexuit, ut aliam in dicendo viam sit aggressus. Neque propterea adeptam Oratoris laudem imminuit, sed multis adauxit partibus; cum jam non fucatam, sed veram, et solidam eloquentiam majori cum auditorum profectu exhiberet. Alii etiam vel ex lectione opusculi, vel ex Francisci colloquiis, quæ frequenter de his rebus inferebat, Orationes suas recudere, atque in meliorem redigere formam studuerunt. Clemens ille Recius, cujus vitæ compendium paulo ante dedimus, quamvis multum

in hac dicendi facultate præstaret, Francisci tamen iudicio ita suum deferebat, ut per triennii spatium, quo illum sub potestate habuit, quas publice diciturus erat Orationes, eidem traderet corrigendas. In quo nescias utrum mirari magis oporteat: Rectoris ne modestiam, qui se Francisci, tunc juvenis, sententiæ submitteret; an hujus sinceram integritatem, qua tanto viro, *corrige, sodas, hoc, ajebat, et hoc.*

Id Compostellæ accidit, quo Franciscus anno 1745 profectus est cum juvenibus, quos habuerat in rhetorica discipulos, ut iisdem Philosophiam in ea urbe traderet. His quadraginta circiter externorum accessere, quorum profectibus in literis, et virtutibus magna semper invigilavit industria. Ut doceret eos, præcipuas diei actiones in quem deberent finem referre, scholis omnibus brevem ad Deum orationem præmittebat: et in earum decursu, dum opportunitas ferret, ea obiter insinuabat, quæ ad vitia detestanda, colendasque virtutes juvene Christiano dignas poterant adjuvare. Quolibet sabbato lectionis quadrantem ultimum (de hoc ab uno discipulorum admonebatur, cum ipse nunquam horologium habuerit) destinabat narrando exemplo, quod excitandæ devotioni erga B. Virginem esset idoneum. Inde arripiebat ansam, ut hortaretur cunctos ad patrociniū excelsæ Reginæ promerendum, tum debitis eidem præstandis honoribus, tum maxime probitate morum, et frequenti Sacramentorum perceptione. His adhortationibus cum adjungeret sanctioris exempla vitæ, præclarum inter auditores suos nomen obtinuit: nec minus inter cives ceteros, apud quos vir sapiens, et sanctus frequenter audiebat. Ex discipulis multi eum in conscientiæ arbitrum delegerunt, nec pauci deinde ad varia Religiosorum claustra convolarunt. Duo saltem adjuncti sunt Societati, quorum unus deprecabatur enixe Deum, ne unquam sibi adeundæ Societatis mentem injiceret: *Credebam enim certissime* (sic ille, superstes adhuc, datis ad nos literis confirmat) *nullo unquam pacto fieri posse, ut vel minimum ego ministerium obirem ex iis, qua a Compostellensis Sociis exerceri videbam.* Is ergo ad Carthusiensem Ordinem cum animum adjecisset, Franciscum quodam die, puracta confessione, certiozem consilii sui reddidit, eumque de ratione illius

exequendi consulebat . Cui Franciscus incunctanter respondit : *Non ad Carthusiam, fili mi, sed ad Societatem nostram Deus vult, ut accedus.* His verbis ardentissimum illi juveni desiderium incessit petendæ Societatis, in qua jam et salutem suam, et aliorum etiam per ipsius ministeria operaturum esse sperabat . *Accessit insuper, ut idem ait, animus ingens et generosus (cum antea pusillanimis essem ac timidus) ad superandos conatus Avunculi, qui me miserat in Academiam illam, Parentumque meorum, qui licet essent optimi, longe tamen diversa cogitabant.* Gravissimas ergo pugnas sustinere debui, antequam Societatem adirem, nec leviores per biennium in tirocinio sustinui . *Quas ego pugnas neutiquam superassem, nisi alte reposuissem in corde verba illa Idiaquezii, quæ semper tanquam a Deo profecta consideravi.* Hæc enim, opitulante Deo, addebant animos ad resistendum, et amorem meum in Societatem, quem excitaverant dum ea primum audivi, per consequentia deinde tempora semper aluerunt . Itaque quod Societatem ingressus sum, quod in ea permansi, Magistro, Confessarioque meo, secundum Deum, acceptum refero . Hæc paulo fusius exponenda fuerunt, ut discipulorum de Magistro suo præstantissima opinio, et verborum hujus efficacitas agnoscatur . Neque enim aliunde, quam a divino spiritu, quocum ipse conjunctus erat intime, ortum fuisse crediderim responsum illud tam promptum, ac tam firmiter in discipuli mente confixum . Quod etiam effectu ipso comprobatum esse novimus . Hic enim Francisci discipulus multis saluti fuit in Hispania, ubi docendi labores susceptis per ætatem expeditionibus sacris suble-  
vabat . In Italia vero magno fuit, et esse pergit exulibus adjumento : eundemque Itali nonnulli religiosi viri, ac femine conscientie moderatorem adhibuerunt . Ne plura dicam, ventus adhuc viri modestia prohibet .

Quanto diligentior Franciscus erat in promovenda pietate discipulorum, tanto hi promptiores scholis aderant, et sapientie, quæ *in malevolam animam non introibit*, copiosiores capiebant fructus . Ille quidem nullam prætermitterebat industriam, ut prælectiones suas assidue, attenteque exciperent, et quod in eis difficiliter occurreret, quam maxime posset, dilucidaret, omnesque privatim ac publice frequentibus

certaminibus exerceret. Inde habuit præstantes doctrina discipulos, quorum multi præclara deinde obierunt munera. In omnibus Philosophiæ partibus explicandis Aristotelem non solo Platoni, sed recentibus quibuscunque Philosophis præferebat. Ut enim ab his effecta quædam experimentorum ope fuerint explorata, vix tamen super illorum causis quidquam inventum est ab iisdem, quod anteferri mereatur principiis Stagiritæ. Non ideo ille quæstiones aliquot ab hodierna Philosophia mutuatus non esset libenter, quæ jucundioribus studentibus laborem redderent, et aliquam in posterum, pro diversa ipsorum professione, utilitatem afferrent. Sed et illas juxta Peripateticorum placita plerumque tractari, definirique cupiebat, ut quæ magis accommodata crederet explicandis, ac tuendis altissimis catholicæ religionis mysteriis.

Ad hæc pertractanda missus ille est ad Pintianam primum, deinde ad Salmanticensem Academiam, in quibus Theologiæ magisterium exercuit ab anno exeuntis seculi quadragésimo octavo ad quinquagesimum secundum. Ut autem in philosophicis Aristotelem, ita etiam in Theologicis secutus est Divum Thomam, interprete ac duce Eximio Doctore, quem ille Thomistarum optimum reputabat. In utroque laudabat plurimum et fundatam doctrinæ soliditatem, et admirabilem methodum in proponendis, explicandis, confirmandisque sententiis propriis, atque in alienis refutandis modestiam singularem, quam tenuit ipse, dum versatus est in scholis, deindeque cæteris commendare nunquam prætermisit. Antequam primum Theologiæ curriculum absolvisset, lætissimum accepit nuntium, concessam sibi esse a Generali Præposito solemnem quatuor votorum professionem. Hanc Vallisoleti emisit anno 1749, in templo S. Ambrosii XVIII Kal. Septemb., qui dies Assumptæ in cœlum Virgini sacer est. Eidem præmiserat consuetas S. Ignatii meditationes, ac per triduum ostiatim ex more Societatis emendicaverat. Fuit autem plerisque civibus, quibus affatim notus erat, spectaculum admirandum, atque optimi plenum exempli, primogenitum Granatensium Ducum intueri, suspensa ex humeris mantica, vicatim stipem in ea urbe quæritantem, in qua propinquos altissimæ conditionis habebat. Sed qui sponte voluit fieri pro Christo pauper, talem

lem sese exhibere, neque modo in amplissimæ civitatis conspectu, neque unquam alias in oculis cujusquam erubuit .

Post hæc alacrior ad inceptum docendi munus regreditur. Hoc autem brevioris fuisse moræ idcirco existimo, quod aliqui diutius illud protrahere conabantur. Notum erat Granatæ Duci, filium suum non vacuum gerere Magistri nomen, sed post explicatas cum laude universæ Philosophiæ quæstiones, designatum fuisse publicum Theologiæ Professorem, et cathedram cum ingenti honore occupare. Voluisset ergo, ut Salmanticæ Doctoris insignibus ornaretur, ubi jam alii Sociorum, ex primariis orti familiis, ad eundem dignitatis apicem evecti fuerant. Id equidem per semetipsum filio significasse, compertum non habeo. Sed de his egit cum Priore Pompelonensi Lubiano, qui literas ad Franciscum misit, in quibus eloquentiæ suæ vim omnem exprompsit, ut eum induceret ad lauream in Theologiæ facultate accipiendam. Verum surdo narrabat fabulam, et quamvis ingenio, et eloquio præstaret multum, nihil tamen potuit hac vice apud Franciscum efficere. Is argumenta omnia, quibus Priori adstringendus esse videbatur, facillime argumentis aliis dissolvit ex christiana humilitate desumptis, in qua erat apprime peritus. Et quoniam agebat Prior, nullum inde oriturum gravamen vel Salmantino Collegio, vel Castellanzæ provinciæ, cum ejus Pater vellet omnem præstare sumptum, ut in Doctoris gradum assumeretur, id æquo animo vix ferre potuit, ac fere cum indignatione respondit: nullo unquam pacto permissurum, ut in se perversum illud ederetur exemplum, posse Sociorum aliquem in Doctorum referri album, eoquod ex opulenta esset domo, quæ sumptus in eam pompam offerret. Deinde cuidam familiarissimo suo, qui rem omnem noverat, asseveranter dixit, quanta posset contentione obnisurum, ne hunc honoris titulum acceptaret, nisi si forte a Superioribus cogeretur. Hi autem invitum noluerunt cogere. Perspecta illis quidem erat profunda viri sapientia, et mens altissima, quæ obbeundis digne Academiæ muneribus aptissimum eum redderent, præter egregium decus, quod eidem ab ejus illustri genere accederet. Noverant etiam, in explicando perspicuum esse, solidum in defendendo, subtilem et acrem sine offensa-



sione adversariorum in oppugnando. Sed cum scirent pariter præclaras ejusdem dotes ad gubernandum, videbant illi, si Lyceum ad regendam Cathedram ingrederetur, longo nimis annorum spatio ibidem ex Lycei legibus permansurum. Igitur reluctantem cogere non voluerunt, ut eum citius possent ad Collegiorum regimen admovere. Quam vero prudens eorum consilium fuerit, planum brevi fiet, si quædam prius attingam, quæ in spirituale multorum commodum per eosdem annos effecit.

#### C A P U T I V

*De ministeriis ab eo exercitis ad animorum salutem procurandam.*

**M**agisterii sui tempore non solum erudiendis in scientia discipulis, ac bonis moribus informandis intentus erat, sed multa etiam aggressus est, quæ propius ad aliorum in spiritu profectum spectabant. Dum recolendæ Theologiæ navabat operam, præter strenuam in excipiendis confessionibus diligentiam, majus quoddam suscepit opus, in quo suum ad promovendam salutem hominum studium vel inter labores non minimæ difficultatis ostendit. Magna erat ab antiquis etiam temporibus Salmantini Collegii cura pro instruendis in officio Christianæ vitæ Batuecis, qui pascendis capris dediti, alvearibusque curandis, scabros montes habitant et incultos. Difficilem illam provinciam ea tempestate susceperat Emmanuel Diezius, in eodem Collegio infatigabilis operarius, et vir simplicitatis antiquæ, propter quam, et sparsos in Batuecorum institutione sudores acceptissimus erat Cauriensi Episcopo, cujus ditioni illi subsunt. Etenim per annos fere triginta cum juniore aliquo Sacerdote ad eos montes in ætate profectus, concionibus, et catechesibus, et privatis adhortationibus gentem illam ad timorem, et amorem Domini permovebat. Octogesimum ætatis agebat annum, cum ultimam ad Batuecos expeditionem suscepit: ab eaque Salmanticam per autumnum regressus, morbum contraxit, quem cum supra-

re non posset, ut pacifice semper vixerat, ibidem quoque pacifice obiit 21 Januarii 1767. Inter alias ejus virtutes mansuetudo, et virginitas eminebant: quarum illa nota erat omnibus, hanc autem illibatam intulisse tumulo, qui omnia ejus intima noverat, post illius obitum testatus est. Cerveræ natus fuerat anno 1687 die 25 Martii. Hunc ergo mitissimum senem Franciscus Xaverius, recenter a Sacerdotio suscepto, ad laboriosam illam comitatus est excursionem: sub illiusque ductu egregiam inter montanos illos operam posuit, ut eos ad pœnitentiam, et pietatem adduceret. Non pauca sustinenda ei fuerunt incommoda per confragosa montium itinera, quæ pedibus agenda erant, et in quibus aliquando totum juvenile robur debuit exerere, ut ulterius progredereetur. In trajectu fluminis, quem socius superare non poterat, humeros supposuit sandapilæ, intra quam senex inclusus erat, et sic eum, oppidanorum adjutus ope, in adversam ripam transvexit. Cibus utrique frugalissimus, vel ex agrestibus fructibus, radicibus, et silvestribus herbis; vel, si quando lautius reficiebantur, ex lacte caprino. Lectus autem vel nudi asseres, vel stramen. Et tamen inter pastores illos jucunde Xaverius diversabatur, quod ex ejus sermonibus conjiciebamus, quibus suam ad Batuecos missionem ita commemorabat, ut qui libenter eam susceperat, ac sapius, si licuisset, iterasset.

Alias non æque difficiles missiones habuit in his Scholarum interstationibus, quæ proficiscendi offerebant opportunitatem: multoque habuisset plures, si negotia, quæ demandata sibi fuerunt, permisissent. Sed quidquid in iis minus poterat, aliis supplere studuit utilissimis ministeriis. Nam et exercitia S. Ignatii multis meditanda proposuit, et conciones aut publicas in templis, aut privatas in Coenobiis ad Virgines, in carceribus ad custodias, aliisque in locis ad Scholasticos, et Milites frequenter habuit. Inde autem longa confessionum series exoriebatur, quibus audiendis promptas semper, et patientes præbebat aures. In hoc exercendo munere, quantum assequi per effecta possumus, peritiam ac dexteritatem habuit singularem. Ubique enim plurimi ad eum confluebant, et cum linguam ejus ad animi sananda vulnera salutiferam ex-

perti fuissent, avidius deinde revertebantur. Compostellæ, Salmanticæ, Vallisoleti, Burgis ad illum summi, et infimi magno accedebant numero: et quamvis hos libentius exciperet et audiret, in illis tamen consiliorum suorum fructus luculentius apparebat. Salmanticæ nobiles aliquot adolescentes, qui Collegiis majoribus adscripti erant, et Franciscum animi ductorem elegerant, multam ei laudem pepererunt, cum ab aliis passim ob perspectas ipsorum virtutes digito monstrarentur. In aliis quoque urbibus et primarii cives, et conspicui templi forique Ministri, et militares Præfecti, qui eodem conscientiæ moderatore utebantur, optimum ejus ductum integritate morum, et præclaræ vitæ exemplis comprobabant. Neque tantummodo extranei, sed domestici etiam, et conjunctissimi non semel eum propter opinionem virtutis suæ in conscientiæ arbitrum adhibuerunt. Villamfrancam Guipuzcoæ oppidum confirmandæ valetudinis causa profectus, ad sororem suam Michaelam Idiaqueziam divertit. Nupserat hæc Marchioni de Valmediano Joachimo de Arteaga, qui deinde inter Hispaniæ Magnates relatus est. Hi ergo nobiles æque, ac pii conjuges, quod alias occasione simili fecerant, arcana sua Francisco in confessione aperuerunt. Idem Marchionum filii quatuor effecerunt, quibus idonea jam erat ætas: idem primogenita ipsorum filia Anna Joachima, tunc Basurti Domina, postmodum autem, ditione illa relicta, et quidquid ei mundus ab illustrissima stirpe, ac singularibus naturæ dotibus pollicebatur, Sanctimonialis in Tudelensi domo Virginum Societatis Marianæ, quæ publicæ puellarum incumbunt educationi, ubi paulo post vitam cum suavissimum virtutum odore finivit. Enimvero in Arteagarum familia ita erant omnia rectissime constituta, Christianæque disciplinæ ita vigeat studium, ut singuli sine rubore possent animi sinus Sacerdotibus aperire: sed ut eisdem et fratri, et leviro, et avunculo manifestaverint, fieri nequaquam potuit, prout sunt hominum ingenia, nisi præclaram de sanctitate illius existimationem habuissent. Ipsa etiam Francisci mater confessionem apud filium instituire aliquando desideravit: sed hunc debita reverentia comminuit, ne votis ejus annueret, illiusque sermonem prudenter ad alia convertit. Denique *Francisca de Sancto Ignatio*,

tio, altera Francisci soror, quæ in Azcoithiensi S. Crucis Cœnobio religiosissimam vitam duxit (eam deinde imitata est soror ejus Elisabetha, sacrum pariter induta velum in celebri Parthenone Matritensi, ab Incarnatione nuncupato) pœnitentiæ Sacramentum sæpe a fratre suo recepit: sæpiusque ab eodem absente, vel cum relegatus in Italiam venerat, consilium in rebus animi per literas petiit.

Neque propterea tam multi ad eum recurrerant, quod Dei offensas facile dissimularet. Ut de his intime dolebat ipse, sic etiam eas vindicare curabat, et impedire. Variam pro variis animi morbis prudenter adhibens medicinam, protervos et contumaces acriter objurgabat: præfidentibus frangebatur spiritus: spem diffidentibus injiciebat: timidis ac pusillanimis addebat animos: omnesque ita dimittere conabatur, ut ad se non invite reverterentur. Patientiam in primis, et longanimitatem præ se ferebat, ut nunquam illorum desperaret emendationem, qui vel fragiliores esse viderentur, vel in perversis moribus obstinatiores. Etenim, cum audiret ab omnibus, qui suis pedibus accidebant, in ipso statim confessionis initio Patris se nomine compellari, æquissimum utique judicabat, eos pariter in filiorum habere loco, et paternum erga illos animum exhibere. Inciderat de his aliquando sermo in familiari colloquutione, cui Franciscus jam senior aderat: et cum is aliqua pro temporis opportunitate dixisset, conversus ad eum alius: *Existimo, inquit, neminem a se fuisse sine absolutione dimissum.* Id ille neque negare voluit, neque item concedere, solumque respondit: *Hoc tibi confirmare possum, difficilem me semper ad desperandum fuisse.* Innuebat scilicet, nihil non tentandum ad peccatorum salutem obtinendam, neque committendum, ut deseratur æger, si primi conatus irriti fortasse ceciderint. Sed iterum, ac sæpius adhibenda remedia, Deumque ferventius interim obsecrandum, ut operi perfectionem adjiciat, quod ipse inchoavit: eaque via suluberimos effectus expertum se esse affirmabat. Cum audisset olim, quemdam e Societate famosam feminam ad peragenda S. Ignatii exercitia recipere non voluisse, nisi prius ab eo loco discederet, ubi obscœnis amoribus cum magna Christiani orbis offensione virum principem illaqueaverat; hanc ille agendi ra-

tionem adduci non potuit ut probaret. Imo etiam ajebat, excetram illam ad commentandas fidei veritates se facile fuisse admissurum; cum fieri profecto posset, ut per eas ad bonam rediret frugem; aut si secus contingeret, integrum sibi esset reliquam officii sui partem explere.

In orationibus, quas ad populum, vel ad privatos cœtus habebat, quamvis excellens in oratoria esset facultate; quod inter docendum eam, et sæpe alias ostendit; non tamen sublimi dicendi genere ut plurimum utebatur. Illam plerumque tenebat orationis formam, quam omnes facillime caperent, licet gravis semper esset, ac sententiosa. Hoc etiam ad faciliorem captum haud modicum efficiebat, quod non festinanter, ac propere, sed paulatim, cunctanterque loqueretur. Inde autem aliqui existimabant, pro ingenii sui fœcunditate orationem plerumque fundere extemporaneam. Sed enim a veritate tantum ii aberrabant, quantum ille ab quorundam aberat opinione, qui sacrum Oratorem in suggestum ita velent ascendere, ut ea solum paratus sit dicere, quæ ibidem a Domini spiritu suggerantur. Id valde improbabat ipse, proptereaque longa commentatione parabat omnia, et quatenus alia negotia sinerent, et argumenti exigeret gravitas, omnia etiam, vel pleraque commendabat scriptis. Dum Theologiam docebat Vallisoleti, multis auditorum plausibus exceptæ fuerunt orationes duæ, quas ibidem dixit: alteram de S. Ambrosio in ejus templo, alteram in S. Albani de Maria Virgine Vulnerata. Hanc ibi denominationem habet religiosissima Dei Matris imago, quam Gadibus hæretici Angli sacrilego furore vulneribus appetiverunt: indeque Vallisoletum translata est ad Seminarium Anglorum S. Albani, ut ab eis coleretur impensius, quorum a conterraneis sceleratius violata fuerat. Utrique illi orationi quamplures adfuerunt viri doctrina, dignitateque insignes: quibus admiranda fuit et propositionis jucunda novitas, et argumentorum ad eam comprobendam efficacitas, et apta cunctarum partium dispositio, et singularum elegans exornatio. In domesticis adhortationibus quæcunque susciperet pextractanda, loculenter adeo explicabat, et tam vividis coloribus depingebat, ut ea non modo animi auditorum, sed prope oculis observari viderentur: unde per  
mul-

multos consequentes dies frequens erat et fructuosa domesticorum de his , quæ ab ipso audierant , sermocinatio .

Sed vis verborum ejus ad animos permovendos non solum in concionibus , sed in privatis etiam colloquiis emicuit . Attentus ad omnem juvandi homines occasionem , multis pro loci ac temporis opportunitate consilia dabat , quæ salubres ferebant fructus post longam etiam annorum seriem . Virum ego novi septuagenarium , qui dum puer esset , Franciscum eo tempore convenire cœpit , cum is Salmanticæ alterum theologiæ studii cursum absolverat . *Et jam inde , inquit , a prima quam habui cum ipso allocutione , videbar mihi agere cum homine sanctitate vitæ commendabili . Talia illius erant verba , sanctaque consilia . Ingressus ad eum quodam die , legentem reperi sacrum Codicem , dataque inter nos salute : Ecce , ait , quomodo vocanti Deo sit obaudiendum . Hic enim legebam modo , vocatum a Deo Abrahamum , statim respondisse : Adsum . Cogitabat tunc puer de religiosæ vitæ statu deligendo : eaque verba sic illi adhæserunt , ut non solum brevi Societatem adierit , sed nunc etiam asserat , nullo unquam tempore memoriam eorum abjecisse . Idem adjungit , tunc primum cognovisse de cultu Cordis Jesu , et Mariæ , acceptis ab Idiaquezio imaginibus aliquot e multis , quas ad eum mittebat præclarus ille Sacerdos Franciscus Nunnius , qui promovendæ pietati verbis , et exemplis Navæ regis insigniter adlaborabat , et Francisci nostri studium in eodem opere urgendo bene perspexerat .*

Is libenter ad ea , quæ diximus , intendebat animum , nullumque detrectabat ministerii genus , quod esset augendis animarum lucris opportunum . Sed interea majus ei parabatur onus , quod fere in omni vitæ tempus laturus erat , quamvis non ita libenter ob profundam humilitatem , qua de se demisse sentiebat semper . Alia tamen de illo Præpositorum opinio erat , longeque diversa sententia . Viderant in demandatis ei muneribus , quam recte , ac diligenter eadem administrasset . Perspexerant prudentiam ejus in multis agendarum rerum consultationibus , quibus pro sui ratione officii sæpe interfuerat . Observaverant in eo benignitatem cum fortitudine , modestiam cum magnanimitate , patientiam cum caritate conjunc-



junetam, aliaque præclara dona, quæ illum præfecturis aptissimum efficiebant. Et quanquam idoneum etiam regendis Cathedralis judicabant, de illius tamen conatu ne Doctor inauguraretur, minime doluerunt, cum possent eum diutius regendis hominibus adhibere. Jam inde ab ipso tirocinii tempore Magister ejus Sartolus, qualis, quantusque futurus esset Franciscus, non obscure significaverat. Cum enim prudentiorem in eo agendi, cogitandique rationem animadverteret, hanc de illo coram aliquot veteranis Patribus admirabilem pronuntiavit sententiam: si ad ea pertinuisset tempora, cum S. Ignatius, non tam ætatis, ac religionis computatis annis, quam æstimate virtutis, et prudentiæ pondere, juniorem aliquem multis provectoribus imponebat; dignum utique habendum fuisse, cui non solum alicujus Collegii, vel Provinciæ, sed universæ committeretur regimen Societatis. Quod licet per hyperbolem a tam prudente viro dictum esse non dubitem; is tamen prænuntiasset videri posset honorificum illud judicium, quod de Francisco deinde gravissimi tulerunt viri, qui Congregationi XVIII, ut infra dicam, adfuerunt.

## C A P U T V.

### *Burgensis Collegii Rector designatur.*

**A**nno volventis seculi quinquagesimo secundo quæstiones Theologicas iterum explicabat Vallisoleti, cum literæ aliatæ sunt Roma, quibus ei Præpositus Generalis Collegii Burgensis curam demandabat. Expavit ad inexpectatum nuntium humilis Francisci animus, initioque literas de afferentis manu recipere recusavit. Deinde aliis, qui ad accipiendas vehementer illum urgebant, neutiquam per eas literas impediri se ajebat, quominus rem prius attenta consideratione perpenderet, et quæ objicienda sibi occurrerent, juxta Ignatii leges, cum debita submissione proponeret. Postquam illud impense Domino commendavit, quosdam etiam in consilium adhibuit, quorum erat perspecta virtus, et nota prudentia. Horum autem responsis, qui, salva officii religione, repugnare non

posse affirmarunt, adductus tandem est, ut literas acceptaret: cum ea tamen animi reluctantione, quam ipse cuidam e discipulis significavit. Huic enim agenti sibi, nullum jam evadendi aditum superesse, sed omnino caput oneri subjiciendum: *Recte ais*, respondit ille: *verumtamen res ardua est, mihi crede, nimiumque difficilis gubernatio, si ad omnes instituti numeros sit exigenda. Ora pro me Dominum.* Sic ille sollicitum, sui que diffidentem animum indicabat. Sed nemo ad imperandum est aptior, quam qui detrectat imperium, illudque majorum auctoritate compulsus assumit.

Vertente jam vere Burgos profectus est, ubi prima ejus cura fuit de Collegii statu diligenter cognoscere tam in his, quæ ad spiritualia spectabant, quam ad temporaria. Ut autem boni plurimum, quod in prioribus reperit, promovere facilius posset, ad reparanda plurima, quæ in posterioribus deerant, cogitationes suas convertit. Notum erat omnibus provincie Sociis quam exigua res Burgensis Collegii esset. Templum quidem, et Sacristium bene erant instructa: quanquam et iis novus Rector novum etiam ornatum adjunxit. Sed in Vestiario repositum invenit thoracem unicum, qui suffici aliis posset, quibus induti erant Socii, cum lavandi essent illi, vel reficiendi. Multa quoque desiderabantur in cæteris apothecis: ac præterea rimosum erat Collegii tectum, proindeque sarcendum imbricibus, ne graviora damna ex frequenti stillicidio provenirent. Postquam attente omnia inspexerat, summam earum rerum confecit, quæ parato opus erant, eamque Procuratori tradidit expediendam. Is erat Michael Sanctistephani ex Adjutorum numero, vir sane humilis, et pius, tantæque in seipsum austeritatis, quantam in alios benignitatem perhibebat: quanquam ne largior erga omnes esset, ex domesticæ rei angustiis prohibebatur. Nunc ergo, cum longissimum percurrisset indicem, in quo tam multa sibi comparanda jubebantur, vix, quo se verteret, inveniebat: nam et scrinia pene erant vacua, et mutuari difficile judicabat, cum jam ære alieno gravatus esset non modico. Tandem ex consilio alterius, quocum de his privatim egerat, difficultates exponere decrevit, quæ hujus rei obstare videbantur executioni: easque brevi scripto comprehensas, Rectori modeste obtulit

tulit considerandas. Laudavit is factum, quod Procuratoris consentaneum erat regulis: sed nihilo minus in incepto perstitit, eidemque ad bene sperandum confirmato dixit, ut illa omnia emeret, quæ indicata jam fuerant; se autem de ratione solvendi, ut re vera fecit, omnino provisurum.

Alia etiam præstitit, quæ vel prorsus necessaria, vel admodum erant utilia. Inter Collegii creditores civis quidam erat, qui pecuniæ vim ingentem dederat mutuam, et alia insuper contulerat beneficia. Sed cum ob eam causam nimium sibi arrogaret, et in administrationis partem vellet seingere, curavit Rector, ut debitum illud quamprimum extingueretur, et sic hominem a domesticis negotiis exclusit. Post hæc magnificam aram, quæ jam ibi erecta fuerat Divo Xaverio, propriis expensis contexit auro: multumque industria sua contulit ad inaurandam aram maximam ejusdem templi. Prægrandem etiam argenti summam impendit in reparandis Scholis tum puerorum, qui primas literas, et Grammaticam addiscebant, tum juvenum, qui Philosophiæ, Theologiæque operam dabant. Unde merito *Idiaquezii* nomen, ob effusam adeo beneficentiam, ex Superiorum decreto inter insignes *Burgensis* Collegii Benefactores relatum est. Sed cum gravioribus intentus esset, non ideo cætera, quæ levioris erant ponderis, negligebat. Paterna cavebat solitudine, ne quid eorum deesset Sociis, quæ communis ferebat vivendi ratio: quo in genere multum ei fuit enitendum, ut immoderatam Promi cujusdam, optimi cæteroqui viri, parsimoniam coerceret. Nul- lum tamen ex inferioribus administris in suo munere volebat diligentior, quam *Valetudinarii* præfectum, ut is ægotantibus non modo necessaria, sed jucundiora quoque, quantum fieri posset, subministraret. Adibat ipse frequenter infirmos, ab eisque distincte inquirebat, numquid in cibo, aut potu, aut medicamentis tempori adhibendis a præfecto peccatum esset? num etiam in curanda commoditate lecti, cubiculique munditiæ debitam solertiam exhiberet? Et cum is in evacuando scaphio negligentior aliquando fuisset, Rector illud in latrinam ea via portavit, qua præfectum habiturus erat obvium, ut facto ipso negligentiam ejus acrius, et efficacius coargueret.

Ad studia vero virtutum, et Societatis ministeria promovenda conatum nihilo remissiore adhibuit. Ad utrumque Socios et efficacibus verbis, et suo maxime incitabat exemplo. Nam ut exactus erat in domestica disciplina servanda, sic erat strenuus in laboribus aggrediendis, qui vel publicæ cunctorum civium, vel privatæ multorum saluti deservirent. Ipse aderat in templo primus ad pœnitentium confessiones audiendas: accurrebatque promptus ad ægrotos, et moribundos, qui ejus opem in extremis implorabant. Tam sæpe, quam cæteri, vel frequentius etiam, e superiori dicebat loco nunc domi, nunc in Cœnobiis sacrarum Virginum, nunc in primario urbis templo, ubi Canonicorum expectationem superavit. Nonnunquam, recurrentibus esurialibus feriis, per multos continentes dies binas quotidie conciones habuit. Mane dicebat ad milites in eorum urbanis castris, postquam longam dederat operam confessionibus excipiendis. Post meridiem autem extra urbem ad duo fere millia prodibat in oppidulum, quod regio Huelgarum Monasterio subjacet. In commissionem sacram agere instituit, obtenta facultate ab Antistita Monasterii, quæ in locis amplissimæ suæ ditionis potestate fungitur fere Pontificia. Id autem, quod novum multis videri poterit, quam vere dictum sit, intelligere licet ex literis ejusdem Antistitæ, quas apud nos habemus, et quarum exemplum hic juvat apponere.

## NOS DOMNA MARIA HOZES

„ Dei, et Apostolicæ Sanctæ Sedis gratia, Antistita Regalis Monasterii Huelgarum prope Burgensem urbem, Ordinis Cisterciensis, et Habitus P. N. S. Bernardi, Domina Superior, Præolata Mater, et legitima Administra in spiritualibus et temporalibus prædicti Regalis Monasterii, ejusque Hospitalis domus, quam appellant *Regis*; Cœnobiorum quoque, Templorum, et Sacellorum suæ filiationis, Oppidorum, et Castellorum suæ Jurisdictionis, Ditionis, et Clientelæ; ex vi Bullarum, et Concessionum Apostolicarum, cum jurisdictione omnimoda, privata, quasi Episcopali nullius Diocæsis; et ex vi Regalium Privilegiorum;

*Lib. II.*

g g

utram-

„ utramque enim jurisdictionem tranquille, pacificeque exercemus, ut publicum est, ac notorium. „

*Præsentium tenore literarum, attenta virtute, et scientia N. N. potestatem ei facimus, ut pro tempore nostra voluntatis administrare possit sanctum Pœnitentiæ Sacramentum ( exceptis Religiosis feminis sine speciali nostra facultate ) quibuscunque personis apud ipsum confiteri volentibus, a que in hoc dicto Monasterio, atque in Hospitali nostra domo, quæ Regis appellatur, et in cæteris Cœnobiis, Templis, et Sacellis nostra filiationis, sine præjudicio juris Parochialis; absolvendo eos ab omnibus peccatis, iis exceptis, quæ Sanctitati suæ, et ex jure sunt reservata, procedendo in omnibus multa cum prudentia, maturitate, et attentione; observatisque omnibus Decretis Apostolicis, et Sacri Tribunalis Sanctæ Inquisitionis. Ad quorum effectum præsentem dari jussimus, ac dedimus, nostro subscriptas Nomine, signatasque Sigillo Abbatiali nostra Dignitatis, et a præsentem Notario roboratas &c.*

*Possit etiam Monialium confessiones audire, et Sanctum Evangelium predicare in omni nostra ditione, ac jurisdictione &c.*

Igitur iteratis Idiaquezii catechesibus, et concionibus populus ille, qui nunquam post incolarum memoriam eo prædicationis genere fuerat excultus, pœnitentiæ concepit sensus, et ad pietatis recaluit studia. Multum ad id genus expeditiones afficiebatur ipse propter uberes justitiæ fructus, qui plerumque inde proveniunt, aliosque pariter ad eandem adhortabatur. Sed quoniam Burgensibus Sociis tanta messis copia intra urbem erat, ut longius excurrere non vacaret, a provinciæ Præposito Sacerdotes duos obtinuit, qui tertio probationis anno exercebantur. Hos misit in disjuncta septem oppida ( Bellimar in eis fuit, ubi Societas habuerat olim domicilium ) in quibus illi strenue adlaborarunt, ut indigenas ad vitia detestanda, et ad novæ vitæ propositum permoverent. Neque inde aut populis, aut Collegio ipsi major aliquis sumptus accrevit, cum aliunde Rector sacris illis Præconibus de necessario sumptu providerit. Certam pecuniæ summam legaverat quidam Burgensi nosocomio, quod ibidem Barrantes vocant: eo tamen pacto, ut Collegio Societatis quinquageni donarentur aurei, quoties Socii per dies totidem quinquage-

nos

nos missionem aliquam intra diœcesim illam susciperent. Cum id notum Rectori esset, a Curionibus, et Magistratibus cuiusque oppidi literas petiit, quibus publicam faciebant fidem, par illud Sacerdotum quinquaginta dies in ea sacra expeditione posuisse. Exhibitisque nosocomii Administratori literis, prædictam ille numerorum summam Rectori misit, qui eam solvendis profectionis ejus expensis adjudicavit.

Multam quoque operam contulit ad animos hominum piis meditationibus ex disciplina S. Ignatii exercendos. Inter plurimos, quos eo commentationum genere instruxit, dignus est memorari Joannes Franciscus Guillenius, in Academia primum Cæsaraugustana Sacræ Theologiæ Doctor, deinde Canariis Insulis (Fortunatas dixerunt veteres) datus Episcopus, ac demum ad Burgensem Archidiœcesim evectus. Is in Rectore Idiaquezio cum eximiam prudentiam, spectatamque doctrinam, et morum probitatem animadverteret, illum a confessionibus habere voluit, et in gravioribus Pastoralis curæ negotiis frequenter ejusdem consilium exquirebat. Eidem aliquando dixit, optare se aliquam cæteris occupationibus particulam temporis suffurari, ut eam inspiciendis animi sui rebus impenderet: proptereaque in Collegium secedere decrevisse, ut ab aliorum interventu remotus, sub illius ductu divinis incumberet meditationibus. Tam laudabili optimi Præsulis desiderio non potuit Rector obsistere. Advenienti deinde per quadragesimam jejuniorum eam designavit temporis partitionem, quæ personæ congruebat, et ætati: quarum hæc erat valde inclinata, illa vero ad pietatis opera sua sponte propensa. Cunctis autem domesticis admiranda fuit singularis in tali viro docilitas, qua descriptas commentationum vices ita observabat exacte, ut ab eis nollet vel transversum unguem arbitrio suo discedere. Per eos dies quidam Sociorum verba facturum in templo, dum in suggestum pergit, ad Archiepiscopum ingreditur, ab eoque rogat, ut auditoribus suis quadraginta dierum Indulgentiam concessam velit. Petitioni libenter annuit: simul tamen inquit, num ipse interesse concioni possit? Quidni possis? aiebat Socius: si modo id tibi placeat, nil obstat omnino. Sed Rector, opponebat Antistes, nihil super hoc mihi dixit: et aliud quiddam agendum mo-



do erat ex illius præscripto. Instabat nihilominus Socius, ut, quod libitum esset, ipse decerneret. Sed cum id obtinere non posset, Rectorem monuit, quem protinus accurrentem sic afatus est Archiepiscopus: *Paratus sum in concionem prodire, si jusseris; aut hic remanere, si velis.* Deduxit eum Rector in superiorem chorum, unde Concionatorem commode audire poterat: omnesque in Ecclesiæ Principe illam adversus animi ductorem observantiam suspexerunt, quæ foret vel in religioso viro summe laudanda. Rector vero, qui plures alias, et præstantes æque virtutes in egregio Pastore agnoscebat; multaque noverat benevolentia signa, quæ idem in Canariis, et Burgis, et alibi erga Societatem exhibuerat; jam pridem Romam scripserat ad Præpositum Generalem, ut fraternitatis jura, et spiritualium bonorum participationem, quam amplissime fieri posset, benemerenti Præsuli largiretur. Commodum Præpositi literæ, quibus eâ Guillenio germanitas concedebatur, cum is adhuc sacris insisteret exercitiis, Burgos perlatae sunt ad Rectorem. Hic autem opportunitatem illam arripiens, literas pretioso circumornatas margine, qui Rectoris jussu Romæ fuerat elaboratus, coram Sociis obtulit Archiepiscopo, brevi ad eum habita oratione eucharistica, in qua illius erga Societatem præclara merita commemorabat, atque hujus aliquam grati animi significationem in præsentis dono exhibebat. Lætissimo vultu, magnisque gratiarum actionibus beneficium illud Præsul accepit: suamque regressus domum, literas in patenti loco decentissime collocavit, et advenientibus ostendebat, ut se Societatis fratrem esse, quod plurimi faciebat ipse, ceteri agnoscerent.

Hunc autem fraternæ dilectionis affectum, quo Socios humanissimus Pontifex complectebatur, ampliori deinde testatus est beneficio. Burgense Collegium, ubi olim et græcæ literæ, et severiores floruerant disciplinae, tanta premebatur modo facultatum inopia, ut paucos aleret Sacerdotes, quorum unus moralem Theologiam, terni Grammaticam edocebant, reliquis ad varia intentis pro animarum salute ministeria. Archiepiscopus de augendo Magistrorum numero cogitavit, ut in metropolitana urbe, quæ sedes Regum fuerat, et Castellæ primatum obtinet, faciliorem juventuti aditum ad studia literarum aperiret,

riret. Rectori ergo syngrapham dedit undecim mille aureorum, sive ducatum, ut Hispani loquuntur, viginti millium, ex quorum fructibus bini saltem alerentur Socii, quorum alter Philosophiam, alter vero Theologiam traderet Scholasticam: disertisque declaravit verbis, per donationem illam nullum se onus Collegio imponere, quod ex justitia subire teneretur. Huic tanto beneficio ut aliquam Rector referret gratiam, Guillenium inter insignes Collegii benefactores recensendum curavit, misso ejus nomine in album, quod appensum in Sacratio erat, ut et illius beneficentia nota esset omnibus, et ipse particeps fieret Sacrificiorum, et precum, quæ singulis annis, et mensibus, et hebdomadis peragebantur a Sociis pro ipsorum benefactoribus. Deinde in studiorum proxima instauratione novi designati sunt Professores, qui Cathedras occuparent, quas erexerat Archiepiscopus, habita in ejus laudem Oratione latina, multisque diversi generis, et vario idiomate carminibus evulgatis. Aliud etiam benevolentiae monumentum Burgensibus Sociis Guillenius reliquit, quod silentio involvendum esse non duxi. Tractatus illos, quos in Scholis dictaverat auditoribus, dum esset Cæsaraugustæ Doctor, dono dedit Collegii Magistris, quibus magno esse poterant usus, cum Guillenius in Scholæ quæstionibus pertractandis multa ingenii laude florisset. Pulchre illi compacti erant, sed cum nullo inscripti essent titulo, Rector, currente calamo, hoc eis apposuit epigrammatium :

*Qui victum dederat, donat sua scripta Magistris:*

*Quos pius Anistes sic alit, atque docet.*

Nimius fortasse, justoque prolixior in exponenda Guillenii liberalitate quibusdam videbor fuisse. Sed longus de beneficiis sermo, quanto magis conferentem dedecet, tanto est in accipientibus laudabilior. Nec vero hæc ipsa largitas Archiepiscopi ad commendationem Idiaquezii, cujus gesta exequimur, parum credenda est pertinere. Hujus enim virtuti, ac sapientiæ tantum tribuebat Præsul, ut in expediendis difficillimis rebus, atque his maxime, quæ Theologicam requirebant scientiam, vix quidquam sine illius consilio statueret. Inde amabat eum plurimum, et pro susceptis in suarum ovium commodum laboribus eidem gratificari studebat. Haud minorem

rem apud cives inivit gratiam, quos in primo fere ad eorum urbem accessu sibi obstrinxerat inæstimabili beneficio. Inter multas nobiliorum familias graves insurrexerant dissensiones, quæ veterem eliminaverant amicitiam. Rector ad eam revocandam aggressus, urbanissime convenire singulos, alios submisso rogare, deprecari, alios prudenti coarguere severitate, omnes ad condonandas et reparandas injurias gravissimis rationibus adhortari: donec pacem in illis constituit domibus, quæ antea, ut affirmabat Sacerdos quidam, infernarum sedium speciem referebant. Exinde Burgensibus magno in honore fuit Idiaquezius, quem multi Rectorem illustrem, Rectorem doctum, et sanctum frequenter denominabant.

## C A P U T V I.

*Renuntiatus tirocinii Rector, Romam mittitur  
ad comitia.*

**P**ost triennium in Burgensi administrando Collegio magna cum approbatione peractum, IV Nonas Majas 1755 missus est Villagarsiam, ut Collegium illud regeret, ac tirocinum susciperet magisterium. Hoc enimvero majus erat onus, longeque difficilius, quam Burgensis administratio: nec tamen aliquid molitus est, quod sciam, ut eam gravissimam effugeret occupationem. Inde autem colligendum est manifeste, contentionem illam, qua sæpe alias honorifica detrectare conatus est munera, non ex abjectione animi, aut fugiendi laboris desiderio, sed ex Christianæ humilitatis studio provenisse, quod eum constanter induxit ad honores, et plausus hominum declinandos. Neque hos admodum timere poterat in solitudine Villagarsiensis, ubi fere tantum domesticos intra parietes tota ejus exercenda, et versanda erat industria. Jucunda quoque rememoratio fervoris antiqui, quem olim in illis conceperat religiosæ vitæ incunabulis, multum potuit eum allicere, ut libenter munus illud amplecteretur, a quo novum ad studia virtutum ardorem facile accessurum sibi esse sperabat. Sed, ut instabilis est humanarum rerum conditio, pacificam illam sedem,

in

in qua diutius jucundissime permansisset, aliis nec opinato supervenientibus causis, nonnisi parumper in præsentia tenere potuit.

Quo die Bürgis excesserat, ut iter ageret Villagarsiense, vivere desierat Romæ R. P. Ignatius Vicecomes, Præpositus Generalis Societatis. Pro successore diligendo, bini per singulas Provincias designandi erant Socii, qui simul cum Provinciali Romam ad electionem faciendam proficiscerentur. Ad hoc ergo munus in Castellanzæ Provinciæ conventu propter insignes illius dotes electus est Idiáquezius, qui multa tentavit, ut ab illo onere, cui se imparem reputabat, eximeretur. Neque verba tantum, et preces, sed lacrymas etiam largiter fudit, ut electionem illam, quantum se penes erat, impediret. Cum enim fama vulgasset, expeti se Romæ, et super hoc literas ad Provinciæ Præpositum fuisse directas, incredibile dictu est, quantum is rumor illius animum exterruerit. Etenim illud est sinceræ humilitatis ingenium, ut quo quisque a cæteris habetur dignior, tanto se ipse judicet indigniorem. Xaverius certe longissime aberat a quorundam misera conditione, qui claris natalibus orti, fumosis majorum imaginibus insolescunt: et cum nulla ipsi laude nitantur excellere, omnia sibi arrogant, nihilque deberi sibi non existimant propter egregia progenitorum facinora, a quibus illi turpissime desciverunt. Contra hæc Franciscus noster, cum splendida familiæ suæ decora probro sibi futura esse cognosceret, nisi eis aliquid de suo ipse adderet, ad persecuendam virtutis viam, quæ vera demum est gloria, toto pectore incubuit. Et quoniam inter cæteras ejus virtutes solida eminebat humilitas, quidquid honoris sibi deferebatur ab aliis, non tam suis, quam suorum meritis adjudicabat. Illa vero præclara munia, quæ sæpe jussus est exercere, vix adducebatur, ut crederet, propterea sibi demandari, quod esset eorum dignus; sed potius propter sui generis splendorem, et clarissimam suæ gentis stirpem, quæ Societati eximios sanctitate viros dederat Ignatium, Xaverium, et Borgiam. Is eum angebat timor, eodemque vehementius incitabatur ad conspicua detrectanda munera, nequid suo vincto Societas detrimenti caperet, quam ipse summo opere diligebat. Nunc igitur legationem illam Romanam ut  
veri-

verissimam calamitatem deprecabatur, ex qua nonnihil honoris imminere sibi pertimescebat, prout rumores ferebant sparsi, quo nihil ingratus eidem poterat evenire. Suamque in renitendo constantiam apud amicum excusaturus, qui cum ipso intererat Provinciali conventui, dolenter eidem dixit. *Avertat Deus tam perniciosum exemplum, ut honorifica Societatis munera propter sanguinis claritudinem aut mihi, aut alteri deferantur, qui proprio sit merito destitutus.* Sed quamvis multum pro revocanda electione sua contenderit, aliorum tamen cedere sententiæ debuit, qui longe diversam de illius meritis induerant opinionem.

Dum Romam pergeret, multis in locis perhonorifice fuit exceptus. Burgis, ubi recentissima erat rerum ab eo bene gestarum memoria, tota pene civitas ad salutandum illum confluit. Galli etiam Socii, qui suum quodammodo Xaverium reputabant, quem a pueritia bonis artibus erudierant, et apud ipsos voluisse Societati dare nomen sciebant, magnis modo benevolentiae signis, et præcipuis honoribus prosequabantur. Sed ex illorum obsequiis non potuit ipse, quin multum hauriret amaritudinis: cum præsertim unum, aut alterum post tergum suum incaute cum aliis ita mussitantem audierit: *En vobis Hispania Magnatem ex Xaveriana stirpe, qui modo Societatis Præpositus eligitur.* Nihil esse poterat efficientius ad Francisci animum, quem timores jam diu sollicitabant, penitus conturbandum. Conceptus inde mœror vires etiam afflixit corporis, contractoque tandem morbo, coactus est Augustæ Taurinorum subsistere. Provincialis, quoniam comitiorum urgebat tempus, commendata Taurinis Patribus Francisci cura, qui omnibus erga illum usi sunt caritatis officiis, cum Electore altero Romam ire perrexit. Ibi peringratum fuit nuntium de adversa Idiaquezii valetudine. Multi enim Electorum oculos in eum conjecerant, et aliorum animi, prout affirmabat deinde quidam ipsorum, ita comparati erant, ut Idiaquezius in Generalem assumptus esset, si Congregationi ad conductam electioni diem adfuisset. Postmodum acceptis Taurino literis, quibus lætiora de salute illius afferebantur, ab iisdem Electoribus renunciatus est Assistens Hispaniæ. Quæ quidem electio multis eo visa est respexisse, ut Idiaquezius, si forte R. P.

Aloy-



sio Centuriono superviveret, qui de vena in aetate Praepositus creatus fuerat, et ante biennium ab electione decessit, suffi-  
ci eidem posset: atque interim Romae degens, in his, quae  
ad regimen Societatis proxime pertinebant, exerceretur.

Sed si huc aspexerunt aliqui, Franciscus ab scopo recu-  
sandi honores nunquam deflexit oculos. De munere delato  
sibi certior effectus, cum primum ex infirmitate convaluit,  
sine mora contendit Romam, antequam Electorum coetus dis-  
solveretur. Die vigesima sexta Decembris in Urbem ingres-  
sus, ad congregatos Patres recta perrexit: ibique multa ex-  
cusavit, quominus parem se fore arbitraretur labori ejus mu-  
neris: multa etiam deprecatus est, ac flevit multa, ut ejus  
abdicationem Congregatio comprobaret. Re in deliberationem  
adducta, rogatisque, eo excluso, Patrum suffragiis, nonnul-  
li ad acceptandum munus cogendum esse censebant, nec ra-  
tionibus cedendum esse, quas eidem profunda suggerebat hu-  
militas. Alii vero non tam rationibus adducti, quam permo-  
ti deprecationibus, ac suspiriis, annuendum illius petitioni  
judicabant. Inter caeteros quidam e Germania Socius Franci-  
sci angorem tanta est miseratione persecutus, ut elata voce  
clamaverit: *Fiat semel et iterum Provincialis, et fruatur eo  
Societas, nec certa morti addicetur.* Cum in eam sententiam  
reliqui adiissent, tandem abdicationem ratam habendam esse  
censuerunt. Tum demum Franciscus respiravit, abstersisque  
lacrymis, et moerore, sessionibus, quae deinceps habitae fue-  
runt, laetissime interfuit. Romanos etiam Socios, praesertim-  
que illos, qui in Professorum domo habitabant, jucundissi-  
ma consuetudine, moribusque facillimis sibi stricte conjun-  
xit: ut dolerent deinde, cum ab eis discessurus erat, quod  
opportunitatem habendi eum diutius amisissent.

Quos in Urbe dies egit, his domesticorum colloquiis  
multo libentius detinebatur, quam externorum salutationibus,  
quorum non pauci e primariis ad eum convenerunt, multis-  
que benevolentiae, atque observantiae significationibus sunt pro-  
secuti. Quod ego non solum antiquissimo suae domus stem-  
mati tribuendum puto, sed recenti etiam exemplo modestiae,  
qua munus sibi sponte delatum abdicaverat. Neque enim ma-  
gis ad devinciendos animos hominum ea facta valent, quibus



pariuntur honores, quam valeant illa, quibus honores promeriti recusantur. Pontifex Maximus Benedictus XIV, quo die Congregationis Patres ad pedum admisit osculum, de Primogenito Ducis Granatæ nominatim interrogavit: qui cum indicatus ei fuisset, in illius conspectu singularem ostendit animi voluptatem. Inter viros principes, qui favere illi studuerunt, quidam e Collegio Purpuratorum, cum de contentione agnovisset, qua demandatam occupationem repudiare nitentur, per epistolium hortatus est, ut Assistantis munus acciperet: atque ut majorem vim verbis adderet, suum ipsius allegabat exemplum, qui purpuream Galerum minime recusaverat. Respondit ei Franciscus, de præstantibus Eminentissimi viri dotibus altissimam sibi esse opinionem: sed in eo, quod de Galeri admissione adungebat, quamvis hoc ipse non reprobarer, tamen laudabilius multo sua quidem sententia fuisse facturum, si dignitatem illam non admisisset. Is erat de honoribus Francisci sensus, quem ipse perpetuo tenuit, ut se illis eripere conaretur, quantum religiosæ jura sinerent obedientiæ. Ad abjecta quæque ac viliora promptus aderat animo, et manu, quamvis dura essent, et laboriosa: ad ea vero, quæ decoris speciem aliquam exhiberent, nonnisi eorum coactus imperio, qui Dei tenebant locum, adducebatur. Demum postquam solutus est cœtus, et pia quædam loca lustravit Sanctorum nobilitata cineribus, relicta libenter Urbe, in Provinciam suam lætior, quam venerat, remeavit.

## C A P U T V I I.

*Ad Hispaniam regressus, pergit in Collegio regendo Villagarsiensi.*

**N**on levis erat ponderis, nec leve reputabat ipse, Collegium illud administrare, in quo tirones septuaginta, vel octoginta, nonnunquam iis etiam plures educabantur. Ibi dem triginta fere debebant veterani Socii, quorum alii Sacerdotes erant, diversis aut docendi, aut concionandi, aut excipiendi confessiones intenti ministeriis: alii vero Coadju-

rtes,

res, quibus et domestica demandata erant officia, et agrorum, ac villarum cura committebatur. Pro his necessarius erat opportunus servorum numerus, pastorum, et agricolarum, quorum multi domesticos intra muros habitabant. His accedebant non pauci Ministri templi, Sacerdotes, Cantores, et Symphoniaci, qui quotidie divinas ibi cantabant laudes, et Missam quotidie cum cantu celebrabant: ad eosque proinde Rectoris intendenda erat cura, ut suo muneri diligenter, ac decore satisfacerent. Hæc multiplex, ac tam varia hominum rerumque conditio difficile reddebat munus, quod Francisco ex Italia reduci deferebatur. Id tamen multo illi tolerabilius erat, addo etiam jucundius, quam in Urbis conspectu vivere, atque in amplissimo totius orbis theatro permanere. Ut autem expediendis negotiis, quæ suis incumberebant humeris, longiorem haberet usuram temporis, multo ante cæteros linquebat lectulum: diuque divina contemplatus, quo tempore surgebant reliqui, ipse ad Confessarium accedebat, ut animum expiaret, quod solemne illi erat quotidie facere. Pergebat deinde orare cum omnibus, donec sacrificandi tempus adfuisset, quod plerumque in tirocinii Sacello maximo, adstantibus tironibus, efficiebat. Postmodum admittendis, audiendisque vel domesticis, vel externis operam dabat. Rectoris cubiculum in superiori domus contignatione, intra quam tirones etiam ab aliis sejuncti Sociis manebant, ita erat ad tirocinii angulum constitutum, ut duas haberet januas. Altera spectabat in tirocinium, per eamque tironibus ad Rectorem facilis patebat accessus. Altera extra tirocinii septum erat, per quam reliqui Socii, qui mediam, et infimam habitabant domum, atque externi etiam ad Rectorem ingrediebantur. Is autem, cum auscultandis novitiis diu noctuque esset intentus, non propterea cæteros, qui ad exteriorem januam accederent, excludebat. Frequenter potius ad eum conveniebant et Collegii Minister, et Procurator, et studiorum Præfectus, et templi Œconomus, aliique aliis præpositi negotiis, ut rationem de injunctis redderent, et ab ipso nova mandata reciperent. Et cum tam multi quotidie, ac tam variis de causis ad eum venirent, unumquemque tamen, quasi vacuus ab omni alia cura esset, excipiebat.

Supra sexennium in occupatione illa perseveravit, quæ inter gravissimas totius provinciæ computabatur. Sed ea capacissimum Francisci animum præpedire adeo non potuit, ut is potius novum eidem pondus addiderit, substructiones quasdam aggressus, quæ in subditorum omnium, sed novitiorum maxime, cederent utilitatem. Nullum pro his erectum erat peculiare Valetudinarium: proindeque, dum ægrotarent, in alia quædam cubicula extra tirocinii ambitum descendebant. Aliunde vero Bibliotheca, in superiore Collegii parte ab initio constituta, non nisi per tirocinium adiri poterat: quod et Sacerdotibus satis erat incommodum, et tironibus nullam prorsus addebat commoditatem. Hi enim duas habebant Bibliothecas, quarum alia libris abundabat asceticis, alia optimis instructa erat latinis, græcisque Auctoribus pro illorum tantum usu, qui literis humanioribus studebant. Rector igitur, translatis alio Bibliothecæ primariæ voluminibus et armariis, in eodem loco Valetudinarium tironibus posuit. Separatas ibi struxit cameras, aramque in medio constituit, ad quam prospectus erat ab omnibus infirmorum lectulis, ut Sacerdotem, ad eandem operantem, vel decumbentes videre possent: aliaque ibidem adjunxit in ægrotorum commodum valde opportuna. Vestiarium quoque ad aliam sedem transtulit spatiosior, in qua novitiorum vestes, quæ prius in angusto conclavi reponebantur, laxius, et accuratius haberi possent, ut non adeo facile contagione pediculorum inficerentur. Senserat molestiam illam Franciscus, dum esset tiro, eamque patienter præ fervore spiritus toleraverat. Sed modo, ut eadem novitios liberaret, quorum villosæ vestes hujusmodi bestiolis erant obnoxia, præter alia, quæ ex Medici consilio tentavit, novum illud Vestiarium ita disposuit, ut in eo distinctis quæque cellis separatius asservarentur. Quas novitii deponerent vestes, postquam lotæ, refectæque fuissent, in superius tecti cavum deportabantur: suspensæque ibi, tandiu ventis ac frigori manebant expositæ, donec lendibus expurgatæ, ad eum locum refererentur, unde illas novitii, cum vestimenta mutare vellent, desumerent. Hac usus industria, munditiæ novitiorum consuluit, et Bibliothecam in antiqua Vestiarii sede, quæ commodior erat Patribus, medico sumptu collocavit.

Aliud

Aliud quoddam molitus est opus majoris impensæ, cui sufficere solus potuisset Idiaquezius. Vetus erat multorum querela, tardiores a discipulis in studiis humanioribus progressus fieri propter librorum penuriam, et mendosas nimium editiones. Sed cum hoc multi lamentarentur, nemo tamen huic malo remedium afferre conabatur. Ut ei Franciscus occurreret, Typographiam in Collegio Villagarsiensi posuit ad usum illius Seminarii, obtenta facultate Regis, et Præpositi Generalis. Obtinuit etiam a Patre suo bis mille ducentos aureos, quibus officinam opportuno loco prope alteram Collegii januam ædificavit: præla emit: characteres optimæ formæ, quibus latini, aut vulgares libri, atque etiam græci excudi possent, Matriti, et in Hollandia comparavit. Collocandis vero typis, prælisque versandis habiles quæsit opifices, inter quos egregium nactus est juvenem, qui per id tempus Societatis Adjuutoribus voluit adscribi, postquam Salmanticæ, ac Matriti excellentem egerat Typothetam. Is Adjuutorem alium instruxit, qui deinde græce quoque componere didicit accuratissime. Paratis jam instrumentis, et qui eadem tractarent perite, quosdam Sociorum designavit Rector, qui typographica errata corrigerent diligenter. Alios etiam induxit, ut Auctorum libros, quos edere pro Scholarum usu cogitabat, brevibus commentariis dilucidarent. Ipsemet inter gravissimas sui muneris occupationes, quippe animum gerens nullis negotiorum molibus opprimendum, Cornelium Nepotem notis ad puerorum captum accommodatis illustravit. Ad exemplum ejus alii Ciceronis Orationes selectas, Virgilium, Ovidium, Q. Curtium opportunis annotationibus explicarunt: alii expurgatas Anacreontis odas, et Æsopi Fabulas vulgari donarunt interpretatione, indicatis passim regulis Grammaticæ græcæ, quæ ibidem excusa fuerat, Auctore Josepho Petisco. His editis libris, et præceptorum compendiis, quæ paulo ante Burgis edenda curaverat, pueris aperuit viam ad latini, græcique sermonis notitiam facilius adipiscendam. In alio quodam opusculo, quod jussu Provincialis scripserat, Magistris etiam expeditum et utilem proposuit docendi modum juxta ea, quæ pridem constituta fuerant in Ratione Studiorum Societatis. Hoc modo sublatis, quæ sensim irrepserant, impedimentis,

novisque additis adminiculis, latina pariter, et græca reffloruerunt studia. Quoniam vero in Societatis Scholis haud minor pietatis, quam eruditionis discipulorum habenda erat cura, pios aliquot vulgavit libros, qui promovendæ religioni deservirent. Inter alios edidit libellum aureum Thomæ a Kempis de Imitatione Chisti cum versione græca Patris Georgii Mayr, qui pridem illum ediderat Augustæ Vindelicorum anno 1615. Sed versionis hujus exempla ita erant rara, ut Franciscus unicum ejus exemplum in Collegio Pontevadrensi repererit. Hoc autem invento thesauro, decrevit illum statim cum multis communicare, pulcherrima editione facta, quam Societatis adolescentibus nuncupavit, qui literis dabant operam; ut pietatis, atque humanitatis semina, quæ dudum in Seminario Villagasiensi receperant, lectione assidua pretiosi hujus libelli confoverent. Idem cum plausu exceptus fuit in Hispania, ut etiam a quibusdam Italis, qui eum ab Hispanis exulibus obtinere potuerunt. Reliqui Villagasienses libri propter correctionem exactam, et papyri nitorem, elegantiamque typorum magno etiam habebantur in pretio: nec solum in Societatis legebantur Scholis, sed inter ipsos Præceptores externos non deerat, qui avide illos conquireret, ut auditores suos ad eam conformaret normam, quam ostenderat Idiaquezius.

Is inter adeo multiplices occupationes nihil de vigilantia super administratione domestica detrahebat: non quod inferiorum officiis sese importunus ingereret, sed quia erat in exigenda ratione diligentissimus, in eoque plurimum reponere momenti. Nec semper administratoribus rerum, quæcunque agenda essent, singillatim præcipiebat omnia; sed cum negotium generali quadam admonitione injunxisset, cætera relinquebat gerentium arbitrio, ut ipsi pro re nata consilium caperent, quod sæpe ad negotiorum juvat expeditionem. Sic etiam administratorum animos sibi adungebat, quorum industria, ac diligentia multum se tribuere demonstrabat. Et quæ illi prudenter in suo quisque munere decrevissent, tueri, ac defendere conabatur; aut eosdem, si quando errassent, ad corrigenda sua decreta sic inducebat, ut ipsorum consuleret auctoritati. Nonnunquam tamen eam curam ipsemet sibi desumpsit. De Collegii Procuratore conquestus est Palentinus Canonico-

corum coetus, quod pecudum copiosiores haberet greges, quam ex antiqua circa Decimas conventionem permissum eidem esset. Nihil de conventionem illam noverat Rector: sed facta modo super his diligenti investigatione, Palentiam ad Canonicum venit, qui pro negotio illo fuerat designatus. Is de pecorum excedente numero ( quem compertum esse aiebat, et coram Rectore determinavit ) offensos esse dixit Collegas suos, sibi que demandasse, ut excessum illum, etiam intenta lite, impediret. Tum Rector: Excessum, inquit, pecorum non bene exploratum habes; est enim haud parum illo major, quem ipse statuisti. Sed hoc sine fraude cujusquam, et me inscio effectum est. Propterea huc ipse venio, ut Canonicis satisfaciam, novamque cum eis pactionem ineam, quae accommodata sit diversae conditioni temporum, et majori Sociorum numero, qui modo Collegium incolunt Villagarsiense. Delegatus ad eam viri sinceritatem obmutuit; et cum de his ad Canonicorum Senatum retulisset, illi etiam, collaudata Rectoris ingenuitate, ab instruendae litis consilio recesserunt: novumque constitutum est pactum, quod et Canonicis erat utile, et Collegio Villagarsiensi congruentius.


Ut hic Procuratoris sui causam ingenua veritatis manifestatione defendit, sic etiam alibi contra mendacii fabricatores acriter decertavit studio. Quidam ex Adjutoribus sibi subditis Collegii praedium vicino in oppido administrabat. Huic oppidi ejusdem incola, vel acceptam praetextens injuriam, vel propria inductus malevolentia, gravissimum imposuit crimen, quo nihil religioso viro invidiosius. Ut criminationi majorem fidem adderet, tres alios contribules suos ad eam testificandam induxit: eorumque innixus testimoniis, delationem coram Episcopo fecit, qui dioecesis lustrandae causa prope aberat ab eo loco. Non defuit, qui de tota illa machinatione Rectorem admonuit. Is accitum ad se Fratrem de rumoribus edocet, qui contra ipsum spargebantur: et quam benignissime potest, hortatur, ut siquid hominum more commiserit, aperte sibi, ac simpliciter fateri non dubitet: se autem pro paterno amore, quo illum prosequeretur, et pro gratia, qua valebat apud Episcopum, ad quem nomen ejus delatum fuerat, rem omnem sine strepitu, et cum minimo dedecore transacturum.

Ad



Ad hæc Frater ille totus inhorruit: seque immunem penitus ab imputato scelere protestatus, Rectorem enixe deprecatur, ut in mores suos diligenter inquirat, rogatis incolis, quoscunque velit, ejusdem oppidi; quorum testimoniis malitiosi quadruplatoris fraudem aperiendam esse sperabat. Cum veridica existimaret Rector, quæ Frater attestabatur, nullum pro illius defensionis laborem prætermisit, aut sumptum. Quæstionem juridicam institui fecit, ex qua inter alia compertum est evidenter, e testibus, qui delationem subscripsisse ferebantur, unum nescire literas, neque unquam subsignare didicisse. Inde calumniatoris infamia paruit, et Adjutori restitutus est honor, qui tam inique violatus fuerat.

Solicitam Rectoris industriam non solum in gravioribus hisce rebus, sed in aliis etiam videre licuit, quæ diligentem illius curam erga omnes sibi commissos aperte manifestabant. Multi erant in Collegio servi, quorum alii colendis agris, alii pascendis gregibus incumbebant. Pro his designatus erat Socius, qui certis anni temporibus, statisque diebus, cunctos in doctrina Christiana, et bonis moribus erudiret. Rector, qui ad omnes officii sui partes erat intentus; cum observasset, pastores sæpe ab instructionibus illis abesse, vel quia pecus in remotis pascebant montibus, vel quia nusquam illud deserere posse causabantur: promptum huic etiam malo remedium adhibuit. Cuidam e Sacerdotibus injunxit, ut instruendis servis invigilaret: ac ne unquam pastores deessent aliqui, juberet eos alternis custodias agere, ut omnes etiam per vices catechesibus interessent. Nonnunquam ipsemet in destinatum catechesi locum descendens, modo ab iis, modo ab aliis exquirebat, quid tandem in explicatione doctrinæ didicissent: quod omnibus, ut intento essent animo, proficiebat. Quæ autem ipse circa servorum curam statuit, deinceps servata sunt usque ad Sociorum exilium.



## CAPUT VIII.

*De ratione, quam habuit, in tironibus educandis.*

**R**ectoris Villagarsiensis præcipua vertebatur cura in instituendis tironibus, qui per id tempus fere octogeni censebantur; convenientibus eo non paucis, qui postmodum in Americam erant, aut in Asiam transmissuri. Omnes hi, utpote a tam variis genitoribus orti, atque in diversis nati regionibus, diversam etiam habebant indolem, magnaque opus erat industria, ut unumquemque ad novæ vitæ formam accommodares. Multi adhuc teneri, qui tum primum e paterna domo discesserant: grandiores alii, qui prius in publicis Scholis, et Academiis aliquandiu versati fuerant: universi autem ab hujus mundi blanditiis, ad amplectendam Christi crucem, et ineundam perfectionis viam, recenter evocati. Quibus proinde opus erat experto duce, sapienteque Magistro, ne in prærupta, vel devia discederent, et ut frequentes hostium insidias detegerent, ac superarent. Non enim mirandum est, si humani generis implacabilis adversarius adolescentes illos variis modis impeteret, qui, relictis omnibus, ad perfectionem connitebantur, ut deinde alios per Instituti sui ministeria ex Dæmonum ereptos imperio, in Dei libertatem assererent. Franciscus ergo, cui Diaboli notæ erant mille nocendi artes, ut contra illas alumnos suos instrueret, nihil eis commendabat impensius, quam ut omnes animi sinus expanderent, nihilque celarent penitus, nisi vellent ab inimico vaferrimo superari. Deinde ad se accedentes maternis visceribus recipiebat, auditisque patienter singulis, opportunum cuique conferebat auxilium. Mœrentibus abstergebat lacrymas: languidis subjiciebat stimulos: currentibus, ne usquam impingerent, offendicula demonstrabat: dubitantibus quo pedem ferrent, viam securissimam ostendebat. Cum autem viderent singuli, quam amanter ab eo susciperentur, quantusque ad virtutem vigor ex consiliis ejus accederet unicuique, crescebat in omnibus erga Franciscum amor, et facilitas ad eum iterum cum fiducia revertendi. Et sane recursus illi adeo fre-

quentes erant, ut, quamvis nullum aliud negotium superes-  
set, solus hic labor audiendi, dirigendique novitios, distinen-  
do, atque defatigando Rectori sufficere posse videretur. Sed  
ille nullis occupationum fluctibus impediabatur, quominus præ-  
cipuam adeo sui muneris partem diligenter obiret, quam eti-  
am utilissimam videbat esse ad tirones in spiritu promoven-  
dos. Non enim minores inde capiebat fructus, quam ex ad-  
hortationibus publicis, quas sæpe habebat ad omnes, et ex col-  
lationibus, quæ frequentes etiam erant, de spiritualibus re-  
bus, et quæ ad tirocinii disciplinam spectabant. Ex hac au-  
tem communi, privataque institutione, ac præsertim ex amo-  
re illo mutuo, qui Magistrum inter et discipulos intercedebat,  
strenuus ille ardor effluxit, quo tirones Villagarsienses ad stu-  
dia virtutum sub Francisci magisterio contenderunt.

Non propterea cætera prætermittebat religiosæ perfectio-  
nis adjuncta. In promovenda corporis mortificatione, quan-  
tum quidem ad inediam pertinet, satis moderatus erat; cum  
expertus jam olim fuisset, perniciosam esse robustis adole-  
scentibus nimiam ciborum parsimoniam. Facilius iisdem per-  
mittebat, ut dulciora quædam edulia relinquerent, quæ irri-  
tandæ potius gulæ, quam sustentando corpori deserviebant.  
In asperioribus aliis macerationibus, quæ flagellis, ciliciis,  
lectique duritie peragebantur, receptum tirocinii morem ob-  
servari curabat, nisi forte aliquid interdum esset ex prudenti-  
æ legibus immutandum. Ad cohibendos vero naturæ impe-  
tus, et perturbationes animi moderandas, sagaci quadam u-  
tebatur industria, iis sæpe injunctis, quæ cujusque ingenio  
maxime repugnarent. Eos, exempli causa, qui vivaciores e-  
rant, et irrequieti, certo quodam loco immotos jubebat es-  
se, donec inde discedere admoneret ipse: quod aliquando  
durissimum cuidam accidit, qui diu in eodem loco perman-  
sit, dum eum Rector alio evocavit. Sed non omnes uno mo-  
do exercebat. Quemdam, qui epistolam a Patre suo avidissi-  
me expectabat, in hunc modum probare voluit. Postquam  
allatæ sunt literæ, resignavit eas Rector ex jure, moreque  
Societatis: viditque de his agere, quæ novitius vehementer  
adeo desiderabat. Huic ergo non statim literas, quas apud  
se retinuit, sed literarum integumentum tradidit, dicens:

Agno-

Agnoscisne manum istam? Agnosco, ait ille, literas Patris mei, quas habere tantopere optabam. Tum Rector: Perge, inquit, protinus in culinam, easque in ignem conjice comburendas. Perrexit ille incunctanter, nec dubitavit Patris, ut putabat, epistolam, simulque ardentissimum legendi eam desiderium flammis dare voracibus, ut Superioris sui jussa perficeret. Verum is paulo post literas tironi reddidit, ut eas legeret, et responsum ad Patrem daret. Alias etiam adhibebat artes ad comprimendum judicium proprium, obterendamque superbiam. Et cum tam variis ab eo modis novitii frequenter exercerentur, mirandum tamen erat, quam illi assidue, fidenterque recurrerent ad eundem, ut qui tentamenta illa omnia, quamvis dura, et acerba essent, non aliunde oriri cognoscerent, quam ex amore intimo, quo ipsos prosequeretur.

In decernendis delinquentium poenis ita severitatem exhibuit, ut amoris etiam paterni meminisset. Transgressiones illas non facile dissimulabat, quæ cæteris pernicioso esse possent exemplo. Sed in earum reprehensione, quamvis severiorem vultum indueret, verba tamen amorem ejus manifestabant, quo unice inductus fuerat, ut virgam assumeret correctionis. Siquis publice ob graviorem aliquem defectum cogarguendus esset, in hunc ferme modum fieri consueverat animadversio. Convenientibus ad prandium, vel cœnam Sociis, reus in triclinii medio ante parvulam mensam procumbebat in genua: deinde alius e suggestu contenta, gravique voce admissam ab eo culpam enuntiabat de scripto, quod a Superiore acceperat, in quo etiam justa culpæ objurgatio, et subeunda pœna continebatur. Hoc autem supplicii genus Franciscus nocturno tempore nemini volebat infligere, ne cuiquam somnum eriperet, quem juvenibus maxime necessarium esse judicabat, ut postridie solitas tirocinii functiones expeditius obire possent: aut fortasse etiam, ne aliquis per offusas noctium tenebras locum daret tristioribus imaginibus, quæ illum ad consilia devolverent deteriora. Si quando suspicabatur, nonnullum ex reprehensione illa publica vehementius exacerbandum, opportune submittebat aliquem, qui benigne illi occurreret, ac dolorem inde contractum mitigaret. Cum

decrevisset prædicto modo punire novitios duos laicos, qui solito gravius deliquerant, admonuit eum, qui sibi datus erat in Socium, ut dum illi reprehendebantur, maneret ipse in cubiculo præter morem: ac de ratione item docuit, qua eos excepturus erat, cum e triclinio post indictam pœnam regrederentur. Regressi quidem fuerunt admodum perturbati, multaque de austeriore severitate conquerentes, qua in conspectu omnium tam acriter fuerant objurgati: quare deliberatum sibi esse affirmabant, a Societate discedere, in qua leves etiam culpæ gravi adeo reprehensione castigarentur. Magistri Socius, ut ab eodem præmonitus fuerat, leniter illos excepit, paulatimque ad eam animi tranquillitatem adduxit, ut jam ipsi erubescerent tulisse impatienter correptionem illam, quam vel insontes æquiore animo ferre debuissent; quippe qui versarentur in schola virtutis, in qua nonnunquam innoxii etiam soliti sunt pari modo exerceri. Ambo deinde in suscepto vitæ cursu perseverarunt, et lætanter experti sunt, postquam suam ipsi culpam agnoverant, et emendaverant, a tirocinii Magistro æque benevole haberi, ac si nihil deliquissent. Nunquam ille, quantumvis acriter increparet aliquem, dimissionem a Societate comminabatur. Hoc enim officium relinquendum ajebat Satanæ, cujus est noviorum præsertim animos ab incepta virtutis via mille artibus deterrere: suum autem esse, adolescentes illos in arrepto vitæ proposito confirmare: siquis vero ad Instituti formam aptari nolle, postquam alia omnia tentasset frustra, eum in domum suam, ut aliquando fecit, civilissime dimittere.

Aliquando vero in tironibus gubernandis ita se gessit, ut potius ductum superni luminis, quam humanæ prudentiæ leges observare videretur. Patuit hoc maxime, ut de cæteris taceam, in Joanne Baptista Barcena. Is ad Societatem venerat per superatas parentum, et propinquorum gravissimas oppugnationes: et cum esset egregia indole, atque honestis moribus adolescens, in tirocinio sub Francisci magisterio positus, ad omnem ejus loci disciplinam se facile inflexit. Ultra annum ibi processerat alacri semper animo, tantaque ad virtutes contentione, ut inter spectatissimos tirones recenseretur: cum repente gravi tædio correptus, omnia jam fastidire incepit, quæ  
ad-



adhuc in deliciis habuerat. Non distulit de his ad tirocinii referre Magistrum, qui animos illi addidit, securasque indicavit vias, quibus manifestam Diaboli eluderet tentationem. Hæc tamen adeo invalescebat in dies, ut tironem aspicere retro, et missionem a Societate coegerit postulare. Noluit petitionem illam exaudire Franciscus: sed partim benevolentia signis, partim contemptu suarum precum, aliisque artibus conatus est perturbatam novitii mentem ad tranquillitatem adducere. Parebat is Idiaquezii monitis, et quamvis optatam inde non traheret pacem, in obeundis tamen publicis et privatis tirocinii muniis nihilo segnior erat, quam antea. Exacto jam biennio, quando sacramentum de more dicturus erat, vehementius institit, ut in paternam domum remitteretur. Sed Franciscus divino potius, quam humano consilio reluctantem induxit juvenem, ut religiosa vota conciperet. Post aliquot demum menses, cum ad Philosophiam mittendus erat, apud Franciscum conquestus est, quod jugum sibi imposuisset, quod portare diffideret, ac tandem cum ignominia excutere pertimesceret. Cui ille: *Ne timeas, inquit; neque enim longum abibit tempus, cum mihi de his, qua tecum egi, plurimas persolves gratias: et ipse ad saniores restitutus mentem, tuam hanc fateberis, et improbabis insaniam.* Hæc Octobri fere medio contigerant: et Joannes ante duos menses Francisci prædictionem cumulate, ac lætanter vidit expletam. Nam quo die S. Xaverii festum eodem anno celebrabatur, repente mutatus est: et quasi velum ex ejus oculis reduceretur, insidias agnovit Satanæ; deceptionisque periculum, a quo proxime abfuerat, cum horrore prospexit; ac divinam erga se laudavit misericordiam. Memor simul eorum, quæ Franciscus sibi dixerat in discessu, sine mora de his omnibus certiores reddidit, maximasque illi egit gratias pro insigni caritate, et patientia, qua se penitus immerentem sustinuerat. Et quoniam beneficium illud S. Xaverii meritis adscribebat, quem ipse pio cultu venerabatur, statuit ejusdem vestigia premere, profectionemque ad Indos petere, si modo consilium hoc ab eodem Francisco probaretur. Is juveni de felici mutatione plurimum gratulatus, profectionem dissuasit Indicam: non quod eum tanto operi judicaret ineptum,



tum, cum jam vel in tirocinii velitationibus magnum pro animarum salute zelum ostendisset; sed quoniam Indiam, ut expresse illi ajebat, reperturus intra Hispaniam esset. Et vero Joannes per annos quinque, quos duntaxat deinde vixit, pretiosiores auro, et gemmis Indicis thesauros meritorum invenit in diuturnis, et gravissimis morbis, quos invicta patientia, et invidenda lætitia pertulit, gratias Deo indesinenter agens pro singulari providentia, qua se in Societate servaverat, simulque laudans cœlestem Idiaquezii prudentiam, cui suam post Deum tribuebat felicitatem. Narravit hæc Joannes ipse fidissimo amico, et condiscipulo suo Josepho Gallardo, a quo eadem ego totidem fere verbis accepi.

Qui prudens, et industrius erat in medendis tironum animis, maternam ostendebat sollicitudinem, cum iidem corpore infirmarentur. Sæpissime invisebat illos, non modo interdium, sed intempesta quoque nocte, postquam cæteri discesserant ad dormiendum. Cuidam negotium dederat, ut se moneret protinus, quotiescunque Medicus adveniret: et quæ is decerneret medicamenta, curabat a præfecto Valetudinarii perscribi, ut exacte omnia, tempestiveque adhiberentur. Si periculosior esset morbus, peritiorem aliquem Medicum advocabat aliunde, nullisque parcebat sumptibus, ut ægrotantium consuleret valetudini. Chirurgum quemdam experientissimum, qui legionem militum sequebatur, et aliquot inde aberat leucas, in Collegium venire fecit, missis ad Tribunum litteris, ut novitium inviseret, qui gravibus ex tuberculo doloribus angebatur. Unum, aut alterum, cui Medicus nativum cœlum profuturum esse censebat, in patriam suam misit cum Socio, qui curam illius ageret. Vigilabat ipse attentissime, ne quid infirmorum Curatores omitterent, quod posset eorum levamini, recreationique deservire: iisdemque amplam faciebat potestatem, ut e penu, aliisve cellis illa omnia peterent, quæ parando ægrotis delicatiori cibo necessaria essent, aut opportuna. In Collegiis omnibus, quibus præfuit, eadem usus est vigilantia, ut infirmorum Præfecti suo muneri accuratissime satisfacerent. Inter alios quidam erat diligentissimus, quem tamen Rector aliquando ita coarguit, quasi esset in procurandis ægrorum commodis negligentior. Contristatus est ille objurgatione Rectoris:

et ad Sacerdotem quemdam ingressus; Nescio, inquit, quid ultra præstare debeam, ut Rectori nostro plane complaceam. Tu ipse nosti, noruntque, opinor, alii, omnes officii mei partes quam non oscitanter implere contendam. Et tamen hodie, postquam certiozem illum reddidi de infirmorum statu, deque applicitis unicuique medicinis, vehementer suspicari se dixit, me meo muneri non debite satisfacere. Neque defectum aliquem singularem mihi exprobravit, sed hoc unice objecit: nullam adhuc adversum me querelam delatam ad se fuisse vel a Procuratore Collegii, vel a Coquo, vel Promo: quod ipse tanquam certum negligentiam meam interpretatur indicium. Ad hæc Sacerdos ille subridens: Nihil est, ait, quod inde dolere debeas: Rector enim non serio tibi succensuit, sed incitare currentem voluit, et contra difficultates obfirmare validius, quas Procurator, et qui cibariis præsumt, obtendere nonnunquam solent, ne tam prompte, ac liberaliter ea tibi concedant, quæ ab ipsis pro ratione tui muneris debes exigere.

Præter diligentiam, quam adhibebat Rector, et ab aliis adhiberi curabat, ut ægrotantes benignissime tractarentur; superaddebat ipse ferventes ad Deum preces, ut illis valetudinem impetraret. In gravi cujusdam tironis infirmitate frequenter, et instanter iterabat illam Reguli ad Christum deprecationem: *Domine, descende, priusquam moriatur filius meus*. Nec minus orasse credendus est pro cæteris, qui bene valerent, cum ad rectam tirocinii administrationem ea potissimum adhibuerit adjuncta, quæ ab oratione ferventi, et profunda humilitate nascuntur. Inde autem fructum illum percepit, quem ipse, vel nolens, indicavit. Commentarium scripsit, in quo nonnulla pro tirocinii regimine adnotavit, quæ longo usu didicerat: eaque deinde successori suo Juliano Fonseca relicuit, quem inter alia his verbis alloquitur, quibus suam cum tironibus agendi rationem summatim videtur expressisse: *Intime persuasum habeas, te prorsus inutilem, et tanquam nihilum esse, ut huic tanto muneri satisfacias: imo vero indignum te reputes, cui Deus tot, et tam caros sibi filios commiserit educandos. Experieris autem hoc pacto, Dominum tibi ubera distenta lacte concedere, ut enutrias eos cum suavitate, doctrina sancta, et copia divinarum consolationum, ut illi te-*  
cum,

cum et tu cum illis pariter curras per viam mandatorum suorum, et semitam consiliorum. Quod ipse fecerat, et senserat utilissimum, hoc videlicet alteri velut optimum commendabat. Illam autem doctrinæ sanctæ alimoniam, qua ipse tironum animos enutrivit, magna ex parte proposuit in libello quodam edito, cui titulum fecit: *Praxes spirituales ad usum tirocinii Villagarsiensis*. In eo quotidianas percurrens tironum occupationes, et quæcunque iis peragenda erant certis anni temporibus exercitia, de ratione disserit exequendi singula cum perfectione; propositis plerumque nonnullis Christi Domini actionibus analogis, vel sententiis, ad quas inter operandum respicerent, ac se illis, divina juvante gratia, conformarent. Multa etiam armorum genera subministrat, variaque subsidia perhibet opportuna, tum ad tentationes Dæmonum superandas, tum etiam ad virtutes, quæ religiosum virum decet, assequendas. Propterea librum illum, quem Auctor pro tironibus tantum ediderat, multi etiam provectiores conquirebant, ut ipsi præclaris ejus monitis uterentur, et alienis quoque profectibus inservirent, cum viderent in eo religiosæ perfectionis medullam contineri. Antequam Gallix regnum convelleretur, Sacerdos quidam Gallus, qui familiariter Francisco nostro utebatur, prædictum libellum ab eo petiit, ut Gallice redditus et excusus, per sacrarum Cœnobiaz Virginum diriberetur, ad pietatis, et perfectionis studium inter easdem promovendum. In eundem libellum cum incidisset alter Sacerdos Italus, qui selecta quædam Hispanorum Opera italice reddidit, et excudit ad hominum mentes solida pietate imbuendas, illum etiam in patriam linguam convertit, cum multam inde sibi promitteret utilitatem.

## C A P U T I X.

### *Collegio præficitur Salmantino.*

Jucundam tirocinii sedem non sine dolore reliquit, ut morem gereret Præposito Generali, qui eum Salmanticam adire jussit, ut Collegium illud maximum administraret. Copio-

piosus ibi etiam erat , et varius Sociorum numerus : Juvenum , qui sacras discebant , aut recolebant literas : Magistrorum , aliorumque Sacerdotum , qui domi ac foris juvandis omni ope animis incumbebant : et Adjutorum , qui domestica exercebant munia , et Collegii curabant prædia . Franciscus ad omnes pariter vigilantix suæ curam extendit , ut et disciplina vigeret domi , et externorum commodis omni officiorum genere inserviretur . Id autem feliciter urgere potuit , cum Operarios nactus esset strenuos , quibus ipse , quantum graviora negotia sinerent , præibat exemplo suo in confessionibus præsertim excipiendis . Magistris honorem debitum deferebat , neque propterea cum iisdem facile dissimulabat , si quid in eis reprehensione dignum animadverteret : unde quemdam ipsorum libere admonuit , ut in scholarum explicatione a quibusdam locutionibus abstineret , quæ teneris auditorum animis aliquam afferre poterant offensio- nem . Juvenibus , quorum plerique sub ipso posuerant tirocinium , reverentiam atque obedientiam commendabat erga Magistros , et indefessam in studiis assiduitatem , ut otium in præsentia fugerent , quo nihil juventuti funestius , deindeque alios solide docere possent , quæ diligenter modo didicissent . Sic tamen illos ad studia literarum volebat intentos , ut majorem ab eis curam exigeret in perfectione vitæ sectanda , et Societatis legibus observandis . Hoc etiam a laicis , cæterisque subditis tanto potiori exigebat jure , quanto diligentior erat ipse in omnibus officii sui partibus adimplendis .

Hæc domi agebat sedulus , cum literas quasdam accepit , quæ illum extra domum , atque adeo extra urbem prodire coegerunt . Bletissæ , nobili Vettonum oppido , quod Salmantica disjunctum est millibus viginti quatuor , stationem habebat Helvetiorum militum legio . Tribunus legionis hujus literas ad Salmantinum Societatis Rectorem misit , quibus enixe ab eo petebat Sacerdotem peritum linguæ Gallicæ , ut gregarium militem Gallum , qui morte plectendus erat , confessione sacra expiaret , et ad locum usque supplicii comitaretur . Rector , acceptis literis , profectionem illam voluit ipse suscipere , adhibito in viæ comitem Joanne Joseph Carrillo , qui etiam sciebat Gallice , et Theologiam eo tempore audiebat . Bletissam ingressus , statim ad reum deducti petiit , qui

vinctus jam erat in ergastulo, unde propediem educendus erat ad necem. Initio comiter illum affatus, dolere se vicem suam ostendit, simulque de qualitate cognovit criminis, propter quod capite damnatus esset. Deinde quædam opportune suggessit, ut sententiam illam non tam ab hominibus, quam a Deo latam existimaret, qui sibi per corruptibilis vitæ jacturam aditum ad immortalitatem aperiret. Postremo de hunc eum monuit, quæ præstanda sibi erant, ut confessionem rite institueret, ad quam excipiendam post brevem aliquam moram rediturum se dixit.

His in tenebricosa illa custodia peractis, inde ad Pazensium divertit domum, quorum nota ibi erat pietas, et singularis erga Societatem benevolentia. Dum eo pergit, juvenem illum, quem secum Bletissam duxerat, in hunc ferme modum alloquitur: Vehementer incitari me sentio, ut militem istum ab extremo supplicio, quantum me penes fuerit, liberare contendam. Ego quidem neque tribunum, neque alium quempiam ex præfectis militaribus novi, quibus pariter me ignotum esse crediderim. Sed cum adventus noster eos diu latere non possit, factu proclive est, ut ipsorum aliquis ad nos salutandos accedat. Proinde utamur saltem hac vice iis rebus, quas mundus in pretio habet, ut caritatem facilius exercere possimus. Tu ergo, postquam ego intro discessero, illa de me, deque meis fratribus poteris dicere, quæ visa tibi fuerint opportuna. Fortasse hac via miserandum hunc hominem ab imminente vitæ periculo eripiemus. Inter hæc Pazensem intrarunt domum: nec multo post milites venerunt duo, ab ipsorum tribuno missi, ut Salmantinum Patrem inviserent, eique gratias agerent, quod iter illud ad preces suas tam prompte suscepisset. Tunc juvenis, Francisci socius, egregie partes illas sustinuit, quæ sibi fuerant demandatæ. Milites humanissime exceptos tantisper sedere jussit, dum ad eos prodiret Rector, quem intus breve quoddam negotium distinebat. Rogantibus vero, quid nominis haberet Rector? Hic est, reposuit ille, Pater Franciscus Xaverius Idiaquezius, Granatensium Ducum primogenitus filius, et frater præsentis Granatæ Ducis, qui rebus bene gestis in bello multam apud Regem obtinet gratiam, a quo jam dudum est Legati munere de-



decoratus : alii etiam ejusdem fratres præclaros occupant in militia gradus. Plura volentem dicere milites interpellarunt : seque ad tribunal reverti velle dixerunt , ut de iis , quæ cognoverant , certiorum eundem redderent . Ille autem , cum hæc audisset , subito ad Rectorem venit , centurionibus , aliisque legionis suæ præfectis stipatus . Obviam eis processit Rector , atque omnes summa cum humanitate recepit . Post communes inter se habitas salutationes , variâ de variis rebus miscuerunt verba , donec tandem , ut pronum erat , de reo milite opportunus incidit sermo .

Hic vero ad tribunal conversus Rector : Fateor equidem , dixit , me in privato legionum vestrarum jure non admodum esse versatum . Sed si vera illa sint , quæ mihi reus coram exposuit , non omnem arbitror implorandæ misericordiæ aditum esse præclusum . Postquam enim vestra deseruit signa ; quod sane gravissimum est crimen , meritaque morte ulciscendum ; in Lusitaniâ aufugisse ait , ibique tandiu perseverasse , donec de Catholici Regis decreto quodam audivit , quo veniam concedebat transfugis , si modo ante certam diem ad castra reverterentur . Se autem ad dictam diem ideo non rediisse , quod nihil ad aures ejus de hujusmodi decreto pervenerit : sed cum primum de illo cognovit , statim arripuisse viam , ut in legionem , a qua defecerat , sine mora remearet : in eoque reditu , velut transfugii reum , fuisse comprehensum . Si hæc , inquam , verum habent , nonnullum indulgentiæ locum erga reum istum existimo superesse . Etenim bona fides , qua decrevit se ultro sistere , atque in relicta castra regrediebatur , non parum favere illi videtur , ut possit statutiæ poenæ remissionem aliquam obtinere . Hoc iterum ingenue fateor , militiæ vestræ leges non bene habere perspectas , nec me quidquam petere , quod iisdem legibus adversetur . Si tamen , illæso militari jure , aliquis sit gratiæ locus , et irrogata mortis poena in aliam possit commutari mitiorem , id ego enixe deprecor , singularique beneficio me vobis obstrictum reputabo , si vitam huic homini meis precibus concedatis . Tribunal ad hanc Rectoris orationem initio tantisper hæsit . Deinde , collaudata pietate viri , quidquid pro reo adduxerat , ita sibi probari affirmavit , ut libenter postulatis ejus



annueret, nisi aliorum etiam exquirendum esset iudicium. Scis enim, addidit, deliberationem huiusmodi ab illorum pendere sententia, qui bellico interesse solent consilio. Tum Rector: Video, inquit, in hanc domum, honorandi mei causa, tot advenisse duces, ut omnes consilii iudices, vel plebsque certe hic adesse crediderim: quorum ego clementiam similiter imploro, neque illam a tam generosis viris impetratum me esse diffido. Ad hæc verba consurgunt duces, omnesque una voce tribuni sententiam probant, et reo pœnam remitti posse decernunt. Hic Rector amplissimas omnibus persolvit gratias: eosque admonens, ut reo concessam veniam caute, paulatimque indicarent, ne forte repentina opprimeretur lætitia, ipse cum ingenti animi consolatione ab iisdem discessit.

Sed militibus majora his præstitit caritatis officia non diu post ipsius reditum in Collegium. Exarserat Hispanos inter, et Lusitanos bellum, in quo Rex Galliarum auxiliares copias misit Hispanis sub ductu Principis de Bobò. Is Salmanticæ per dies amplius viginti substitit, ut militem ex confecto longo itinere recrearet. Aliis in alia Religiosorum claustra digressis, Franciscus in Collegio suo tria Gallorum millia cum ipsorum ducibus recepit hospitio. Non facile dictum est, quantum eo tempore adlaboraverit, ut hospites illos, antequam in aciem cum hoste conflicturi prodirent, ad stabiliendam cum Deo pacem, et conscientias confessionem criminum expurgandas induceret. Affari omnes comiter, et humaniter: modo hos, modo illos de instabilitate vitæ, deque incerta Martis alea commonere: præsentem opportunitatem, quæ fortasse nunquam alias reditura esset, tanquam singulare Dei beneficium exponere: suam denique operam polliceri libenter, si quis ad aures ejus pro quærenda animi medicina vellet accedere. Cum hæc ille, aliaque salutis monita opportune inculcasset, et milites nativa ipsorum lingua scite adeo loquentem audirent, facile adducti sunt multi, ut eidem arcana sua manifestarent. Quorum exemplis subinde permoti alii, jam non solum Collegii hospites, sed illi etiam, qui diversa subierant per urbem tecta, Societatis Rectorem frequenter ad exonerandas conscientias perquirebant. Sæpe etiam ad Nosocomium mili-

tum

tum vocabatur, ut ægrotantium confessiones audiret, vel decessuris suprema ferret auxilia. Cum vero unus jam impar esset tanto oneri sustinendo, Vallisoletto duos obtinuit Socios, Joannem Baptistam Iriartem, et Josephum Petiscum, qui Gallice bene noverant, et utilissimo promovendo operi magno illi auxilio fuerunt. Primas tamen laboris ubique ferebat Rector, ad quem milites, præsertim nobiles, magno semper numero concurrebant. In eis insignes animorum conversiones effecit: multosque ad exspuenda venena induxit, quibus eos infecerat Hæresis, falsaque Philosophia, quarum utraque per id tempus nimis jam serpebat in Gallia. Non semel ob eam causam ad sacros recurrit Judices, ac tandem supremus Quæsitore fidei potestatem ei fecit amplissimam, ut in reconciliandis qui lapsi fuerant, iis tantum cautionibus uteretur, quæ prudenti ejus arbitrio necessariæ viderentur, aut opportunæ. Alii, quos a corruptissimis moribus revocaverat, in pœnitentiæ testimonium, magnam ei pestilentium librorum copiam, et peccandi nefanda instrumenta tradiderunt. Hac ille animarum præda lætissimus, notitiam sermonis Gallici, quo tanquam hamo tam multos e cœno vitiorum extraxerat, inter Dei beneficia grato animo commemorabat: eamque aliquando totius mundi divitiis anteferre se dixit, cum toties sibi usui fuisset ad alienigenarum salutem procurandam. Et enim in quibuscunque fere urbibus habitavit, tanto frequentius ea caritatis exercuit officia, quanto promptiorem illum et Superiores, et Parochi reperiebant, ut peregrinos spiritali ope adjuvaret. Salmanticæ vero non solum Gallis, sed Hispanis quoque militibus profuit, quorum multi per id tempus in eadem urbe diversabantur. Nonnulli e primariis ducibus ad expiandas confessione noxas illum adhibere voluerunt: quorum aliqui meditationibus sacris ab eodem fuerunt exerciti: omnesque deinde singulari eum amore, ac præcipua veneratione prosequebantur.

Diuturna Gallorum militum in religiosis adibus commotio domesticam disciplinam, et tranquillitatem Sociorum nihilo inturbavit. Rector enim, conspirantibus cum eo ducibus, eorumque Imperatore, prudenter adeo disposuit omnia, ut nulla esset domi perturbatio, atque omnis abesset pro-

procul licentia militaris. A secunda vigilia noctis altissimum ubique silentium observabatur, quod non ante licebat abrumperè, nisi post peractum sequenti mane primum Sacrum in templo: tunc enim permissum erat militibus, ut ab suo prodire possent diversorio. Imperator Gallus, qui prudentem viri suspiciebat industriam, cæterasque virtutes ejus tacitus observaverat, mirifice affectus est erga illum. Pro susceptis vero laboribus in copiarum suarum commodum plurimas eidem persolvit gratias, seque beneficii hujus memorem in posterum etiam exhibuit. Nam paucis post annis, cum Hispani Socii relegati essent in Corsicam, ille Chauvelino Præfecto, ad eam Insulam proficiscenti, nihil commendavit impensius, quam ut Idiaquezium, insignem olim sui agminis benefactorem, quibuscunque posset rebus protegeret, et adjuvaret. Nunc vero Salmantica profecturus, infirmorum hospitium eidem committere desiderabat: sed ab incepto destitit, cum responderet illi Rector, posse inde detrimentum capere annonam Hispani exercitus, cujus pars magna reposita erat in Collegio. Quod sane prudentissimi fuit consilii; nam paulo post, contagioso gliscente morbo, multi e Gallis pariter, et Hispanis periculosius ægrotare cœperunt. Tunc Rector, quos domi suæ recipere, suadente prudentia, recusaverat, in valetudinario jacentes publico, stimulante caritate, diligenter adjuvit. Ad nosocomia duo, quorum in altero Hispani, in altero ægrotantes manebant Galli, omnes Collegii Socii per vices suas aderant incunctanter, et quæ cuique ad infirmorum subsidium partes demandarentur, eas singuli adimplebant strenue. Sed stetit non parvo Sociis præclarum hoc caritatis officium. Nonnulli cum Rectore ipso, qui plus cæteris laborabat, graviter ægrotarunt. Hunc Deus ad graviora certamina reservavit: quosdam alios, et inter eos eximie indolis juvenem Stephanum Zaldum, qui Diaconatum attigerat, sibi pigneratum est cœlum. Talis denique fuit Sociorum in subveniendis militibus diligentia, ut Minister ærarii regii Marchio Scylacæus ad Rectorem scripserit, quam exhibuerat erga milites beneficentiam, Regi notam, et gratam esse, cujus proinde nomine gratias eidem agebat cumulatissimas.

Dum ille in juvandis militaribus copiis tam strenuam po-

nebat operam, nullam erga domesticos curam prætermittebat, ut ad privata munera, et communia Societatis ministeria singuli pro conditione sua diligenter incumberent. Sed in tractandis animarum causis, sicut indefessam ab unoquoque requirebat industriam, sic etiam a quavis vel offensionis, vel novitatis specie abesse omnes desiderabat, neque in eo facile connivebat, quod minus ad prudentiæ leges exactum deprehendisset. Antequam ad eam veniret urbem, audierat de pia quadam femina Salmanticensi, cujus erat apud quosdam opinio sanctitatis eximia; aliis longe aliter opinantibus, ac fumum tandem ex fulgore daturam pertimescentibus. Dirigebat eam hoc tempore quidam Societatis Sacerdos, minime quidem lævus, neque destitutus ingenii dotibus, quarum nobile specimen dederat, vulgatis prælo libris, qui cum laude legebatur, et fructu: sed idem aliquanto credulus, et qui pro suo candore animi non facile in aliis fraudem suspicaretur. Is Vitam devotæ femine scribere aggressus, multas jam illeverat paginas, cum eo Franciscus advenit, qui rem illam seria discussione dignam existimavit. Vocatum ad se Socium, de ratione primum interrogat, quam haberet in ea femina dirigenda: deinde, quam adornabat historiam, afferri sibi jubet, ut eam ad trutinam revocaret. Paruit ille incunctanter, cum omnino esset ad religiosæ vitæ leges exactus. Rector spissum illud opus evolvit, in quo longissima erat visionum series, multaque divinitus revelata, quæ multa etiam indigebant spongia, nec facile poterant sine discrimine divulgari. Quædam obiter notavit ipse, quæ inter alia sibi maxime displicebant: eaque deinde cum scripto libro discutienda tradidit duobus Collegii Patribus, quorum nota erat sagacitas, et scientia. Cum imperata illi fecissent, eorum animadversionibus alias adjunxit Rector, easque ad Provincialem misit, cujus interposita auctoritate, Sacerdotem illum et a persequenda historia, et a regenda conscientia femine prorsus inhibuit. Quæ non ideo dicta sunt, ut femine, de cujus exitu non liquet nobis, detractum velimus quidquam; sed ut Rectoris providentiam vigilem ostendamus, ne quisquam suorum in devia, et periculis obnoxia declinaret. Sacerdos autem ille, de quo loquimur, Superiorum jussa prompte, submissequè explevit,

neque de femina deinceps, neque de hujus interrupta historia ullum unquam auditus fuit inferre sermonem: quod non vulgare est solidæ virtutis argumentum.

In temporariis Collegii rebus vix quidquam Rector reformatione dignum invenit. Nam et fabrica, quam Philippus Rex III ad carissimæ conjugis Margaritæ Austriacæ supremas preces erexerat, perpetuoque dotaverat censu, omnibus erat absoluta numeris, et in domesticis apothecis illa suppetebant abunde, quæ pro Sociorum usibus requirebantur, seu bene valerent ipsi, sive contra valetudine uterentur adversa. Circa illa tamen, unde annui proveniebant reditus, quiddam immutandum censuit, quod sibi minime probabatur. Habebat inter alia Collegium illud numerosum taurorum gregem, qui pascebantur ad Villam, cujus opportuna erant pascua id genus armentis, quæ certis deinde temporibus divendebantur. Sed ferociores illæ bestiæ non raro viatoribus terrorem, et periculum inferebant: sæpe etiam in vicinos agros, delusa pastorum solertia, cum strage satorum, ac messium dilabebantur: et quanquam id semper pro damni æstimatione resarciebatur, querelis tamen occasionem dabat, et offensionibus vicinorum. Ut his penitus occurreret incommodis, cogitavit Rector de universo taurorum armento divendendo. Non pauca opponebant illi, quibus demandata erat rei familiaris administratio: nec deerant aliqui graviores viri, qui Rectorem ab eo consilio removere contenderent. Ipse vero, postquam attente omnia perpenderit, tandem Superiorum consensu, atque approbatione munitus, et tauros, et pascua vendidit: reductamque inde pecuniam alibi collocavit, unde pares, aut majores etiam proventus sine aliorum offensione poterat sperare.

## C A P U T X.

*Provincia Castellana primum illi discernitur.*

**P**rsægus quodammodo haberi posset Germanus ille Socius, qui Romæ olim in Electorum consessu dixerat, ut Francis-



ciscus noster, quoniam delatum sibi Assistentis munus tanta contentione recusabat, fieret semel, et iterum Provincialis. Bis enim præfecturam Provinciæ gessit, quamvis ille ne semel quidem eam exercere voluisset. Nunc igitur, postquam Salmantinum Collegium vicenos fere menses administraverat, in eunte anno 1764, jussus est Provinciam suscipere gubernandam. Hoc illi dolorem attulit acerbissimum, et cum ad eum multi gratulandi causa convenissent, mirari satis non poterant incredibilem hominis commotionem, qui delatum sibi honorem tanquam gravissimum infortunium deplorabat: unde aliqui ab eo digressi, continere se non poterant, quin ad tantæ humilitatis exemplum exclamarent: *Vere sanctus est homo iste*. Dolenti ergo, et afflicto animo suscepit iter ad Vallisoletanum Collegium S. Ignatii, quæ solita erat provinciæ Præpositis commoratio. In eo itinere, cum venisset ad torrentem, qui Guarenna nomen habet, ancipites hærebant comites, præstaretne referre pedem, ane trajicere torrentem, qui tumidus, et rapidus eo tempore præterfluebat: et cum sæpe Franciscum sententiam rogassent suam, hoc tantum ab eo elicere potuerunt responsum: *Non magni profecto interest, si mediis ego submergar aquis*. Adeo illi collata dignitas displicebat, ut morti potius, quam eidem subjacere voluisset. Sed cum nulla jam declinandi honoris superesset via, constanter induxit animum ad annexa illi onera sustinenda. Hoc enim peculiare fuit ei semper, ut quanto ægrius munera susciperet honorifica, tanto deinde acrius contenderet, atque omnes nobilissimi animi dotes expromeret, ad ea pro virili parte adimplenda.

Cum primum Vallisoletum venit, ut melius de Provinciæ rebus cognosceret, longas cum senioribus illis consultationes habuit, qui designati erant, ut eorum consiliis in Sociorum regimine adjuvaretur. Appetente deinde vere, profectus est incunctanter ad Provinciæ domicilia recognoscenda. In his profectionibus, quibus dabat maximam anni partem, hunc fere tenebat agendi morem. Multo surgebat mane, ut Sacrum mature faceret, quod vix unquam prætermisit, superatis vesperi difficultatibus, quæ non raro in tanta locorum varietate occurrebant. Quotidie itinerarium Clericorum, ante-



quam domo exiret, cum Socio recitabat. Viam ingressus, Mariæ Virginis opem Laurentana deprecatione implorabat, Angelorum item, et Sanctorum Societatis auxilium singularibus precibus deprecabatur. Post hæc horam circiter dabat meditationi cœlestium, deindeque Psalmodiæ partem aliquam exsolvebat. Si tempus, et locus sineret, Socium auscultabat, qui frequenter inter eundem legebat aliquem librum; vel cum eo de Collegii tractabat rebus, in quod habebat iter, aut de his etiam, quæ ad totius Provinciæ regimen spectarent. Ante meridiem conscientiam diligenti examine discutiebat, quod noctu pariter, antequam iret cubitum, iterabat. In diversoriis, dum se occasio ferret, solitus erat pueros de mysteriis fidei, et christianæ doctrinæ rudimentis interrogare: neque unquam alienum a se duxit, inter gravissima negotia in eam descendere puerorum institutionem. Post meridiem, cum Vespertinas solvisset preces, denuo arripiebat iter, in quo similem observabat procedendi modum. Vergente autem in occasum Sole, recitabat cum Socio Rosarium B. Virginis: et cum venisset in locum, ubi pernoctandum erat, Matutinum officium pro insequenti die dicebat, et lectioni vacabat spirituali. In spatiosis Castellæ, ac Legionis campis faciliores erant hujusmodi profectiones, quocunque demum tempore susciperentur. Sed cum ad Cantabros, et Gallaicos, ad Astures, et Pæsicos iturus erat, non leves ei sustinendi labores fuerunt; vel propter hospitiorum incommoda, in quibus aliquando lectus illi ad dormiendum defuit; vel propter salubrosos viarum anfractus, et frequentes cœli injurias, quibus erat inter equitandum facile obnoxius. Non ideo indictum differebat iter, aut intermittebat inceptum, quamvis ipse non raro contractis ab equitatione plagis miserabiliter cruciaretur: habebat enim tenuissimam cutem, quæ diuturnæ vectationis attritu sæpe illi discindebatur. Cum angustam aliquando vallem sub accenti Sole pertransiret, auditus fuit ex abrupto dicere: *Subit animum inexplicabilis afflictio Domini, cum affixus Crucis, nullum doloribus invenire poterat levamentum*. Quæ verba ideo protulisse credebant socii, ut ipse ardorem æstuantis aeris, et pungentes plagarum morsus, quos mulæ impositus nullo modo poterat mitigare, proposita Christi nece, patienti

ti animo sustineret. Ac multum quidem ex tam sublimi proficiebat exemplo, cum inter graves itineris molestias hilaris semper, et festivus incederet, ut vix comites incitaret ad eandem æquanimitèr perferendas.

Postquam venerat in Collegium aliquod, adorata primum suppliciter Eucharistia, complexisque amantissime omnibus ad unum Sociis, ad salutandum Episcopum, si quidem in ea urbe degeret, sine cunctatione prodibat. Deinde, cum Adjutori qui eum comitabatur, discussionem commisisset librorum, quibus accepti et expensi rationes continebantur; ipse in his totus versabatur, quæ ad domesticam disciplinam, et subditorum spirituale bonum pertinebant. Singulos Sacerdotum, a Superiore incipiens, in eorum cubiculis alloquebatur: Fratres ad se vocabat: unumquemque juxta ea, quæ ab ipso audiret, vel aliunde cognovisset, opportune instruebat, monebat, corriperebat, adhortabatur: omnes ad renovationem in spiritu, et perfectionis studium excitabat. Quæ omnia tam suaviter, et benigniter efficiebat, ut Parentis potius, quam Superioris personam sustinere videretur. Collegiorum Rectoribus solitus erat inculcare, S. Ignatio gratissimum effecturos, si Magistros benevole haberent, quo libentius, et alacrius suo muneri satisfacerent. Id erga illos maxime commendabat, qui laboriosam docendæ Grammaticæ susceperant occupationem. In his aliqui erant, qui vel sponte sua, vel hortatu Provincialis inducti, quamvis idonei ad majora essent, se totos in tam utile opus impendere constituerant. Hos semper in honore habuit, et intra religiosæ moderationis fines præcipua studuit liberalitate fovere. Cum enim tanti ad Dei obsequium et Reipub. utilitatem intersit, pueros humanioribus literis, et optimis moribus informari; qui se huic exercitationi perpetuo addixerant, singulari aliquo præmio munerandos esse judicabat.

In tradendis severioribus disciplinis probare non poterat nimiam quorundam Theologiæ Doctorum prolixitatem, qui nonnunquam in eadem versanda materia biennium integrum consumebant. Ex quo fieri necesse erat, ut ipsorum discipuli per quadriennii spatium modicam admodum Theologicarum rerum notitiam compararent. Ad eam præcidendam immode-

rationem, Theologiæ Professoribus injunxit, nequis ultra annum excurreret in eodem tractatu prælegendo: atque ut firmiter in posterum ab omnibus servaretur, idem deinde fecit a Præposito Generali confirmari. Quod si per adversa licuisset tempora, optime de his meruisset omnibus, qui deinceps ad theologica studia suam conferre operam decrevissent. Utilissimum movebat opus, quod Magistris pariter, atque auditoribus ad sacras docendas, discendasve literas faciliorem aditum aperuisset. Virum designaverat in theologicis bene versatum, ingenio item, ac prudentia præditum, ut delectu habito inter scripta Magistrorum veterum Societatis, quorum fuerat nomen in Academiis Salmanticensi, et Pintiana celebratissimum, potiora quæque redigeret in convenientem facultati ordinem, juxta methodum D. Thomæ, completamque Theologiæ summam quatuor mediocribus tomis complecteretur. Ex iis primus tantum prodierat in lucem, quando Socii missi sunt in exilium: et approbatio, quam apud multos obtinuit, vehementius dolorem auxit, quod tam utile opus perfici non potuisset.

Optabat etiam Franciscus, ut in Philosophia, detractis nonnullis, quæ parum utilia, vel minus certe necessaria credebantur, alia quædam subrogarentur ad præsentem philosophandi morem accommodata. Cum enim inter eos, qui Lyceum in Societate frequentabant, non omnes inde gradum facerent ad Theologiam, sed longe aliam studiorum rationem sequi meditarentur; pro his quidem opportunum, ac fere necessarium existimabat, aliquam in Philosophia mutationem facere, et amoeniores quasdam eidem superaddere tractationes. Eo fine nonnullos Societatis Auctores, qui paucis ante annis philosophica scripserant, et cum laude recepti fuerant, Romæ sibi mitti curavit, ut eorum inhærendo vestigiis, novus aliquis in Hispania Philosophiæ cursus institueretur, qui esset et loco, et tempori maxime accomodatus. Id ille pro virili urgere non destitit; sed iniqua, quæ supervenerunt, tempora præclaris conatibus ejus obstiterunt. Sic tamen novum Philosophiæ nitorem addere cogitabat, ut fundamenta, quibus ad eam usque diem innixa perpetuo fuerat, immota relinquerentur. Nam vel in physicis, quæ innovanda præsertim erant, nihil a principi-

ciplis Aristotelicis recedendum esse censebat; cum iisdem minime adversaretur major quidam ornatus eruditionis ad insigniora naturæ arcana illustranda; et aliunde principia illa in Societatis Constitutionibus, et decretis magnopere commendarentur. Hæc eadem opportuniore reputabat ipse ad Catholicæ religionis dogmata propugnanda: seque illud observasse ajebat, ex impiorum numero, qui nostrum hoc seculum probrosis inundant scriptis, plerosque aut ex Mathematicis prodiisse, qui falcem in alienam miserunt messem, aut ex Philosophis Peripateticæ sectæ adversariis, aut ex Theologis denique, qui Theologiam Scholasticam, eidem sectæ addictam, aspernarentur.

Non eadem a Mathematicis timebat incommoda, qui suos intra fines continerentur: eorumque nobilissimas disciplinas et commendabat ipse quam plurimum, et easdem in Provincia sua, non sine fructu, conatus est instaurare. Confugerant ad Hispaniam eo tempore non pauci ex Gallia Socii, qui Senatorum illius regni decretis in alias migrare sedes compulsi fuerant. Horum plerique intra Castellanae Provinciæ fines, cui tum Franciscus præerat, consederunt: et is occasione utendum ratus, Petrum de Lacaze, qui Tolosæ Mathematicam explicabat, Salmanticam misit, ut eam ibidem traderet. Sub ejus disciplina nonnulli Societatis juvenes studia illa ita perceperunt, ut ab eis deinde in Italia, quo tandem relegati fuerunt, plures alii didicerint. In his fuit Franciscus Azpurus, qui paucis abhinc annis a Serenissimo Parmensi Duce Placentiam cum aliis ad erudiendam juventutem evocatus, Mathematicam ibi publice profitetur, eamque magna civium acclamatione, dum hæc scribimus, coram discipulis quinquaginta quatuor exponit.

Circa reliqua Societatis ministeria parem Xaverius noster diligentiam adhibuit, ut ea magistratus sui tempore promoveret. Ad augendam eloquentiæ sacræ dignitatem quosdam huic idoneos muneri designavit ex eorum numero, qui triennium in docenda posuerant Philosophia, cum antea soliti essent ad iterandum denuo cursum destinari. Nonnullos etiam Theologiz Professores hortatus est, ut gymnasii Cathedram cum templi suggestu commutarent. Et quamquam hoc aliquis minus

nus libenter audiit, hortantique Præposito non ea, qua par esset, submissione respondit; is tamen cogere reluctantem noluit, cum ab invitit vix quidquam boni crederet sperandum. Illorum vero industriam, qui templis addicti erant, ut pœnitentium confessiones audirent, vel solo exemplo suo exacuebat. Quoties iter lustrandæ Provinciæ causa susciperet, missis ad Episcopos literis, quorum in diœcesibus debebant Socii, de profectioe sua singulos admonebat, promptumque ad ipsorum imperia pollicitus obsequium, facultatem insuper excipiendi confessiones (nisi jam alias obtinuisset) et sibi, et qui ei a secretis aderat, postulabat. Neque otiosa potestas erat, quam illi amplissimam deferebant Antistites. Cum enim in Collegium aliquod devenisset, ad sacram Pœnitentiæ sellam et prompte accedebat, et constanter in eadem perseverabat. Non ideo tamen inter multiplices officii sui partes aut præteribat aliquam, aut perfunctorie tantum exequebatur. Sedulo inspiciebat omnia, deque præsentis rerum omnium statu, de Collegiorum redditibus, de creditis, ac debitis per se ipse agnoscebat attente, ac siquid emendandum esset, prudenti consilio decernebat. His adde multorum civium salutationes, quæ solito frequentiores erant et propter excelsam sui generis conditionem, et propter publicam doctrinæ, ac virtutis famam. Sed hæc ipsa humanitatis officia in aliquam vertebat Collegiorum utilitatem, vel augendo amicorum numero, vel iis denuo reconciliandis, qui falsis rumoribus, aut alia quavis de causa fuerant abalienati. Aliquando Præsulem, quem imprudenter Rector quidam offenderat, insigni edito demissionis exemplo, veniamque humi prostratus implorans, ad benevolentiam pristinam revocavit.

In statuendis ordinationibus parcus erat, et maxime circumspectus. Quæcunque autem in commune præcepturus esset, ea simplicibus verbis, valdeque perspicuis edicebat, neque ullam præcipiendi formulam usurpabat, quæ aliquam afferre posset offensionem. Siquid autem vitiosum in privatis agnosceret, quod ad omnem Sociorum cœtum minime pertineret, id plerumque non publice, sed remotis arbitris coarctabat: et cum persuadendi, flectendique animos vim haberet incomparabilem, privatam hujusmodi correptionem optatus



tus emendationis fructus consequeretur. Errata vero illa, quæ in aliorum oculos incidissent, in eorum quidem conspectu, ne latius serperent, corrigebat, sed adhibita etiam tum convenienti moderatione. Cum jam a Collegio quodam abiturus esset, Sociique omnes præcedenti nocte ad recipiendam Indulgentiam convenissent, quam Provinciales, absoluta visitatione, impertiri solebant; quemdam illorum severa reprehensione corripuit propter iteratos in eadem culpa lapsus, quibus fastidium aliis creabat, et offensionem. Sed antequam objurgare illum inciperet, excedere de loco jussit et Sacerdotem, quem a secretis habebat, et laicum, qui utrumque comitabatur, ut ruborem minueret reo, qui reprehensione illa omnino resipuit, impensiusque deinde Præpositum amare perterxit. Idemque universim in cæteris domibus eveniebat, ut Socii omnes vehementius erga illum afficerentur, cujus prudentiam, et caritatem experti publice fuerant, et privatim. Ipse autem, postquam aliquem Provinciæ tractum obierat, Vallisoletum rediebat, non ut labori parceret, sed ut alias officii sui partes expleret. Ibi enim cum designatis Consiliariis de negotiis occurrentibus conferebat, ac de his ad Generalem Præpositum referens, acceptisque ab eo responsis, diversos Sociorum gradus, variasque illorum occupationes aptissima dispositione ordinabat. Hæc sane communia Francisco fuerunt cum cæteris decessoribus, qui Provinciam administraverant, neque illa penitus amplitudinem animi ejus manifestassent, nisi alia prorsus insolita, quæ seorsum exponenda sunt, occurrissent.

## C A P U T X I.

*Quid egerit, exortis in Societatem gravissimis  
sempestantibus.*

**A**doranda semper æterni Numinis providentia, cum Societatem Jesu decrevisset extremis laboribus exercere, infatigabili etiam benignitate disposuit, ut in eadem multi essent præstantes virtute, ac prudentia viri, quorum exemplis, adhortationibus, et consiliis imbecilliores alii ad sustinendum eri-



gerentur; alii vero in magnis vitæ angustiis per sollicitam eorumdem caritatem opportunum reperirent auxilium. Inter eos haud postremum obtinuit locum Franciscus Xaverius Idiaquezius, quem Deus ad calamitosa illa tempora reservavit, ut exemplo, et solatio esset non modo suæ Provinciæ Sociis, sed aliis etiam quam plurimis, qui procellis inhorrescentibus, suisque repente convulsi sedibus, tandem ejecti sunt in exilium. Id ego modo aliqua ostendam ex parte, quanquam evidentius hoc idem posteris apparebit, quando conversa condicione temporum, alia multa dignoscere poterunt, quæ in præsentia palam divulgare non licet.

Primi contra Societatem impetus facti sunt in Lusitania, ubi multi Sociorum in teterrima detrusi fuerunt ergastula, quorum aliqua denuo Carvallius construxit, quæ mortuorum potius sepulcra, quam vivorum habitacula videbantur. Cæteri longissimam, et asperrimam intra Collegia passi sunt obsidionem, in qua non pauci egestate consumpti fuissent, nisi eos aliorum pietas vel cum proprio discrimine sublevasset. Franciscus eo tempore tirocinium regebat Villagatsiense: cognitaque suorum fratrum calamitate, adeo fuit diligens, et industrius, ut in eorum subsidium ter mille quingentos aureos, hinc inde collectos, intra Ulyssiponensem Professorum domum fecerit importari, superatis feliciter difficultatibus, quæ minus solertem virum, ac suorum non æque amantem deteruissent. Cum deinde plerique Lusitanorum, post diuturnam ac durissimam in suis domibus inclusionem, relegati sunt in Italianam, pari eos amore complexus est, parique beneficentia prosecutus. Corrogata enim stipe inter propinquos, et amicos, non semel illorum sublevavit inopiam, quibus nulla fuerat pensio ad sustentationem vitæ attributa. Juvenibus autem, qui, spreto Carvallii terroribus, et promissis, invictum animi robur pro retinenda veste Societatis ostenderant; postquam Romanam adventasse cognovit, epistolam cultissimis scriptam legis misit, in qua illorum collaudata constantia, ad eandem inviolabili fide servandam adhortabatur. Huic epistolæ, quæ multum inter Romanos plausum obtinuit, pari stilo juvenis Lusitana rescripsit, maximasque Francisco egit gratias et pro saluberrimis ejus monitis, et pro singulari erga omnes exhibi-

bita beneficentia. Hanc ille per insequentes annos, dum tranquillæ res in Hispania fuerunt, exercere non intermisit, quam brevi post tempore caritatem suam in alios etiam extendit.

Expulsis e Lusitania Sociis, cum Carvallius, ad invidiam tam insoliti facinoris imminuendam, famosis Europam libellis inundasset, in quibus ea recudi fecerat, quæ duobus retro seculis malitiose contra Societatem conficta fuerant ab Hæreticis, et malevolis; non pauci ansam inde arripuerunt, ad illam variis in locis, novisque calumniis exagitandam. In Gallia Senatus Parisiensis, multique alii, Societatis Institutum, quod ne Carvallius quidem improbare ausus fuerat, perniciosum, et impium declararunt, Sociosque ad illud ejurandum, et obedientiam Præposito Generali denegandam, vel, si secus facerent, ad emigrandum ex Gallia coegerunt. His Senatorum decretis cum in varias Socii regiones discessissent, sexaginta circiter in Guipuzcoam, et Navarram advenerunt anno 1764, quo Idiaquezius tempore præfecturam gerebat Provinciæ Castellanz. Scripsit ille continuo ad Collegiorum Rectores, ut benigne advenientes Gallos reciperent, eisque in omnibus, quæ opus essent, perinde atque aliis adessent subditis. Et quoniam inter Superiores inveniri aliquis poterat, qui novum illud onus propter facultatum angustias parum libenter, generoseque sustineret; vehementi omnes adhortatione incitabat, ut divinæ fiderent providentiæ, cui suam ipse operam diligenter esse adjuncturum spondebat. Id quidem strenue præstitit, ut postmodum demonstrabo, si prius ea paucis attingam, quæ, ad extricandam graviores aliam difficultatem, effecit. Dubius et incertus erat, quid Aula sentiret de Gallorum in Hispaniam ingressu, et concessum illis hospitium in quam demum partem acciperet. Ut hoc penitus exploraret, literas misit ad P. Stephanum Bramierium, qui erat a confessionibus Elisabethæ Farnesiz Reginz Viduz, Caroli III Marris. Fecit accurate Bramierius quæcunque a Francisco rogatus fuerat: et cum de iis omnibus, quæ sollicitum illum habebant, Reginam allocutus esset, ejusdem jussu his fere verbis scripsit: „Notum Re-

„gi esse Gallorum adventum, notamque Francisci caritatem,  
„qua illos in Sociorum tectis curaverat excipiendos. Proin-

*Lib. II.*

m m

„ de-

„ deque tranquillus esset, nec porro pergere dubitaret, dum  
 „ Rex aliud non statuisset. „ Hoc habito responso, resedit  
 Francisci timor. Et quanquam denuo illum incessit, cum paulo  
 post regii Procurator fisci de Gallis in Hispania receptis ad  
 Castellæ Senatum retulit, longamque ibidem orationem habuit  
 ad eorum receptum improbandum; id tamen non diu Fran-  
 ciscum sollicitavit. Etenim eodem fere tempore agnovit, gra-  
 vissimum illum Senatum exercitam in peregrinos hospitalita-  
 tem ex Evangelii lege probasse, suisque confirmasse sententiis.  
 Rex quidem nihil tum contra Gallos statuit, neque unquam  
 Francisci nostri, cujus virtutes noverat, ac suspiciebat, ope-  
 randi rationem improbavit.

Is ab ea jam graviore cura expeditus, ad alteram de pro-  
 curando Gallis victu, quam ipse pro firmissima in Deum fi-  
 ducia minimam omnium appellabat, cogitationes et industriam  
 omnem convertit. Ac primum, superato rubore, quem natu-  
 ra omnibus, sed excelsis præsertim viris infudit, ad petendam  
 elemosynam sese sponte demisit. Brevem quandam scripsit epis-  
 tolam, cujus exemplum cum Salmanticam ad Collegium Con-  
 chense pervenisset, nobiles illi Collegæ tenere se non potu-  
 erunt, quin invicem exclamarent: *Deus bone! quanta hic, et*  
*quam sincera resplendet humilitas!* Quædam ejusdem exempla  
 manu sua subscripta, misit Franciscus ad Episcopos sibi no-  
 tos, aliosque dignitate, vel genere conspicuos viros, a qui-  
 bus, exposita sine furo præserti necessitate, simpliciter elemo-  
 synam propter amorem Dei precabatur. Hanc vero flexanimam  
 deprecationem nemo fuit, qui rejiceret. Subsidium, quod in  
 præsentia poterant, alii e vestigio sunt elargiti, alii vero etiam  
 in posterum daturus esse promiserunt. Nonnulli, ut Compos-  
 tellanus Pontifex, et Ovetensis, quotquot Gallos in eorum  
 dioceses Franciscus mitteret, suis expensis alere receperunt.  
 Sed Galli tam procul a patriis finibus, quos revisere propo-  
 diem sperabant, vix adduci poterant, ut recederent, unusque  
 tantummodo Compostellam proficisci voluit. Pompelonem ve-  
 nerunt multi, ibique Prior Lubianus, cujus alibi mentionem  
 fecimus, unciales argenteos septuaginta quinque (nec plures  
 effusa ejus in pauperes liberalitas reliquos sibi fecerat) Rec-  
 tori tradidit Societatis, ut Gallis hospitium disponderet adven-  
 turis.

turis. Deinde vero, cum parem donasset summam, hoc addidit, quod nullo vel argento, vel auro rependi potest. *Quoscumque*, Rectori dixit, *advenientes exules Collegium vestrum non capiat, ne dubites ad me mittere: ego enim illos domi mea recipiam, ego illos alam, et familiam meam, si opus fuerit, in alienas dimittam domos.* Quo facto vir præstantissimus eminenti sapientiæ suæ caritatem supparem esse demonstravit. His autem piorum hominum largitionibus Gallorum necessitatibus abunde subvenire Franciscus potuit: et cum deinde permissum iisdem fuisset a Ludovico XV, ut in Galliam, non quidem ad Collegia Societatis, a quibus pridem extrusi fuerant, sed ad privatas domos redire possent, si vellent (voluerunt autem plerique) quinquagenos philippeos numos singulis in vaticum impertivit.

Interea tamen dum incertus erat Gallorum ad patriam reditus, neque omnino, quantum augendæ forent impensæ, poterat definiri; ne benevolis importunior esset, alias etiam Franciscus inivit vias, ut illorum sustentationi sine alieno gravamine provideret. In primis nonnullos Provinciæ Socios, qui Pompelone, Lojolæque degebant, ad alia jussit Collegia proficisci, ut hospitibus locum suum cederent. Suborta deinde inter Gallos dubitatione circa privilegii cujusdam usum, quod sublevandæ præsentis inopiæ causa concessum iisdem fuerat, nihil prætermisit, ut omnem dubitationis æstum ex justitiæ legibus componeret, ac prudentiæ. Omnibus Galliæ Sociis, cum propriis ejecti essent ædibus, permiserat Clemens XIII, ut expulsionis illius tempore, non obstantibus Societatis Constitutionibus, stipendia possent accipere pro Missarum celebratione. Nunc vero, cum intra Collegia Societatis recepti fuissent, in eisque propter Hispanorum caritatem egregiam de religioso victu sufficienter sibi provideretur, dubitare cœperunt aliqui, possentne diutius concessione illa uti Pontificia. Super his Idiaquezii sententiam exquirebant, qui noluit arbitrio suo decernere controversiam: sed Romam scripsit, expositis et Gallorum dubitandi rationibus, et eleemosynis, quas ipse pro illorum subsidio acceperat, et in posterum sperabat. Rescriptum est ab Urbe, Pontificem Maximum, quam prius potestatem Gallis fecerat recipiendi pro Missis stipendia, ean-

dem confirmare denuo, etiamsi alias undelibet haberent eleemosynas. Tunc Idiaquezius, ut erat fœcundo ad aliorum procuranda commoda ingenio, novam augendæ in Gallos liberalitatis rationem invenit. Adhibitis in consilium præstantioribus Theologis, quæsit ab eis, liceretne Hispaniæ Sociis, qui nullam, ut Galli, solutionem legis habebant, Sacrum facere pro adimplenda Sacerdotum aliorum obligatione, relicto his in integrum stipendio? Quod cum omnes licitum esse affirmassent, certam pecuniæ summam, quam Galli pro celebrandis Missis in discessu suo ab amicis acceperant, iisdem habendam permisit, et Missarum onera inter quosdam Provinciæ Socios distribuit, ut expeditiores essent Galli ad alia stipendia recipienda. Præterea nonnullis aperuit viam, ut in privatis quorundam domibus decentissime vitam degerent, honestis occupationibus dediti. Quidam enim ex Optimatibus rogarunt Franciscum, ut Sacerdotem aliquem Gallum ad se mitteret, qui liberorum incumbere posset educationi, vel Capellani munus exercere. Quorum precibus in ea rerum, ac temporum difficultate facilius annuendum censuit: habitoque inter Gallos delectu, quosdam apud Duces Granatæ ad Egam, Uzedæ, ac Montisplani collocavit, alios apud Marchiones de Valmediano, et S. Joannis, aliosque apud Comites Cervellionis, et Petrarfloridæ.

Postquam exulibus de habitatione, et victu tam decenter accomodaverat, de his etiam diligenter statuit, quæ religiosæ congruerent disciplinæ. Venerant Galli omnes communi Clericorum habitu induti, quem jam tum assumere coacti fuerant, cum ex decreto Senatus Gallici jussi sunt Collegia deserere, privatisque in ædibus habitare. Æquum erat, ut qui jam inter Hispanos recepti erant Socios, sicut iisdem vivebant legibus, paribus etiam vestibus uterentur. Neque id diu cunctati sunt facere, qui Sebastianopolim appulerunt: partim exemplo inducti Provincialis Aquitanæ, qui cum eis venerat, et ut promptus erat semper ad obeunda omnia religionis munera, ita etiam fuit primus ad Societatis vestem induendam: partim adjuti liberalitate, atque industria Joannis Alustizæ, impigri, strenuique in paucis viri, qui Collegio illi præerat, et nullum caritatis officium prætermisit, ut venientibus ad se Gallos, juxta Idiaquezii desiderium, humanissime haberet.

ter



ter eos, qui venerant Pompelonem, quidam inopiam, alii timorem obtendebant, ne Christianissimum Regem offenderent, assumpta modo veste, quam exuere jussi fuerant in Gallia, indeque pensionem amitterent, quam Rex nonnullis eorum assignaverat. Sed eos tandem Franciscus induxit, ut, omni diffidentia, timoreque deposito, religiosas induerent vestes, quas aliis donavit ipse, aliis Episcopus Pompelonensis Gaspar de Miranda, qui multam exhibuit adversus exules beneficentiam. Ut alia quædam decerneret disciplinæ capita, quæ Gallis observanda erant, dum inter Hispanos immorarentur, rogaverat Carolum Nectusium Aquitanix Præpositum, ut Villagarsiam usque procederet, quo ipse profecturus erat lustrandi tirocinii causa: sed impeditus valetudine Nectusius eo misit, qui vicem suam gereret, Patrem Dulimbertum, cujus erat perspecta vitæ integritas, et prudentia. Cum eo Franciscus consultationes multas habuit, ac tandem communi consilio statuerunt, quæ ad rectam Collegiorum, in quibus manebant Galli, disciplinam, et œconomiam spectabant. Statuta illa, typis edita Villagarsiensibus, communicata cum Gallis fuerunt, qui ea probarunt valde, opusque prudentia plenum denominabant. Omnia etiam probata sunt Romæ, atque is maxime articulus, in quo Gallorum regimen ex jure Societatis adjudicatum fuit Idiaquezio.

## C A P U T X I I.

*De his, quæ fecit, cum Societas in Hispania  
incepta est perturbari.*

**N**on pauca per Hispaniam eodem fere tempore aliqui moliebantur, quæ viam gravioribus sternebant malis, et indicendi post paulo Sociis præludia fuerunt exilii. Multi contra Societatem libri ex Gallia, Lusitaniaque advecti, per varias Regni partes spargebantur, qui deterendæ Sociorum famæ, conflandæque illis invidiæ fuerant editi. Et quamvis corruptæ illæ merces clanculum importarentur, aut jam olim ab incorruptis morum Censoribus proscriptæ fuissent; tamen ut  
natu-



naturæ quodam vitio nitimur in vetitum, non deerant, qui avidè illas conquirerent, et quovis pretio compararent. Inter alios Pompelone venalis prostrabat liber, quem anonymus Auctor inscribere non erubuit *Annales Jesuitarum*, cum potius Declamatio esset in Jesuitas fere perpetua, falsis quibusdam narratiunculis interpolata. Ibi enim congesta erant, quæ olim Carolus Molinæus, et Stephanus Pasquierus, aliique Societatis adversarii contra illam, ne pedem in Gallia figeret, objecerunt. Molinæus, quam susceperat, Parisiensis Academiæ defensionem, inde orsus est, quod Jesuitæ novam quamdam Religionem inducerent contra canones Conciliorum, quibus vetitum erat novam ullam Religionem erigere. Quasi vero canones illos ignorasset Summus Pontifex Paulus III, qui Societatem confirmaverat ante annos viginti quatuor, quam Molinæus hæc diceret. Pasquierus autem eo prorupit insanix, ut Societatem hæreticam Sectam diceret, et Ignatium non minus, quam Lutherum, Ecclesiæ perturbatorem fuisse contenderet. Intolerandam hominis impudentiam! quam ut modo cohiberent Sacri Judices, ad quos liber delatus fuerat, illum per Ministrum, quem Pompelone habebant, intercipi fecerunt, et ad Inquisitionis tribunal deportari. Tulit hoc indignanter vir potens, qui Bibliopolæ protectione suscepta, multa movere cœpit, ut eidem *Annales* restituerentur. Sed, jubente Rege, quem supremus Quærsitor fidei de iis omnibus coram edocuit, verendi tribunalis jura servata fuerunt illæsa, et præpotentis viri conatus ea vice repressi.

Verumtamen in tanta ingruentium undique libellorum colluvie fieri nequaquam poterat, ut omnes supprimerentur; atque eo vel maxime, quod intra ipsam etiam Hispaniam quædam ejusdem farinae procudebantur. Publici nuntii, qui per menses singulos sub titulo edebantur Mercurii, multa passim evulgabant, quæ Jesuitis conciliare odium poterant, et infamiam. Videbat Franciscus noster quantum inde malum posset exurgere, nisi mature remedium aliquod apponeretur. Institit ergo apud virum principem, cui suberat is, qui Mercurium compilabat, ut hujus obloquendi licentiam coargueret, neque bonum Societatis nomen calumniosis narratiunculis obscuraret. Alij etiam cordati viri, cum graviora inde ominarentur

zur incommoda , iis omni ope occurrendum esse censebant. Inter cæteros Conchensis Episcopus Isidorus Carbajalis , et Lancaster , Apostolici vir pectoris , multa tentavit , ut perniciosam illam maledicentiã cõhiberet . Et quanquam ob injuriam temporum neque ille , neque item Franciscus conata sua pro eo , quantum optandum erat , obtinere potuerunt , malum tamen illud videbatur aliunde fuisse compressum . Mercurii enim auctor paulo post in regnantem Pontificem Clementem XIII in-  
 vectus est , atque adeo integritatem S. Gregorii VII ausus est improbare . Sed cum religiosissima Hispanorum pectora tam procacem audaciam ferre non possent , multi contra ejus auctorem insurrexerunt , quorum opera , post recantatas injurias , amotus fuit a munere , quod gerebat . Sperandum erat proinde , ut insectationes quoque cessarent in Jesuitas . Verum is , qui priori successit , quamvis de Romana sileret Sede , in traducenda tamen Societate simili modo perrexit . Tunc Franciscus binas Matritum misit epistolas . Alteram ad Magnatem , qui multam apud Generalem fidei Quæsitorem habebat gratiam , ut eum ad tuendam Societatis causam impelleret , et obtrec-  
 tationes , quibus pasim lacerabatur , impediendas . Alteram ad provinciæ Toletanæ Præpositum , quem rogabat , ut , si tentare aliquid ex communi duorum consilio ad asserendam Societatis famam crederet opportunum , suum interponere nomen non dubitaret . Forte per eos dies Matritenses Socii litem vicerant , quæ pridem cuidam ex illorum Domibus intenta fuerat . Inde autem Præpositus corjiciebat , res Societatis non adeo abscissas esse , ut meliora sperari non possent . De rumoribus vero , qui spargerentur in vulgus , non admodum curandum existimabat . Atque his conatus est sollicitum Francisci animum aliqua ex parte sublevare . A Magnate vero tale responsum habuit , quale is a supremo receperat Quæsitore : *Non omnia , quæ in votis essent , pro votis posse obtineri* . Nihil ergo tum temporis ad avertendam , quam timebat , calamitatem , efficere Franciscus potuit .

Multa interim ad eum per auctores minime ineptos afferebantur , quæ augendis suspicionibus , ac timoribus occasionem quam maximam subministrabant . Noverat , consultationes Matriti haberi super quæstionibus , quæ , licet ad omnes religiosæ

vitaſe Asſeclas pertinere poſſent, ex aliis tamen adjunctis Jeſuitas ſingillatim reſpicere videbantur. Quærebatur inter alia, et reſponſum a viris doctis ſub inviolabilis ſecreti fide poſtula- batur: An ſententia contra Religioſos in Supremo tribunali laico pronuntiata, effectum ſortiri debeat, etiam contradicente Romana Curia? Utrum aliquis Religioſorum cœtus, inconſulto Pontifice, a Regni finibus poſſet expelli? Eſſetne Romanus Pontifex in Religionum approbatione infallibilis? Noverat, in diverſis Regni partibus Tabularia juſſa fuiſſe diligenter excuſi, excitatas olim contra Societatem lites recognoſci, et veteres quorundam adverſus eam querelas explorari. Imo etiam Civitatem quandam, quæ paucis ante annis recipiendo Societatis Collegio accerrime, ſed fruſtra repugnaverat, ſolicitatam modo fuiſſe ad cauſam inſtaurandam. Quod cum efficere illa renuiſſet, quippe jam foundationis ejus lætiſſimum fructum experta; unum aliquem civem, qui vehementius cæteris obſtiterat foundationi, per literas admonitum fuiſſe, ut ea omnia, quæ populus, et Clerus, et Religioſorum ordines contra Jeſuitas, pendente lite, objiciebant, accuratè colligeret, ac perſcriberet. Noverat inſuper, exploratores quosdam eſſe designatos, qui Socios in verbis caperent, ſi forte in concionibus publicis, aut in privatis Congregationibus aliquid eis elaberetur, quod in partem poſſet accipi deterioſorem. Et ab iisdem curioſe obſervari, quinam Sociorum limina frequentarent, et familiariter cum eis agerent: quod cum ſenſim emanaret in publicum, familiariffimi quique a Sociorum conſuetudine diſcedebant. Denique per dignas fide literas agnoverat, in Gallia pro comperto haberi, Societatem evertendam demum fore in Hiſpania, ſolumque deliberari, an id exequendum eſſet, ut in Luſitania factum erat, an potius ut in Gallia, anne tantummodo prohibita Novitiorum receptione.

Cum tam multa Franciſci animum ſolicitarent, alia tamen non deerant, quæ illum erigerent ad ſperandum. Atque illud præcipue, quod miſſis ab Aula literis aliqui confirmabant: Catholici Regis animum non facile fore inflectendum, ut exemplum imitaretur, quod in Jeſuitas Luſitania ediderat, et Gallia. Nec vero dubia erat Régis erga Societatem per illa etiam tempora benevolentia. Cum decreviſſet Scholam in  
arce

arce Segoviensi constitui, ut adolescentes nobiles tractandis in acie tormentis bellicis erudirentur, ad eam recte instituendam duos e Societate viros designari voluit. Et Franciscus noster, de his a Gazzolæ Comite admonitus, duos sine mora Socios venire Segoviam fecit, quorum alter Mathematicam adolescentibus explicaret, alter Christianæ illorum institutioni, quæ voluntas erat Regis, incumberet. Sub idem fere tempus Procuratores quidam Americani, supplementum pro Missionibus Indicis scripturi, Maritum venerant. Oblatisque Regi precibus pro conscribendis aliquot Sociis, qui secum in Americam navigarent, Rex adeo superavit eorum vota, ut octoginta deligere benignissime concesserit. Sed ad propensam in Socios Caroli III voluntatem demonstrandam, nihil eo evidentius, quod ipse cuidam de his secum disserenti respondit. Quo tempore probrosa multa contra Jesuitas et scriptis libellis, et obtreptatorum linguis undique jactabantur, inter Hispaniæ Magnates nonnullus ausus est, quid de illis sentiret, Regem ipsum interrogare. Cui Rex: *Nullam ego, inquit, de Jesuitarum fidelitate, optimisque officiis suspicionem habeo. Cujus hoc tibi, et cuicumque alteri manifestissimum esse debet argumentum, quod filios meos etiamnum constitutos habeam sub illorum disciplina.* Enimvero a prudenti, atque amantissimo Patre, simulque Rege potentissimo, de præclara Jesuitarum opinione nulum hoc majus testimonium poterat exhiberi. Non deterius de illis opinabatur Marchio Scylacæus, Minister regius, Regique acceptus in primis. Præter alia notissima ejus benevolentiae signa, fama erat, cum aliqui veterem coram ipso recinerent cantilenam de superbis Jesuitarum opibus, quibus haud modica ærario fieri posset accessio, indignanter eos a se rejecisse, ineptias illas ajens, ignaro popello venditarent; cum ipse nosset optime quænam Jesuitarum essent facultates, quantaque inde imminerent incommoda, si modo illæ ad ærarium regium devolverentur.

Franciscus igitur spem inter et metum constitutus, cum decerni vix posset, utri potius adhærendum esset parti; neque illa, quæ privatim ipse noverat, palam cum aliis communicari oporteret; in administratione Provinciæ suæ quædam efficere cogebatur, quædam item dissimulare, quæ nonnullis for-

tasse displicerent, nedum ab omnibus probarentur. Quoniam notum illi erat, ex insidiis observari Socios, num aliqua in Orationibus ad populum dicerent, quæ malignam admittere possent interpretationem; taliaque a quibusdam improbis reputari quæ nonnunquam Oratores sacri adversus choreas, et spectacula proferre consueverunt; Concionatores admonendos censuit, ut auditores suos ad evitanda irritamenta omnia peccandi universim adhortarentur, ad eas tamen individuas periculorum species minime descenderent. Sed cum aliunde sciret, Sociorum literas aliquibus in locis resignari, admonitionem illam, conducto fideli viro, ad viciniorem Rectorem misit, ut is pari modo mitteret ad propinquum, atque ita deinceps in cæteros veniens, ad extremum usque perveniret. Quæ quidem literas mittendi ratio, ed admonitio ipsa, quæ mittebatur, satis erat insolita, sed, attenta conditione temporum, necessaria. Ob id etiam binos, aut ternos Rectores a litibus eo tempore abstinere jussit, quas adversarii contra quædam Collegiorum bona comminabantur, et quibus nulla tunc erat opportunitas. Quemdam item Sociorum, qui rem aggressus fuerat ad speciem sane utilissimam, sed aliquorum offensionibus obnoxiam, non sine commerita reprehensione ab incepto resiliere fecit, in quo jam longe processerat. Is, inconsulto Provinciali, libellum supplicem scripserat, quem Guipuzcoanis offerre meditabatur. In eo auctoritatis, et eloquentiæ suæ, quarum utraque valebat plurimum, nerves omnes intenderat, ut ostenderet præstantissimæ illi Provinciæ honorificum fore, atque utile, si Lojolæ Seminarium quoddam erigeretur, in quo nobiles pueri Guipuzcoani, alique finitimi bonis literis, et liberalibus artibus informarentur. Id effici sine magno dispendio posse, dummodo incultus quidam locus, ac derelictus ea lege Lojolensibus Sociis concederetur, ut illum arboribus consitum retinerent, cæsisque veteribus novas semper sufficere tenerentur. Inde magna in utramque partem commoda proventura. Nam Guipuzcoanis ea silva carbonem poterat subministrare, cujus penuria laborabant, ad officinas ferrarias promovendas; et Sociis tantundem reddere, quantum pro Seminarii sumptibus opus esset. Hæc ille ingeniose magis, quam prudenter pro ratione temporis excogitavit. Nam

con-



consilium istud nonnulli quidem ex nobiliorum ordine, qui promovere illud poterant, probaverunt: et cum ejus auctor non minus esset acer ac vehemens, quam eloquens et ingeniosus, sine mora libellum supplicem edidit, cui etiam ausus est Francisci nomen, eo penitus inscio, subscribere, atque ita Vallisoletum ad eum remisit. Sed nondum libellus venerat ad Franciscum, quando is quasdam accepit literas, quibus admonebatur, libelli argumentum non æque placere omnibus, et a quibusdam Guipuzcoæ primoribus non facile recipiendum. Franciscus, lecto illo, similiter improbavit, et auctorem graviter pro meritis castigatum, quod libellum suo nomine subignasset, a negotio illo jussit penitus abstinere. Id fuisse propterea fuit exponendum, ne quis forte Francisco nostro libellum illum adjudicet, qui nomen ejus ferebat in calce.

Hæc inter annus incesserat præterlabentis seculi sexagesimus sextus, qui, frequentibus per Hispaniam tumultibus excitatis, pervigilium expulsionis Jesuitarum visus est fuisse. De Matritensi tumultu, qui Marchionem Scylacæum ab Hispania expulit, quem etiam paulo post secuti sunt Jesuitæ, ut ipse prædixerat navem Carthagine conscensurus, ab eis multo plura, qui propius erant, poterunt dici. Nobis hic ea tantum attingenda erunt, quæ facta sunt in Guipuzcoa, quippe intra illius Provinciæ terminos constituta, quam regebat Franciscus, cui proinde multæ occasiones fuerunt prudentiæ, patientiæque perhibendæ. Lojolense Collegium, S. Ignatii natale solum, duos inter populos æquo fere discrimine interjacet, quorum alteri Azpeithiæ, alteri Azcoithiæ nomen est inditum. Cum igitur aliqui de Azcoithiensium plebe, nescio quam annonæ caritatem obtendentes, tumultuari cœpissent, ad eorum sedandos animos plurimum juvat quinque Sociorum industria, qui eodem in oppido residebant. Sed perseverante querelarum causa, verebantur Guipuzcoæ Magistratus, ne turbulenti aliqui Azpeithiam usque pertransirent, et illius incolos concitarent. Propterea eorum princeps, quem Delegatum ibi vocant, Lojolæ Rectorem, Joannem Baptistam Mendizabalem rogavit, ut structores, et lapicidas, qui magno numero in Collegio illo laborabant, de ipsorum officio commo-  
neret, ne unquam seditiosis adjungerentur, si forte novi ali-  
quid



quid adversus Azpeithienses tentare vellent. Egit Mendizabal accuratissime quæcumque rogatus fuerat; sed illius verba non omnes operæ libenti animo susceperunt, quinimo aliquis elata voce respondit, tumultuantium partes sibi potius esse amplectendas. De his Rector sine mora Delegatum admonuit. Nec diu post seditiosi denuo insurgunt, adjutique a nonnullis opificum, tumultum præbent Azpeithiæ, qui nonnisi multis Curionum, ac Sociorum Lojolensium precibus, et obtestationibus sedari potuit. Atque ita demum sedatus fuerat, ut artifices illi ad sua quisque opera reversi fuerint. Pauci tamen abierant dies, cum Guipuzcoæ Prætor, qui sedem tunc habebat Azpeithiæ, manipulo militum stipatus, Lojolam venit, et eorum multos, qui levigandis marmoribus, dolandisque lignis intenti erant, alios in templi atrio, alios vero intra Collegii septa comprehendi, et in custodiam deduci jussit. Ut rescivit hoc Parochus Azpeithiæ, cujus intra fines situm est Collegium, de violata immunitate loci apud Prætorem conquestus est. Sed brevi ab ea querela recessit, et Lojolæ Rectorem monuit, ut ipse causam illam susciperet defendendam. Is viam arripuit, quæ minuendæ offensionis, et invidiæ declinandæ commodissima videbatur. Socium cum literis Pompelonem misit, ut Episcopus diœcesanus de his edoctus, quæ Lojolæ contigerant, quid opus facto esset, ipse decerneret. Episcopus peritum eo legavit Judicem, qui, perspecto locorum situ, asyli jus læsum fuisse, ac proinde vinctos in libertatem asserendos, pronuntiavit; quanquam ejus deinde sententia Martiti fuit improbata.

Dum hæc Lojolæ fierent, longe inde Franciscus aberat, qui Vallisoleto profectus Villamgarsiam, in Torozii montis oppidulo, cui Mudarra nomen, fasciculum literarum accepit, quibus eum Lojolensis Rector de operariis in Collegio captis admonebat. Ex eodem oppido responsum dedit: Capturæ locum non ita sibi esse cognitum, ut statuere inde posset, violatane fuisset immunitas: id ab aliquo potius externorum dijudicandum, cujus sententiæ standum erat ab utraque partium. Post non multos dies aliæ sane quam prolixa afferuntur ei literæ, in quibus Guipuzcoæ Magistratus conquerebantur, vana quodam immunitatis obtentu suspensam esse reorum cau-

sam,

sam, qui tumultum excitaverant Azpeithiæ: id cuidam Sociorum præsertim imputandum, qui Pompelonem ad Episcopum adierat, ut eum ad inhibendum justitiæ cursum induceret: nonnullos opificum adhuc in Collegii substructionibus retineri, quorum fuerat in conflanda seditione audacior impudentia: se denique ad Matritense Consilium querelas suas non detulisse propter debitam Francisco ipsi, et sanctæ Lojolæ domui reverentiam. Ob eam observantiæ significationem multas Franciscus egit gratias. Cætera querelarum capita non aliis querelis, quod citra injuriam efficere potuisset, refutanda credidit; sed patienti potius animo perferenda censuit, et, quoniam in lubrico versabatur, prudenti ac miti responsione delinienda. Igitur ad Magistratus respondit: Quidquid perperam gestum esset a Sociis, se penitus improbare, neque ullam errati purgationem recusaturum: Socium illum, cujus ipsi actiorem indolem incusabant, in aliud Collegium, imo etiam in diocesium aliam protinus amandandum: Rectori vero præscribere, ut quoscumque opifices Delegatus designaret, sine mora dimitteret e Collegio. Responsum hoc ita Magistratum animos mitigavit, ut eorum primus, iterum ad Franciscum scribens, nihil ultra deprecari, ac plene sibi satisfactum fuisse, responderit. Verumtamen Societatis æmuli, cum tota illa controversia citius opinione sua, sedatiusque quam vellent, dirempta fuisset, novam inde ordiri stropham decreverunt. Post menses aliquot, quando nullus jam de Guipuzcoanis turbis sermo erat, vir quidam (quem latendi studium non ita potuit obnubere, quin satis agnosceretur) primam illam Magistratus epistolam ad Franciscum typis edidit, ac per omnes fere Hispaniæ provincias divulgavit. In furtiva illa editione, quæ duobus in locis longissime distantibus effecta est, ut conjectura non levis indicabat, variationes erant aliquæ non magni momenti; sed de Francisci epistola, qua ipse querelis omnibus satisfecerat, nullum in ea verbum, nullaque omnino mentio. Id Delegato ipsi, et Assessoribus ejus ita visum est iniquum, ut ille rem prorsus incredibilem judicaverit, donec excusam epistolam ab ignota manu recepit: hi autem Francisco promiserint, in generali Provinciæ conventu, qui proxime fieret, de fraudulenta literarum editione diligenter inquirendum, in  
eos.

eosque severissime animadvertendum, qui suam ad hoc operam contulissent. Sed oblatam injuriæ vindicationem Franciscus pro mitissimo ipsius animo non admisit.

Gliscebat interea rumor, et varius de Jesuitarum rebus opinandi modus majores addebat animos adversariis. Matrii præsertim, quo multa prædictæ epistolæ missa fuerant exempla, invidiosi adeo sermones habebantur, ut Franciscus de his admonitus ab amicis, animum tandem induxerit ad regiam S. Ildefonsi Villam, in quam Rex tum diverterat, proficisci. Convenerant eodem per illos dies Procerum multi, alique primarii viri, ut in solemnibus S. Ludovici, quæ in diem incidunt vigesimam quintam Augusti, Regem salutarent, et osculationi manuum de more interessent. Postridie ejus diei venit eo Franciscus, secum afferens et literas, quas a Guipuzcoanis acceperat cum variationum annotatione, quæ in earum editione factæ erant, et quas ipse rescripserat ad eosdem. De iis omnibus singillatim locutus est ad Ministros: eorumque singuli et vultu, et verbis significarunt, injustam epistolæ Guipuzcoanæ divulgationem quanta cum indignatione improbant, nec Francisci causam coram Rege tueri, dum se occasio ferret, prætermitturos. Confessarium etiam Regis convenire voluit, qui ostendit ei literarum exemplum editum, quod a tabellario Bætico allatum sibi fuisse suspicabatur. Auditis deinde cum admiratione Francisci responsis, effrontem illorum impudentiam vituperavit, qui subdolam epistolæ curaverant editionem: et quantam ipse apud Regem habebat auctoritatem et gratiam, ad Francisci, ac Sociorum ejus defensionem conferre promisit. Inter Optimates ad eos præsertim adivit, qui aliquo in Aula munere fungebantur, ut et ipsi de totius rei serie melius instructi, de illa solidius possent ante Regem inferre sermonem. Neque ullus fuit inter eos, quin prompte suum pro tam justa petitione obtulerit patrocinium. Post hæc accessit ad Regem, cui manum osculatus est reverenter, nec minores ab eo accepit benevoli, ac reverentis animi significationes. Nam postmodum Rex ipse cubiculario suo Pinio dixit: *Religiosus hic pauper, qui paulo ante ad me venit, Ducatum Granata ad Egam repudiavit, ut Societati Jesu nomen daret.* Nec semel deinde per Confessarii sui literas Fran-

cisci precibus Deo commendari petivit.

Biduum, neque illud integrum, in ea Villa permansit, in qua multi eum magnis sunt honoribus prosecuti. A Ministris, et Proceribus ad prandium invitatus, accumbere delegit apud popularem suum Michaellem Muzquium, Ministrum ærarii regii. Idemque pridie fecerat apud Arcorum Ducem, qui Præfectus erat prætorio. Hic multi aderant Optimates, qui Franciscum non tanquam sibi æqualem, sed longe superiorem aspiciebant propter opinionem virtutum ejus, et animum generosum, quo fluxi honoris titulis humilitatem prætulerat Societatis. Et vero ille inter Hispaniæ Magnates non ut eorum aliquis, sed ut magnus inter Christi pauperes apparebat: quod et modesto vultu, et morum ac verborum simplicitate, atque insuper vestimentorum vilitate demonstravit. Quocirca Marchionis Grimaldi, qui erat secretioris scrinii Custos, facetum quoddam dictum fuit eo tempore celebratum. Dum Regem Aulici mensæ jamjam accubiturum opperiebantur, inter illos Franciscus aderat: et Grimaldus, intento digito in Francisci vestem, quæ fortuito disrupta fuerat, coram aliis audientibus dixit: *Idiaquezius, ut video, de stirpe Gironum venit*. Ludebat in ambiguo vocis *Gironum*, quæ cognomentum est Oxunensium Ducum, et vulgi sermone vestem indicat dilaceratam. Riserunt ad Grimaldi jocum non pauci, quamvis ex neglecto Francisci cultu cognoscerent, quantum ille a mundano fastu abhorreret. Ab honoribus pariter, qui sibi deferebantur, sic abhorrebat, ut altero postquam venerat in Villam die, sub vesperum ad Collegium recesserit Segoviense. Voluisset frater ejus Ignatius, Granatæ Dux, qui cum aliis eodem venerat, ut secum Franciscus Matritum usque procederet: non tantum ut Ducem uxorem suam inviseret, filiosque agnosceret parvulos, quod gratissimum sibi fuisset; sed ut Matriti, ubi præcipuum erat robur adversariorum, idem efficeret, quod fecerat ad S. Ildephonsi. Atque utinam fratri, multis eum roganti, Franciscus obsecundasset! fortasse teterrimum illum nimbum, unde tempestas horribili fragore tandem increpuit, prudentia et industria sua dissipare, quod deinde tentavit frustra, mitioribus adhuc rebus, obtinisset. Sed ille modo, cum Regis, et regio-

giorum animos ad protegendam justitiæ causam tam bene cer-neret animatos, Matriti vero Præpositus resideret Toletanæ provinciæ, aliique viri gravissimi, qui se melius obviam ire periculis poterant, siquid aliqui machinarentur; suam ibi præsentiam minus credidit necessariam. Vallisoletum igitur recta contendit, ut inde alia provinciæ suæ negotia expediret.

Sed ne ibi quidem diu potuit optata quiete potiri. Cum jam undique Societas impeteretur, alia ex aliis oriebantur incommoda, quibus difficile admodum erat occurrere tempestive. Multi amicorum apud Socios conquerebantur, quod ingeminatas in eos plagas plusquam Harpocratico silentio ferrent, neque auderent mutire quidquam contra volitantes satyras, infamesque libellos, quibus carpebantur illorum mores, et Institutum ipsum impie, ac probrose sugillabatur. Inde insectatorum numerum, et audaciam crescere; cum ii præsertim, qui longe ab Jesuitarum consortio aberant, vera esse crederent, quæ illis objiciebantur, utpote nullis eorum impugnata responsis, sed potius taciturnitate ipsa quodammodo confirmata. Hæc apud Sociorum quosdam vim tantam habuerunt, ut pene religioni ducerent diuturniori indulgere silentio. Inter illos, qui Francisco suberant, quidam Instituti Societatis defensionem, quæ paulo ante prodierat in Gallia, Hispanice convertendam, ac typis etiam vulgandam curavit. Quod ut legitime, ac tuto efficeret, a Typographiarum Judice facultatem petiit, qui tamen propter durissima tempora eam expresse concedere non est ausus, sed petenti respondit: *Multa esse, ad quæ præstanda, si potestas rogetur, deneganda sit, quæ tamen, si fiant, omnino debeant dissimulari.* Responsum hoc Socius ille ita est interpretatus, ut sibi permissum esse crediderit, quod petebat. Itaque librum edidit, inscio penitus Provinciali, qui de his nihil ante cognovit, quam Vallisoletum regressus fuisset. Hic primum, acceptis Matrito literis, factus est certior, editionem illam, et alias ejusdem argumenti non ad Typorum Judicem, sed ad severiores alios fuisse delatas, multamque inde obloquendi materiam, et criminandi ansam Societatis æmulos arripuisse. Ut rescivit hæc Franciscus, graviter in Sacerdotem illum animadvertit, qui, se inscio, curaverat editionem: nec solum a Rectoris munere amovit, quo fungebatur,



tur, sed ab illa etiam urbe, in qua multos ducebat annos cum magna civium approbatione, in aliam non æque sibi commodam relegavit.

Cum literas per eos dies ad Castrum S. Ildephonsi missurus esset, ut iis gratias ageret, qui se ibi liberaliter exceperant, eadem usus est occasione, ut aliquam de inopinato illo eventu mentionem faceret. Super hoc ad Grimaldum, et Confessarium Regis scripsit, quorum benevolentiam, dum apud eos mansit, expertus fuerat singularem. Utrique dolorem intimum exponebat, quem rediens senserat, cognita subditi Sacerdotis imprudentia, qui librum ausus erat excudere, neque obtenta facultate sua, nec regni legibus, quæ circa rem erant typographicam, satis religiose observatis. Huic se continuo promeritam irrogasse pœnam, et gubernandi privatum munere, in remotum aliud Collegium amandasse. Rogabat eos propterea, ut apud Regem excusatam vellent Societatem Jesu, quæ delicta in alumnis suis minime dissimularet, sed eos ad exactam cogeret obedientiam, quam omnes erga decreta Regis, ac Domini sui fideliter exhibere tenebantur. His Francisci literis rescribens Confessarius, post consuetas urbanitatis formulas ajebat: „ Asseruisse sibi Regem, cui accep-  
„ tam ab eo recitaverat epistolam, de Francisci rectitudine  
„ plene esse persuasum: nunquam de illo credidisse quid-  
„ quam, nec in posterum crediturum, quod virtuti ejus dis-  
„ sentiret, et a nobilitate sui sanguinis abhorreret. Cæterum  
„ de negotio illo, post auditas eorum sententias, quos admi-  
„ nistrandæ justitiæ constituerat, id tandem decreturum, quod  
„ æquitati congruentius existimaret. „ Idem fere ajebat Grimaldus, cujus responsum, ut alterum etiam Confessarii, sæpe vidit Franciscus Gonzalius, qui tunc Idiaquezio a secretis erat, et a quo nos hæc omnia accepimus, ut pleraque alia, quæ de illo diximus. Gonzalius enim, qui multos cum Idiaquezio vixit annos; postquam is fato concessit, præclara illius collegit facta; nobisque latine vertenda tradidit. Idemque asserit, super controversia illa librorum nihil novi accidisse, dum Franciscus provinciam tenuit. Eam susceperat initio mensis Januarii millesimi septingentesimi sexagesimi quarti. Ut autem præfecturam, quanto citius posset dimitteret, de his



mature providerat, quæ ad successorem deligendum spectabant. Acceptisque Roma literis, quibus Ignatio Osorio provincia deferebatur, illum Salmantica, ubi Rectorem agebat, Vallisoletum arcessivit: et in ipsis Januarii Nonis 1767, quamvis multa reluctantem, et excusantem multa, successorem sibi datum declaravit, ac sese illi humillime subjecit. Eodem tempore renunciabatur ipse Salmantini Collegii Rector: sed antequam eo accederet, Matritum, jubente Præposito Generali, proficisci debuit, ut Societatis rebus, quæ vehementius in dies singulos oppugnabantur, quanta posset virium contentione succurreret.

Rigebant gelu omnia, et militaris via per eos dies alta erat nive impedita. Incensus tamen obediendi studio, subveniendique Societati, pro qua vitam ipsam prodigere non dubitasset, postridie festum Epiphaniarum difficile suscepit iter: superatoque non sine periculo Guadarramæ jugo, ubi currum reperit in altissima hærentem nive, Matritum ante Januarii medium pervenit: relictoque Imperiali Collegio, in quo recipi solebant hospites, ad tirocinium divertit, cujus Rectorem de his curaverat præmonendum. Ibi Magnates quosdam, Consiliariosque regios convenire cœpit, initio urbanitatis, ac veteris amicitix nomine, deinde ut Societatis causam iisdem commendaret. Hanc omnes justissimam agnoscebant, et pro illa plerique quidquid possent, naviter effecturos profitebantur. Nonnulli tamen implexam negotii hujus difficultatem non obscure significabant: cum vix nosse dicerent, quinam essent constituti Judices ad cognoscendas peculiare aliquot causas, pro quibus, ab excitata Matrili seditione, novum quoddam erectum erat tribunal, quod nova etiam appellatione Consilium vocabant Extraordinarium. Ut de his certior Franciscus fieret, ad Præsidentem accessit Consilii, a quo rem obtinere tanto sperabat firmius, quanto is hactenus Idiaqueziorum genti plura dederat intimæ familiaritatis indicia. In primo tamen ad eum ingressu, in quo solum urbanis utrinque officiis certatum est, ad inexpectatum Francisci adventum conturbatus fuit Præses, ut ab iis ego audiui, qui congressui illi adfuerunt, et quotidiana fere consuetudine perspectum illum indicabant ad unguem. Deinde sæpe ad eundem rediit, et indi-

cari sibi Judices postulavit , quibuscum agere de his rebus posset , quarum causa tam incommodam susceperat profectio- nem . Sed nunquam hoc liquido explorare potuit , cum sermonem alio traheret Præses ; vel , propositum urgente Francis- co , solum dixerit , non semper eosdem , sed hos modo , modoque illos ad Regis arbitrium designari . Fortasse Francis- co voluit laborem eripere supervacaneum , cum jam de Socio- rum sorte decisum esset : vel forte ab imperterrito illius animo timuit , ne Judices , aut Regem adiens , ad perficienda suscepta consilia moram aliquam , atque etiam obicem inter- poneret . Nam licet Rivadaviæ Comes , qui Matrivo venerat Vallisoletum , cum Franciscus inde Matritum moverat , cogni- to hujus discessu dixerit ; *sero illum profectum fuisse , cum jam decreta esset ruina Jesuitarum* ; tamen deinde constitit , non ante vigesimam nonam Januarii diem induci potuisse Regem , ut consultum Extraordinarii Consilii approbaret ad exilium Sociis omnibus indicendum . Suppetebat ergo Francisco tem- pus , ut exitialem illam plagam avertere conaretur , nisi alia suis conatibus obstitissent . Neque id ab eo frustra tentandum fuisse , persuadebat tum Regis erga illum propensus animus , et eximia de virtutibus ejus præconcepta opinio ; tum Fran- cisci flagrantissimus in Societatem amor , pro qua se dimica- tioni capituli libenter objecisset , ut ipse Provinciali Toletano asseruit ; tum etiam postulatorum ejus æquitas manifesta , cum id unice intenderet , ne Societas indicta causa condemnaretur , eidemque potestas fieret ad objecta sibi crimina respon- dendi : quod sperari profecto poterat a justissimo Rege fuisse obtenturum .

Sed hinc adversariorum artibus , inde amicorum nimia credulitate remoratus , ac denique Sociorum etiam consiliis impeditus , quos recti conscientia securos reddidit ; non ea , quæolvebat animo , et quæ maxime opportuna fuissent , ef- fecit . Enimvero , dum Matrivi restitit , tanta fuit in quibusdam dissimulandi cura , tantumque in aliis simulationis studium , ut quamvis timor alicujus impendentis mali non penitus resedis- set , haud levia tamen essent indicia , quæ procellam excita- tam in Socios paulatim remittere , ac demum omnino sedan- dam ostendebant . Post illum etiam diem , quo Rex tandem

Societatem ab omni ditione sua decreverat expellendam, quædam ab auctoribus non ineptis asserebantur, quæ spem magnam facerent proxime securæ tranquillitatis. Magnates aliqui, Sociorum benevolentissimi, cum reverterentur ex Regia, quæ tunc erat in Pardo (nemus est Matrilo proximus, in quod Reges interdum secedere consueverunt) lætissimis eos nuntiis consolabantur. Ex iis quidam et emunctæ naris, et fidei non ambigæ Franciscum certiore reddidit, circa Jesuitas aliam esse rerum faciem in Aula: desiisse jam suspectos, odiososque sermones illos, qui prius adversum eos conserebantur, omniaque tranquillam innuere serenitatem. Nec verba tantum, sed facta quoque lætioris fortunæ fiduciam conferebant. Prodierat ante menses aliquot Extraordinarii Consilii decretum, ne Socii per Cantabriam expeditiones sacras susciperent, neve in regione illa cuiquam hominum externorum meditanda proponerent spiritualia S. Ignatii exercitia. Id adeo fideliter a Sociis servatum est, ut incunctanter in domos suas Lojola dimissi fuerint, interruptis commentationibus, quotquot iisdem in Collegio illo exercebantur. Multis deinde literis apud Consilii Præsidentem Franciscus institit, ut inhibitionem illam tollere dignaretur. Hic autem spem bonam facere, propensam ad obsequia voluntatem ostendere, Francisci orationibus se valde commendare, diem tandem ex die ducere: donec modo ad iteratas Francisci preces, in ipsis fere Novendialibus S. Xaverii, et imminente jam Sociorum omnium ab Hispaniæ finibus expulsionem, liberam Cantabriæ Sociis facultatem concessit ineundi Missiones sacras, et meditationes S. Ignatii privatim, ac publice proponendi. Quædam alia per idem tempus acciderunt, quæ vel perspicacissimi cujusquam oculos facile perstrinxissent. Antonius Mourinus provinciæ Toletanæ Præpositus, cujus eminenti sapientiæ par prudentia erat, et utramque morum integritas coarctabat, propter invalescentes obloquiorum turbines longioris Matrilo moram fecerat, ut iis promptius occurreret, quæ usus postulasset. Sed cum videret Matritensi Professorum domui causam fuisse adjudicatam, quæ pridem in supremo Senatu disceptabatur; ac pro domo illa quemdam summa orationis contentione dixisse, qui vulgo inter acerrimos Jesuitarum

rum adversarios recensebatur; aliaque fieri animadverteret, quæ nullum prudenti viro relinquerent suspicandi locum, diutius Matriti morandum sibi esse non censuit. Quapropter ad inspectionem provinciæ discessurus, nullo se timore sollicitari Francisco nostro dixit, neque ulterius movendum quidquam, cum jam omnia tranquille fluere viderentur. Sed vix Murgim venerat, quæ non longe Matrito abest, cum Socii omnes, quamvis nullus eorum in iudicium vocatus fuisset, abire jussi sunt ab Hispania.

### C A P U T X I I I .

*Cum cæteris Hispania Sociis Franciscus ejicitur  
in exilium.*

**N**egotium Rex dederat Arandæ Comiti, Supremi Senatus Præsidi, ut decretum illud exequeretur, quo Societatis homines justis de causis, quas in regio animo reservabat, ab omni ditione sua in perpetuum expellere constituerat. Ut hoc uniformi ubique locorum tenore fieret, a vigesima die Martii opportuna monita direxit Comes ad Prætores, et Judices urbium, atque oppidorum, in quibus degebant Socii, quos ab omnibus civiliter, decenter, ac liberaliter haberi præcipiebat; cum hæc esset voluntas Regis, cujus sub patrocinio, quamvis exilii pœna damnati, considerari debebant, dum exacte illi regiis mandatis obtemperarent. Monita illa cum decreto Regis inclusa erant fasciculo literarum, qui non ante quartum Nonas Apriles resignari jubebatur, ut in ea nocte, vel certe albescente sequenti die Sociis omnibus exilium indiceretur. Matriti vero et in propinquis eidem locis, vel quia jam aliquid emanabat, vel alia quadam de causa, in ipsa nocte, quæ præcessit primam lucem Aprilis Socii omnes comprehensi fuerunt: et Matritenses, pro quibus Comes peculiæres ediderat ordinationes, ante auroram educti fuerunt Getafium, inde in duas divisi turmas Carthaginem deducendi.

Franciscus in tristissima illa nocte, præter communem omnium calamitatem, aliud quiddam imminere sibi subtimuit,  
quod

quod exilio ipso sine comparatione tulisset acerbius. Postquam Judex decretum Regis omnibus denuntiaverat, seorsum illum accepit, eique in aurem insurravit, probabile sibi esse, nonnullos ab Arandæ Comite in Hispania fore retinendos. Quæ Judicis verba in eo rerum articulo non alio respicere videbantur, nisi ut Francisco spem injiceret infortunium suorum fratrum feliciter evadendi: in quo ego, non quidem voluisse fallere, sed falsum esse Judicem, affirmabo. Dum tamen spes illa verisimilis haberi potuit, molestissima sollicitudine Francisci vexavit animum, nihil impensius veriti, quam ne disjungeretur a Sociis, et ne in eo discrimine, ut Nazianzenus de Machabæis ajebat, periculis ereptus, mala victoria superaret. Ut autem labores constanter ferret, qui durissimi sane fuerunt in hac ultima vitæ suæ periodo, jam inde ab initio exilii se ipse in hunc modum interrogabat: *Ecquidnam præstantius eris? adversis me vinci? an potius eadem a me superari?* Et cum postremum hoc tenendum esse sine ulla hæsitazione decerneret, omnes generosi animi vires adversus irruentium malorum impetus sic exerebat, et excelsæ mentis aciem ad superna, permansuraque bona adeo irretorto dirigebat obrutu, ut numquam (quod ab eo sæpe audivimus) melancholicum fuisse, nunquam correptum esse tristitia meminisset. Tanti est in rebus turbidis animum non abjicere, sed illum attenta meditatione, et fiducia divini Numinis confirmare!

Carthaginem cum Matritensibus deportatus, quindenos fere dies in Hospitali domo consedit, dum cæteri adventabant Socii, et classis ad Tyrrheni maris litora instruebatur. Hic nihil de pristina tranquillitate decedens, placido vultu erigebat omnes, eosque jucundo et amœno sermone recreabat. Extremo Aprili navem conscendit, quæ brevissimo dierum spatio Centumcellas appulit, quo Socii omnes initio erant destinati. Sed Clemente XIII, cujus notus erat in Societatem amor, justis alioqui de causis descensionem in ditio-  
ne sua non permittente, dirigendus fuit alio cursus, et in Corsicam secedendum, donec ulteriora Matrilo jussa reciperentur. Ob eam causam Franciscus super maris undas, ab uno in alterum delatus portum, quinque integros menses per-



severavit: quantum satis utique fuisset, ut in ultimam Americam navigaret. Duos circiter menses in portu S. Florentii constitit, qui sinus Nebiensis dicitur ab antiquo Nebio, cuius nihil jam superest, præter ruinas, et nomen Episcopatus. Inde Adjacium Urcinium, deinde Genuam, rursumque Adjacium contendit, ubi tandem expositi fuerunt Toletani Socii. Hic debitas rependit grates illius classis Præfecto Francisco Veræ, qui, ut omnes honorati viri, et strenui militis explevit numeros, ita etiam nullam erga Socios humanitatis, ac beneficentiæ partem prætermisit. Idem fecit primariis militibus Prætorix navis, in quam ipse cum itineris comite paucisque aliis receptus, semper ab urbanissimis viris liberaliter fuerat habitus. Sed et ipsi, perspectis in longa navigatione Francisci moribus, multum erga illum affecti fuerant. Mirabantur enim ingenuam hominis facilitatem, qua se cæteris, quasi neminem dignitate præcederet, in rebus etiam incommodis æquiparabat: laudabant studium juvandi animos, quo promptas classiariis præbebat aures, qui suam ad expianda peccata operam expetebant: sæpe illum, inter nautas considentem, suspexerunt longa cum iisdem colloquia serere vel de mysteriis fidei, vel de vitiorum fuga, vel de Sanctorum, ac Mariæ Virginis veneratione. Jam ergo rediturus ad suos, quos noverat consedissee Calvii, Toletanis Patribus valedixit, quorum jucunda consuetudine, fraternaque caritate novem fere mensibus usus fuerat: et litus in conducto lembo radens, Calviensem portum brevi trajectu tenuit die 28 Septembris, quinto scilicet mense postquam se mari commiserat in Hispania.

Adventus ejus lætitiæ Sociorum auxit, qui post labores inenarrabiles in illius urbis ingressu, deindeque in obsidione molestissima toleratos, nonnullam habere inceperant, abeuntibus obsessoribus, tranquillitatem. Sed quanquam cessarat clamor et timor bellicus, quorum ab utroque procul Franciscus fuerat, haud pauca tamen, nec levia supererant incommoda, quorum multa subeunda illi ex æquo fuerunt cum cæteris, nonnulla ipse caritate, et industria sua quam plurimis delinivit. Conticente jam armorum strepitu, de constituendis convenienti ordine Sociorum domibus (cum in primo



mo ad urbem accessu, et in repentina Corsorum irruptione multi se, ubicunque aliquis pateret aditus, indiscriminatim coniecissent) Ignatius Osorius, qui universis præerat, cogitavit. Francisco gubernandam domum attribuit, in qua omnes adolescentens, qui sacras audituri erant literas, collocaverat, eisdemque propterea S. Aloysii nomen imposuit. Hæc inter ampliores illius urbis domos numerabatur; si tamen domorum amplitudini locus esse poterat intra brevissimum totius urbis spatium. Sed receptis in ea Sociis octoginta septem, quibus et sacellum, et gymnasium, et triclinium, et aliæ communes erant officinæ designandæ, ad privatam incolentium habitationem adeo modicum unicuique relinquebatur, ut jam domus omnium angustissima videretur. Rectoris habitaculum apothecæ mercatoris speciem referebat: in eoque tres simul alii, vel quatuor debebant Socii, quorum lectuli, et unica pro Rectore mensa, totius extensionem cubiculi vix non undelibet occupabant. Cæteris intra domum illam neque laxior, neque commodior obtigit habitatio. Sed tamen inter eas loci angustias nulla erat animorum contractio; cum omnes vigilantissimi Rectoris cura et frequentem haberent cum Deo consuetudinem, unde vera descendunt animi gaudia, et constantem in tractandis literis assiduitatem, quæ aditum inertis præcludebat otio, unde mœror, et luctus, et sexcenta alia gignuntur incommoda.

Quæcunque ad religiosæ disciplinæ vitæ conferunt, apertissimo erant ordine constituta. Certa omnibus decumbendi, surgendique hora: designata meditationi, et conscientiæ discussionibus tempora, illa per horam integram statim a somno, hæc per quadrantem ante prandium, et cubationem: definita spatia temporum pro celebrando, vel spectando altaris Sacrificio: quotidiana ex litaniarum ordine Sanctorum invocatio, et piorum lectio librorum ad semihoram: frequens Sacramentorum usus in Dominicis saltem, ac festis diebus, et frequentes item macerationes corporis vel in cœnaculo coram alijs, vel privatim ad Superiores, aut Confessarii singulorum arbitrium. His accedebant anniversarius dierum octo secessus ad commentanda S. Ignatii exercitia, alique triduum ante duplicem votorum instaurationem, quæ a junioribus peragebantur,

ex quibus maximam partem Francisci familia coalescebat. Atque in his præsertim diebus frequentiores erant adhortationes de religiosæ perfectionis studio ( quanquam id sæpe alias fiebat ) et collationes de rebus sacris. Eorum demum nihil ibi desiderasses, quæ usui esse solent ad pietatem, et profectum spiritus promovendum. Et cum cæteros Rector suis provocaret exemplis, aut si quem tardio rem adverteret, verborum etiam urgeret stimulis, vigebat in ea domo strenuus ad perfectionem conatus, et inter graves durissimi exilii ærumnas promptus ad labores animus, atque innocentis testis minime fucata lætitia. Non minor Rectoris erat cura, ut in studia literarum adolescentes illi toto pectore incumberent. Frustra necessaria tractandis scientiis adminicula in ea tunc urbe requireres, quæ diuturni calamitatibus afflicta belli, assueta potius erat armis, quam libris. Sed Franciscus Romam scripsit, indeque et ex aliis continentis urbibus sufficientem librorum copiam obtinuit, quibus instructi Magistri pariter, et Discipuli, quaternas quotidie habebant scholas, unam de Scriptura sacra, de Theologia morali alteram, duplicem de scholastica, ut Salmanticæ, ac Pintis fiebat. Quotidianis lectionum repetitionibus, et collationibus addebantur interdum concertationes publicæ, ad easque Franciscus, præter veteranos provinciæ suæ Magistros, spectatissimos quosdam e Bætica, qui Calvii remanserant, invitabat: ipse etiam, quippe in eo certandi genere strenuus, propositas disputationi theses nonnunquam oppugnavit. Tantusque aderat Sociorum numerus, quantum in ejusmodi ludis nemo unquam alibi conspexisse meminerat: quod, ut honorem literario spectaculo, dignitatemque augebat, sic etiam concertatorum exactebat industriam, ut in his facultatibus diligentius exercerentur, quarum erant sub tam frequenti et erudito consessu specimen edituri.

Ut suaviorem laborem illum, aliosque passim occurrentes efficeret, liberalis erat in recreationibus concedendis, et iis, quæ ad quotidianum victum pertinent, subministrandis. Postquam rebelles Corsi, pactis induciis, ab obsidione recesserant, locum prope urbem in sphæristerii formam accommodare fecit, ubi juvenes pila nonnunquam luderent ( quod in

Hispania vel apud religiosos viros erat in usu) ut et animum ab studiis severioribus relaxarent, et corporis valetudini exercitatione illa consulerent. In eo loco Franciscus spectaculum præbere voluit, quod risum, an teneras moverit lacrymas, dubitares. Inter spectatores alios ibi aderat quodam die, cum repente in arenam descendens, ternos ex ordine Rectorum ad se vocat: ac totidem conditionis ejusdem ex adversa parte designatis, contra ipsos lusionem ipse cum suis instituit, cæteris inspectantibus, et stupentibus. Nam, ut olim ludendi peritus esset, in ea tamen obessi jam corporis gravitate, si minus mittendæ pilæ, retorquendæ saltem, atque sistendæ satis erat ineptus: proptereaque in medium prodiisse videbatur, non tam ut luderet, quam ut ab aliis illuderetur. Neque collusorum omnium erat ipse ineptissimus; cum eorum aliqui nunquam ex professo in eo ludendi genere fuissent exerciti. Et tamen ille lusus perjucundus fuit omnibus, atque ad intentum a Francisco finem peropportunos. Neque enim is alio spectabat, quam ut sui despicientia nonnullam adstantibus exhiberandi animi occasionem offerret inter gravissimas, quibus undique impetebantur, afflictiones. Unde Sionæi Regis æmulatus exemplum, qui ante Dominum totis saltare viribus non erubuit, quamvis nonnemini pro deridiculo fuerit habitus; ipse etiam coram fratribus suis ludere, subsilireque voluit, ut eos inter multiplices dolendi causas innocuo illo recrearet oblectamento. Quod si actionem illam voluisset aliquis austerioris ingenii tanquam ætati viri, vel ejusdem dignitati minus congruentem vituperare, poterat utique Rector cum eodem prudentissimo Rege reponere: Propter Dominum *et ludam, et vilior fiam plusquam factus sum: et ero humilis in oculis meis: et .. gloriosior apparebo.* 2. Reg. 6. 22.

Sed qui joculari opportune voluit, serio quoque noverat exigere, ut quam quisque officii partem domi suæ suscepserat, in eadem tuenda totis unguibus adlaboraret. Ac ne ullus prætextus esset laboris subterfugiendi, de rebus ad vitam necessariis nihil deesse cuiquam, quantum calamitosa ferebant tempora, permittebat. At vero in egentissima omnium urbe qui tandem poterat numerosam adeo familiam sustentare? Id quidem nunquam intra Calvium obtinisset, nisi multas ten-

tasset vias, ut aliunde subsidia compararet. Nam Genua non modo libros, sed alia etiam vestiendis, alendisque Sociis comportare fecit. Deinde portitores aliquot, qui Labrone, ac Neapoli, soluta obsidione, ad Calviense litus adverterant, spe lucri allexit, ut in advehendis pergerent commeatibus, quorum ipse vim magnam, nullo unquam sumptu deterritus, coemebat. Missis præterea in ulteriora Corsorum oppida domesticarum rerum administris, non pauca inde alimenta conquisivit: et inter alia coegit arietum gregem, quem pastoribus custodiendum tradidit, indeque suorum, ac nonnunquam aliorum etiam necessitati subvenit. Ad eas in vicina oppida profectiones inter alios designaverat Augustinum Cuestam, virum sane industrium et officiosum, expediti corporis et ingenii, nec minoris ad pietatis studia diligentiae, qui tum Calvii, tum etiam in Italico itinere multa libenter devoravit incommoda, ut suorum fratrum, quos intime diligebat, levamini deserviret. Is ante paucos annos Bononiae decessit, magnumque sui reliquit desiderium inter Hispanos, et Bononienses, quorum plurimos sibi obstrinxerat ingenuitate morum, et officiorum multigena exhibitione. Hujus igitur, aliorumque usus opera diligenti, potuit Franciscus in ea temporum difficultate frequentissimam illam domum ita sustinere, ut singulis, aut valentibus, aut ægrotantibus, quantum opus habebant, subministraret. Inde autem conjecturam licebit capere, nunquam ab illa pactione recessisse, de qua ipse duobus post annis, cum adhuc Bononiae juventutem regeret, ad Hispaniae Assistentem, Franciscum de Montibus, sic Romam scribebat XV Kal. Feb. 1770. *Quid ego senserim, quidve tenuerim in hac juvenum multitudine gubernanda, paucis tibi possim exponere. Id enim in conventionem quadam vertitur, quam ipse cum Domino jam inde a commoratione Corsica iniit. Nempe ut eos ego a tentatione famis, aliisque id genus indigentis, juvante Deo, liberare contenderem: Deusque vicissim a reliquis tentationibus eosdem eripere dignaretur. Huic hactenus insistere conatus sum via, eandemque premam in posterum.*

Ad ea jam rediens, quæ Calvii perferenda fuerunt incommoda, hæc sane circa domorum angustias maxime percubuerunt, postquam eo regressi sunt Galli, ut rebellantes

Corsos subjugarent. Cum enim certæ pro militibus nullæ ibi  
 essent stationes, plerique Sociorum vel suis ejecti sunt sedi-  
 bus, ut eas Præfectis relinquerent militaribus, vel in arctissi-  
 mam redacti fuerunt habitationem, ut locum darent ejectis.  
 Quid tum Francisco acciderit, ipsius literæ ostendent, quas  
 dedit eo tempore ad quemdam Societatis virum in continen-  
 ti commorantem Italia, cujus industria bonam inde obtinue-  
 rat librorum copiam. Hic erat P. Aloysius Mozzius, qui de-  
 inde Bergomi ob egregias ipsius dotes inter Canonicos pri-  
 mum, modo autem inter Prælatos adscriptus, suum ibi otium  
 optime collocavit, præclaris opusculis adversus protervam Jan-  
 senistarum hæresim, atque in piam Philosophorum ævi nostri  
 sectam evulgatis, quæ multam apud sapientes, et apud ipsum  
 Pontificem Max. Pium VI. commendationem promeruerunt.  
 Huic ergo Franciscus noster ita Calvio scribebat. „ De nos-  
 „ trorum accessione laborum, quos omnino negare non pos-  
 „ sumus, quantum tibi doleat, ex tuis literis manifeste per-  
 „ spicio. Sed tamen aliquam spero dolori tuo afferre conso-  
 „ lationem, iisdem laboribus exponendis, et fortitudine com-  
 „ memoranda, qua illi (divinæ Majestati sint laudes) perferun-  
 „ tur. Nusquam alio per Dei misericordiam laborum pondus  
 „ gravius incubuit, quam in hanc domum nostram, quæ S.  
 „ Aloysii Gonzagæ nomine distinguitur a reliquis. Nactus e-  
 „ go eram, ut universi juvenes, qui Theologiam discunt, eo-  
 „ rumque Magistri sub eodem tecto reciperentur: et quod  
 „ unice ad aliquam ipsorum deerat commoditatem, id tandem  
 „ perfectum fuerat in matutino diei 26. Maii. Sed ecce tibi  
 „ post meridiem ejusdem diei primæ Gallorum copix repente  
 „ huc appelluntur, duabusque paulo amplius horis ab earum  
 „ adventu, dimidia nobis domus eripitur: et qui adhuc satis  
 „ degebamus anguste, nocte illa intra reliquam compacti do-  
 „ mum, angustissime pernoctavimus. Postridie vero coacti  
 „ sumus totam vacuare domum, ab eaque dejecti, nullum,  
 „ quem subiremus, locum habebamus. Eodem die Julianus  
 „ Fonseca cum tironibus, et Rhetoricæ auditoribus, quibus  
 „ præerat, jussus fuit ædibus suis excedere. Cum ii tenerio-  
 „ res essent, de constituendo illis domicilio agi cœptum est  
 „ ante omnia: eductisque ab una domo, ut in alias commi-



„grarent, pluribus antiquiorum, prima illa juventutis portio  
„eodem die fuit collocata, ut etiam Philosophi omnes, quo-  
„rum domum Galli reliquerunt intactam. Erat autem, dile-  
„cte Pater, dolendumne dicam? an potius jucundissimum?  
„incanos videre senes, variisque oppressos valetudinum incom-  
„modis, qui suam libentissime deserebant habitationem, ut  
„eam cederent adolescentulis. Ego certe in transmigratione  
„illa, quæ brevi peracta est horarum spatio, duos eminere  
„affectus animadverti: singularem in senioribus voluptatem,  
„qua de veteri decedebant hospitio: et laudabilem in ju-  
„nioribus verecundiam, quod illorum occupare locum cog-  
„rentur. Omnia ad amussim exacta sunt obedientiæ, et sic  
„omnia cesserunt pulchre. Interea manebam ipse sub dio cum  
„Sociis circiter nonaginta, in quibus illi omnes erant, qui  
„theologicis vacant studiis: neque ullum pro iis erat recep-  
„tulum, in quo cibum, aut somnum caperent eo die. Sed  
„primum illud incommodum facile aliorum caritas, cumulateque  
„superavit: nec mihi tot licuit hospites concedere, quot se-  
„niores provinciæ Socii deposcebant, qui certatim omnes vo-  
„carunt ad prandium. Noctu pariter ad eosdem diverterunt,  
„præter nonnullos, quos retinui mecum in domo, quam eo  
„die contra spem omnem inveni, tantique conduxì, quanti  
„eam locare voluerunt Corsi: quanquam, pensione jam pac-  
„ta, propius nihil est factum, quam ut hanc etiam Galli sibi  
„desumerent. Alias subinde, atque alias in vicinia conduxì  
„domos, quas rejecerant Galli: et sic tandem sub diversis  
„tectis, sed proxime inter se dissitis, omnes iterum congre-  
„gati fuimus. Eodem modo ad hanc usque diem, quamvis non  
„sine incommodis, habitamus. Nam primum extra tecta pro-  
„dire omnes debent, ut meridie, ac vesperi veniant in cœ-  
„naculum, quod longum est ulnas septem cum dimidia, la-  
„tum autem sex, ut alias tibi, credo, indicavi. Aditum ad  
„illud præbent atriola duo, pariete divisa intermedio, cujus  
„partem demoliti sumus, appositisque ibi scalis ligneis, quas  
„nos ipsi fecimus, per eas descendimus in cœnaculum. Hoc  
„sane adeo æstuosum est, atque fervidum, ut confirmare ti-  
„bi possim, a furni similitudine non abhorreere. Et tamen in  
„eo ternæ quotidie scholæ de re theologica juvenibus ex-  
pli-



„plicatæ fuerunt, et quarta de libris sacris. Deinde non mi-  
 „nus molestum est (quod non nisi præfatus honorem dix-  
 „rim) exonerandi alvi causa foras semper etiam per noctem  
 „ire; cum nulla sit in hac domo, neque omnino esse pos-  
 „sit, ad requisita naturæ opportunitas, sed tantum in alia  
 „proxima, ex qua tamen immunditiæ quotidie efferendæ sunt  
 „in mare. Jam illud dici vix potest, quam operosum sit ap-  
 „tum studiis locum reperire; non quod abacorum deficiat co-  
 „pia, quam in prima comparavimus domo; sed quia nus-  
 „quam collocari sic possunt, ut necessarium lumen accipi-  
 „ant. Proinde juvenum alii super lectum operantur studiis,  
 „alii super scalas, nonnulli circum ipsam domum sedentes  
 „ad umbram, quam mane fundit in hoc latus, post meri-  
 „diem vero in adversum. Præterea quotidianæ spiritus exerci-  
 „tationes non eo, qui nostri moris est, ordine haberi pos-  
 „sunt; sed alii eas aliis in locis peragunt, prout cuique per-  
 „missum fuerit. Etenim quamvis ædium domina conclave  
 „quoddam ad constituendam aram benevole nobis concesserit,  
 „id tamen ut plurimum frumenti acervis contractum est,  
 „et impeditum: unde ad audiendum Sacrum, divinamque  
 „percipiendam synaxim, necesse est, ut alii post alios in-  
 „grediantur. His accedit, quod eadem femina, ejusque an-  
 „cillæ nonnunquam rei sacræ nobiscum adesse volunt. Con-  
 „tingit etiam interdum, ut, cum nos eo venimus ad discu-  
 „tiendum animum, ad litanias, vel novenarias fundendas pre-  
 „ces, illæ nihilominus in cribrando tritico prope nos ip-  
 „sos pergant. Neque ab hoc eas opere deterrere contendi-  
 „mus, sed potius habemus gratiam, quod in his rerum an-  
 „gustiis loci hujus quamvis incommodi liberum nobis usum  
 „permittant. Id tandem haud in minimis laboribus reponen-  
 „dum, nullam hic esse collocandis infirmis commoditatem.  
 „Sed Deus huic malo ita providit, ut ab eo tempore, cum  
 „a Gallis ejecti sumus, nemo nostrum graviter ægrotaverit.  
 „In præsentī quidem plures quadraginta fluxu ventris labo-  
 „ramus; nullus tamen propterea grave quid patitur. „Hac-  
 „tenus Francisci literæ: cujus humilitati tribuendum est, illud  
 „præterisse silentio, quod reliquis magno fuit exemplo, sibi  
 „autem, ut ego quidem existimo, jucundissimæ consolationi.

Quo

Quo die mutanda fuit sedes, ipse nobilibus humeris sellam imposuit, et manu peram apprehendit: eaque supellectili onustus, coram Gallorum ducibus, quibus non erat ignotus, in publicam processit viam, ut aliquid de labore suorum participaret. Illud etiam, quippe mitis erat et humilis corde, adungere prætermisit: a militibus Gallis non admodum humaniter extra tecta se modo ejectum, qui ante illos sex annos tria Gallorum millia domi suæ liberalissime receperat.

Sed inter multas, nimiumque difficiles curas providendi tot Sociis de habitatione, de libris, deque omnis generis com-  
 meatu, nihil unquam fuit ei potius, quam ut omnes suæ traditos potestati, ac præsertim juvenes intra religiosi fines officii sedulo contineret. Curabat ipse in primis, aliosque fidissimos adhibebat, ut Scholastici ab iis longe abstracti, quæ ipsorum animos male possent afficere, in divinarum rerum, et scientiarum tractatione diligenter exercerentur. Quæcunque spatia temporum aut pietatis officii, aut Scholæ exercitatio-  
 nibus, aut honestæ non darent recreationi, omnes intenti erant literario solvendo penso, quod Magistri singulis designassent. Idque inter graves molestias, et locorum angustias non modo constanter, sed libenter etiam, et alacriter peragebant; cum sincerum Rectoris animum animadverterent, quo ipsorum commodis paterno semper invigilabat affectu. Habebantur etiam statis temporibus adhortationes, quarum ab ipso Rectore, dum commoratus est Calvii, fere omnes habitæ fuerunt. Agebat in his plerumque de constantia in adversis, de servanda Deo fide, de amore vocationis vel inter succrescentes ærumnas retinendo, deque aliis illi maxime tempori convenientibus: quæ omnia magno eloquentiæ robore, ac pari fervore spiritus pertractabat. Disserebat aliquando contra quorundam opinandi modum, qui per eos præsertim dies, cum urbs hostibus invadenda credebatur, licitum esse affirmabant, fuga salutem quærere, neque in notabili adeo rerum omnium perturbatione crimini vertendum esse, si quisquam a Societate deficeret. Hanc opinionem, vel errorem potius, dissimulandæ obtentum ignaviæ, dum acriter ac solide refutaret, in hæc verba cum vehementi animi commotione prorupit: *Si quando (quod avertat Deus) meditari*

*me fugam audieritis, crura mihi, oro vos, ante confringite, quam gressum unum ad Societatem deserendam conficiam.* Nec vero sine fructu fuit ejus in adhortandis ad perseverantiam subditis diligentia. Etenim inter laborum invicem sibi succedentium incursus, et, quod majorem ad pervertendum vim habet, inter prava quorundam exempla (quatuordecim eo tempore Calvio aufugerunt: Sacerdotes decem, quorum aliqui magisteriis, aliisque honoribus decorati fuerant; duo tamen ad relicta redierunt signa: Logicæ auditor unus, et laici tres) omnes qui Francisco suberant, in quibus juvenum pars erat maxima, constanter in statione illa difficili perstiterunt.

Ad externorum profectum spiritalem vix quidquam poterant Socii, quippe nondum vernaculæ periti linguæ, nisi eos vitæ exemplis, ac precibus adjuvarent. Francisco tamen non defuit occasio perhibendi amoris intimi, quo religiosissimum Capuccinorum Ordinem semper fuerat prosecutus. Quidam eorum laicus, jubente Prætorè Calvii, missus erat in vicina Corsorum oppida, ut literas ad Magistratū ferret, quibus Rex Christianissimus habitatores Insulæ ad obedientiam sibi debitam hortabatur. Sed primum ingressus oppidum, ne longius ad ingratam procederet legationem, in arctissimam custodiam traditur. Prætor, ut vicem redderet, Cœnobii Præsidentem, qui natus erat eodem loco, in vinculis retinendum statuit, donec propinqui ejus et populares libertatem laico concessissent. Dimisit ergo milites in Cœnobium, non longe ab urbe dissitum, qui Custodem ad se adducerent, quem simul cum ejus socio detrusit in carcerem. Hispani lacrymas tenere vix poterant, cum tales viros nullo suo merito tam indecore haberi conspicerent. Franciscus duos statim misit, qui vinctos suis verbis inviserent, et in afflictione consolarentur: cibum etiam, quo vires reficerent, suppeditavit: egressusque domo nihil non apud Gallorum præfectos effecit, ut e custodia venerabilem senem eriperet, qui paulo post in Cœnobium cum socio rediit.

## CAPUT XIV.

*Relicta Corsica, in continentem pertransit Italiam.*

Qui dies sanctissimo Galliarum Regi Ludovico Nono sacer est, idem felix, faustusque fuit Hispanis, qui tertiumdecimum jam mensem in urbe Calvio exulabant. Sub vesperum illius diei certus affertur nuntius, Christianissimum Regem (cui Genuenses vel ad certum tempus, vel in perpetuum cecidisse Corsicam dicebantur) Jesuitas, in ea manentes Insula, omnes inde exportari decrevisse. Non æque certus erat nec profectionis dies, nec terminus deportationis. Quidam enim, inter quos ipse Præfectus rei bellicæ, propediem discedendum esse affirmabant: et sane postera die conspectæ sunt naves Gallicæ viginti quatuor, quæ cursum ad eam Insulam dirigebant, e quibus tredecim intrarunt Calvium. Inde autem effectum est, ut Hispani non pauca, quæ in quotidianum sumptum comparaverant, vili pretio vendiderint: eademque postmodum, dilata per vicenos dies conscensione, carius emere coacti fuerint. Ignotum pariter erat iisdem, quonam essent devehendi. Nam Præfectus navium, a quo id Ignatius Osorius, qui Sociis præerat, curaverat exquirendum, ad Liguriam transvehendos esse respondit: *sed ibi aderunt, adjunxit, qui locum vobis indicent, in quo sedem constituatis.* Responsum hoc ancipites reddebat Socios super his, quæ paranda essent ad profectionem. Nam si Ligustica in ora consisterent, multa secum in navibus afferre poterant, quæ pro instruenda ibi domo deservirent. Si vero longius progrediendum esset, frustra suppellectilem illam assumerent, quam itinere terrestri nec tuto possent, nec sine majore dispendio deportare. Verum his, aliisque gravioribus prætermisiss, quæ cunctis fere communia erant Sociis, ad ea, quæ Francisci magis sunt propria, deveniamus.

Conscensio medio Septembri navibus, et advenientibus qui Argajolæ, Adjacii, Bonifaciique consederant, omnes a Cæsariæ litore ad oram Liguriæ secundis solverunt ventis: quam mare propter exortam paulo ante procellam ita con-

vulsum erat ac tumidum, ut in præcedentis anni multo longiore navigatione nunquam adeo violenter jactati fuerint. Francisco navis obtigit, quæ *Virgo de Gratia* nominabatur, in eamque illati fuerunt centum sexaginta Socii. His victum subministrare per dies decem ab incepta navigatione, ita in se Galli receperant, ut omnes nautarum more habendi essent ex Trugueti decreto, qui Telone per id tempus rem maritimam administrabat. Propterea Franciscus convenientem commeatus copiam, quantum quidem obtineri Calvii poterat, intra navem immitti fecit, ut suorum commodis aliqua ex parte provideret. Illud tamen cavere nullo modo potuit, ne plerique vectorum satis incommode pernoctarent. Navis enim, quamvis omnium esset maxima, postquam arculæ, aliaque imposita fuerunt impedimenta, nonnisi collocandis septuaginta lectulis locum dabat: nec latius palmorum trium spatium singulis relinquebatur culcitis, quæ sine fulcro super ipsos navigii asses sternebantur. Ne autem Sociorum pars major noctem extra lectum ducere cogeretur, Franciscus certas servari vices statuit, ut alii ad mediam usque noctem, alii reliquas horas lectulos occuparent. Nonnulli vero, qui suam aliis concedebant vicem, super navis foros integram agebant noctem, lodice obvoluti, vel pallio, donec omnes sub tabulato manere coacti sunt a Navarcho pertimescente, ne quis in mare vehementi agitatione detruderetur. Sed inter molestias illas, et nautarum fraudes, qui reposita in Sociorum usum non semel expilarunt, constanti omnes procedebant animo, Rectoris impulsu exemplo, nullum aut lecti, aut mensæ incommodum recusantis, et adversa omnia læto vultu excipientis, tanquam a Deo profecta, in cujus laudes cum gratiarum actione frequenter erumpebat.

Post quartum molestæ navigationis diem Genuensem tenuerunt portum, in quo longiorem fecerunt moram, ventis obnoxii et imbribus, sed habitaculi præsertim angustiis maxime coarctati. Rector, quoniam alia non poterat, hoc saltem arcere incommodum deliberavit: conductaque celoce capacioris alvei, quæ illuc Epidaurum venerat, transvectos in eam Socios, quos Calvio secum duxerat, latius ibi, ac decentius collocavit. Hic etiam locum designavit in puppi, quo Magi-



stri aliquot, et seniores accederent ad prandendum; cum ipse interim aut in latere navis recubans, aut insidens tabulato, cibum juvenibus immistus sumeret. Multa per eos viginti dies, quibus ad Genuam constiterunt, habenda fuerunt colloquia inter Sociorum Præpositos, et Gallicæ classis Præfectos: ad quæ plerumque Franciscus non modo ut peritus Interpres, sed tanquam præcipuæ auctoritatis Consiliarius adhibebatur. Suadebant initio Galli, ut novis ibi conductis navibus, Centumcellas Socii contenderent, inde Romam brevissimo itinere perventuri. Quod Præpositis cum persuadere nullo modo possent, ab eis deinde petierunt, ut unciales argenteos quinque pro singulis Sociorum penderent ad necessarios itineris sumptus, donec Reipub. fines excessissent. Verum ne id quidem obtinere potuerunt, quippe inter Socios ipsos non deerant, qui profectionem illam procurarent. Postremo Galli multas repetendi Telonis causas adducere, Sociosque urgere vehementer, ut in alia navigia pertransirent. His annuendum censuerunt Socii, relictisque Gallorum navibus, quæ novas in Corsicam advecturæ erant copias, Castellani in alias sex insiluerunt, pro quarum binis naulum solverunt Galli.

E navibus, decernente Reipub. Senatu, qui tantam hominum multitudinem ad eas redactam angustias contagioni iudicabat obnoxiam, receptis humaniter ægrotis intra urbem, cæteri ad proximum Lœmocomium translati sunt. Inde Franciscus post dies decem missus est ab Osorio Segestam Tiguliorum, ut tercentis, qui cum ipso adnavigabant, et aliis, qui subinde erant adventuri, hospitium ibi quæreret, ac de ratione ageret terrestris itineris ineundi. Utrumque ille, Belengerio Prætoze amicam ei opem conferente, brevissime confecit. Segestam vigesima prima Octobris appulsus, ipse cum juvenibus, aliisque subditis in publicum Nosocomium divertit: aliorum plerosque ad Cœnobia S. Dominici, S. Francisci, Capuccinorumque Patrum destinavit, quorum omnium singularis fuit caritas erga Socios: nonnullos in Mercatorum quadam domo, aliisque privatis ædibus collocavit. Ut lembi, quibus Socii advehebantur, litori propinquabant, procedebat ipse ad molem, indeque omnes ad designata diversoria dirigebat. Interea cum agasonibus, et jumentorum loca-



toribus egit: datisque et acceptis syngraphis, de vecturæ pretio usque ad Parmensium fines cum iisdem convenit. Post triduum, peractis jam quæ ad profectionem Sociorum omnium requirebantur, ipse ante alios cum bono suorum agmine iter arripuit. Sed quoniam hoc per salebrosos Apennini anfractus habendum erat, divinam prius implorandam opem statuit. Agebantur per eos dies magno populi accursu Novendiales in templo Segestæ preces ad S. Aloysii aram, pii cujusdam civis impensis, ut Sociis, quos amabat intime, fausta omnia comprecaretur. Huc ergo, pridie quam discederet, cum Theologiæ candidatis omnibus venit: peractoque in eadem ara Sacrificio, singulos cœlesti Viatico contra imminenti periculosa viâ discrimina communivit: quod jucundissimum frequenti populo fuit spectaculum. Postera die, quæ Octobris erat vigesima quarta, cum iisdem Theologiæ studiosis, aliisque ad septuaginta, Varesium, salvis omnibus, venit. Aderat ibi Genuensium Antistes, qui Franciscum, et aliquot Sacerdotes ad eum salutandum ingressos, benignissime accepit, et magna laborum commiseratione, quos mari terraque jactati patiebantur, prosecutus est.

Sub auroram sequentis diei rem sacram fecit ad Virgines Augustinianas, et nonnullos comitum incruenta Hostia communicavit. Inde per altissimum S. Crucis montem progressi, et millia passuum emensi tredecim, Burgotarum incolumes pervenerunt. Hoc primum est Genua per viam illam egressis Parmensis ditionis oppidum. Ut eo ventum est, Franciscus Doctorem Nolum convenit, quem delegaverat Dux Parmæ Ferdinandus I, ut advenientes Hispanos exules decenti hospitio reciperet, et qua posset benignitate prosequeretur. Is autem votis piissimi Ducis obsecutus, tres bene spatiosas domos excipiendis hospitibus designavit. Ad eas Franciscus et viâ comites cum divertissent, paratos ibi lectulos, mensasque instructas, et reliquam supellectilem necessariam invenerunt: culinæ quoque ministras, et famulos, qui cœnantibus inservirent. Præcesserant eadem via plerique Americanorum, qui nondum uncias acceperant argenti signati quindecim, quas Rex Catholicus singulis Sociis ad profectionem illam præceperat erogari. Propterea eorum multi, post calcatas ab extremis no-

vi Orbis partibus undas immensurabiles, breve illud, sed asperrimum iter pedibus confecerunt. Horum vicem miseratus Dux Parmæ, præter victum, et hospitium per diem integrum gratis eis concessum, jumenta etiam, quibus ad Forum usque novum deveherentur, atque insuper octo argenti uncias liberalissime donavit. Eximiam hanc benignissimi Principis largitatem, quantum poterant, imitati Burgotaresnes, insignem et ipsi misericordiam erga prætereuntes Socios exhibuerunt. Nam cum plures interdum convenirent, quam quos designata hospitia commode caperent, Sacerdotes, et primores populi certatim eos in suas ducebant domos, et humanissime habebant. Eminuit inter cæteros Dominici Tardiani, ejusque piæ conjugis caritas incomparabilis. Hi enim, dum illac pertransierunt Socii, octo plerumque suæ assidere faciebant mensæ: sub finemque mensæ mittebant, qui vias oppidi concursaret, et quoscunque reperiret impransos, ad se advenire compelleret. Fiebatque non raro, ut nonnulli denuo accederent, quos vel inopia, vel pudor, ne cibum quærerent, detinuerat: eosque optimi Conjuges pari amore, parique liberalitate tractabant. Iidem infirmos aliquot domi suæ curandos susceperunt, donec restituta omni fomentum genere valetudine, inceptum iter possent pergere sine periculo. Apud eosdem diutissime hospitati fuerunt Petrus Diazius, Joannes Lucas Guzmanus, et Augustinus Cuesta: quorum ille a Peruvix Sociis, alter a Paraquariis, tertius a Castellanis, et Mexicanis designati fuerant ad sarcinas custodiendas: earum enim pars maxima, quod alibi diximus, deficiente jumentorum copia, detinenda fuit ibi, permissa unicuique manticula, quæ posset in ephippiis accommodari. Quid illis Tardianus fecerit, ab hoc uno illius facti, quod ex Augustino ego accepi, facile agnoveris. Renuebat is in frigidissimis Januarii diebus foculum, qui eidem instanter offerebatur, intra suum habere cubiculum. Propterea Dominicus, ejusque uxor vehementer illum urgebant, ut saltem ad caminum frequenter accederet, ad quem ipsi sedere consueverant. Quoties autem iteratis eorum cedebat precibus, Dominicus linteo, quod igni applicitum excafcecerat, involutas Augustini manus, ut promptius undique calefierent, suis ipse manibus leniter comprimebat. Enimvero cum parvulo

vulo dilecto filio quid amplius, quæso, aut quid potuisset blandius efficere? Nec solum nobiles, et opulenti, sed vulgares etiam homines, pauperesque feminæ pietatem in Socios pro suis quisque viribus exercuerunt. Alii enim aut panem, aut caseum prætereuntibus offerebant: alii vero aut unum, aut bina ovorum paria, aut minuta quædam æra donabant, quæ tanto erant pretiosiora, quanto magis dissimulanter intra galerum, dum audiendo Sacro intenti erant Socii, conjiciebantur. Tam prolixam et Principis, et sui populi beneficentiam, cum id suaderet locus, non potui, quin aliqua ex parte commemorarem: ut inter eos, qui nostra legerint, hoc saltem constet animi gratissimi testimonium.

Cum Franciscus Burgotari diem unum, sicut cæteri, restitisset, conductis ibi equis in biduum, profectionem ad diem VI Kal. Novemb. paraverat, et indixerat. Sed effuso imbre superveniente, non nisi V Kal. ejusdem mensis profecti sunt, qui dies Apostolorum Simonis, et Judæ memoriæ consecratur: indeque progressi, Forum novum duobus itineribus advenerunt. Totus ille tractus frequentioribus clivis, quos eminentes asperant cautes, et horrore vallis altissimæ, per quam fluvius Tarus rapide volvitur, ineptam ac deterrimam viam præbet itinerantibus. Accedebat per eos dies ex præcedentium imbrium copia lubricitas major, quæ per salebrosam crepidinem incedentibus et pavorem augebat, et periculum: cœnosi quoque lacus occurrebant, quos prætervehi sine discrimine pauci admodum poterant in ea præsertim vel equorum apparatione nimis incommoda, vel equitum dexteritate non magna. In eo itinere Francisci labor fuit maximus; cum sollicita illius caritas ad aliorum cavenda pericula redderet intentissimum. Ubicumque difficiliores aditus occurrissent, præsto ipse aderat, aut etiam ad eosdem explorandos præcurrebat: ibique manens, donec præteriisset longissimus comitatus, admonebat omnes paulatim, cauteque incedere, continereque jumenta, ne duo simul, quod assueta erant facere, progredierentur. Sæpe alias huc illuc discurrens, modoque ad primos veniens, modo regressus ad ultimos, unumquemque consilio, aut ope, qua forte indigeret, adjuvabat. Neque ullus erat in toto agmine, quamvis hoc ex juvenibus maxi-

mam

mam constaret partem, qui dexterius illo vel desiliret ab equo, vel in eum rursus inscenderet. Equitandi peritia, quam adolescens adeptus erat, ut diximus, magno illi fuit usui, ut nunc suæ, atque aliorum prospiceret incolumitati. Ipse enim per declivia, et ardua regebat equum ex arte, minusque proinde obnoxius periculo decidendi, facilius poterat, promptiusque cæteris subvenire. Quanquam nullus fuit, Deo bene juvante, in difficillimo itinere casus admodum periculosus. In trajectu quidem fluminis adolescens, et Sacerdos, qui pone sequebatur, in cœca saxa impingentes, prolapsi sunt: sed inde, nisi quod uterque bene madidus emersit, sine ulla læsione corporis evaserunt. In his autem, cæterisque laboribus nulla major erat viatoribus consolatio, quam paternus sui ductoris amor, quo laborantium miserebatur, et auxilium, unde unde posset, afferebat. Postquam vero in diversoria pervenissent, ille omnes humanissime accipere, singillatimque salutare: de vario itinerum eventu sermonem inferre: aliosque de perite moderatis equis, ne in præcipiti loco ruerent, collaudare; alios de susceptis etiam levibus offensionibus consolari: sed præcipue Deo, et tutelaribus Angelis immortales gratias agere, quod fortunassent iter, atque omnes tandem, ut indesinenter ipse deprecabatur, de tantis periculis eruisent.

Forum novum ingressis, cum jam inde omnia plana et amœna essent, fere omnis est periculorum timor ereptus. In conductis itaque curribus, ac rhedis Parmam prætervecti, primum Regii, deinde Murinæ pernoctarunt. Regiensium tam effusa fuit erga omnes Hispanos exules benevolentia, ut nunquam interitura sit apud eos grata humanissimorum civium recordatio. In utraque illa urbe Itali degebant Socii, quorum conspectu cœperunt Franciscus, et ejusdem comites recreari. Collegium Mutinense regebat ea tempestate Joannes Granellius, Atestinæ Bibliothecæ Præfectus, editis Lectionibus sacris super historicis veteris Testamenti libris, aliisque politioris literaturæ operibus celebris inter nostri temporis eruditos. Is, cum audisset adventare Franciscum, magno stupatum juvenum comitatu, duos in antecessum miserat Adjuutores ad diversorium, in quo recipiendi erant, ut eorum sarcinulas colligerent, in tutoque collocarent: Franciscum au-

te m,

tem, ut in Collegium diverteret, invitavit. Sed excusavit ille suorum juvenum curam, ne oblatum hospitium admittere cogeretur. Postera tamen die, quæ Sanctorum universitati dicata erat, cum iisdem mature veniens in Collegii templum, ibi operatus est sacris, atque omnes cœlesti mensa communicavit. Postmodum Granellius, missis in triclinium adolescentibus, ubi eis copiosum jentaculum apposuit, Franciscum, aliosque Sacerdotes secum duxit in cubiculum, ut eos potione reficeret chocolati. Deinde quemdam e Collegii Patribus designavit, qui p̄egrinos ad Estensem deduceret Bibliothecam: multaque alia præstitit fraternæ caritatis officia, quibus Franciscum, et qui cum eo venerant, m̄re sibi devinxit. Hi paulo post in Collegium regressi, Orationem sacram audierunt, quæ de more habita fuit eo die in laudem Sanctorum omnium. Eidem interfuit Pontifex Mutinensis Josephus Maria Foglianus: cui discedenti obviam cum suis occurrit Franciscus, ut debitum ei reverentiæ obsequium exhiberet. Non potuit Antistes optimus eorum aspectu majorem in modum non commoveri; genua quippe ante illum flexerant, ut moris est in Hispania coram Episcopis facere. Cœpit eos suavissime amplecti, sæpeque illi obortæ sunt lacrymæ, dum oculos præsertim conjiceret in adolescentes, quorum placidam modestamque lætitiã in tantis laboribus admirabatur. Beatos identidem appellabat, quibus talia pati contigerat: Deumque agebat, prædestinationem ipsorum ad gloriam sempiternam iisdem laboribus confirmasse. Inter hæc, aliaque dulcissima verba, et iteratas benedictiones ab eis tandem discessit. Quidam huic simile accidit Regii, ubi etiam Episcopus ejus urbis Joannes Maria Castelvetrus nonnullos eorum videre voluit, qui tirocinium paulo ante absolverant. Tres ad eum missi cum Sacerdote, quos Præsul humanissimus paterna indulgentia diu secum, familiariterque detinuit, multa super exilio, et vario itinerum eventu rogans: quæ omnia intentis auribus, partimque libenti, partim miseranti auscultavit animo, donec, eorum collaudata constantia, et munusculis in singulos distributis, urbanissime illos dimisit.

Granellius post meridiem ad Idiaquezium veniens, primum illum perduxit ad salutandum Episcopum: deinde ad



Felicem Antonium Biancum , qui Francisco III Mutinensium Duci a sanctoribus consiliis erat : postremo ad Principem Marianam Herculanam de Martiano , quæ Societatis erat studiosissima . Ubique autem magna cum benevolentia , et præcipui honoris significationibus exceptus est : deindeque urbani hujus officii fructum , quem mox videbimus , reportavit . In eadem urbe literas accepit a provinciæ Præposito Ignatio Osorio , qui Bononiam processerat , ut inde Sociorum Rectoribus certas in Bononiensi territorio sedes designaret , in quibus singuli cum attributis unicuique Sociis commorarentur . Scripsit ergo ad Franciscum , ut Panzanum cum omnibus , quos e Liguria secum duxerat , adveniret : his denuo adjuncti fuerunt aliqui , unde in eum locum quinque supra centum convenerunt . Est autem Panzanum in Mutinensis , Bononiensisque ditionis confinio , non longe a Scultenna flumine , pagus exiguus , qui Bononiæ in temporalibus subest , in spiritualibus Abbari paret Nonantulano . Ad australem plagam in conspectu habet arcem Urbanam , paucisque inde ad orientem passibus Castrum Francum occurrit , quod aliis Forum Gallorum appellatur . Malvasiæ Comites , qui Bononiæ tunc inter Senatorias familias recensebantur , præter alia , quæ Panzani possident , Villam ibidem habent prope Parochialem ædem ejusdem pagi , Sanctis Philippo et Jacobo Apostolis dedicatam . Franciscus ad eam Villam , ad quam pridie Sacerdotem unum , et laicos duos præmiserat , cum manipulo suorum venit secunda die Novembris 1768 : duobusque insequentibus diebus cæteri hospites , et incolumes advenerunt . Nullus erat , quin de contacto Pontificio solo , quod aliqui desilientes e curru venerabundi sunt osculati , vehementer sibi gratularetur : omnesque sub communi populi Christiani Parente , Clemente XIII , sedem pacificam , et tranquillam sibi vitam promittebant .





## CAPUT XV.

*De illius in Panzanensi Villa commoratione.*

Post labores, et errores varios, quos Franciscus per undeviginti menses terra, marique subierat, ad eam modo regionem deportatus, quam et salubritas cœli, et soli ubertas, et incolarum humanitas exteris commendabilem reddit et appetendam; optatam demum quietem, et felicem rerum copiam pro suorum sustentatione sodalium facile assecuturus esse videbatur. Et tamen per menses non amplius undecim, quos in eo loco vixit, tam grave negotiorum pondus sustinuit, ut multorum frangendis viribus suffecisset: solam Francisci mentem tantæ molis capacem debilitare non potuit. In conquirenda vero supellectili, cæterisque domesticis rebus constituendis multas initio reperit difficultates, quas tandem labore, et industria superavit. Domus, quam intraverat inhabitandam, licet ampla et spatiosa esset, modicam tamen præbebat hospitibus commoditatem. Facta enim pro æstivis præsertim ardoribus declinandis, longa constabat aularum serie, in quibus seni, vel octoni collocandi erant, nullo contra ingruentia jam frigora munimento. Cubicula vero, in quibus singuli habitare possent, aut bini, pauca erant, et ex iis quædam sibi dominus reservaverat. Nulla insuper utensilia pro sternendis lectulis, nulla vel culinæ instrumenta, vel triclinii. His accedebat vestimentorum inopia, cum multi ea tantum haberent, quæ gestabant Calvii, ubi sub æstuoso cœlo leviter incedebant induti: egressique inde, viatorias arculas, in quibus reliquam vestem incluserant, relinquere coacti sunt in itinere, neque illas ante quintam Februarii diem receperunt.

Cum tam multis simul esset occurrendum necessitatibus, Franciscus ita omnibus providere studebat, ut gravioribus potiore curam impenderet. Et quoniam ex difficili profectio-  
ne defatigatis nihil magis necessarium erat, quam defessa curare corpora, nullam prætermisit industriam, ut suum unicuique stratum citissime appareretur. Tantamque in eo voluit adhiberi diligentiam, ut quinta nocte postquam primi  
Pan-

Panzanum venerant, omnes aut laneam, aut stramineam habuerint culcitam ad recumbendum, quamquam nondum fulcro suspensam. His deinde fulcris elaborandis quemdam ab Osorio Adjutorem obtinuit in fabrilibus peritissimum: quædam etiam alibi compacta coemit, ut rem totam promptius expediret. Interea ipse nullum lecti fulcimentum admisit, donec omnes ad unum subditi, ne Coquo quidem excepto, quæcunque illud levamen obtinuissent. Quin etiam culcitam, quæ facta solo stramine utebatur, dum aliquis ob contractam invaletudinem molliore indigeret lectulo, eidem jubebat apponi, atque ipse interim in sella ducebat noctes, quod jam pridem in Collegiis inter meridiandum assuetus erat efficere. Ut facilius de lecto Sociis omnibus provideret, multum ei Granellius, multum Mariana contulit Herculana. Hæc enim stramentarias culcitas viginti quatuor, ac totidem pro eis fulcra dono misit: ille commodavit aliquas lana confertas, et Fratrem Benedictum Corradinum per dies aliquot Panzanum misit, ut Hispanos in disponendis lectulis, aliisque domesticis officiis adjuvaret. Quantum porro strenua illius opera sint adjuti, Franciscus in his ad Granellium literis die quinta Novembris indicavit. „ Hodie proficiscitur Mutinam noster Benedictus Corradinus, quem multis nominibus nostrum appello. Noster enim dux fuit, noster hospitator, noster œconomus, noster in comparanda suppellectile, necessariisque rebus procurandis, dignoscendisque monetis Doctor eximius, et carissimus. Hodie, inquam, proficiscitur, data tamen fide quamprimum revertendi; illius enim opera, et adjumento per dies adhuc paucos indigemus. Etenim revera in hac regione vivendi tirocinium ponimus: indigent ergo tirores suo Magistro. Sat, superque (quæ Reverentiæ vestræ facilitate, et humanitas est) his omnibus significavi, quam vellemus omnes, ut per te Benedicto nostro quantocius revertendi facultas fiat. „ Facta quidem illi fuit a Granellio, qui beneficium hoc aliis etiam cumulavit. Vestes aliquot Sacerdotales, et vasa quædam sacra Francisco dedit utenda, donec alia pro domo sua comparasset. Illum etiam egregie juvit apud Episcopum Mutinensem, quoties initiandi fuerunt juvenes, quos semper in Collegio suo liberali recepit hospitio,

neque unquam de Francisco, et illius familia benemereri prætermisit.

Dum is ea, quæ ad lectum pertinent, diligenter expedire conabatur, omnem interea movebat lapidem, ut rem aliam, quæ sibi maxime cordi erat, deproperaret. Inter Socios, quos secum Panzanum duxerat, amplius sexaginta juvenes numerabantur, quos utilibus intentos studiis, quam primum fieri posset, desiderabat. Sed retentis Burgotari primum, deindeque in Foro novo plerisque libris, quos pro illorum usu Calvii comparaverat, novas modo tentavit vias, ne tandiu cessarent juvenes, dum ea volumina reciperentur. Propterea jam inde ab altero adventus sui die literas misit Bononiam, et Mutinam, ac postmodum Ferrariam, et in Germaniam, ut libros conquireret undecunque. Hac usus industria, et nullo unquam pondere deterritus impensarum, decentissimam Bibliothecam instruxit, quam deinde advectis Parma libris locupletavit. Sic potuit et literarium juvenibus aperire ludum, et extra ludum illos cum cæteris convenienti lectionis pabulo distingere. Nam et sacros, et profanos, et historicos, et asceticos, et varix vario idiomate literaturæ collegit libros, ut omnes opportunam haberent mentis pro singulorum conditione, ac pro temporum diversitate alimoniam. Sub idem tempus religiosæ vitæ actiones ita in ea domo ad usitatæ disciplinæ formam revocavit, ut omnia ibi perinde, atque olim in Collegiis, observarentur. Ut autem literarum, et virtutum studia majori omnes conatu, ac debita cum intentione susciperent, post aliquam requiem a laboriosa peregrinatione concessam, cunctis exercitium spiritus ex S. Ignatii formula per octo dies indixit. Inter cæteros Panzanum venerat Petrus Calatayudius, quem Franciscus per confragosos Apennini saltus lectica deportari, et in toto illo itinere mitius haberi curaverat, ut pretiosam ejus vitam produceret, quantum posset; eumque deinde usque ad obitum domi suæ retinuit. Nunc ergo illius uti opera statuit, ut juvenibus meditationum capita exponeret, atque omnes ad instaurandum fervorem animi suis adhortationibus incitaret. Qui cum esset in eo dicendi genere versatissimus, et nihil ab eo quisquam audiret, quod factis non videret expressum, mirum quam acres ad per-

factionem stimulos subdidit universis. Postquam hæc jacta fuerant virtutum fundamenta, tum demum Franciscus discipulos, et Magistros ad doctrinarum studia, scholasque convertit. Omnia denique in eum modum disposuit, quem ipse in literis indicavit, quas dedit ad Præpositum Generalem postridie Idus Decembris ejusdem anni. Inter alia suæ domus negotia, de quibus ad Præpositum referebat, hæc ibi adjunxit: *S. Ignatii exercitia omnes una peregrimus: constitutus est domesticarum actionum ordo: et consueto jam more literarum habentur exercitationes. Videor autem mihi sine ulla verborum exaggeratione dicturus, in hac domo ita omnia procedere, sicut posset in presenti rerum statu desiderari.*

Sed spiritalis ille recessus, cui Panzani vacarunt Socii, fabulæ occasionem dedit, cujus origo paulo altius repetenda est, ut his, quæ modo dicam, majus quoddam lumen accedat. Non diu post expulsos ab Hispania Socios, multa tentarunt Societatis æmuli, ut persuaderent populis, ad quos venturi erant exules, et exilium illud, et reliquas suorum fratrum calamitates non alia de causa in Jesuitarum capita recidisse, nisi propter intemperantes ipsorum mores, et audacem dominandi cupidinem, qua potiri omnibus, atque omnia perturbare conabantur. His quidem coloribus accedentes ad Corsicam depinxerunt, deindeque in Italiam pertranseuntes similibus pigmentis adumbrarunt. Sed et paucis ante Hispanorum expulsionem annis vir quidam nobilis, *Qui mores hominum multorum vidit, et urbes, cum Roma in patriam suam reverteretur, famosum libellum per varias Italiæ urbes disseminavit, in quo Monita quædam ad Principes continebantur, ut caverent sibi ab artibus Jesuitarum. Neque apud Principes tantum, sed apud vulgares etiam homines Jesuitarum nomen, et mores proscindebantur. Tanta erat, ac tam fœda librorum colluvies, quæ contra Societatem ea tempestate prohibat! Nempe illuc non pauci respicere videbantur, ut id aliqua ex parte perficerent, quod suadebat olim Jesuitarum, et bonorum omnium infensissimus inimicus. Jesuitæ vero, qui se maxime nobis opponunt, aut necandi, aut si hoc commode fieri non potest, ejiciendi, aut certe mendaciis, et calumniis opprimendi sunt.* (Calvinus Aphor. 15. de modo propagandi  
Cal-

*Calvinismum*.) Et quoniam ex perseveranti calumniarum iteratione semper aliquid hæret, ut vere agebat protervus idem divinæ contemptor veritatis, multi de Jesuitis, quos nunquam introspexerant, ex calumniatorum sententia judicabant.

Inde autem effectum est, ut Panzanenses, apud quos Hispani Socii turpissime descripti fuerant, de illorum adventu perinde solliciti essent, ac timidi, quasi ad eos profligatorum turma militum adventaret: precesque in ipsorum templo indictæ sunt publice, ut Deus pagum illum ab imminenti contagionis periculo liberaret. Tribus deinde ab adventu hebdomadis, cum Hispanos animadverterent diem unum, alterum, plures intra domum contineri, neque in agros, ut initio fecerant, prodire deambulatum; vehementer illi admirari, et curiosius in tam diuturni recessus causam inquirere. Cum autem audissent, *Jesuitas intentos esse exercitiis*, boni illi agricolæ, qui vix alia exercitia noverant, nisi quæ milites in proxima Urbana arce agitabant, firmissime persuasi sunt, aliosque in eandem adduxerunt sententiam, Jesuitas Hispanos in spatio illo Palatio, quod arcis speciem aliquam referebat, militari peragendo exercitio per dies aliquot incubuisse. Sed hic error, quem rusticorum simplicitas peperit, apud eosdem non adolevit. Quam enormiter falsi fuissent, ipsimet cito agnoverunt, cum Jesuitas alia omnia, quam militarem artem, exercere perspicerent: cum viderent eos frequenter in templo divinis operantes, et ministrantes, longasque fundentes preces cum animi, et corporis modestia singulari: cum sæpe illos aspicerent, dum prodibant in agrum, non plumbeos, sed precatorios tractare globulos, et Coronam Mariæ Virginis alternis recitare: nonnullos etiam colloquia secum miscentes audirent, quæ meram pietatem, et religionis studium redolebant. Duo tamen inter cætera valuerunt maxime, ut rustici homines præposteram exuerent opinionem, quam de Jesuitis ob disseminatas præceperant detractiones. Primum, quod mendicorum catervæ non modicæ, qui quotidie ad petendam stipem accedebant, panem, et jusculum sub meridiem elargiebantur. Alterum erat exemplum Pastoris sui Josephi Belletti, rectissimi viri, et in curando suo grege diligentissimi. Is pro candore animi, quem gerebat, factus est ingenue,

de



de adventuris hospitibus injectum fuisse sibi timorem, cum multa contra illos audisset, quibus ad creandam invidiam nihil esse poterat efficientius. Sed idem, simul eos agnovit, dilexit impense, atque intima cum illis conjunctus est amicitia. Sic autem eorum consuetudine capiebatur, ut apud suos, et apud externos Hispanorum laudator esset perpetuus: multas enim ad amicos mittebat literas, in quibus de Jesuitarum moribus, et doctrina præclaram aliquam adungebat commendationem. Inde vero Panzanenses incolæ, qui verbis Archiepysbyteri sui multum ex merito deferebant, timorem cum Jesuitis agendi penitus deposuerunt, atque illos tanto amore prosequerantur, ut eorum discessum non minus acerbè tulerint, quam adventum.

Interea rumorem illum, qui Panzani ortus erat de militari Jesuitarum exercitatione, grandioribus deformatum mendaciis vulgaverat fama, quæ semper *Mobilitate viget, viresque acquirit eundo*. Nonnulli Bononiæ, atque alibi affirmabant, qui Panzani constiterant, Jesuitas bellica tractare instrumenta, igniferas habere cannas, et glandes æneas fabricari. His, credo, rumoribus permotus vulgaris quidam homo ( nisi forte submissus fuerat ab alio, qui rem clanculum explorare percuperet ) Castrum Francum venit, ubi tum multi conserant Hispanorum: et quemdam ex Rectoribus remotis arbitris allocutus, conficiendique nitrati pulveris artem se callere præfatus, multis illum deprecabatur, ut aliquam sibi commendationem ad Panzani Rectorem daret, qua is ad conducendam in ministerium illud operam suam permoveretur. Tantam hominis aut fatuitatem, aut impudentiam Rector ille ferre non potuit: itaque severioribus acceptum verbis a se dimisit, ac de stultissima illius petitione Idiaquezium admonuit. Nihil hanc movit maligna susurratio, quæ Bononiæ latius serpebat in dies, et in aures etiam honoratissimas insilliebat. Alumum Hispanorum Collegium regebat in ea urbe Joachimus Quintanus, qui multam apud Bononienses inivit gratiam, et multorum sibi junxerat amicitias. Venit is quodam die ad primarium civem, cujus eminebat dignitas inter cæteros, eumque de prolusionibus bellicis loquentem audit, quas Jesuitæ instituisse Panzaani dicebantur. Renuerat iis ha-

be-



bere fidem Quintanus, cum sexcenta alia contra Jesuitas jactata fuissent, quæ tandem inter calumnias enumeranda esse, dies ipsa prodiderat. Id tamen, reposuit illi vir princeps, exploratum equidem, ac liquido compertum habeo. Ad eam fortasse dirimendam controversiam, quæ Bononienses in diversa distrahebat studia, inducti sunt Senatores aliqui Panzani cum Malvasia Comite proficisci, ut Rectori, cujus illustre genus noverant, de adventu gratularerentur, simulque de his certiores fierent, quæ multorum sermonibus spargebantur. Excepit eos Rector quanta potuit humanitate, nonnullisque sermonibus ultro citroque habitis, cubicula, et dormitoria, totamque perlustrarunt domum. Nihil in ea, quod religiosos dedeceret viros, magnam imo vero multarum rerum inopiam observarunt. Nam pleraque cameræ vel storeis, vel crassioribus linteis arcendo utcumque frigori distinguebantur: lectuli vel solo hærentes adhuc, vel stragulis male contacti. Pro ferreis fistulis multas Christi confixi æneas imagines suspexerunt: quod si voluissent curiosius investigare omnia, pro gladiis, proque falcatis ensibus non pauca reperissent inter Socios macerandi sui corporis instrumenta. Postquam domum undique inspexerant, ad habitaculum Comitis recesserunt: et cum advenit prandendi tempus, descendit ad eos Rector, qui familiare cum ipsis colloquium habuit. Tunc vero nobilissimi Senatores de sermunculis per urbem sparsis, quibus nullam ipsi fidem adjunxerant, magno cum risu, ac pene cum indignatione fecerunt verba. Mirari satis non poterant, qui tandem commentum illud aut ab aliquo fingi, aut a quoquam pro certo reputari potuisset. Exinde malignus ille rumor Bononiæ salt. m, ac per omnem circa regionem omnino conticuit. Franciscus de hac fabula, quæ Matritum usque pervasit, sic postmodum scribebat: *Propius nihil est factum, quam ut me Panzani Regem appellarent, sicut Nicolaum olim Regem appellarant Paraquaria.*

Verum ipse majorem gerebat animum, quam ut calumniis dejici, aut ullis pisset negotiorum molibus perturbari. Ad expediendas occurrentes necessitates, quæ in prioribus præsertim mensibus pene erant innumerabiles, tanta hinc industria, tanta inde tranquillitate incumbibat, ut aliis cessare nunquam,

aliis nihil moliri, videri posset. Cum Italice nondum perfecte nosset, satis prolixas, beneque digestas fere quotidie mittebat literas Latinas, Hispanas, Gallicas pro personarum conditione diversa, ad quas illæ dimittebantur. In eis publica suæ domus, et aliarum, atque etiam privata multorum negotia pertractabat: nec solum de comparanda supellectile, conquirendisque agebat libris, sed etiam de Sanctorum imaginibus, de ciliciis, ac flagellis, et aliis, quæ ad pietatem faciunt, obtinendis. Non pauca super conditionibus locatæ domus ad Comitum Malvasiam scripsit: quem etiam deprecatores apud Senatum adhibuit, ut liceret sibi boves cædere, vel arietes pro solo Hispanorum usu, qui Panzani commorabantur. Multa etiam scribere Burgotarum debuit, ut eos in operandi modo instrueret, qui remanserant ad sarcinas: et postquam, reseratis arculis, scripta omnia sublata fuerunt, nihil intentatum reliquit, ut ea recuperare niteretur. Osorius quoque multa illi per id tempus demandabat, ut habitationem Sociis quæreret, qui substiterant ad Castrumfrancum, donec sedes iisdem certæ designarentur: ad quas ipse nonnunquam profectus est inspiciendas; de aliis per locorum peritos cognoscebat. His accedebant salutationes non infrequentes, quarum aliquot suadebat urbanitas, alias vero domesticorum caritas exigebat. Cum prope arcem habitaret Urbanam, officii sui duxit Præfectum, et Centuriones invisere, quos deinde propensos expertus est ad obsequium. Adveniente postmodum ad lustrandum præsidium illud Ignatio Boncompagno Ludovisio ex Plumbini Principibus, qui Bononiæ Prolegati munere fungebatur, ad eum quoque salutandum accessit cum plerisque Rectoribus, qui remanserant Castrifranchi. Perhumaniter eos accepit generosus Juvenis, multaque grati animi dedit indicia ob eam delati sibi honoris significationem. Sed multo frequentior erat Sociorum ex aliis provinciis, et maxime transmarinis, ad Panzani Villam adventus, ut Franciscum reviserent, quo Magistro in tirocinio, vel alibi usi fuerant, aut etiam ut eum de facie nossent, cujus erat inter ipsos fama celebratissima. Multi quoque ad Petrum veniebant Calatayudium, cujus scripta legerant, et facta modo suspicere, contemplarique ora desiderabant. Liberaliter excipiebat omnes

Franciscus, ac ne quid inde detrimenti caperet domus illa, omnibus ære suo alimenta subministrabat. Nihil tamen mirabilius erat, quam hominem innumeris intentum rebus, nulli non diligenter insistere, ac simul cum hospitibus ita familiariter, atque humaniter agere, quasi nihil aliud instaret agendum.

In primo post adventum mense quiddam aggressus est, quod Osorius præmaturum existimavit: ideoque conatum ejus tantisper inhibendum censuit, unde nobile quoddam obedientiæ, quamvis Francisco minime inusitatum, eluxit exemplum. Nonnulli erant juvenes, quibus in Hispania propter ætatem ad Sacerdotium aspirare non licuit: iis multo plures accesserant Calvii, ubi theologica studia non pauci absolverant, et nullus erat, a quo promoveri possent, Sacrorum Minister. His omnibus a Corsica discessuris spem fecerant Osorius, et Idiaqueus obtinendi Sacerdotii, cum ad continentem devenissent: quod iisdem incitamento fuit maximo, ut gravissimas profectionis hujus molestias majori cum alacritate perferrent. Indicto postmodum in ditionem Pontificiam itinere, quibusdam illorum dixit Osorius, sperare se ad proximum Natalem Domini sacris eorum primitiis esse adfuturum: et Franciscum, quem præcedere cum juvenibus jussit, hujus etiam gerendi negotii opportuna occasione jusserat imminere. Is ergo, perspecta benevolentia, quam erga juvenes ostenderat Episcopus Mutinensis, cum eodem rem illam feliciter conficiendam esse sperabat: et quanquam nihil tum Antistiti significavit, cum ad eum ingressus est alloquendum, de his tamen cum Granellio egit, qui de obtinenda petitione certissimum illum reddidit. Post non multos dies Panzanum venit Osorius, ab eoque Franciscus interrogavit, possetne Mutinensis Præsulis animum explorare circa juvenes ad sacros Ordines promovendos? Quod cum probasset Osorius, ille sub Novembris finem ad Episcopum scripsit, et epistolam secunda Decembris die Castrifranchi reliquit, ut inde Mutinam mitteretur. Sed nondum perlata erat, cum novas ipse accepit literas a Granellio, qui Episcopum alloqui præoccupaverat, eumque ad obsequium ita promptum invenit, ut proximum decimi mensis jejuniorum triduum pro conferendis Ordinibus designaverit. His acceptis literis, Franciscus juvenibus suis diem indixit, intra quam per-

ricu.

riculum subituri essent de re morali: et Rectorem illum, sub quo alii juvenes initiandi tertiam probationem agebant Castrifranchi, ut idem ipse faceret, admonuit: ac sine mora de his omnibus ad Præpositum Osorium scripsit. Huic præpropera visa est Francisci diligentia, et in præsentis rerum cursu non admodum opportuna. Nam iidem illi juvenes, qui Castrumfrancum venerant ante mensem, propter immodicum locationis pretium in eadem manere domo non poterant, ac per eos dies in aliud erant oppidum migraturi; quod inopportuna erat, ut se legitime ad recipiendos Ordines præpararent. Propterea Osorius Idiaquezio rescripsit, ut quantum posset eniteretur pro differenda sacrorum Ordinum celebratione: simulque illi significavit, ne plus justo suis juvenibus indulgeret, qui nimis avide Sacerdotii apicem desiderabant.

Responsum hoc Francisco nonnullum doloris sensum iniecit, ut ipse in literis ad Osorium ingenue testatus est. *Id tamen, aiebat, nihilo me segniorem efficiet ad obediendum. Quod si aliquid, aut vero aliqua singillatim nosti, de mea nimia erga juvenes indulgentia, scis profecto, posse te de his me libere conmonere: et ego commonitionem tuam libenter accipiam.* Hic erat Francisci nostri erga majores suos animi candor, et ingenuitas. Ut autem Osorii mandatum exequeretur, hanc de novo dedit epistolam ad Episcopum Mutinensem. „ Illustrissimi,  
 „ me Præsul: Explicare scribendo minime possum, quot grati  
 „ animi significationibus, et quo lætitiæ sensu ex literis Pa-  
 „ tris Rectoris ad me datis cognovimus tuam illam eximiam  
 „ benignitatem, caritatemque insignem, qua dignatus es res-  
 „ pondere, paratissimum te esse ad sacros Ordines juvenibus  
 „ nostris conferendos. Pro hoc beneficio magnas tibi, et im-  
 „ mortales gratias et agimus, et habemus. Sed tua ipsa hu-  
 „ manissima caritas, quæ illis initiandis dies 17. 18. et 21.  
 „ designat, in difficultatem non levem nos conjecit. Certio-  
 „ rem feci de tua adversus nos benignitate Patrem Provincia-  
 „ lem, qui prope Bononiam degit, et quem justissime urget diffi-  
 „ cultas tam cito beneficium tuum accipiendi. In eo videli-  
 „ cet difficultas sita est, quod sat temporis non intercedit ante  
 „ statas dies, quo possint præmitti examina, et ea omnia,  
 „ quæ pro more, et instituto nostro præmitti debent ante-

„quam candidati ad sacros Ordines accedant. Imo pars ini-  
 „tandorum, quæ in hac domo degit, exercitia quidem spi-  
 „ritualia jam peregerat: sed pars altera eorum, qui Theo-  
 „logiæ curriculum absolverant, non potuere exercitia incho-  
 „are. Collecti fuerant interim in quandam Castrifranchi do-  
 „mum prope Panzanum; sed hodiedum domo carent, et in  
 „quodam diversorio publico versantur, hodie, vel crastina  
 „die profecturi, et recepturi se in Castrum S. Joannis, ubi  
 „pro illis quædam domus nuperrime conducta est. In tanta  
 „sane rerum, et itineris perturbatione vix, aut ne vix qui-  
 „dem sperari poterat, ut se ad sacros Ordines tam paucos  
 „intra dies rite compararent. Quapropter, Illm̃e Præsul, a te  
 „etiam atque etiam efflagito, ut æqui bonique habeas con-  
 „cedere inducias, quas postulare cogimur. Erit tempus op-  
 „portunum, quo tanta ista tua benevolentia uti possimus.  
 „Interim non solum meo, sed præsertim Reverendi Patris  
 „Provincialis, et totius Provinciæ nomine gratias iterum at-  
 „que iterum ago pro singulari tua caritate, qua exules pe-  
 „grinos, et afflictos recreas, atque erigis. Deus O. M.  
 „te quam diutissime incolumem tueatur. Panzano 8 Decem-  
 „bris 1768.

Ex hujus narratione facti, quæ pluribus exequenda fuit,  
 ut manifestius paterent omnia, videre hinc licet integritatem  
 Osorii, qui notam inurbani non timuit in retardando bene-  
 ficii usu, quod ei conferebatur, ut ne aliquid eorum præter-  
 mitteret, quibus ex Societatis lege probandi erant juvenes,  
 antequam ad Sacerdotalem gradum ascenderent: inde vero  
 perfectum obedientiæ studium, quod hic Franciscus noster,  
 ut sæpe alias, ostendit. Cum enim purgare se potuisset a-  
 pud Episcopum Mutinensem, exposita simpliciter Osorii res-  
 ponsione, qui tam promptam celebrationem Ordinum non pro-  
 babat, nullam in eum voluit offensionis partem rejicere, quam  
 subvereri poterat ex recusato Præsulis beneficio. Imo vero  
 sententiam Præpositi sui justissimam duxit, eamque tueri co-  
 natus est, et efficacium rationum pondere confirmare. Itaque  
 omnes obedientiæ fideliter explevit numeros, cum et impe-  
 rata prompte sit executus, et ad illa exequenda voluntatis et  
 intellectus firma adhæsiōne incubuerit. Hinc etiam promissam  
 obe



obedienti viro victoriam reportavit . Nam Episcopus Foglianus allatas a Francisco rationes æquissimas reputavit , eidemque humanissime respondit : Quod efficere Decembri mense promiserat , quovis alio tempore , quod ipse , ac Reverendus P. Provincialis opportunius existimasset , æque libenti animo præstiturum . Datam fidem exsolvit proximo Februario 1769 , benevolentissime receptis juvenibus quotquot ad eum missi fuerunt pro Sacerdotali dignitate obtinenda , quos deinceps in filiorum loco habiturum se esse promisit .

Franciscus in illa Panzani solitudine multa meditabatur , ac tentabat multa , ut aliorum exulum commodis inserviret ; sed eorum maxime , qui tirones in exilium ea conditione venerant , ut nihil essent a Catholico Rege pro annua sustentatione percepturi . Nondum tertium egerat in eo loco mensem , cum has dedit literas ad P. Jacobum Andream , qui Romæ negotia Societatis Hispaniensis procurabat , et tunc in Æmiliam missus fuerat , ut de constituenda exulibus sede cum Præpositis ageret provinciarum . „ Procul , inquit , a Panzani „ finibus ( cum Panzanensis ager hujusmodi non ferat fructus ) „ quædam mihi venit aureorum summa , in eorum præsertim „ missa subsidium , qui carent pensione regia . Et quanquam „ tota meo relinquebatur arbitrio , tamen et donatoris menti „ congruentius , et Deo acceptius fore existimavi , si ea disper- „ tiretur . Propterea commodam nactus opportunitatem , id mi- „ si ad Baticos , quod ipsorum olim tironibus respondere ju- „ dicavi . Ex Toletanis nemo erat , cui non solveretur pensio . „ Quot vero essent inter Aragonienses , quibus ea non pende- „ retur , jam diu est , cum a Josepho Pignatelio per literas „ exquisieram : ab eoque tandem intellexi , esse viginti septem . „ Pro his mitto tibi aureos itidem viginti septem , quos puto „ esse Mediolanenses , neque illorum agnosco pretium , nam „ hæc ipsa moneta est , in qua ego donationem accepi . Ef- „ fice , precor , ut ad Pignatellii manus perveniant , in eorum , „ quos dixi , opem aliquam impendendi . Vellèm equidem am- „ plius iisdem mittere : sed quanto pluribus subveniendum fuit , „ tanto minus potuit ad singulos pertinere . Hoc tibi certo „ confirmare possum , beneficii auctorem ad id elargiendum „ fuisse permotum ex amore Societatis , et miseratione filiorum „ ejus



„ejus, quorum precibus commendari Deo vehementer cupit. Noluit Franciscus benefactorem in his literis indicare, vel quia latere volebat ipse, vel alia forte de causa, quæ in ea tempestate silentio illum præterire suadebat. Nunc autem nihil prohibet dicere, munus illud, ut ex ephemeride apparet, quam Franciscus Panzani scripsit, profectum fuisse ab Aloysio Mozio, qui Theologiam eo tempore Mediolani audiebat, deindeque ob indefessum tuendæ avitæ religionis studium clarissimum assecutus est nomen, ut alibi significavimus.

Quanquam omnibus sine ullo provinciarum discrimine subvenire Franciscus pro viribus studebat, præcipuam tamen industriæ suæ partem ad eos sublevandos convertit, qui sine pensione venerant ex provincia Castellana. His multa erogabat ipse, de summa illa detrahens, quam pro privatis suis necessitatibus liberaliter a propinquis recipiebat. Sed cum hæc satis esse non possent, ut omnium occurreret indigentis, difficile dictu est, quam ingeniosa ejus caritas fuerit, ut aliorum animos ad misericordiam excitaret. Ab eo jam tempore cum Romam profectus fuerat ad comitia Societatis, nonnulla intercedebat ipsi cum Bristoliensi Comite necessitudo, quem Taurini noverat Oratorem Regis Anglici, ubi cum illo sermones aliquot habuit familiares. Missus deinde Comes ad legationem Hispanam, de Francisco nonnunquam colloquebatur cum ejus fratre Granatensi Duce, quem rogabat etiam, ut multam illi salutem, cum ad eum scriberet, suis verbis impertiretur: et aliquando Franciscus ad Comitem ipsum scripsit. Veterem hanc recolens amicitiam, non dubitavit literas modo ad Bristoliensem mittere, in quibus largitatem ejus commemorans, quam Taurini erga miseros exercebat, ac præsertim erga religiosas Virgines Capuccinas, orabat eum, ut aliquam beneficentiæ partem in eos vellet adolescentes ostendere, qui perpetuum exilium amplexi fuerant sponte, ut constantes in religiosæ vitæ genere permanerent, quod matura deliberatione susceperant. *Ego quidem, addebat, nullius egeo, cum frater meus Granata Dux, consentiente Rege, ita mihi succurrat, ut aliquorum egestatem levare possim, non tamen omnium.* Hoc idem in aliis iterabat epistolis, in quibus collaudata constantia juvenum, et exposita illos alendi difficultate, suppliciter opem aliquam

quam implorabat. Cum per id tempus publici afferrent nuntii, Cardinales de Corduba, et de Solis ad electionem Romani Pontificis adventuros, literas disposuit, quas tradere utrique cogitabat, cum illi Mutinam, aut Bononiam devenissent. *Inopiam subiisse (ajebat eorum alteri) non erubescit: sed inde valde conturbor, quod eidem subjectos viderim meos in Christo fratres. Neque ideo aliquid pro hac domo peto, in qua mediocriter ex pensione regia sustentamur. Hoc unum deprecor, ut in subsidium juvenum viginti sex, qui nulla pensione gaudent, nonnihil velis pro liberali pietate tua concedere.* Has tamen literas ad Cardinalem non misit, cum is Romam profectus sit alia via. Ad alios etiam scripsit, ut opem his juvenibus impetraret, quos gravissimæ tentationes, et labores asperrimi nunquam a vitæ proposito deterruerant, proindeque digniores erant, ut aliorum sublevarentur auxilio.

Cum deinde Præpositus Generalis ex indulto Pontificio facultatem fecit exulibus Sociis, ut stipendium pro dicenda Missa possent accipere, non segnis fuit in ea captanda occasione, ut juvenibus, aliisque indigentibus opitularetur. Et quoniam Bononiensis regio, aliæque Pontificiæ ditionis urbes plenæ tunc erant Jesuitis non solum Siculis, Parmensibus, Neapolitanis, et Hispanis, sed etiam Lusitanis, quibus quotidianum Missæ stipendium unicus fundus, et unica erat pensio; ne his forte detrimento esset, longius procedendum sibi esse duxit, ut Missarum quæreret stipendia. Uno die literas sub eodem exemplo dedit ad Præpositos provinciæ Mediolanensis, et Sardinæ, et ad Rectorem Collegii Taurinensis. Quarum literarum hæc erat clausula, quæ diligentem Francisci curam in his tractandis rebus ostendit. „ Quod si inter-  
 „ grum tibi fuerit aliqua stipendia mittere, vellem primum,  
 „ ut mihi mitterentur per epistolam, quam vocant *Cambialem*,  
 „ alicui negotiatori Bononiensi datam. Deinde, ut per privatam  
 „ alteram epistolam mihi indicetur numerus dicendarum Mis-  
 „ sarum, et stipendium pro unaquaque. Insuper an Missæ ce-  
 „ lebrandæ sint pro defunctis, vel propter alios fines. Hæ e-  
 „ nim cautelæ mihi proderunt, ne in scrupulos aliquos, vel  
 „ dubitationes incidam, atque ut melius obligationibus satisfa-  
 „ ciam. „ Nonnullas etiam misit epistolas ad quosdam Ger-  
 ma-

manix Socios, præsertim ad Antonium Bozizium Collegii Ter-  
gestini Rectorem, a quo stipendia quædam pro Missis accepit,  
et eleemosynas aliquot sine ullo concessas onere: quas tamen  
ille certo Sacrificiorum numero rependendas curavit. In his  
autem Francisci ad Bozizium literis, præter sinceram et in-  
nocuam ejus festivitatem, videre licet illius grati animi ma-  
gnitudinem, quam semper ad Ignatii exemplum, quod sæpe  
ipse commemorabat, erga bene de se meritos exhibuit. Quod  
unam, aut alteram ejus epistolam proferentes, abunde pos-  
sumus confirmare.

Septima Augusti die 1769 ita Bozizio scribebat. „ Vix lo-  
„ cum concedis gratiis agendis, cum ecce iterum gratias age-  
„ re cogis. Certas mecum, tecum certo. Sed cum ego gra-  
„ tiarum actione, et memori animo certo, certas tu benefi-  
„ ciis, et pecuniis certas. Do manus, et non solum perho-  
„ norifice, sed etiam utilissime succumbo, dum tu palmam,  
„ ego pecuniam tuli. Accipio nempe tuam epistolam die 26  
„ Julii datam, summasque collatas a Patribus Angerero, et  
„ Foreggero, quibus per literas grati animi testificationem si-  
„ gnifico. Cum te in hoc caritatis certamine victorem appel-  
„ laverim, fidus profecto armiger non tam honoris, quam grati  
„ animi causa, nominandus mihi est iste tui Collegii Minis-  
„ ter, qui tam impigram operam, tantamque diligentiam adhi-  
„ buit in levatione nostra procuranda. Vale plurimum. „ In  
altera, quam paulo post ad eundem misit, sic inter alia loquitur.  
„ Quanquam in alia 16 Augusti data, mihi auctor sis, et auctor  
„ profecto iniquus, ut obsequio accepto, gratiarum actionis  
„ ne meminisse quidem deberem; tamen probe noveris, fore me  
„ omnino nedum pietatis, sed etiam humanitatis sensu abhorren-  
„ tem, si id mihi culpæ adhæreret, ut tuorum me caperet obli-  
„ vio beneficiorum, quæ a te per injuriam, et per modestiam  
„ obsequia appellantur. Neque minor et injuria, et modestia  
„ tua est, cum me erroris insimulas inde, quod nollem deposi-  
„ ta nostrorum eleemosynæ causa imminutum iri. Parco qui-  
„ dem injuriæ, modestiæ parcere non possum. Rea illa est,  
„ et rea erit, quando ita fuerit mecum locuta. Profiteris te  
„ in tua admonitione jocari: non negabo in mea me nugari  
„ objurgatione. Cum adducar ut credam, accepturum me ali-  
„ quas

„ Quas literas a Patre Angerero, tunc iterum scribam isti Pa-  
 „ trifamilias, qui te teste, et me experto, profert de thesau-  
 „ ro suo nova, et vetera. Tu vero, optime Pater, ne præ-  
 „ termittas amplissimas ei agere gratias pro novissimis stipendiis.  
 „ Missæ autem statim celebrabuntur, nam ut Sacerdotes His-  
 „ pani in proverbio habent, cum carent stipendiis, Coronas  
 „ vacuas habemus., Ex iis agnosci etiam potest egregia pie-  
 „ tas Tergestinatorum Patrum, et illorum caritas vere germana,  
 „ qui de raudusculo peculii sui detrahere non dubitarunt, ut  
 „ inopiam suorum fratrum sublevarent. His autem, aliorumque  
 „ subsidiis necessitati subventum est indigentium, donec Fran-  
 „ ciscus, et literis, et rogatoribus interpositis, a Catholico Re-  
 „ ge tandem obtinuit, ut omnibus, qui de tirocinio venerant  
 „ in exilium, annua pensio perinde, ac cæteris, solveretur.

## CAPUT XVI.

*Bononia sedem sibi, suisque constituit.*

Quamquam Panzani recte omnia procedere videbantur,  
 cum et interius disciplinæ vigeret ordo, magnusque es-  
 set ad literarum studium ardor, et exterius benevo-  
 lentia incolarum accederet, qui novos hospites mirifice dili-  
 gebant; Francisco tamen justis de causis solitudo illa non ad-  
 modum probabatur. Dolebat illi multorum non leve incom-  
 modum, quod ex ipsa domus constitutione capiebant: multi  
 enim hiberno tempore aut nullum poterant contra frigora mu-  
 nimentum objicere, aut convenienti erant ad legendum, et  
 scribendum luce privandi. Pro comparando necessario victu,  
 Castrumfrancum ad duo fere millia quotidie procedendum e-  
 rat obsonatoribus, semelque per hebdomadem Bononiam agen-  
 dum erat iter quindecim millium: quod in illa domestici te-  
 nuitate census non modicum addebat quotidianis sumptibus in-  
 crementum. Alia his non levioris momenti accedebant, prop-  
 ter quæ Franciscus in animum induxit sedem illam relinquere,  
 aliamque conquirere, ubi suos ante futuræ hiemis frigora col-  
 locaret. Postquam in Centensi urbe, ad quam ipse profectus

est, frustra egerat de conducenda quadam domo, quæ recipiendis Panzani Sociis opportuna judicabatur, cogitationes suas ad quærendum Bononiæ domicilium tota contentione redegit. Sed antequam illud obtinere potuisset, quasi Deus in exercenda ejus obedientia, probandaque patientia, et humilitate gauderet, graves adeo superandæ fuerunt difficultates, ut et virtutum illarum ope, et inexsuperabili constantia sua opus fuerit, ut res tandem ad exitum perduceretur.

Noverat ex literis Præpositi Societatis ad Osorium, qui eas cum Francisco ipso communicaverat, commorationem Sociorum in Bononiæ urbe a Generali non improbari; quantum nulla erat in his literis de Scholasticis expressa mentio. Osorius idem, cum Panzani domum inspiceret, gratissimum sibi fore indicaverat, si pro Theologiæ auditoribus obtineri posset Exercitiorum domus, quam habebant Bononienses Socii tirocinio S. Ignatii continentem. Franciscus, qui de petendo Asceterio illo jam antea cogitaverat, his maxime incitatus, consilium suum omni ope promovere perrexit. Sed cum hoc, postquam multa tentaverat, nulla via succederet, nihilo remissius conversus est ad aliam ibi domum perquirendam. Eam industrii cujusdam discipuli sui opera, qui Bononiæ degebat, tandem invenit, et ducentis aureis Romanis conduxit. Vix tamen transacta erat pactio, cum literas accepit Roma, quibus admonebatur, non placere Præposito Generali, ut studiosi Theologiæ juvenes Bononiam deducerentur. His literis, quæ minus constantem virum non modice perturbassent, nihil ipse visus est commoveri; sed statim animum ad indicatam Præpositi voluntatem exequendam tota intentione virium induxit. Proinde ad discipulum, qui Bononiensem domum conduxerat, sine cunctatione scripsit, ut quocumque honesto modo posset, ab inito contractu resiliret. *Si melior est, ajebat illi, obedientia, quam victima, pro comperto tenendum est, potiozem etiam esse, quam aureos. Videte igitur* (alloquebatur simul Panzani Procuratorem, quem ea de causa Bononiam miserat) *quenam iniri via possit, ut a contractu recedamus, oblata etiam aliqua pecunia summa pro his, qua hæcenus confecta fuerunt. Neque vos анги velim, aut nimium super iis, qua promittenda sunt, litigare. . . . Osculemur*

Dei



*Dei manum, qui vos diu incolumes servet.* Talis erat illius tranquillitas in adversis, et tam submissa erga Deum reverentia!

Discipulus mandata Magistri sui non continuo credidit exequenda: sed prius ad eum scripsit, et quanta potuit eloquentiæ vi, persuadere conatus est, ut Præpositum Generalem certiozem redderet, quem in locum adducta res fuisset; cum sperari prudenter posset, ut, his cognitis, sententiam mutaret suam, ne ipse cum tanto dispendio, et, quod præcipuum erat, cum ingenti dedecore tam cito a fide data discederet. Hæc sane minime contemnenda videbantur, et quemcunque alium, non æque solida virtute præditum, maxime permovissent. Quantum vero apud Franciscum effecerint, ex ejus literis agnoscere poterit, quas decima octava Julii ad discipulum misit. Præerat is cuidam Sociorum domui, quam vocabant Martyrum Japonensium: atque huc alludens Franciscus, ita suam epistolam auspicabatur: „Noli, quæso, con-  
 „tendere, ut in Japonia tantum sint Martyres: sine, ama-  
 „bo te, ut Panzani quoque inveniuntur. Hic jam ex me ha-  
 „bes, de sinistro conductæ domus eventu nonnihil humani-  
 „tus doluisse; sed cruorem mihi fluere nondum aspicio. *I-*  
 „*gnoscite mihi, Patres: quid mihi expediat, ipse novi.* Non  
 „equidem diffitebor, vetus hoc Anachoretarum axioma non  
 „raro velamen esse, quo fraudulenter judicium proprium ob-  
 „tegitur. In præsentia tamen ab ea fraude videor mihi pro-  
 „sus immunis. „ Post hæc rationes adducit efficacissimas, ex  
 „doctrina S. Ignatii super electione rerum desumptas, propter  
 „quas ostendit, nihil movendum esse ulterius, neque oportere  
 „se rursus ad Generalem scribere (ad eum paulo ante scripserat,  
 „cum agebatur de obtinenda Exercitiorum domo) sed illius  
 „voluntati se plene, perfecteque submittere. Deinde sic pergit:  
 „„ Animus, qui fidus esse solet, nescio quid mihi præ-  
 „sagire, ac pro certo spondere videtur, hanc obedientiæ  
 „cæcæ occasionem inter illas annumerandam esse, quas so-  
 „let Deus felici exitu secundare. Denique benigne feres, o-  
 „pinor, quod in hoc tibi morem non geram. Etenim, ut  
 „tibi vel intima manifestem, super his, quæ ad consulendum  
 „honoris meo pertinent, quædam habeo cum S. Paren-



„te Ignatio fœdera constituta, quæ violare nullo modo ve-  
 „lim. „ His innixus erat humilitatis, et obedientiæ firmis-  
 „simis fundamentis.

Nec vana fuit spes illa felicitis exitus, quam animo præ-  
 sentiebat. Quasi enim unice voluisset Deus Francisci nostri,  
 ut Abrahami olim, tentare obedientiam; postquam illum ad  
 obsequendum in re difficili paratissimum vidit, magna facta  
 est, et insperata rerum conversio. In ipso S. Ignatii natali  
 die, cujus ob reverentiam decreverat de tuendo honore nun-  
 quam contendere, cum Procurator, et discipulus a conduc-  
 tione domus nondum abiissent, liberam habuit a Præposito Ge-  
 nerali facultatem cum suis omnibus Bononiam commigrandi.  
 Hoc accepto nuntio, nonnullos eo misit, qui de accommo-  
 danda, et instruenda curarent domo, antequam ad eam ve-  
 nirent ceteri. Sita erat in S. Felicis via, ex adversum fere  
 Parochialem ædem S. Nicolai: et quanquam tunc spectabat  
 ad Comitem Franciscum Aldobrandum, tamen a Fontanello  
 quodam nobili Mutinensi viro, qui eam olim habuerat, Fon-  
 tanelli domus appellabatur. Ad eam Septembri mense Panza-  
 no venerunt Socii, exceptis juvenibus, qui tertium Theolo-  
 giæ cursum absolverant: hi enim recta profecti sunt Brito-  
 norium, ut Sacris initiarentur, indeque sub initium Octobris  
 ad Fontanelli redierunt domum. Nullum Francisco erat du-  
 bium, quin Episcopus Foglianus juvenes illos, si ad eum  
 missi fuissent, libenter promovisset ad Sacerdotium, ut jam  
 antea cum aliis fecerat. Sed cum certo aliunde nosset, hanc  
 ejus humanitatem in Aula quadam fuisse improbatam, noluit  
 benemerentem Præsulem immeritis exponere querimoniis. An-  
 nuente igitur, probanteque Osorio, Sacerdotem quendam mi-  
 sit cum literis ad Episcopos Romandiolæ, inter quos facile in-  
 ventus est, qui ad humillimas ejus preces inflecteretur. Fran-  
 ciscus Episcopus Britonoriensis de Comitibus Columbanis  
 prompto, libentique animo recepturum esse respondit, quot-  
 quot ad eum pro suscipiendis Ordinibus mitterentur. Nunc  
 ergo duodecim juvenes, qui ad eum missi fuerant, ad Pres-  
 byteratum evexit: deincepsque omnes, qui ad Sacerdotium  
 promovendi fuerunt, pari benignitate consecravit.

Interea Franciscus noster, qui nullam de aliis benemeren-  
 di

di occasionem prætermittēbat, profectiōnem suorum ad Bononiensem domum acceleravit, ut Panzani locum daret nonnullis, qui eo venire valetudinis causa desiderabant. Rogatus fuerat a Laurentio Uriarte (is familiam ducebat adolescentium, qui Philosophiam discebant in Lavinis) possetne aliquos tantisper domi suæ recipere, dum afflictas vires cœli mutatione reficerent. Cui Franciscus incunctanter respondit, non solum ægrotantibus, sed cunctis etiam, qui ad Lavinum habitabant, libenter se domum illam concessurum, quam propediem relinquere cogitabat; et ex conventionis jure usque ad ultimam Octobris lucem poterat retinere. Cum igitur plerosque suorum Bononiam præmississet, et qui Theologica studia confecerant, in urbem Centi, ubi tertium probandi erant, destinasset; antequam ipse inde discederet, Mutinam profectus est, ut Antistiti Fogliano, Rectori Granellio, aliisque benevolis valediceret. Ad Vicarum etiam Nonantulæ adivit, et Præfectum Urbanæ arcis, et alios, quorum benevolentiam expertus fuerat, dum in sede illa permansit, debitis illorum humanitati gratiis persolutis, eam memori semper animo colere repromisit. Demum trigesima die Septembris 1769 Panzano Bononiam venit, mœrentibus, ac dolentibus illius Parochiæ incolis, qui Francisci beneficentia, ejusque ac Sociorum moribus ita fuerant capti, ut perpetuam in eo loco mansionem illorum esse desiderassent. Præ cæteris Archipresbyter Bellettus doluit, qui se felicem tales adeptus hospites reputabat, proindeque ipsorum modo ferebat ægrius desiderium, et abeuntes multis est lacrymis prosecutus. Ad memoriam vero facti hujus in subsequenda tempora transmittendam, inscriptionem in templo posuit, quæ Sociorum adventum, commorationem in pago illo, et discedentium vota pro felicitate Panzanensium indicabat.

## CAPUT XVII.

*De his, quæ Bononia gessit: ubi provinciam iterum  
suscipit gubernandam.*

Quam hactenus secutus fuerat in administratione sui muneris viam, eandem Bononiæ tenuit, eique perseveranter insistens, æqualem industriæ suæ fructum reportavit. Erga potestatem Ecclesiasticam, et Civilem, quod efficere solitus fuerat ubique, debitum observantiæ officium promptus exsolvit. Nam primo post adventum die ad Archiepiscopum, et Prolegatum adiit, ut illis reverentiam, et convenientem utrique submissionem exhiberet. Domi vero, in quam præter aliorum competentem numerum, juvenes convenerant sexaginta novem, haud minorem, quam alibi, adhibuit curam, ut religiosarum vigeret legum observantia. Sacellum erexit, in eoque aliquot aras constituit, quarum una sedes assidua erat augustissimi Sacramenti. Huc Socii quotidie recurrebant, ut meditationibus sacris insisterent, ut divina participarent, vel celebrarent, ut preces Mariæ Virgini, cunctisque Coelicolis funderent, ut animum iterata examinatione discuterent, ut lumen pro rebus dubiis, solatium ac robur pro adversis impetrarent. Huc etiam conveniebant statis diebus ad audiendas adhortationes, in quibus de religiosi viri officiis cum perfectione adimplendis agebatur. Neque his contentus ad promovendam virtutem adjumentis, alia quædam privatim Franciscus usurpabat, quæ non minus ad domestici decorem ordinis efficiebant. Nam hos modo alloquens, modoque illos, nunc obsecrans, nunc etiam arguens, unumquemque ad præscriptum servandum, atque ad explenda diligenter munera stimulabat. Multam etiam operam dabat, ut inter juvenes florent studia literarum, quæ non segnius in illa domo, quam Salmanticæ olim, urgebantur: nisi quod ad ea certamina, quæ ineunda erant more academico, ab externorum concursu justis de causis abstinendum censuit; solunque provinciæ suæ Magistros, ut cum propugnatoribus manus consererent, advocabat. In his vero, quæ ad sustentandam honeste vitam spe-

spectant, memor illius pacti, quod in Corsica invisisse cum Deo diximus, nunquam deparcus erat in subministrando vic-tui necessaria, neque in iis animi relaxationibus permittendis, quæ viros non dedecent religiosos. Sed dum ipse aliorum commodo, vel sui negligens, benigniter studebat, ferventibus interea votis Dominum obsecrabat, ut supernis eos adjuvaret auxiliis, quibus et Diabolicas superarent insidias, et ad destinatum perfectionis culmen studio nunquam intermisso con-tenderent.

Ut expeditior esset ad curam domesticorum, quantum ipsi prudentia permetteret, et urbanitas, ab externorum fami-liaritate abstinebat. Quoniam vero inter multos, qui ejus consuetudinem expetebant, non omnes excludere decenter po-terat, ita nonnullorum salutationibus, et colloctionibus in-dulgebat, ut neque frequenter, neque diu cum illis ageret, opportuneque misceret inter loquendum monita, quæ animum ad cœlestia revocarent. Et quam obtinebat apud eos gratiam, ad patrocinos convertit exules, quos non semel eorum auctoritate defendit, quibus ipse familiariter utebatur. Peculiaria patrocinii hujus commemorari possent exempla, nisi præstaret, recenti adhuc rerum memoria, nihil super his di-cere singillatim. Non tamen eodem pede, quo cives, Socie-tatis homines metiebatur, quibus et facilem ad se aditum da-bat, et frequentius hanc officiorum vicissitudinem exhibebat. A primo in urbem adventu Rectores omnes invisit, qui Col-legiis præerant Italarum: deincepsque omnes ad unam adivit domos, quas Hispani, cujuscunque provinciæ forent, aut in-tra urbem, aut in ejus suburbiis incolebant. Omnes enim pari amplectebatur affectu, atque omnibus facto ipso significa-bat, inter Ignatii filios, quamvis regionum, aut provinciarum diversitate discretos, quanta esse deberet animorum consensio conjunctioque voluntatum. Diligentissimus etiam erat in ade-undis, et consolandis ægrotis: quod si omnes, propter exce-dentem eorum numerum, adire ipse non posset, mittebat ali-quem, qui verbis suis inviseret, et subsidia, quæ ab eo spe-rari poterant, offerret. Adeo nota erat illius circa ægrotan-tes cura, ut qui minimo labore vellent de infirmorum nu-mero, deque illorum valetudine agnoscere, satis haberent u-  
nam

nam Francisci domum adire, in qua certa de his erat, exactaque notitia. Multi etiam, antequam eum quavis alia de causa convenirent, diligenter inquirebant de infirmorum statu, qui in ipsorum vicinia erant, ut interrogationibus satisfacerent, quas super his facturum esse minime dubitabant. Sed dum ægrotos omni ope fovere studebat, nullum erat auxilii genus, quod non libenter cæteris exhiberet. Hic etiam per literas ad pios amicos subsidia perrexit quærere, quibus indigentium occurreret necessitati. Ab eis non pauca pro celeberrimis Missis recepit stipendia, inter quæ jure quodam præcipuo memoranda sunt plurima diversis accepta temporibus ab illustri Confessore Christi P. Nohaco, qui Avenione, dum Parochi munus ad S. Symphoriani cum insigni animorum fructu perageret, a sicariis Jacobinis de Valleclausa impie cum multis aliis Catholicis fuit trucidatus medio fere Octobri 1791.

Dum his Franciscus, aliisque caritatis operibus, ac præsertim debilioribus confirmandis erat intentus, novum subire onus debuit, quod illi propter adversam temporis conditionem, et aversum maxime ab honoribus animum non poterat non esse gravissimum. Februario extremo anni 1773 designatus est a Præposito Generali, ut iterum provinciæ suæ assumeret præfecturam. Et quoniam perspecta illi erat hominis indoles inodestissima, in privatis ad eum literis: *Spero te, ajebat, electionem hanc, quamvis molesta tibi sit, fore admissurum, atque omnem reluctantis animi oppositionem esse a te pro bono tuæ provinciæ superandam.* Hæc tamen satis non fuerunt, ut Franciscus sine ulteriore deliberatione delatum sibi munus admitteret. Voluit prius Petri Calatayudii sententiam exquirere, quem habebat domi, semperque suspexerat ob ejus vitæ sanctimoniam. Sed quia is eo tempore, receptis jam Ecclesiæ Sacramentis, ad supremam horam appropinquabat (eodem die vivere desiit) per Emmanuelem Ibarzabalem, qui Petro erat a confessionibus, quæsit ab eo, quid sibi consuleret efficiendum. Cum hæc audisset Petrus, ad imaginem Christi crucifixi convertit oculos, diuque tacitus in illius obtutu perseveravit. Emmanuelem deinde compellens, hoc ei responsum dedit: *Sic dices Patri Rectori Francisco Xaverio: orasse me Dominum, ab eoque petiisse lumen, ut recte ad interrogata res-*  
pon-



pondeam. Deus autem mihi significavit, debere ipsum demandatam provinciam suscipere sine tergiversatione, et cum perfecta iudicii, ac voluntatis obedientia. Et quoniam non ignorat, Deum sibi materna dedisse viscera, ut suorum facile misereatur, dilatet animi sinus, laboretque ad Dei gloriam, nihil ex calamitosa presentium temporum conditione deterritus, sed confidens potius, quod Deus sua causa prospiciet. Quando vero Pontifex, et Rex Catholicus conati fuerint . . . Hic eum interrupit Emmanuel, cum deliquo proximum animadverteret, quod frequens illi erat per eos dies. Illam autem abruptam propositionem non dubitabat Emmanuel, ad ulteriores respicere calamitates, quæ postmodum Societati supervenerunt, et quas superna luce prævidisse Petrum existimabat. Quod ne quis temere a se dici suspicaretur, hanc afferebat opinionis suæ confirmationem. Loquebatur ipse cum Petro, paulo antequam is ægrotaret, de laboribus, et molestiis, quæ Sociis eo tempore inferebantur. Tum Petrus, curvato præter solitum corpore, dolenter in hæc verba prorupit. *Alius adhuc superest haustus amarior.* „ Obstupui ego, inquit Emmanuel, totusque ad eam „ Petri vocem exhorruui. Neque assequi cogitando poteram, „ quisnam amarior haustus imminere adhuc posset, cum amarioris calicem usque ad faces ebibisse nos crederem. Sed quæ „ nobis evenerunt deinceps, vim omnem et sensum illius verbi manifestissime mihi aperuerunt. Nulla deinde fuit opportunitas Petrum super his, quæ norturus dixerat, amplius „ interrogandi. „ Hæc omnia Emmanuel Ibarzabal, qui Petri socius fuit in missionibus per Hispaniam, deinceps nunquam ab eo disjunctus est in exilio, commendata literis, et propria manu subscripta reliquit.

Ad ea jam, quæ Francisci propria sunt, revertentes; cum is de voluntate Dei prudenter dubitare non posset, humeros subjecit oneri, quod laturus non erat diu, sed neque sine dolore acerbissimo depositurus. Sub idem tere tempus, quo ipse provinciam administrandam suscepit, a Clemente XIV designatus fuerat Vincentius Cardinalis Malvetius, Archiepiscopus Bononiensis, ut erga Socios Italos, qui Bononiæ, Centique degrebant, Apostolici Visitoris munere fungeretur. Nostrum non est, hic ea persequi, quæ Bononiæ acta sunt eo tempo-



re: illa tantum obiter attingemus, in quibus Franciscus caritatis, et prudentiæ suæ nonnullum specimen dedit. Cum decrevisset Malvetius ut Novitii omnes, qui ad S. Ignatii educabantur, relicta Societatis veste, in domos suas quæmoritimum dimitterentur, venit eo Franciscus, ut afflictos adolescentes, quo poterat modo, consolaretur. Longum cum eis colloquium habuit, libentissimeque obtulit domos illas, quas Hispani vicinis in oppidis habitabant, ut ad eas diverterent ex itinere. Opportunam liberalitatem omnes grato animo collaudarunt: et cum ea uti statuisset, qui profecturi erant Mutinam, statim ille Castrumfrancum scripsit ad Franciscum Gonzalium, qui Sociorum ibi erat Rector, ut advenientes juvenes exciperet perhumaniter. Misit is quosdam, qui venientibus obviam procederent, et in domum suam deducerent, in eaque ab omnibus habiti sunt humanissime. Postquam tirones in patriam quemque suam remiserat Cardinalis, de juvenibus egit exauctorandis, qui Rhetoricam discebant, et Philosophiam. Contendebat initio, ut Jacobus Belgradus, qui Rector illorum erat in Collegio Sanctæ Lucæ, religiosa spoliatus veste in parentum domos cogeret proficisci. Sed negabat is, licitum sibi esse quemquam suorum nullius culpæ reum, e religionis clastro propellere: proindeque nunquam ad rem adeo insolitam inducendum, nisi ex Apostolicis literis, quas exhiberi sibi frustra petierat, eam esse Pontificis voluntatem, agnosceret. Perseverantem in sententia Belgradum Cardinalis in publicum detrusit carcerem: indeque post aliquot horas eductum, extra urbem, ac diœcesim Bononiensem relegavit. Deinde juvenes intra Villam quamdam prope urbem inclusit, ad eamque nonnullos ire jussit religiosos viros, qui curam illorum agerent, et ad Societatem inducerent deserendam.

In tam gravi Sociorum luctu, qui communis erat omnium ordinum civibus, Franciscus noster, quanquam et ipse vehementi dolore pressus, nullum, quod in præsentia præstare posset, fraternæ caritatis officium prætermisit. Statim ad Collegium S. Lucæ quosdam suorum misit, qui mœrentibus Patribus consolationem aliquam adhiberent. Nec multo post ipsemet ad eos venit, prudentique oratione conatus est eorumdem ægritudinem delinire: opem etiam, atque operam prom-  
pto

pto animo collaturum promisit, siquid fieri a se posse crederent, ad eam tristitiam temporum mitigandam. Juvenes adire non potuit, qui detenti erant in Villa, cujus in aditu excubabant milites, et satellites, nequis ad interiora penetraret: neque ideo auxilium aliquod iisdem non contulit opportunum. Romanus quidam Præsul, cui nota erant, quæ Sociis Bononiæ fiebant, juvenibus scripsit literas, quibus eos ad perseverantiam adhortabatur. Has literas ad Franciscum nostrum nescio quis Roma direxit, ut securius ad juvenes pervenirent: illeque industria sua perfecit, ut eis tutissime redderentur. Sed vero illi juvenes non multis incitandi erant, ut in officio permanerent, cum jam inde a primo certamine demonstrassent, non facile a religionis proposito dimovendos. Quo die captus, et in exilium missus erat Belgradus, longam ad eos orationem habuit Archiepiscopi Vicarius, ut relicta Societate, ad propria reverterentur. Nemo tamen fuit inter eos, quem Vicarii verba permoverint, omnesque una voce dixerunt: nisi certo, legitimeque nossent, id a Pontifice Summo decerni, nunquam a Societate, in qua sacramentum Deo dixerant, recessuros. Cum deinde ad Villam pertraherentur, nonnulli aderant Hispani Socii, qui abeuntibus inter lacrymas, et amplexus felicem exitum precabantur. Tunc unus adolescentium non sine Hispanorum ingenti gaudio respondit: *Novimus, quid Palentia gesserint tirones Villagarsiensis: Deoque bene propitio, eosdem imitari speramus*. Neque horum quisquam in decertando fuit illis impar, cunctique precibus, et suasionibus cujusdam viri fortiter obstiterunt, donec tandem armata militum manu religiosi spoliati sunt vestibus, et nolentes in paternas abire domos compulsi.

Timendum erat nec immerito Hispanis Sociis, ne suis etiam adolescentibus idem, quod Italici, eveniret. Propterea Franciscus, ut in tantis periculis nullum prudentiæ officium non adimpleret, omnibus provinciæ suæ juvenibus breviculum hoc tradidit describendum, quod a singulis propria manu signatum servari jussit, ut illud, siquando usus posceret, exhibere possent: „ Cum Eminentissimus et Reverendissimus Dominus Cardinalis Archiepiscopus Bononiensis mihi infra scrip-

„to intimari pro parte sua jussit, ut deponam vestem So-

„cietatis Jesu, itemque mihi concedi dispensationem votorum  
 „religiosorum, quibus secundum ejusdem Societatis Consti-  
 „tutiones obligatus sum; peto humillime, et cum debita tanto  
 „Principi reverentia legitimam exhibitionem alicujus Chirogra-  
 „phi Pontificii, vel similis documenti, quo Eminentissimus  
 „sit munitus, et quo mature considerato, conscientia mea ad  
 „respondendum coram Deo conquiescat, et sit secunda. De  
 „cetero, si prædicta mihi exhibitio non concedatur, reveren-  
 „ter protestor, intimationi me non consentire, sed omnino  
 „repugnare. Eminentissimumque precor etiam, atque etiam,  
 „hanc meam protestationem æqui bonique ducere non dedi-  
 „gnetur. „Quamquam vero Malvetius contra Hispanos ju-  
 „venes nihil aggressus est eo tempore, non ideo quiescebant  
 „Sociorum animi, quibus suspecta erant omnia, et gravissimi  
 „undique timores incutiebantur. Multi non levibus, ut puta-  
 „bant, rationibus inducti, vehementer suspicabantur, omnes His-  
 „paniæ Socios eo esse adigendos, ut tandem aut Societatem de-  
 „serere, aut pensionem regiam amittere cogerentur. Franciscus,  
 „ut contra timores illos suorum animos obfirmaret, brevi quo-  
 „dam scripto demonstravit, non nisi imprudenter, et cum in-  
 „juria Catholici Regis timeri posse, ne is exulibus Sociis a-  
 „signatam pensionem detraheret, dum illi Sanctionis legibus ob-  
 „temperarent, in quibus nulla erat ejurandæ Societatis adjuncta  
 „conditio. Si tamen, eam apponi aliquando posse, quis  
 „fingeret, non ideo, ajebat, debere aliquem de statione recede-  
 „re, sed in ea constanter perseverare. Id manifestis probabat  
 „Constitutionum verbis, in quarum sexta parte cap. 2. num.  
 „10. sic ait S. Ignatius: *Parati sint ad mendicandum ostiatim,*  
*quando vel obedientia, vel necessitas id exiget.* Et in Exam.  
 „cap. 4. num. 26. *Cum enim, qui primi in Societatem conven-*  
*runt, per hujusmodi indigentiam, et penuriam majorem rerum*  
*corpori necessariorum probati fuerint; qui post eos accedent, curare*  
*debent, ut quoad poterunt, eo pertingant, quo illi pervenerunt,*  
*vel ulterius etiam in Domino progrediantur.* His rationibus, et  
 „exemplis tam generosos spiritus inter provinciæ Socios exci-  
 „tavit, ut hi parati essent mendicitatem potius amplecti, quam  
 „Societatem relinquere, si quando ad alterutrum impellerentur.  
 „Ac de his certior factus Præpositus Generalis non potuit,

tuit, quin egregiam Francisci curam in promovendo vocationis studio meritis laudibus celebraret.

Alia insuper Franciscus præstitit, ut Socios contra nonnullorum conatus præmuniret, paratus interim ad ea, quæ Christi Vicarius decerneret, exequenda. Sic ipse testatus est Cardinali Malvetio, cui negotium datum esse credebatur Jesuitas suæ diœcesis ad alios Religiosorum ordines pelliciendi. Eidemque asseruit, parem submissionem ad Pontificis jussa exhibendam esse ab omnibus sibi subditis, pro quibus se fidejussorem constituerebat. Id omnes effectu comprobant, cum se dolenter quidem, sed prompte Pontificio decreto submiserunt, quo tandem suppressa est Societas a Clemente XIV. Decretum illud indictum Bononiæ fuit Sociis 25 Augusti: et Franciscus post quartum diem, secularibus indutus vestibus modestissimis, ad Malvetium venit, eique fideliter, juxta decreti formulas, obtemperatum esse promisit. Hac tam prompta obedientia, aliisque submissionis exemplis, quæ per eos dies ediderat, Cardinalis animum ita sibi devinxit, ut deinde propitium, ac benevolum expertus fuerit. Pridie quam abolitionis decretum promulgaretur, per literas admonuit Socios, ne se deinceps Superiorem agnoscerent, sed fidum reputarent amicum, qualem se omnibus, et singulis ex animo exhibere spondebat. Statimque officium illud, nec rogatus ab aliquo, diligenter obire cœpit. Quippe usus benevolentis significationibus, quibus eum Malvetius prosequabatur (aliquando in amicitis signum osculum ori ejus impressit) facultates aliquot, et privilegia quædam ab eodem obtinuit pro Hispanis omnibus, qui Bononiensem intra diœcesim exulabant. In his præcipua fuerunt, ut Oratoria conservarent, quæ in ipsorum domibus erecta fuerant: ut pœnitentiæ Sacramentum inter se possent administrare: ut in esurialibus, aliisque diebus exceptis vesci ovis possent, et lacticiniis, et ad condiendos cibos liquatum laridum adhibere. Quæ deinde Cardinalis Joannetus, Malvetii successor, rogatu Francisci confirmavit.

## CAPUT XVIII.

*De illius vite ratione post abolitam Societatem.*

**R**eligiosis vestibus incredibili cum dolore depositis, neque ideo religiosos exutus mores, in eadem Fontanelli domo cum multis aliis, tanquam unus eorum, aliquandiu permansit. Deinde cum sufficienti sociorum numero in alias pertransiit ædes. Hoc sane consentaneum credebatur menti Pontificis, qui extinctæ Societatis individuis vel in antiquis ipsorum domibus convivere permittebat, dum ab earum administratione abstinerent, nec solita cum proximis exercerent ministeria. Is autem vivendi modus, ut plures sub eodem tecto habitarent, Hispanis exulibus maxime erat necessarius; cum ad patrias reverti non prohiberentur, et tenuitas proventus annui non facile sumptus æquare posset, quos alias facturi essent in conducendis novis ædibus, ac servis, et in domestica suppellectile comparanda. Verumtamen exeunte Junio 1775, jussi sunt omnes antiqua dissolvere contubernia, severeque interdictum, ne plures, quam terni, eandem domum incolerent. Franciscus eodem die per amicos habitationem aliam fecit inquirere, certus noctem illam extra domum suam traducere, vel si ad cautionem divertere necessarium esset. Sed inventa, conductaque nova domo, ad eam ipso die pertransiit cum duobus sociis, quibus deinde, consentientibus Ministris regiis, adjuncti sunt alii duo. Cum eis in Bononiæ urbe, quamvis interdum ædes mutare coactus fuerit, usque ad felicem obitum perseveravit.

Ubicunque autem degeret, nunquam a diligenti cessavit perfectionis studio, et in aliorum curanda salute pro ratione temporis adlaboravit. Ad promovendum animi sui profectum hac plerumque occupationum serie utebatur. Mature de lecto surgens, primitias cujusque diei Regi seculorum offerebat, ejusque perfectionibus contemplandis, et beneficiis grato animo recolendis longa mora insistebat. Postmodum, abstersis confessione sacra conscientia maculis, ad aras operabatur: et inter agendas gratias, Sacrificium alterum auscultabat. Post hæc, brevi sumpto jentaculo, recitabat cum socio diurnæ Psalmodiæ



diæ partem, quæ tempori conveniebat. Reliquas ad meridiem horas lectioni plerumque dabat, vel scriptioni, nisi quid aliud suaderet caritas, aut prudentia. Quotidie tamen, dum ei per vices licuit, ante meridiem prolibat in templum maximum, ut Dominum suppliciter adoraret. Quod cum deinde propter pedum imbecillitatem non posset efficere, consuetas nihilominus domi fundebat preces, et intra cubiculum manens, Deum suum Danielis more adorabat. Post meridiem deambulationem aliquam ad tuendam valetudinem usurpabat, vel invisebat ægros, aut alios etiam, quibus debitum esset illud urbanitatis officium. Persolutis jam cæteris precibus Sacerdotalibus, iterum studiis dabat operam usque ad cœnam. Sed in prima noctis hora non pauci ad eum conveniebant amici, quos excipiebat humaniter, ac libenter: quanquam sæpe, facta illis inter se loquendi libera potestate, pergebat ipse legere, vel scribere, nihil interea propter amplitudinem mentis a colloquentium rumore perturbatus. Post cœnam, in qua multis annis solo pane, et potu modico reficiebatur, disserebat cum domesticis familiariter: et antequam somnum caperet, discutebat animum, et matutinæ meditationis argumentum ex pio aliquo libro desumebat. Præter quotidiana pietatis opera, quotannis Novendialia quatuor cum suis contubernalibus celebrabat, et cum iisdem per dies octo peragebat S. Ignatii exercitia: aliosque ut idem facerent, consilio et exemplo suo permovit.

In quotidiana cum cæteris consuetudine facilis, et humanus erat, nullo diuturni imperii sapore retento, multoque minus mundanum redolens faustum, aut aliquam ex natalium dignitate jactantiam. Nunquam passus est Ducis, vel Excellentiæ titulo denominari. Quod si quis eum his vocibus aliquando compellasset, non facile illas iterum usurpabat, ut molestiæ nimirum parceret, quam inde ipsi creari ex ejus vultu, et verbis fere indignantibus agnoscebat. Nam quæ semel pro Christo abjecerat, noluit ea rursus propter hominum respectum assumere: et quam hactenus libentissime professus erat humilitatem, in eadem usque ad mortem perseverare constituit. Hac etiam de causa neque pretiosam aliquam vestem, neque ullam elegantioris formæ voluit unquam admittere. Sive  
domi,



domi, sive extra illam esset, pullo semper, talarique incidebat habitu laneo, qualem gestare solent modestissimi Sacerdotum. Hoc tamen recentes illius vestes a veteribus discrepabant, quod neque obsoletæ, nimiumve detritæ, neque alicubi discissæ, ut olim; sed aptæ, ac decentes erant propter illorum, qui degreabant cum ipso, diligentiam. Nunquam adductus est, ut argenteam in mensa supellectilem adhiberet, quanquam id aliqui decorem ejus exigere contendebant, cum aliquando convivio exciperet viros, quorum dignitati major quædam urbanitas debebatur. Sed non ideo ille a retinenda mediocritate discessit, neque inde offensionem apud convivas incurrit, qui moderationem illam non ex avaritiæ sordibus, sed ex altiori principio noverant provenire. In cubiculo mensam sine tapeto habebat, vulgaria quædam sedilia, et imagines aliquot sacras: inter quas una sanctissimi Cordis Jesu, quod adorabant Cœlites Societatis: altera Mariæ Virginis, quæ Societatem sub augustissimo pallio contegebat, ut olim ostensa fuit P. Martino Gutierrez. His deinde linteum adjunxit, in quo pulcherrimis iconibus descriptum erat acerbissimum iter Christi ad Calvarium: quod ex adversum eum locum suspendit, in quo sedebat ipse, ut facilius illud intueri posset, ac meditari.

Paulo ante frequentes illos, et horribiles terræ motus, quibus concussa Bononia fuit anno hujus seculi undecogesimo, copioso et iterato sanguinis fluxu debilitari Franciscus cœpit. Inter alia, quæ multi ad occurrendum huic malo excogitarunt, censuit Paschalis Antinorus egregius Medicinæ Doctor, opus esse Francisco vitam ruri agere per ætatem, ut intermissis studiorum laboribus, mutatoque cœlo, afflictam reficeret valetudinem. Exinde cum sociis suis discedebat quotannis per menses aliquot in suburbanam Bertaliæ domum, quam illi Marchio Jacobus Mariscottus Bersellius liberalissime utendam concessit. Multum ex illa rusticatione ad reparandas vires profecit: eamque libentius ideo suscipiebat, quod proxime ad urbem manens ( passus aberat MD ) frequentem habere poterat cum antiquis sodalibus consuetudinem. Quotidie, dum tempus sineret, ad eum veniebant aliqui, quos recipiebat ipse benigne, per eosque de cæteris cognoscebat, qui degreabant

in urbe, ac præsertim de illorum bona, vel adversa valetudine. Quod si aliquid fortasse occurreret, quod opem ejus exposceret, non secus ferebatur illam, quam si viveret intra mœnia. Propter frequentem adventum hospitem largioribus aliquanto dapibus instruebatur ibi mensa, quam Bononiæ fieret per reliquos anni menses. Ipse tamen a frugaliore victu, cui erat assuetus, non facile recedebat: semperque ab exquisitis liquoribus abstinuit, et generosiore vino, quod interdum secundis mensis propter hospites inferebatur.

In posterioribus vitæ annis ex nervorum relaxatione ita debilitatus est pedibus, ut non nisi difficillime posset incedere, quamvis cætera bene valeret. Inde gravius aliquid timebat Medicus, si Franciscus, ob eam gradiendi difficultatem, vitam ageret sedentariam, quam ejus habitudini maxime noxiam fore credebatur. Jussit ergo parari currum, in quo vehi frequenter posset, ut vectatione illa valetudinem tueretur. Multa contra hæc objiciebat Franciscus, cujus animus ab omni semper ostentatione abhorruerat, neque aliquid, quod fastum saperet, vel in præsentis vitæ statu vellet admittere. Sed tandem amicorum suavis, et constantia præsertim Medici, qui exercitationem illam necessariam ei esse affirmabat, rhedam aliquam emi permisit, quæ ab unico veheretur equo, et politioris nihil haberet ornamenti. Post aliquot annos coactus est bijugum currum admittere undique oclusum, ne vento, et frigore læderetur, quibus in aperta rheda erat expositus. Sed is etiam ad Francisci votum ita erat accommodatus, ut a Bononiensi quodam cive, dum sermo de illo incideret, non improprie *Carrus humilitatis* appellaretur. Hoc modo commoditatem illam, qua ex Medici præscripto utebatur, novit ipse cum paupertatis, et humilitatis studio mire conjungere. In gravescente deinde crurum imbecillitate, gressum facere, nisi aliorum adjutus ope, non poterat. Et quanquam nemo esset, quin libenter illi ferret auxilium, ipse tamen molestiam, quam iisdem exhibere putabat, multo ferebat ægrius, quam dolores, quibus interdum acriter urgebatur. Hos enim patienter, constanterque sustinebat, sæpe illud repetens, quod de S. Ignatio scribit Ribadeneira: *Corporis infinitasem animi robore sustentabat, et magna patientia, constantiaque peregrinatio-*

nis sua molestias perferebat. Sæpe etiam cum eo colloquens, quem habebat a confessionibus, affirmabat, quæ senescenti sibi supervenerant incommoda valetudinis, tanquam a divina voluntate profecta, æquo ac libenti animo tolerare.

Non propterea otiosam agebat inertemque senectutem, neque sui tantum sollicitus, nullam in aliorum spiritale commodum operam conferebat. Ab Archiepiscopis Malvetio, et Joannetto facultatem obtinuit indefinitam ad audiendas confessiones peregrinorum, et advenarum, qui vellent apud ipsum conscientiam deponere delictorum, cum potestate substituendi pro se alium, quem probaret ipse. Cum autem Bononiam frequentissimi adveniant exteri, multas ibi confessiones excepit, Gallorum maxime, et Hispanorum, quorum aliqui studiorum causa sedem ibi fixerant aliquandiu. Quicumque autem ad medelam animi opem ejus exquirerent, promptum, et affabilem inveniebant, neque ipse unquam laborem illum subire recusavit. Hoc etiam tempore opuscula quædam scripsit, quorum unum edirum deinde fuit in Hispania. In eo pro Ecclesiæ honore contendit, institutas ab eadem fuisse Academias, et Seminaria, sive Collegia, in quibus juvenes ad scientias religioni maxime convenientes informarentur: neque id egisse ductu, et exemplis Arabum Mahumetanorum, ut asserebat quidam nostri XVI Scriptor eruditus. In altero contra eundem Auctorem agit de dignitate, ac præstantia Theologiæ Scholasticæ, deque utilitate Aristotelicæ Philosophiæ, a qua illa rectam ratiocinandi formam desumit. Scripsit etiam dissertationem de antiquitate cultus sacri Cordis Jesu, ex traditione seculorum ab ipsis Ecclesiæ incunabilis comprobata, contra Camillum Blasium. Asservatur hæc, cum aliis quibusdam, in Bibliotheca, quam Franciscus sibi comparaverat, et usque ad ultimos vitæ menses diligenter excutere non omisit: eandemque moriens contubernatibus suis, aliisque Hispanicis, qui Bononiæ degunt, utendam reliquit.

## CAPUT XIX.

*Quadam de Francisci virtutibus singillatim.*

**D**e his quidem multa jam diximus, quæ religiosissimos hujusce viri mores ostendunt, et constantem in servando recto perseverantiam demonstrant. Sed quoniam aliqua vel solum indicanda, vel penitus omittenda fuerunt, ne nimium historix series abrumperetur, æquum fuerit de Francisci virtutibus separatim, et continenter agere, ut illarum pretium, et frequens earundem exercitium magis lectoribus innotescat. In fide ( ut ab ea sumamus initium, quæ radix, et principium est cæterarum ) ita fundatus erat, ut ex eadem vivere dici posset. Hæc a puero frequenter exercita, per lubricam adolescentiæ viam gressus ejus constanter direxit, ne præceps ad dexteram deflecteret, vel sinistram. Hæc inter delicias Aulæ, et summam regii Principis gratiam, sublimes suggererat illi cogitationes, ne facile caperetur illecebris, quibus eum ad se mundus allicere conabatur. Ab ea lumen, et robur accepit, ut amplissimis honoribus, ac divitiis, quæ illum hereditario jure manebant, humilem, et pauperem pro Christo vitam præferret in Societate. Id autem tanta animi generositate perfecit, ut vel in ultima senectute affirmaret: si centies posset relinquere, quæ semel reliquerat propter Deum, magna cum voluptate facturum, his ductum principiis, quæ divina fides nos docet. Ut ad eam operationes, et cogitationes suas maxime conformaret, præter attentam Scripturæ sacræ meditationem, frequenter alios interrogabat super genuino alicujus loci sensu, adhibitis etiam Interpretibus, quorum selectam habebat copiam. Sed hoc præcipuo quodam studio inquirebat, cum agebatur de consuetudine aliqua, vel operandi modo, qui jam inter homines receptus esset, vel quem veller ipse adhibere: tunc enim diligentius investigabat, numquid huic simile sacris in literis inveniretur, ut juxta illud suum agendi morem vel in minimis ordinaret.

Hinc etiam plurimi faciebat ipse, arque aliis frequenter commendabat prudentissimas illas regulas, quas S. Ignatius ad

calcem Exercitiorum scripsit, ut cum orthodoxa Ecclesia vere sentiamus. Inter cæteras eam sæpe iterabat, magnopereque laudabat, quæ sic ait: *Denique, ut ipsi Ecclesia Catholica omnino unanimis, conformesque simus, siquid, quod oculis nostris apparet album, nigrum illa esse definiert, debemus eidem, quod nigrum sit, pronuntiare.* Nec solas fidei decisiones tota contentione animi reverebatur, sed illa etiam pietatis, ac devotionis adminicula, quæ ab Ecclesia probata sunt, et recepta, ipse quoque verbis comprobabat, et factis. In frequentibus per Hispaniam itineribus dum crucem aliquam, vel ædiculam sacram aspiceret, quamvis jam pene dirutam vetustate, reverenter ad eam conversus ajebat socio: *En tibi monumentum, quod majorum nostrorum fidem ostendis.* Bononiæ, dum terra movit, supplicationibus adesse voluit, quæ publice indictæ fuerant ad Dei clementiam implorandam: quamquam ita erat defectus viribus ob copiosam sanguinis emissionem, ut inde domum regressus, semianimis corruerit in scalis, neque ad superiora conscendere sine aliena ope jam posset. In eadem urbe, quoties augustissimum altaris Sacramentum, aut simulacra Deiparæ, vel Sanctorum, solemnî pompa circumferri contingeret, domum suam decenter apparari curabat: emeratque in eum finem peristromata serica tredecim pro numero fenestrarum, quæ ad viam publicam spectabant. His hodie utuntur Hispani, quibus ea relicta sunt a Francisco, cujus proinde religiosa pietas adhuc Bononiæ viget: cum nulla fere sit Urbis regio, in qua peristromata illa, occurrente supplicationum celebritate, modo in hac, modo in illa domo suspensa non inspiciantur. Sumptus etiam faciebat non modicos in conquirendis sacris reliquiis, et imaginibus, quas deinde liberaliter elargiebatur, ut Sanctorum cultum inter plurimos promoveret. Sed his majora cogitabat efficere, cum ad Indos transmittere desideravit, ut fidem inter illos vel induceret, vel excoleret. Et quoniam hoc impetrare non potuit, ad eam inter populares suos excitandam, et promovendam, omnes animi vires, atque omnem intendit industriam. Ideo enim expeditiones sacras aliquandiu ita suscepit, ut diutius, si liberum fuisset, in iisdem perseverasset: ideo in erudiendis doctrina Christiana pueris per vicos et pla-



teas congregatis frequens erat in diebus festis: ideo gravissima fidei documenta variis hominum cœtibus sæpissime proposuit ad meditandum: ideo in auscultandis confessionibus pœnitentium in toto diuturnæ vitæ decursu adeo fuit indefessus, ut nullis aut laboribus, aut negotiis ab utilissimo illo munere retardaretur.

Ex contemplatione perfectionum Dei, quæ per fidem edocemur, in spem certam erigebatur obtinendi beatam æternitatem, atque illa insuper temporaria bona, quæ necessaria sibi essent, aut convenientia. Huic innixus providentiæ divinæ fundamento, quando paternam abdicaturus erat hereditatem, nihil sibi reservare voluit, ne quid de fiducia illa detraheret, qua dependere a Deo semper desiderabat. Deusque vicissim erga illum ita se præbuit, ut non modo privatis ejus occurreret necessitatibus, sed multa etiam subministraret, quibus posset aliorum indigentia subvenire. Propterea inter angustias, ad quas sæpissime reductus esse videbatur, et a quibus evadendi viam non facile reperturum credebant alii, miram ipse retinebat animi tranquillitatem, nullumque diffidentia prædebat indicium. Pulsabat quidem juxta consilium Domini, ut aperiretur sibi: quærebat, ut inveniret: petebat, ut aliquid acciperet. Sed ad hæc non alia inducebatur ex causa, nisi ut obediret Deo, qui suam exigebat cooperationem: tam certus interea de felici negotiorum exitu, ut propter facultatum inopiam nihil aggredi prætermiserit, quod in majus Dei obsequium, vel in aliorum subsidium cessurum esse judicaret. Hoc modo Burgis ornatum et nitorem addidit templo, gymnasia refecit omnia, cathedras et Sociorum numerum auxit, iisque de necessariis ad vitam decentissime providit. Multa quoque molitus est Villægarsiæ, quæ non solum ad tironum commodum, sed in totius etiam regni vergerent utilitatem. Nam inter alia typographiam ibi constituit, ex qua emendati, et illustrati notis prodibant libri, qui pueris ad humanitatis studia faciliorem aditum aperiebant. Palentino Collegio tria aureorum millia donavit semel, quibus potuit ex angustis emergere, propter quas de illo dissolvendo, vel certe imminuendo, a Superioribus agebatur. Gallos etiam, qui ad eum in Castellæ provinciam confugerunt, liberaliter excepit, deinde



indeque in patriam reduces copioso viatico instruxit. Nec minores pecuniæ summas expendit in Lusitanis primum, ac deinde in Hispanis exulibus sublevandis. Quod si reliqua omnia iis velis adjungere, quæ in divinum cultum, et aliorum egenorum subsidium insumpsit, non temere de Francisco nostro credideris, per spem firmam in Dei providentia copiosiores ad exercendam misericordiam invenisse thesauros, quam quos domi suæ, retenta primatus dignitate, habere potuisset.

Sed spes ejus in his elucebat maxime, quæ ad superna dona pertinent obtinenda. Hæc sibi primum a Deo sperabat indubitanter. Circa cæteros vero, quos Deus custodiæ suæ commiserat, vel directioni, non facile despondebat animum, si ab eis non omnia statim obtinere posset, quæ vellet. Recogitabat, nullum esse animi morbum, qui diligenti et opportuna medicatione sanari non possit: ideoque, si priora minus succederent, ad ulteriora procedebat medicamenta, neque ante medendi faciebat finem, quam industriam omnem ex caritatis, et prudentiæ legibus exhausisset. Et quia *Domini est salus*, nullum remedium frequentius adhibebat, quam ferventes ad Deum preces, a quo debiliorum salutem, et delinquentium correctionem potius, quam ab industria sua sperabat. Quantum vero deprecationes ejus valerent, nonnumquam Deus insolito quodam modo, et portento simili visus est ostendisse. Dum provinciam in Hispania regeret, Socius quidam laicus, remisso paulatim spiritualium rerum studio, neglectisque Superiorum admonitionibus, et correptionibus, eo tandem devenit, ut dimissionem a Societate minacibus verbis a Rectore suo contenderet obtinere. De his Rector Provinciam admonuit, qui statim literas misit, in quibus opportunum suggerebat ei consilium, ut audaciam illius subditi coherceret. Sed interea ipse ad orationem confugit, Deumque magnis gemitibus precabatur, ut illam miserando Fratri culpam ignosceret, eumque reduceret ad saniolem mentem. Quorum precum mox patuit effectus. Nam vix Rector epistolam Provincialis acceperat, cum hæc iterum ad eum scripsit: Eo ipso mane, quo literas dabat, Fratrem illum subito pavore correptum, et suffusum lacrymis ad se venisse: nihil jam exequi recusare, quod sibi vellent injungere: quin etiam rogasse  
sup-

suppliciter, ut vel abjectissimo Collegii ministerio, et maxime laborioso addiceretur. Affirmabat enim, visum sibi per noctem fuisse S. Franciscum Xaverium, extento brachio, et terribili vultu minitantem ei multa, nisi, relicto deserendæ Societatis proposito, ad perfectæ obedientiæ normam se penitus accommodaret. In his ego, aiebat Rector, fictioni locum esse non suspicor, qui ferociorem hominis indolem, et duritiam cordis ante perspexeram; et modo illum tam mitem, et morigerum, ad omniaque paratum inveni: propterea quæ mihi agenda scripseras, suspendenda duxi, dum te de his certiore facerem, quæ denuo contigerunt. Probavit hæc Præpositus Provincialis, qui Fratrem illum ad humiliora destinavit officia, in quibus experimenti causa libenter aliquandiu permansit.

Ut insignis erat Franciscus in contemnenda mundi hujus gloria, ita etiam præstabat in æternò, summoque Bono diligendo. Solitus erat frequenter in hæc verba erumpere: *Nihil me in hoc mundo delectat*: et frequentius etiam in hæc alia: *Quam bonum, et magnificum habemus Deum!* quibus et mundanarum contemptum rerum, et altissimum de Deo sensum exprimebat. Huic autem sentiendi modo æqualis erat dilectionis affectus, quo Deum ipsum prosequabatur. Super hoc Julianus Fonseca, qui diuturnam cum Francisco habuit, familiaremque consuetudinem, sic inter alia testificatur: *Cum ab omni singularitate abhorreret, communem tenebat operandi modum. Sed operationes suas omnes intentionis puritate ad eminentem perfectionis gradum elevabat: et cum propriam odisset gloriam, totus erat in Dei gloria promovenda. Et alibi: Pro certo habeo, inquit, intimam fuisse unionem ejus cum Deo, et propter fiduciam, et amorem, quo tanquam filius recurrebat ad Dominum nostrum Jesum Christum, impetrasse ab eo multa, quæ postulabat.* Hæc sane testimonia, a tali præsertim viro protecta, præclaram ingerunt opinionem de Francisci erga Deum caritate, quæ aliunde per effecta ipsa dignoscebatur. In iis censi merito debet imperturbata pax animi, quam inter vitæ tam varios casus, quorum fuerunt aliqui difficillimi, constanter visus est retinuisse. Cum enim oculos in Deum converteret, a quo noverat dulce pa-

riter,

riter, et amarum sapientissima dispensatione profluere; ut in prosperis moderatorem, ita etiam constantiam servabat in adversis: et in utrisque incitamenta, ut se magis divinæ voluntati conjungeret, inveniebat. Index etiam amoris erat acerbus ille dolor, quem dissimulare non poterat, cum injurias Deo illatas vel secum ipse recogitaret, vel ab aliis audiret commemorari. Olim cum amico suo Fonseca colloquens, asseveranter illi affirmavit, valde se iratum esse huic mundo. Rogatusque ab eo causam: *Infensus illi sum*, dixit, *quodiam ipse iniquissime habuit Dominum meum Jesum Christum*. Et mundus eum non cognovit. *Vide, quaso, num hoc satis superque sis, ut ego illum oderim, et fastum ejus, et vanitatem, et insanias omnes abominer*. Dum aliqui coram ipso sermonem inferebant de Philosophorum hujus ævi, et Jansenistarum artibus perniciosis, quibus impietatem et irreligionem longe lateque spargere conabantur; aut etiam de populis Americanis, qui recenter ad fidem conversi, post ejectos inde sacrorum Ministros, ad montes et latibula regressi fuerant; inde illius animus inconsolabili mœrore conficiebatur, obortisque lacrymis rogabat adstantes, ut sermonem illum vellent abrumperè.

Inter divina peragenda mysteria vehementiori amoris æstu corripiebat, cum sæpe illius vultus, dum ad aram consisteret, visus fuerit præter morem accensus. Propterea non facile, nisi si penitus insuperabilis causa intercederet, a quotidiana sacrificio abstinebat. In profectionibus, quas sæpe suscepit, cum provinciam administrabat, prima erat cura, postquam vesperi venerat in diversoria, Parochos alloqui, ut postridie liceret sibi rem sacram facere; quamvis interdum auroram prævertere cogere, ut posset iter conficere destinatum. Si quando autem ad facultatem illam obtinendam gravior aliqua occurreret difficultas, facile patiebat, quis ille, et a quibus ortus esset, per viæ comitem manifestari; adhibitis in spiritale lucrum secularibus titulis, quos alioqui neutquam volebat commemorari. Postquam vires ita illum defecerant, ut pedibus non posset insistere, multa tentavit, multasque habuit consultationes ad expiorandum, an baculo adjunctus, aut alio quovis decenti modo posset peragere Sacrificium, quippe quo nihil optatius sibi esset in mundo. A spe illa dejectus,

divi-

divinæ voluntati se plene submitit, et habitationem suam ita disposuit, ut quoties e cubili non posset surgere, in eodem residens, Sacerdotem intueri posset ad aras operantem. Hoc modo duas per dies singulos audiebat Missas, in quarum prima coelestem quotidie dapem accipiebat, in altera pro tanto dono debitas agebat gratias: et ex hac divini frequentatione mysterii vires desumebat ampliores, ad tolerandos cum gaudio exilii sui labores, donec Deum, quem unice amabat, sine velamine contueretur.

Secundum Deum, Beatissimam ejus Matrem, utpote Deo conjunctissimam, præcipuo dilectionis affectu prosequabatur. Illius imaginem in tela pulchre depictam secum ferebat semper, cum ad lu-strandam provinciam pergeret: eamque in Collegiis e regione mensæ collocabat, ad quam diutius manebat ipse pro Sociorum animis inspicendis, et totius domus negotiis pertractandis. Quam ardentes ad eam funderet preces! quibus amoris jaculis dulcissimum Cor ejus peteret! novit ipsa Virgo Santissima, cujus benigno, potentique patrocinio tribuendi sunt felices rerum eventus, quos ille in administrationis suæ tempore obtinuit. In eadem tela sub extento augustissimæ Reginæ pallio expressæ ad vivum erant imagines Sanctorum Societatis Jesu. Hos etiam Franciscus et colebat impense, et deprecatores ad Virginem allegabat, ut facilius votorum summam consequeretur. Erga S. Ignatium, ut in Parentem utique, singularem reverentiam exhibebat, eumque plerumque non nisi demisso capite nominabat. In colligendis ejus dictis, et factis peculiare posuit studium, ut ea deinde pro temporum opportunitate ad suam, et aliorum instructionem accommodaret. Sed inter actiones Ignatii quasdam ille *Patriarchales* appellabat, easque non facile in exemplum adducendas esse censebat; cum Societatis Institutorem decerent aliqua, quæ non æque cæteris Superioribus convenirent. Ad S. Franciscum Xaverium, cujus gerebat nomen, et genus, magna semper cum fiducia in rebus etiam difficilissimis recur-rebat, eumque demereri curabat frequentandis obsequiis, et moribus imitandis. In Burgensi templo amplissimam ejus aram ex propinquorum largitionibus vestivit auro; deindeque ad fratrem suum Granatæ Ducem scripsit, ut Sacellum, quod

pridem illi erectum fuerat in arce Xaveriana, ubi natus erat Indorum Apostolus, magnificentius exornaret. Insigni quoque pietate S. Aloysium reverebatur, ejusque colendi studium juvenibus præsertim inculcabat. Noverat enim ex quorundam ipsorum testimoniis, ut narrabat ipse, si vel solum Angelici juvenis intuerentur imaginem, ad amorem puritatis vehementer accendi: si quando vero prolapsi fuissent, in ea rursus aspicienda tanto pudore suffundi, ut demittere in terram oculos cogerentur: quod erat illis ad detestanda crimina, neque iterum perpetranda, saluberrimum incitamentum. Omnes denique honorabat cœlestis patriæ beatos cives, et si quis denovo coram ipso nominaretur, solitus erat eum inclinato profunde capite venerari: quod si antea de illius gestis nondum audisset, interrogabat alios, qui noverant, indeque ad laudandum Deum, qui mirabilis est in Sanctis suis, incitabatur.

Erga cæteros homines ita caritatem exercuit, ut in eis juvandis totam fere vitam impenderit. Nondum enim Societati nomen dederat, cum jam exarserat ad animarum quærenda lucra ex consuetudine cum Apostolico viro Petro Calatayudio, quem ad sacras expeditiones secutus est aliquandiu. Et ardorem spiritus ad curandam salutem hominum, quem ex colloquiis, et exemplis talis viri concepit, potius deinde auxit, quam aliquatenus imminuerit. Ad permovendos in bonum animos nativa ejus suavitas, et jucunditas vim magnam addebat verbis, ut facilius ab ejus ore salutaria monita reciperentur. Cum simplicibus, et pusillis agebat ipse quoque simpliciter: cum iis vero, qui dignitate præstabant, noverat etiam gravitatem quamdam sermonis, dum res posceret, adhibere. Quanquam interdum primarios etiam viros ita tractabat, ut, applicita leviter manu ad illorum pectus, vel caput, brevi quadam sententia commoneret de his, quæ ipsorum conditio ab eis maxime requirebat: neque ingrata illis erat, nec infructuosa familiaritas Idiaquezii, cujus integritatem morum, et studium proficiendi omnibus suspiciebant. Quædam etiam pro concione dicebat, quæ, licet communia essent et vulgaria, tamen propter fervorem spiritus, quo loquebatur, mirabiles in auditoribus motus excitabant. Dum Burgis Rectoris munereungebatur, convenerant  
ad



ad Exercitia S. Ignatii juvenes, qui Philosophiam, et Theologiam discebant in Collegio Societatis, quibus multi etiam accesserant de Schola Patrum Dominicanorum. Franciscus ad eos quodam die descendens, postquam de his disseruerat, quæ consideranda illo die erant, orationi mentali cum iisdem interfuit. Inter orandum quasdam ex intervallo proferebat sententias, quæ præsentī meditationi maxime essent accommodatæ. Id autem ferventer adeo, et tam apposite ad movendum fecit, ut unus juvenum inde repente digressus, ad quemdam Collegii Sacerdotem accesserit, ab eoque multis cum lacrymis, suspiriisque petierit, ut se de totius vitæ peccatis confiteri cupientem auscultaret: talia enim a Rectore audisse affirmabat, ut nisi statim cum Deo rediret in gratiam, irreparabilem animæ ruinam pertimesceret. Rogavit eum Sacerdos, quid tandem audisset a Rectore, ut tantopere commoveretur? neque enim lacrymas tantum, et gemitus, verum etiam sanguinem e naribus profundeabat. Cui respondit juvenis: sæpe nobis hoc dixit: *Ex hoc mundo tecum feres emortualem tunicam, et non amplius.* Alia multa sine dubio dixerat in exhortatione, quam ad juvenes habuit: et hæc ipsa postrema verba probabiliter ab aliis jam audierat ille juvenis. Sed ea tunc a Francisco inter orandum prolata, per efficaciam, ut credi potest, orationis ejusdem, salutariter juvenem exterruerunt, qui conscientiam delictorum sequenti mane, quando jam tranquillior erat, apud Sacerdotem illum deposuit.

Si tantum valebat verbis ad animarum commoda promovenda, non minus efficax, et industrius erat in opere ad corporales multorum sublevandas necessitates. Quamvis enim nihil haberet proprii, neque aliquid ex opulentissimo patrimonio retinere sibi voluerit; per auxilium tamen humilitatis, qua mendicare pro Christo nunquam erubuit, latissimam exercendæ caritatis viam invenit. Hoc modo in Hispania, atque etiam in Italia quamplurimos adjuvisse, jam alias vidimus. Sed præter illa, quæ precando collegerat ab aliis, multa quoque largiebatur ipse de his, quæ pro suo qualicunque usu a propinquis liberaliter accipiebat. Illius frater Ignatius, qui successerat in omnia Francisci jura, cum memor semper esset quanta per eum divitiarum, et honoris sibi fac-



ta fuisset accessio, libenter eidem, copioseque subveniebat. Alii etiam ex propinquis non pauca subministrabant, quibus ipse, cum parvo semper contentus esset, largiorem erga cæteros exercere potuit misericordiam. His enim subsidiis et tirones provinciæ suæ magna ex parte aluit, donec omnibus industria sua pensionem a Rege obtinuit, et aliorum inopiam sæpissime sublevavit. Inter alios singulari prosecutus est caritate adolescentes duos, qui Socios ab Hispania ejectos sponte sequi voluerunt, ut in eorum numero, si fieri posset, vel in exilio conscriberentur. Id alteri eorum, cui nomen Ignatio Dorronsoro, concessum fuit Calvii, ubi receptus est inter Societatis Adjutores, quorum ministeria libenter, ac laudabiliter egit, dum Societas mansit. Ea vero deficiente, cum adhuc nulla pensione donatus esset, quam ne tum quidem obtinuit, quando cæteris concessa est, qui novitii venerant ab Hispania; Franciscus omni ope destitutum intra domum suam recepit, eumque veluti filium semper apud se habuit, dum vixit: et morti jam proximus, eidem de ratione victus, quo poterat modo, etiam in posterum providit. Cum altero multam quoque beneficentiam exercuit: nam et illum ad persequenda jovit literarum studia, et quæcumque necessaria essent ad vitam, longo ei tempore subministravit: et tandem post Societatem extinctam, quam et ipse adire cupiebat, viatico et commendatitiis instructum literis in patriam suam remisit.

Sed infinitus propemodum essem, si eorum inire numerum vellem, quibus Franciscus liberalitatem suam impendit, cum aliquando vel unica largitione multorum necessitatibus subveniret. Postquam Bononiam venerat, nonnulli ex iis, qui Sociorum domibus in ea urbe præerant, cum ad angustias redacti essent, haud modicam ab illo impetrarunt opem, ut commissas sibi familias sustentarent. Quædam Hispanorum domus propter impensas in curandis ægrotis, aliisque in rebus factas, magnum æs alienum contraxerat, cui solvendo non erat Rector, qui eam administrabat. Is quodam die, cum Francisco de numaria suæ domus difficultate colloquebatur; nec tamen ausus est quidquam ab eo petere, cum sciret, quam multa in aliorum subsidium expendisset. Ipse vero post non multos dies Rectorem illum convenit, eique nec opinanti crum-

menam in manus tradidit quingentis foetam uncialibus argenteis, quibus et debita exsolvit omnia, et suorum commodis melius potuit in posterum providere. Postquam autem Societas esse desierat, frequentiores fere occasiones habuit perhibendæ beneficentiæ. Initio enim multi, ex junioribus præsertim, ne arculas quidem habebant, quibus modicam conderent supellectilem: alii male fulti erant vestibus, cæterisque utensilibus, quæ ad novum vitæ genus requirebantur. Deinde non pauci vel ex diuturno morbo, vel aliis etiam de causis, egestate misere oppressi, nec Medico mercedem solvere, neque vitam nisi ægre poterant tolerare, nec demum aliquid, cum occubuissent, pro celebrando funere relinquebant. His omnibus necessitatibus Francisci caritas occurrebat, quam tanto confidentius implorabant plurimi, quanto notior erat illa universis. Nec ideo indigentibus benefacere recusabat, quod molesti sibi olim fuissent, aut beneficiorum immemores, quæ pridem ab ipso acceperant. Imo vero vulgatum inter omnes erat, liberaliorem in eos esse Franciscum, qui offensam ei aliquam intulissent. Unde quidam ex illius intimis, de hac ejus patienti, benignaque caritate disserens ita loquitur: Non raro ab amicis interrogatus, fecissetne mihi Franciscus, quod huic, aut alteri fecerat? Nequaquam, ajebam illis. Notum quippe erat, majora solitum esse beneficia conferre ingratis et aversis, quam sibi adhærentibus et addictis. Nec tamen propterea dubitabam, quin statim collaturus mihi esset opem, si quando illa indigerem. Quod si ego, aut alius quisquam ex familiarissimis ejus, de his apud eum conqueri voluissemus, certissimum mihi habeo, idem utique responsurum fuisse, quod benignus ille pater, de quo sermo est in Evangelio: *Fili, tu semper mecum es, et omnia mea tua sunt: epulari autem, et gaudere oportebat, quia frater tuus hic cæt.* Enimvero Franciscus in beneficiis conferendis, sicut in reliquis operibus suis, Deum potius, quam homines respiciebat.

Aliis quoque pauperibus et urbanis, et peregrinis quotidiana fere subsidia conferebat. Plerique Hispanorum, qui devotionis, aut alicujus negotii causa Romam petebant pedites, ad Francisci veniebant domum, in qua semper stipem aliquam accipiebant: quod cum alii ab aliis deinde audirent, frequentior erat

peregrinorum in eam domum accursus. Sæpe illos adduci ad se intro præcipiebat, quamvis sordidi, ac parinosi essent, repugnantibusque non raro domesticis, quibus ea facilitas periculosa quodammodo videbatur; cum posset ab ignotis, robustisque mendicis contra grandævum senem aliquid insolentius attentari. Sed caritas, quæ foras mittit timorem, Franciscum ab omni suspicione reddebat liberum: et ipse occasionem illam arripiens, salutaria omnibus consilia dabat, ut eorum animis non minus prodesset, quam corpori. Non paucos eo modo induxit ad peccatorum confessionem, quam vel audiebat ipse, vel Hispanum aliquem Sacerdotem subrogabat, qui eam audiret juxta facultatem, quam acceperat ab Archiepiscopo. His autem, qui longiorem petebant moram, ut se rite ad pœnitentiam compararent, de necessario providebat victu, donec animum exacta confessione expressissent. Duos etiam religiosos viros, qui ab Hispania diversis temporibus advenerunt, in domo sua diu retinuit, liberaliterque tractavit: et eorum alteri persuasit, ut animum, antequam inde abiret, per dies octo sacris meditationibus exerceret. Sed multo diutius cum puero caritatem exercuit, qui Romam cum patre suo, et altero fratre profectus, utrumque inter peregrinandum amisit, ac matrem quoque jam ante amiserat. Hanc pueri orbitatem commiseratus Franciscus, ad quem ille regressus Roma confugit, benigniter in domum suam admisit, eumque sex ferme mensibus omni ope adjuvit, atque in doctrina fidei, ac bonis moribus per Sacerdotem quemdam curavit erudiendum: tandemque illi de necessario providit vjatico, ut in Hispaniam tuto reverteretur.

Qui propter Deum liberalis erat in homines, erga Deum ipsum, cui se penitus mancipaverat, multo fuit liberalior. Religiosæ perfectionis viam magno animo aggressus, constantiam semper, ac diligentiam in eadem persequenda servavit. Et quoniam permagni interest ad eam affici disciplinam, quam quisque sequi decrevit, ut progressum in ea faciat notabiliorum; ille, quam amplexus erat, vivendi formam sic adamavit, ut vita ipsa cariorem haberet. Libenter enim pro tuenda Societate dedisset vitam, ut ipse testatus est, si potuisset hoc pacto eam ab imminente calamitate liberare. Alias etiam

vim amoris hujus adeo vehementer expressit, ut admirationem adstantibus excitaret. Nonnunquam de hoc argumento jucundissime disserens, in hæc verba coram multis, qui aderant, erupit: *Si forte olim audieritis, Idiaquezinum de potestate mentis exisse, id non alia de causa evenisse putetis, nisi præ lætitia inexplicabili, qua cor meum exultat, quod in Societatem adscitus fuerim.* Enim vero exsuperantem gaudii voluptatem significantius indicare non potuit. Vir quidam nobilis ex eorum numero, quos Hispani Collegis majores vocant, ad salutandum Franciscum ingressus, cum eo de conditione religiosi status, quem sequebatur, nimis familiariter cœpit agere, ne dicam imprudenter. Non enim, ajebat, tui generis claritatem, neque præclaras quibus ornatus es dotes, obscurior hæc vita, quam amplexus es, admodum decet: hanc saltem induisses trabeam, quam ego gero; sic enim ad honorum culmina facillimum aditum invenisses. Patienter, dum hæc effunderet, auscultavit eum Franciscus. Deinde vero consurgens, gravi, ac severo vultu respondit: *Si trabeam istam, quam tanti æstimas, assumere voluissem ego, videor mihi honoris aliquid eidem fuisse additurus, quod tu ipse, credo, non inficiaberis. Verum hæc Societatis tunica (eam utraque manu a pectore apprehendit) me valde honorat, neque a me quidquam illi honoris accedit. Tu vero consideratius loqui didiceris et de aliorum Ordinum, et de Societatis religioso statu, quo nihil honorabilius mihi est, et præstantius.*

Ab hoc autem religiosæ professionis amore vehementer incitabatur, ut ea quoque diligeret, quæ professio ipsa requirit. Paupertas, quæ cunctis pene mortalibus invisâ est, semper illi cara fuit, et jucunda. In ipso tirocinio sic eam amplecti cœpit, ut viliora quæque indumenta deligeret, quantum posset, eaque aptissime sibi cadere judicaret. Ac fere idem in reliqua servavit vita, cum plerumque vestibus indueretur, quæ jam essent usu detritæ, nisi ab eis, quorum imperio vel curæ suberat, novas aliquando sumere cogeretur. Nonnunquam fraude aliqua, vel artificio fuit impellendus, ut decentius aliquod reciperet indumentum. In Collegio, cui tum ipse præerat, contendebant ab eo Socii, ut galero vetustissimo, quem gestabat, alium sufficere vellet non æque obsoletum. Verum id assequi non potuerunt,

runt, donec advenientibus Marchionis de Valmediano filiis ad Avunculum invisendum, eorum obtinuerunt opera, quod diu frustra desideraverant. Cum enim ostendissent eis galerum Avunculi, dum is extra cubiculum nescio quid facturus evaserat, unus eorum a summitate illumprehendens, quæ jam pertusa erat, facillime totam evulsit, penitusque discidit. Doluit inde Franciscus, quasi gloriam sui capitis amisisset, et nepotem audaculum objurgavit: sed cedere necesse habuit, et galerum alium ægre tandem admisit. Cum deinde ad Aulam venisset pro negotiis provinciæ suæ, non erubuit in scissa veste coram Magnatibus apparere. Et quamvis inde aliquis cavillandi desumpserit occasionem; plerique tamen, et Rex ipse ante alios, generosum animum, quo mundana omnia contempserat, ex neglecto ejus vestitu conjecerunt.

Post Societatis abolitionem, quantum novi status ferebat conditio, in eodem colendæ paupertatis studio perseveravit. Priusquam vestem deponeret religiosam, aderat quodam die coram Vincentio Cardinali Malvetio, ad quem simul etiam venerat Ferdinandus Coronelus, qui Bononiæ regius Administrator erat pro solvenda exulibus pensione. Is in colloquio illo vehementer apud Malvetium instabat, ut Franciscum ad induendas vestes cogeret, quæ decebant Excellentissimum Granatæ Ducem; sic enim illum in primo ad Cardinalem ingressu denominaverat. Franciscus denominationem illam iniquissimo tulit animo: certumque, ac deliberatum sibi esse dixit, pretiosas, et elegantes vestes, quas jam pridem repudiaverat, in posterum nunquam admittit: nec dubitavit caligas, et femoralia, quibus erat indutus, ostendere Cardinali, qui tantam in tali viro simplicitatem vestium admiratus, noluit eum a proposito consecrandæ moderationis dimovere. Ille quidem deinceps, etsi convenientem statui Sacerdotali gestavit amictum, nunquam tamen adduci ullo modo potuit, ut elegantius aliquod, aut pretiosius indumenti genus assumeret. Et quam tenuit semper in cultu corporis moderationem, eandem in cæteris rebus omnibus observavit. Nunquam usus est horologio, neque argenteis fibulis, nec serico pileolo, vel mucinio. Nulla unquam voluit ornandis parietibus aulae: nullum elaboratum stragulum in lecto, quem semper obtexit

per-



pervetusta quadam lodice , Carthagine sibi tradita , cum inde solveret in Italiam . Illas etiam commoditates , quibus uti ex Medici præscripto aliquando debuit , ita cum paupertatis studio temperavit , ut nullum in eis ostentationis specimen appareret . Palam hoc demonstrabat et currus ille , de quo supra mentionem fecimus , et adscititia cæsaries , quam extremis temporibus adhibere coactus est ad fluxiones capitis cohibendas . Hæc sane ab omni elegantiae specie longissime aberat , aperteque intuentibus indicabat , necessitati tantummodo deservire : illiusque usum noluit ipse ultra Missæ tempus extendere , aut cum Eucharistiam quotidie sumeret , quando Missam celebrare non potuit .

Ex amore paupertatis propensiore quodam affetu diligebat pauperes , in quibus Christi personam reverebatur , qui propter nos egenus factus est , cum esset dives . Humaniter ac benigne illos alloquebatur , et stipem propria manu donabat , recusato sæpe aliorum ministerio , qui suam ad id operam offerebant . Hoc extra urbem frequenter eveniebat , cum æstivo tempore manebat in Villa , ex qua neminem , qui ad petendam opem accederet , sine illa dimitti patiebatur . Cum autem foras deambulandi causa prodiret , multi eum pauperes in loco , ad quem accedere solitus erat , opperiebantur : quorum singulis , detento curru , stipem aliquam impertiebat . Et quamvis in promendis numulis non modice interdum ex vestium volumine impediretur , non ideo precibus annuebat comitum , qui stipem etiam dare , ut molestiam illi minuerent , contendebant : sed omnino volebat ipse aliquid in singulos sua manu erogare . Id cum fere quotidie faceret , ipsi etiam equi , cum ad prædictum venissent locum , præ consuetudine sistebant gradum , immotique perseverabant , donec inde turba pauperum digrederetur .

De illius modo castitate dicturus , paucis id agam verbis , ut Francisco ipsi consentiam , qui de hoc argumento parcissime loquebatur . Quanto enim impensius amabat illam , atque ab aliis pariter amari cupiebat , tanto accuratius ab iis sermonibus abstinebat , qui possent imagines contrarii vitii excitare . De hoc vitio ne in concionibus quidem ita volebat agi , ut oratio descenderet ad singularia : in privatis vero colloquiis ,



quamvis reprehendendi causa fieret, multo minus sinebat illud attingi, nec verebatur de his loquentem interpellare, licet importunus videri nonnunquam posset. Sed neque locutiones illas in familiari sermone usurpari probabat, quibus sacræ literæ, Doctoresque mystici explicant unionem intimam, et castissimos illos amplexus, ad quos Deus puriores aliquot animas dignatur admittere. Hæc enim, dum opus esset, privatim potius discutienda esse censebat, quam in colloquio multorum pertractanda; cum ea possent interdum in alicujus vergere detrimentum. Solertissimus nimirum erat in his omnibus avertendis, quæ vel leviter virtutem illam offenderent, cujus est indoles simillima lilio, quod tanto candidius emicat, quanto minus fuerit attrectatum. Ut eam servaret ipse illibatam, jam inde a primis annis, rejecta nuptiarum, et hereditatis amplissimæ cogitatione, serio cœperat de amplectendo religiosæ vitæ instituto deliberare: ab eaque mente, tanquam a Deo injecta, nullis potuit illecebris, nullis tentationibus dimoveri. Hoc autem perfectioris vitæ desiderium vel inter ipsas Aulæ delicias ita gressus ejus direxit, ut adolescentiam duxerit innocentem; cum ipse interea, et honestis studiis, et Christianis operibus deditus, illa constanter effugeret oblectamenta, quæ candorem animi poterant offuscare. Intra religiosa deinde claustra receptus, quanquam in tutiore loco thesaurum pretiosissimum collocaverat, non ideo securum credidit, nisi custodiam adjungeret diligentem. Iraque ad eum augendum, et conservandum, asperitatem adhibuit, usum, orationis, et humilitatis studium, cibi potusque parsimoniam, quam ad extremam usque vitam servavit. His autem subsidiis, ac divina præsertim ope suffultus, puritatem mentis et corporis creditur fideliter custodisse. Ad studium ejusdem virtutis in sacris poenitentis Ministris promovendum, librum in Hispania scripserat *De castitate Confessaris*, quem eleganti latinitate, solidæque doctrinæ copia compositum, Censores designati jam approbaverant. Sed illum, propter indictam eodem tempore legem exilii, prælo mandare non potuit: ejus tamen autographum in tabulario Ducis Granatæ ad Egam, cui Franciscus illud miserat, verisimile est cum aliis ejusdem scriptis asservari.

Etsi vitam in gerendis magistratibus maximam partem duxerit, non ideo pauca obedientiæ, nec parum illustria dedit exempla. Nam in primis nullum obedientiæ genus gravius illi erat, ac difficilius, quam imperandi munus, quoties ei deferrebat, admittere. Hinc sæpe profusæ lacrymæ, et animi angores intimi, qui corporis etiam valetudinem nonnunquam immutarunt. Sed postquam demandata munera nec lacrymis, nec precibus poterat declinare, perinde illis subiciebat humeros, quasi grata sibi essent, aut levia: quod non modicam in obediendo perfectionem indicat, et requirit. Deinde in imperio ipso exercendo singulorum vires, et indolem sic explorabat; ne cui forte majus, aut non ita conveniens onus imponeret, sed omnes ad officium faciliori via compelleret; ut quodammodo subditis potius obsequi, quam ab eis obsequium exigere videretur. Præterea Superiores habebat ipse, quorum potestati subjectus erat, et quorum proinde jussa prompte, ac fideliter exequabatur. De hac ejus perfecta ratione patendi, vel cum difficultia præciperentur, præclara quædam argumenta jam exhibuimus, dum ea, quæ Panzani gessit, recenseremus. Sed et alibi, quamvis nullo Superioris cogerebatur imperio, ad illius sequendos nutus promptum se animo, et opere ostendit.

Dum provinciæ præerat in Hispania, scripserat ad eum aliquando Præpositus Generalis, novum sibi videri, alienumque ab aliarum consuetudine provinciarum, quod in Castellana fiebat, ut tirones alterum probationis annum cum studiis jungerent humanitatis. Id enimvero antiquissimum erat ibi, ac fortasse ab eo institutum tempore, cum mos idem vigeat Romæ, ut Sacchinus indicat Hist. Soc. P. 4. lib. 3. num. 37. Sed quocumque demum tempore mos ille inductus fuerit, ad eum modo emendandum non leves intercedebant difficultates. His tamen Franciscus nullo modo deterritus, ad indicatam Generalis voluntatem explendam serio convertit animum: statimque de ratione suppeditandi necessarios reditus, ac de habitatione constituenda cogitare cœpit, in qua juvenes post completum tirocinii biennium, studiis incumberebent humanioribus. Et quamvis consilium hoc, superveniente postmodum Sociorum expulsionem, perficere non potuerit, in eo tamen

aggrediendo non modicam obedientiæ laudem promeruit. Patrem etiam conatum adhibuit ad reformandas Philosophiæ Scholas, postquam ex literis ejusdem Generalis agnovit, gratum sibi facturum, si curaret, ut in eis aliquid de amœniore, et experimentalis Physica tractaretur. Sine mora probatissimos aliquot Scriptores conquiri jussit, quibus in explicanda naturali Philosophia juvari Magistri possent: ac, nisi adversa obstitissent tempora, novum aliquem cudi fecisset Cursum philosophicum, quem sequi deberent omnes, ut plenius Præpositi Generalis voto satisfaceret. Ad eundem de provinciæ suæ rebus tam exacte ac simpliciter scribebat, ut qui ejus aliquando dictantis excepit verba, dum morbo impeditus erat ad scribendum, magnopere miratus fuerit ingenuam sinceritatem in exponendis quæ gesserat, aut gerere cogitabat, et absolutam submissionem judicii ad Præpositi voluntatem, quippe qui nollet ab ea nec in minimis discordare.

Postquam Societatis Moderatoribus subesse desierat, erga illum, cui ex communi jure subiciebatur, promptam similiter exhibuit obedientiam. Vix enim Pontificiæ literæ, quibus suppressa est Societas, Bononiam allatæ fuerant, cum ipse protinus ad Archiepiscopum ejusdem urbis Cardinalem Malvetium venit, eique tanquam legitimo Superiori se plene submisit. Ab eodem facultatem pro deligendo sibi Confessario, pro pecuniarum usu, proque aliis similibus tam suppliciter petiit, quam si cum aliquo ageret veterum Superiorum. Quod Malvetius ita probavit, ut eum deinde singulari benevolentia prosequeretur: nec solum postulata omnia libenter illi concessit, sed potestatem insuper fecit, ut eadem ipse cum Hispanis exiitibus pro arbitrio suo communicaret. De aliis Francisci virtutibus, ac præsertim de illius in gubernando prudentia, de fortitudine in adversis, de honoris et gloriæ mundanæ contemptu, atque indefesso humilitatis studio tam multa in præcedentibus dicta sunt, ut ad eas comprobandas minus necessarium existimem lectorem pluribus demorari.

## CAPUT XX.

*De Francisci obitu, et illius funere.*

**E**arum intentus exercitationi virtutum, quas modo commemoravimus, laudabilem agebat vitam, et inter molestias ægræ valetudinis cum tranquillitate migrationis suæ diem expectabat. Nonnullis antequam obiret mensibus, significaverat Medicus, qui eidem ægrotanti semper adfuit, et cui proinde nota erat illius corporis habitudo, Francisci vitam per annos jam decem divina potius, quam humana ope sustineri. Tribuebat hoc ille precibus Hispanorum exulum, quibus novebat ex multorum colloquiis civium, quorum frequens intrabat domos, vel solum Francisci nomen defensionem esse, potentique patrocinio. Sed et Franciscus ipse, cui semper aliena commoda potiora fuerunt, quam sua, constantius adversam valetudinem tolerabat, ut facilius aliorum intenderet utilitati. Illud etiam in provec̃ta, et afflicta ætate vigorem ei aliquem addidisse crediderim, quod spem bonam aleret, in desideratissimum Societatis gremium tandem aliquando reversurum. Itaque cum eam in Alba Russia incolumem servatam esse cognovit, iter illuc agere cogitavit, paratus ad experimenta quælibet subeunda, ut iterum in ipsa reciperetur. Sed cum timerent Russiani Patres, ne id Hispaniæ Curiæ non probaretur, et graviora inde nascerentur incommoda, ab incepto illo destitit eo tempore.

Deinde vero, cum mitiora esse tempora videbantur, et ipse jam octavum et septuagesimum agebat annum, ad Pontificem Maximum libellum supplicem misit, his conceptum verbis: *Beatissime Pater: Franciscus Xaverius de Idiaquez, filius primogenitus Ducum Granata ad Egam, Hispania Magnatum ex prima classe (alia quædam adjungebat gentilitia decora, quoniam hoc ad obtinendam gratiam expedire illi dixerat, qui libellum erat Pontifici traditurus) Orator humillime accedit ad Solium Sanctissimæ vestræ: et post humile pedum osculum exponit, se in Societate Jesu vixisse ab anno trigesimo secundo hujus sæculi, atque semper in Societate perseveras-*

se usque ad extinctionem. Jam vero, cum sibi constet, Societatem Jesu adhuc subsistere in Alba Russia, petit etiam atque etiam, ut Oratori seni, et laboribus fracto lenimen concedat, illum in Societatem restituyendo, et provincia Alba Russia auctoritate Pontificia applicando, ut sic mori tandem possis in Religione, in qua tandiu libentissime vixerat. Hanc gratiam a Sanctitate vestra postulat Orator per viscera Jesu Christi Domini nostri, qui cœt. Ut libellus opportuno tempore redderetur, usus est opera cujusdam Bononiensis viri, qui multam apud Pium VI. iniverat gratiam. Sed tamen verisimile est, Francisci preces non fuisse exauditas, cum de his nunquam ipse locutus fuerit, ac ne cum eo quidem, quem adhibuerat ad libellum supplicem scribendum. Hic etiam, vivente Francisco, silentio rem texit, eamque nonnisi post illius obitum cuiquam aperuit.

Interea Franciscus ad vitæ metam appropinquabat, et quamvis lecto non esset affixus, gressum tamen movere sine aliena ope vix poterat. Sed quanto debilior erat corpore, tanto mens ejus a perituris abstracta bonis ardentius anhelabat æterna. Frequenter per id tempus verba illa iterabat: *Nihil me in h. c. mundo delectat*: et alia, quæ familiarissima sibi fuerant: *Quam bonum habemus Deum!* Credi etiam potest, aliquam propinquæ mortis præensionem habuisse. Postquam enim de more in Bertaliæ suburbanum venerat anno 1790, Notarium illum accivit, quocum Bononiæ ante aliquot annos cum facultate Summi Pontificis condiderat testamentum: illudque modo coram eodem Notario, et testibus recognovit, atque aliqua ejusdem capita reformavit. His peractis, contubernales etiam suos per insequentes dies ad se vocavit, et ab eorum unoquoque quæsit, quosnam Bibliothecæ suæ libros habere sibi unusquisque vellet, postquam ipse decessisset: quod potuit de imminente illius morte suspicionem injicere, quamquam de hoc ipse nihil expresse significavit. Perrexit deinde cum domesticis, et externis eodem modo agere, quem hactenus observaverat, donec post Augusti medium vertigine contactus est, dum mensæ cum cæteris accumbebat. Inde inter suorū brachia in proximum defertur cubiculum, in quo per diem manere consueverat, et collocatur in lecto. Cupiebat



ille transferri ad superiorem habitationem, in qua Sacellum erat positum, ut et Missam audire posset, et divinum quotidie recipere Sacramentum. Sed Medico, qui statim adfuit, mutationem illam non approbante, Franciscus devotioni suæ prætulit obedientiam. Hanc etiam erga inservientes sibi pariter exhibuit, sive cibum illi offerrent, aut potum, sive pharmaca ministrarent. Ad omnes eorum nutus facile flectebatur, nullamque vocem impatientiæ, vel doloris indicem edidit, quamvis paucos intra dies, alicubi disrupta cute, fuerit exulceratus.

Sed nihil in eo magis fuit admirandum, quam animus imperturbatus, quo mortem jam appetentem aspexit. Deficientibus paulatim viribus, quo potissimum morbo laborare videbatur, spes nulla erat reliqua illius valetudinis relevandæ. Quod cum ei denuntiatum esset, ut se ad æternitatis viam compararet, non animo, non vultu concidit, non timore aliquo visus est corripi, sed gaudere potius, et exultare, quod peregrinationis suæ finis advenisset. Ea nempe in Deo fiducia, quam fovere ipse studuit divinis perfectionibus contemplandis, et virtutibus exercendis, vires illi credenda est addidisse, ut eam denuntiationem sine ulla conturbatione reciperet: et qui generose mundum spreverat propter Deum, gaudere utique potuit, quod tandem relicto mundo, ad Deum, quem unice amabat, appropinquaret. Quos deinde dies vixit, eandem animi pacem retinuit. De valetudine interrogantibus, Bene secum agi, placidissime respondebat: nihilque ab illius ore prodibat, aut ex vultu deprehendebatur, quod tranquillum hominem, Deoque submissum non indicaret. Sacro jam præmuniendus Viatico, quod magno pietatis sensu recepit, veniam prius ab omnibus exoravit, quos verbis offendisset, aut factis. Idemque postmodum erga famulos præstitit, quos nominatim compellatos rogavit, ut quæcunque in eos deliquisset, benigne vellent ignoscere. Sed illi profusis lacrymis, ac gemitibus demonstrarunt, quam nihil ab eo fuissent offensi, a quo nonnisi optima morum exempla, et sana consilia, et assidua receperant beneficia. Post non multos dies inunctus est oleo sancto: et tanquam ipse alteri adesset, cui Sacramentum ministraretur, perinde intentus erat omnibus, et ad singulas deprecationes distincte, religioseque respondebat. Cum sæpe  
roga-



rogatus esset a Confessario, num quid illius animum sollicitaret, toties eidem asseruit, nihil esse per Dei misericordiam, quod eum angeret, et affligeret. Cum hac imperturbabili tranquillitate ad extrema devenit, Deoque solitis precibus commendatus, placide tandem in Bertalix pago decessit Kal. Septembris 1790, hora circiter quinta post mediam noctem, ætatis anno septuagesimo nono cum dimidio. Facies ejus venustior, et amabilior post mortem apparuit, quam viventi fuerat: et venerationis affectus, quo multi eum propter opinionem virtutis prosequerentur, divulgato illius obitu, maxime increbuit. Bertaliensium aliqui ad videndum exanime corpus ingressi, reverenter deosculati sunt manus ejus, ad easque Rosaria devotionis ergo applicaverunt. Alii deinde non solum ex urbe Bononia, sed Mutina etiam, et Parma, et aliunde petebant aliqua, quæ Francisco usui fuissent, ut ea sibi pro sacris pignoribus asservarent. Nec defuerunt, qui brevi post tempore beneficia quædam commemorarent, quæ a Deo per Francisci merita obtenta fuisse affirmabant. Ego vero, ut alia, quæ minus comperta sunt, prætermittam, hoc unum referam, quod accepi a Sacerdote perspectæ probitatis, et fidei Dominico Balestrio, cujus testimonium manu sua perscriptum, atque signatum subjicio.

„ Testor ego infrascriptus, fidemque facio, Franciscum  
 „ Xaverium Idiaquezium, qui fuerat olim e Societate Jesu,  
 „ diem supremum obiisse anno millesimo septingentesimo no-  
 „ nagesimo. Is per annos multos rusticatum venerat cum aliis  
 „ Sacerdotibus, qui pariter ex eadem Societate fuerunt, in sub-  
 „ urbanam domum, quæ valde vicina est Parochiali Templo  
 „ S. Martini de Bertalia, in quo ipse ab annis jam octo et vi-  
 „ ginti Capellani munus exerceo. Possum autem sincere, ve-  
 „ rissimeque asserere, atque etiam testimoniis confirmare toti-  
 „ us populi, cujus numerus superat septingentos, et Francis-  
 „ cum, et ejus socios ita hic fuisse versatos, ut caritatis, et  
 „ aliarum exercitatione virtutum optimo exemplo fuerint uni-  
 „ versis incolis S. Martini de Bertalia, et Rovoreto, qui si-  
 „ mul sunt uniti. Hoc insuper, quod ipsemet expertus sum,  
 „ et eos, qui me norunt, in admirationem adduxit, æque ve-  
 „ ridice affirmo. Quo die, post Francisci mortem, justa illi  
 per-

„ persolvebantur in Parochia Bononiensi SS. Gervasii et Pro-  
 „ tasi, illuc ego profectus sum, ut Sacrum pro illius anima  
 „ offerrem. Sed iter illud non nisi ægerrime, magnaue cum  
 „ defatigatione confeci: nam podagra laborabam, quæ me mul-  
 „ tis retro annis usque ad prædictum diem afflixit. Tunc ve-  
 „ ro indesinenter rogabam Dominum, ut me vellet ab eo in-  
 „ tolerabili incommodo non meis meritis, qui peccator sum  
 „ indignus, sed per merita servi sui Francisci liberare. Deus-  
 „ que preces meas benigniter exaudivit. Nondum enim ad me-  
 „ dium perveneram Sacrificium, cum me penitus dolor ille  
 „ pedum reliquit. Ab eoque tempore in hodiernam usque di-  
 „ em perfectam obtinui sanitatem, iis valde mirantibus, qui  
 „ me podagra misere afflictum viderant, modoque perfecte sa-  
 „ num vident, et agnoscunt. Præterea, cum adessem in do-  
 „ mo quadam, ubi amissa fuerat certa pecuniæ summa, quam  
 „ surripuisse arguebatur virguncula annorum sedecim, hanc  
 „ ego remotis arbitris interrogavi, esset ne furti rea? illaque  
 „ omnino innocentem esse affirmante, in semotum discessi lo-  
 „ cum, Deumque per merita ejusdem servi sui Francisci de-  
 „ precatus sum, ut rem illam domesticis aliqua ratione mani-  
 „ festaret ad inculpata, atque afflictissimæ puellæ consolatio-  
 „ nem. Non multæ abierunt horæ, cum tota inventa est pe-  
 „ cunia in eodem ipso contenta involucro, intra quod illam in-  
 „ cluserat accusator. Denique multis ego variisque molestiis  
 „ per maximam cujusdam noctis partem exagitatus, somnum  
 „ conciliare non poteram; cum venit mihi in mentem recur-  
 „ sum ad Deum facere, interpositis viri hujus optimi meritis,  
 „ ut quietem mihi aliquam concedere dignaretur. Quod cum  
 „ fecissem, continuo me somnus cepit: deindeque expergefaca-  
 „ tus, nihil eorum memini, quæ me noctu sollicitaverant, nec  
 „ nisi post horas multas animadverti, quod mihi nocte illa  
 „ contigerat. Hæc omnia verissima esse, subscriptione mea con-  
 „ firmo, appposito Sigillo Parochialis hujus Ecclesiæ S. Martini  
 „ de Bertalia, et Rovoreto. Septima die Martii, millesimi  
 „ septingentesimi nonagesimi quinti.

„ \* Dominicus Balestrius Capellanus. „

Quamquam Franciscus in testamento suo disposuit, ut fu-  
 nus ejus perinde atque aliorum exulum Sacerdotum celebra-

retur, æquum tamen visum est multis, non tam illius humilitatis, quam propinquorum dignitatis habendam esse rationem. Itaque corpus ejus, postquam unguentis conditum est Bertalix (ubi sepulta sunt illius viscera prope aram Sanctissimi Cordis Jesu, quod ipse totis visceribus amavit, ut Inscriptio indicat, quæ ibidem incisa fuit marmorì) Bononiam delatum est noctu ad Parochialem ædem SS. Gervasii, et Protasii, sub qua domus sita erat, quam incolebat in urbe. Postridie in eadem æde, quæ magnifico funebrium velorum apparatu, et ingenti cereorum numero instructa erat, parentatum Francisco fuit, magno ex omni civium ordine facto concursu, multisque illius vultum plenior, et gratiosior quam antea demirantibus. Eximius Francisci amor in Societate eum impulit, ut sepeliri peteret ad S. Ignatii, ubi multa Sociorum, etiam Hispanorum, quiescebant corpora: ut quibus tandiu professione vitæ conjunctissimus fuerat, iisdem communi sepulchri copularetur. Reverendi autem Domini Congregationis Missionis S. Vincentii a Paulo, qui sedem illam tenent, Francisci cognita voluntate, tanquam se divites felicesque reputarent talis viri nactis exuviis; eidem libentissime consenserunt. Illuc ergo deportatum est solemni pompa cadaver, arcæque inclusum lignæ, in eodem collocatum fuit loculo, in quo sepultus erat Petrus Calatayudius, quem Franciscus, dum viveret, tanquam suum in Christo Patrem dilexit, eidemque post mortem conspeliari voluit, ut simul cum ipso ad vitam inde resurgeret sempiternam. In arca illa lignea repositum fuit hoc Elogium, a Josepho Petisco elaboratum, quo et vitæ series, et præcipuæ Francisci laudes continentur:



## D. O. M.

FRANCISCVS . XAVERIVS . DE . IDIAQVEZ  
PATERNO GENERE . TOPARCHIÆ . GENTIS . LOJOLEÆ  
MATERNO . COMITATVS . XAVERII  
HERES . NATVS  
REGIO . SANGVINE . ANTIQVOS . NAVARRÆ . REGES  
ET . INCAS . IMPERATORFS . CONTINGENS  
VICCOMFS . ZOLINÆ . MARCHIO . DE . CORTES  
INTER . PRIMARIOS . HISPANIÆ MAGNATES  
DVX . GRANATÆ . AD . FGAM  
INFANTIA . ET . PVERITIA  
CASTISSIMORVM . INNOCENTIA . MORVM  
ET . LITRARVM . PRÆSSERTIM . HVMANIOKVM  
INGENTI . LAVDE . FELICITER . EXACTA  
JAM . ADOLESCENS . IN . IPSO . ÆTATIS . FLORE  
ANNO . SCILICET . VIGESIMO  
HEREDITATIS . NOBILISSIMÆ  
ATQVE . OPVLENTISSIMÆ . JVRE  
IN . FRATREM . TRANSLATO  
SOCIETATEM . JESV  
QVAM . DIV . IN . VOTIS . ARDENTISSIMIS . HABVERAT  
POST . LONGA . ET . VARIA . CERTAMINA  
FORTITER . SVPERATA  
INGRESSVS . EST  
MAGNA . HOMINVM . ADMIRATIONE  
AC . MAJORI . EXEMPLO  
IN . EA . SANCTORVM . IGNATHI . ET . XAVERII  
CONSANGVINFORVM . SVORVM  
VIVAS . IMAGINES . EXPRESSIT  
MAGISTERIO . PRÆDICATIONE . PRVDENTIA  
SANCTITATE . MORVM  
DIVINÆ . GLORIÆ . PROMOVENDÆ . TAM . AVIDVS  
VT . AB . HOMINIBVS . CONTINVO . PRÆPEDITVS  
NE . ILLAM . AD . INLOS . PROPAGATVQVVS . ABIRET  
EJVS . AFVD . DIVM . HÆC . ESSET . JVGIS . ORATIO

DOMINE . SI . TV . ES  
 JVBE . ME . VFNIRE . AD . TE . SVPER . AQVAS  
 HVMLITATE . TANTA  
 VT . CVM . OMNIVM . SOCIORVM . SVFFRAGIIS  
 AD . SVPREMAM . ORDINIS . PRÆFECTVRAM  
 EXPETERETVR  
 IPSE . SIBI . SOLI . VILISSIMVS  
 NIHIL . NON . TENTAVERIT  
 SOIFRTISSIMO . QVO . PRÆDITVS . ERAT . INGENIO  
 DONEC . ALIO . EAM . DIGNITATEM . AVERTISSET  
 NIHILOMINVS . ASSISTENS . HISPANIÆ  
 ABSENS . LICET . CREATVS  
 HOC . ETIAM . MVNVS  
 SVMMIS . IMISQVE . PRECIBVS  
 APVD . PATRES . CONGREGATOS . DEPRECATVS . EST  
 VT . CARISSIMOS . SIBI . NOVITIOS  
 IN . VILLÆGARSIÆ . SOLITVDINE . REVISERET  
 VOTI . COMPOS . FACTVS  
 INCREDIBILE . DICTV . EST  
 QVANTVM . IN . EORVM . ANIMIS . EXCOIENDIS  
 TVM . VIRIVTE . TVM . FRVDITIONE  
 ADLABORAVERIT . AC . PROFECERIT  
 AD . PROVINCIÆ . CASTELANÆ . GVBERNACVLA  
 QVANTVMVIS . INVITVS . ADMOTVS  
 SCHOLARVM . OMNIVM . DOMESTICARVM  
 NON . MAGIS . QVAM . EXTERNARVM  
 VIA . ET . RATIONE . DOCENDI . ACCVRATISSIMA  
 IN . INTEGRVM . RESTITVTA  
 SPLENDOREM . PIETATEM . STVDIA . COMPENDIA  
 MIRIFICE . RENOVAVIT  
 RECTOR . REGALIS . COLLEGI . SALMANTICENSIS  
 SECVNDVM . RENVTIATVS  
 ET . MADRITVM  
 GRAVISSIMI . NECOTII . CAUSA . MISSVS  
 CVM . CÆTERIS . SOCIIS . HISPANIS . RELEGATVR  
 IN . ITALIAM  
 SED . DVX . OMNIBVS . FVIT  
 IN . LABORIBVS . ET . ÆRVMNIS . ITINERIS . AC . FXILII  
 PRO-

PROPE . INFINITIS . PREFERENDIS  
PETERIORA . QUÆQUE . SIBI . SEMPER . SUMENS  
IN . LECTO . VESTITV . HABITACVLO . CIBO  
QVO . RELIQVI . MELIVS . HABERENT  
APOLITA . SOCIETATE  
DVM . ESSET . ITERVM . PROVINCIALIS  
MORIS . NON . MUTAVIT  
PERPETVO . SVI . SIMILIS  
CONTEMPTV . RERVM . HVMANARVM . EGREGIO  
DEMISSIONE . ANIMI . SINGVLARI  
NON . MINVS . QUAM . MAGNITVDINE  
ADVERSITATVM . TOLERANTIA . OBEDIENTIA  
MANSVETVDINE . RELIGIONE . CONSTANTIA  
FIDE . SPE . CARITATE  
DENIQVE . SPECTATISSIMO . EXEMPIO  
VITÆ . VEL . IN . MEDIO . SECVLO . DVCENDÆ  
AD . NORMAM . EVANGELII  
ET . ECCLESIE . CATHOLICÆ  
CVJVS . SACRAMENTIS . DEPRECATIONIBVS  
INDVLGENTIIS . RITE . SVSCEPTIS  
EXIMIO . DEVOTIONIS . INTIMÆ . SENSU  
AD . EXTREMVM  
EHEV ! QUANTOPERE . DESIDERANDVS  
ÆTERNVM . VICTVRVS . PACATISSIME . OCCIDIT  
ANNOS . NATVS  
SEPTVAGINTANOVEM . MENSES . SEX . DIES . SEX  
KALEND . SEPTEMB:  
ANN . A . CHRISTO . NATO . & IOCCI XXXX  
PARENTI . SVO . BENEFICENTISSIMO  
COMMVNI . MAGISTRO . VIRTVTVM  
ET . SCIEN TIARVM  
POLITIORVM . ARTIVM  
CVM . PIETATE . CONJVGENDARVM  
AVCTORI . PRÆCIPVO  
VERBO . SCRIPTIS . ET . OPERE  
BENEMERENTI  
PERENNIS . OBSERVANTIÆ . MONVMENTVM  
SODALES . HISPANI . OPP . DO . MÛRENTES  
POSVERVNT .



In ipso pavimento Templi marmoreus collocatus est lapis, qui Sepulcheri loculo imminet, in quo Francisci Xaverii, et Petri Calatavudii corpora reconduntur. Eidemque lapidi sequens insculpta est Inscriptio:

A. ✠. Ω.

FRANCISCO. XAVERIO. IDIAQVEZ. HISPANO

PRIMARIO . DYNASTÆ  
 ANTIQVIS . NAVARRÆ . REGIBVS . ORTO  
 ET . MAGNO . REGNI . MARESCALLO  
 TOPARCHIÆ . LOJOLEÆ  
 AC . XAVERII . COMITATVS . HFREDI  
 DVCI . GRANATÆ . AD . FGAM  
 HIS . ALIISQVE . DITIONIBVS  
 AMORE . JESV . SPRETIS  
 QVAM . JURE . HABITIS . NOBILIORI  
 PRIMIS . IN . SOCIETATE . JESV . MVNIIS  
 VEL . HVMILITER . RECVSATIS  
 VEL . BENE . GESTIS . INCOMPARABILI  
 IN . OMNI . ÆTATE . AC . VITÆ . GENERE . INSIGNI  
 CVNCTARVM . VIRTVTVM . EXEMPIO  
 LITERARVM . INDVSTRIO . CVLTORI  
 SAPIENTISSIMO . MAGISTRO . SCRIPTORI . ELEGANTI  
 EXVLVM . HISPANORVM  
 SOLATIO . ET . PRÆSIDIO  
 QVI . CVM . VIXISSET . A . LXXIX . M . VI . D . VI  
 FELICITER . DECEDENS . KAL . SEPT . A . MDCCXC  
 HEIC . CONTVMVLARI . OPTAVIT  
 PATRI . SVO . IN . CHRISTO  
 PETRO . CALATAYVD . S . J . VIRO . SANCTISSIMO  
 PIETATE . DOCTRINA . SCRIPTIS  
 EVANG . PRÆDICATIONE . INCLITO  
 IN . EXILIO . III . KAL . MART . EXSTINCTO  
 A . MDCCCLXXIII . ÆIAT . LXXXIV  
 VIRIQVE . B . M .  
 CONTVBERNALES . DOLENTESS  
 F . F .

Hæc habui, quæ de rebus Francisci Xaverii dicerem, non tam pro ipsius dignitate Viri, quam pro ingenii mei tenuitate conscripta. Aliorum autem Virorum facta, quæ initio mens fuerat in hoc etiam complecti libro, cujus moles ad sufficientem jam modum excrevit, alteri tractanda relinquo, qui velit inceptum a me opus persequi. Ego enim, ut vera loquar, cum jam diu et titubante pulsu, et caligantibus oculis, et capite præter morem defatigato, non nisi ægre in eodem promovendo adlaboraverim, ulterius illud urgere non ausim. Hoc etiam, quod hactenus utcumque feci, benigno illorum patrocinio adscribendum existimo, quorum laudabilia narravi gesta: præsertimque acceptum refero meritis Idiaquezii, qui mihi hoc onus imposuit, idemque, ut spero, vires quoque impetravit, ut illud in hunc usque portarem locum, ubi jam obligatam olim fidem scribendi duos de Viris illustribus libros sufficienter puto exsolvisse.

Utinam meus hic labor et in honorem Dei, qui laudandus est in Servis suis, et eorum, ad quos pervenerit, in aliquam cedat utilitatem.



## I N D E X

## R E R U M N O T A B I L I U M.



- A**
- A**lava (Teresia) Rosarium aureum S. Aloysio donat. Pag. 122
- Alustiza (Joannes) expulsos e Gallia Socios humanissime recipit Sebastianopoli. 276
- Annales Jesuitici*, anonymum et per-versum opus, a fidei Quæsitibus in Hispania intercipiuntur. 278
- Annonæ, pecudum, et armentorum augmentum post exercitiam erga pauperes misericordiam. 171. seq.
- Arteagaram familia ex Christianæ vitæ legibus optime constituta. 226
- Avenione P. Nolhacus cum aliis Catholicis impie a Jacobinis occiditur. 336
- B**
- Belgradus (Jacobus) primùm in custodiam, deinde in exilium mittitur. 338
- Belletus (Josephus) de Jesuitis initio sinistre sentit, quos deinde amat impense. 318. seq. 333
- Benedictini Monachi erga infirmos Socios multam Burgis exhibent caritatem. 44
- Bononiæ præclarum constantiæ exemplum adolescentes perhibent Societatis. 339
- Bozizius (Antonius) aliq. Germaniæ Socii inopiam sublevant Hispanorum. 328. seq.
- Burgotarensum erga prætereuntes Hispanos Socios humanitas singularis. 309. seq.
- C**
- Calatayudii (Petri) jam moriturus ad Idiaquezium verba. 336. seq.
- Calvinus necandos Jesuitas, vel calumniis opprimendos esse censebat. 317
- Castellana provincia quot haberet Socios, et quem quique adierint portum exilii tempore. 7
- Castelvetrus (Joannes Maria) Regiensis Episcopus quosdam Societatis juvenes ad se vocat, ac munere donatos dimittit. 312
- Castillus (Gaspar) Societati gaudenter adjungitur. 178. Diuturnis in tirocinio morbis exercitus, non inde contrahit languorem animi. 178. seq. Compostellam studiorum causa missus, longiorem inde profectionem arripit in exilium. 179. seqq. Dum Coruniæ detinetur, sedulo divinis rebus, et literariis incumbit. 187. seq. Absolutis studiis, evahitur ad Sacerdotium. 188. Multam in perficiendo spiritu curam impendit. 189. Eximiam reputat felicitatem subesse obedientiæ jugo. 189. seq. In externo cultu ita decentiam amat, ut simul

teritatem sectetur. 190. Ad continendos animi motus egregium conatum adhibet. ib. Laudabile ponit studium in reterenda beneficiis gratia. 191. Offerendo Sacrificio diligenter se præparat, multumque inde fructum reportat. ib. Suppressa Societate, nihilo segnius incumbit studiis. 192. In extremo morbo multa virtutum edit exempla. 192. seq. Vitam inter frequentes Christi amplexus Bononiæ finit. 193.

- a S. Christophoro (Joannes Thomas) tironibus adjungitur Societatis. 95. Copulandis litteris ac virtutibus Patronum sibi asciscit S. Aloysium, 95. seq. Docendis, regeisque Sociis magnam viræ partem impendit. 96. Inter discipulos scientiam promovet, et virtutem. 97. Ab ejus Schola multi ad Indos proficiscuntur. ib. Vallisoleti cum magno studentium fructu Congregationi præficitur Aloysianæ. 98. seq. In orationibus habendis ad populum non probat exquisitam quorundam diligentiam. 100. seq. Sacerdotes, qui tertium probandi erant, diligenter instruit. 101. Ministerium explicandæ doctrinæ pueris studiose promovet. ib. In Rectoris munere vigilantiam cum prudentia, se veritatem cum indulgentia conjungit. 102. seqq. Tenacitati Procuratoris remedium adhibet efficacissimum. 105. Ipse in alios caritatem et largitatem exercet. ib. Beneficiis gratum se perhibet, idemque commendat aliis. 106. Corpus suum austere  
Lib. II. bbb

castigat. ib. Et animi metus strenue cohibet. 107. seq. Humiliter, et constanter adversa tolerat. 108. seq. In morbis patientiam retinet, et obedientiam. 109. seq. In extremo morbo constantiam, et pietatem exhibet singularem. 110. seq. Bononiæ obit, ibidemque sepelitur. 111.

Colmenares (Eugenius) quoloco, ac tempore natus sit. 151. Post tirocinium, et studiorum cursum, Grammaticam docet. 152. Et Philosophiam, aucto discipulorum, et poenitentium numero. ib. Socius datur Magistro novitiorum: et Theologiam Palentia docet. 153. Postquam multa Collegia rexerat, Provinciam sæpe administrat. ib. Tota Eugenii vita oratione præsertim, et mortificatione constabat. 153. seqq. Quædam ex adversariis ejus excerpta, quibus ejusdem orandi studium comprobatur. 155. Orationis ope concitatos iræ motus viriliter superat. 156. In objurgando lenitatem rigori præfert. 157. Perpetuum corpori bellum indicit. 158. seq. Quam largus in austentatibus, tam modicus cibi erat, et somni. 159. seq. In laboribus aliis, unde unde advenientibus, patientem et submissum Deo animum gerit. 161. seq. Ab elatione ac singularitate alienus, hilarem se præbet in quotidiano congressu. 163. Sed idem demisse abjicitur coram Deo. 164. Paupertatem, et moderationem tenet in omnibus. 164. seq. Castimoniam decus omni ope defendit.

dit . 165. Levitatem vel in alterius ore ferre non potest . 165. seq. Obedientiam etiam minoribus exhibet . 165. Divinam fidem frequenti fovet meditatione . ib. Spem quoque promissis aht a Deo factis . 166. seq. Caritas in Eugenii regnabat corde . 167. seq. Sacratissimum Cor Jesu ferventi amore prosequitur . 168. Inde mansuetudinem traxit , et invictam in portanda cruce constantiam . 169. Inde misericordiam didicit erga pauperes . 170. seq. Quam misericordiam multiplici mercede Deus rependit . 171. seq. Et homines liberali compensant officio . 172. seq. Beneficentiam ad immerentes quoque , sibi que molestos extendit . 173. Nonnihil de rigore remittit , ut aliorum voluntati consentiat . 173. seq. Ne quem offendat verbis , studiose cavet . 174. Quanto propinquior ad metam , illustriora promit virtutum exempla . ib. In tranquilla pace postremum diem expectat , ad quem se præparat diligenter . 175. Sacramentorum adjutus ope , Bononiæ moritur , et ibidem cum honore tumulatur . 176. Eugenii elogium sepulchrale . 176. seq. Compostellani Socii , imminente jam proscriptione , nullis suasionibus inducuntur , ut sibi prospiciant . 180. Decretum exilii constanti , et submisso animo excipiunt . 181. seq. Archiepiscopus doloris sui , et amoris in Socios non dubia prodit indicia . 183. De Sociorum exilio dolet civitas universa . 183. seq. Quid in discessu , quid item in pro-

fectione contigerit . 184. seqq. Quam rationem vitæ Corunniæ instituerint . 187. Ferrolii cæteris adjuncti Sociis , lætanter ab eis discunt , generalem fuisse submissionem ad jussa Regis , et neminem propter afficta crimina fuisse detentum . 188.

Cousani Comitis , Gallorum ducis , insignis pietas in ægrotantes Socios . 51.

## D

Diezii ( Emmanuelis ) elogium . 224. seq.

Diezius ( Philippus ) insolabiliter dolet , quod ab exilii pœna eximatur . 184.

Dissidiis componendis nihil aptius est mansuetudine . 5.

## E

Episcopus Britonoriensis multos Sociorum promovet ad Sacerdotium . 332.

Exercitiorum spiritalium occasione fabula conflatur in Jesuitas . 317. seqq.

## F

Ferdinandi I. Parmensium Ducis egregia in Hispanos exules liberalitas . 308. seqq.

Foglianus ( Josephus Maria ) Episcopus Mutinensis Socios amplectitur , eorumque constantiam laudat . 312.

Frenerus ( Antonius ) erga Josephum Turrianum eximiam perhibet caritatem . 196. seqq.

## G

Gonzalius ( Franciscus ) dum Theologiam Pompelone docet , Christianam doctrinam pueris frequenter explicat . 101. seq. Idem Xaverii Idiaquezii res gestas colligit . 289.

**Gerdaliza ( Marcus )** Sociis inter A jutores adscribitur. 85. Demandatum in tirocinio munus cum laude virtutum exercet. ib. Rem domesticam, et alienam diligenter curat. 87. Magno puerorum commodo ludimagistrum agit. 88. Exilium tanquam oportunitatem ad sanctiorem vitam acceptat. ib. Et mentem et corpus diligenti coerces studio. 89. Suum esse ducit cæteris ministrare. 90. Erga senem infirmum admirandam exhibet caritatem. 90. seqq. Martham. et Mariam refert. 91. seq. Mendicum, vel procul agens quotidie juvat. 93. Centi laudabiliter obit. 93. seq.

**Gyrii ( Josephi )** elogium. 87. seq. **Granellius ( Joannes )** Mutinensis Rector omni officiorum genere **Idiaquezio**, ejusque Sociis opitulatur. 311. seq. et 315.

**Guillenii ( Joannis Francisci )** Burgensis Archiepiscopi singularis pietas, et in Burgense Collegium beneficentia 235 seqq.

## H

**Hispani exules** ad contubernii difficilem mutationem Bononiæ adiguntur. 17.

**Huelgarum Antistita** potestate fugitur fere Pontificia. 233.

## I

**Idiaquezii ( Francisci Xaverii )** ortus, et prima educatio. 201. Societati post maturam deliberationem adjunctus, tirocinium in ea ponit, et literis informatur. 209. Humaniores docet literas Philosophiam, et Theologiam, in qua Doctoris detrectat lauream. 217. De ministeriis ab eo exer-

citis ad animorum salutem procurandam. 224. Burgensis Collegii Rector designatur. 230. Renuntiatus tirocinii Rector, Romam mittitur ad comitia. 238. Ad Hispaniam regressus, pergit in Collegio regendo Villagarsiensis. 242. De ratione, quam habuit, in tironibus educandis. 249. Collegio præficitur Salmantino. 256. Provincia Castellana primum illi decernitur. 264. Quid egerit, exortis in Societatem gravissimis tempestatibus. 271. De his, quæ fecit, cum Societas in Hispania incepta est perturbari. 277. Cum cæteris Hispaniæ Sociis ejicitur in exilium. 293. Relicta Corsica, in continentem pertransit Italiam. 305. De illius in Panzanensi Villa commoratione. 314. Bononiæ sedem sibi, suisque constituit. 329. De his, quæ Bononiæ gessit: ubi provinciam iterum suscipit gubernandam. 334. De illius vitæ ratione post ablitam Societatem. 342. Quædam de Francisci virtutibus singillatim. 347. De Francisci obitu, et illius funere. 365.

**Iraola ( Vincentius )** sui nominis recordatione ad continendos naturæ motus incitatur. 136. Propter morum probitatem a Marchionibus de Valmediano in ipsorum domum ad filiorum curam admittitur ib. In deligendo vitæ statu prudenter, et Christiane procedit ibid. Ex literis Indicis ad petendam Societatem inducitur. 137. In tirocinio imitandum sibi proponit S. Alcyonium. ib. Philosophiæ Studium quod Methyoniæ inchoaverat, absolvit in



Corsica. 138. Viliora quæque ministeria libenter exercet. ib. Theologiam Panzani, et Bononiæ dicit. ib. Ubiq; ad aliorum excurrit comoda, et in legibus eminet observandis. 138. seq. Sacerdotio consecratus, Castrumfrancum mittitur, ubi usque ad mortem manet. 139. Multa ibi agit, multaque tentat, ut animorum saluti serviat. 139. seq. Mortuum sepelire contendit. 140. Post Societatis excidium nihil omittit, ut se juvantis animis habilem reddat. 140. seq. Obtentâ confessiones audiendi potestate, munus hoc integerrime, indefessequē obit. 141. seqq. Veteribus adjunctus sociis, multam eis opem affert, et solatium. 143. In juvandis infirmis, et morti proximis infatigabilem operam ponit. 143. seq. Ecclesiasticum addiscit cantum, et Curionis exercet munera, ut missioni proluat Indicæ, quam semper in votis habuit. 114. seq. Perficiendi sui curam cæteris occupationibus anteponit. 146. In cibo parcus, et in oratione prolixus, quamvis modicam inde caperet suavitatem. ib. Paupertatem cum misericordia in egenos conjungit. 147. Modestiam, et gravitatem in colloquiis exhibet feminarum. ib. Erga omnes obedientiam, et submissionem observat. 147. seq. Eminebat in eo æquabilitas animi, ex assidua vincendi sui contentione profecta. 148. seq. In ægrotorum obsequio contracta lne, vitam invidendo sine concludit. 149. seq. Castrifranchi cum ingenti omnium luctu sepelitur, 150.

de Iriarte ( Gregorius ) ab exilio Sociorum excipitur. 44.

## L

Lacaze ( Petrus ) mathesim docet Salmanticæ. 39.

de Losada ( Ludovicus ) laudatur. 38.

Lubianus ( Firminus ) consilium Idiaquezii probat de Societate amplectenda. 210. Frustra illum deinde hortatur, ut Doctoris Theologi gradum accipiat. 223. Insignis ejusdem caritas erga Socios e Gallia profugos. 274. seq. Lusitani aliquot Socii quanta in ergastulis passi fuerint. 9. seqq.

## M

Mariæ Leczinskiæ, Galliarum Regionæ, parentalia fiunt Calvii. 50. Mariana Herculani Princeps multam erga Panzani degentes Socios perhibet caritatem. 315.

Marchionis Jacobi Mariscotti liberalitas erga Idiaquezum. 344.

Mendiburi ( Petri ) elogium. 112. seq.

Mendiburi ( Sebastiani ) natalis dies, et locus. 112. ingressus ad Societatem. 114. Diligentia in virtutibus, et literis assequendis, ib. Pompelone Grammaticam, cum fructu docet. 115. Per ætatem ad montanos excurrit populos. ib. Varias Vasconicæ linguæ dialectos perfecte discit. ib. In ejus linguæ usu peritiam, et elegantiam obtinet. 116. Inter alias Oratoris dotes præstantem actionem habuit. ib. Qualem teneret in excursionibus agendi morem. 117. Inter multorum plausus, multas etiam hominum, ac Dæmonum patitur impugnationes. 117. seq. Philosophiam, et Theologiam expli-

plicat Pompelone. 118. In eadem urbe Congregationem erigit Alysianam. 119. Quotus ab ea fructus proveniret. 120. seq. S. Aloysium impense colit, et ab aliis sategit ut colatur. 121. seq. Congregatio Sacerdotum et Schola Mariana sub illius factu et numero augetur, et fervore pietatis. 122. seq. Multos comendationibus sacris, et concionibus excolit. 123. seq. Quorundam per diocesim excurrit concionandus. 124. Odtrectationes initio sustinet, quas major deinde consequitur veneratio. 124. seq. Extra diocesim Arnedum, Autolum, et Calcidam ministeriis excolit Apostolicis. 125. seqq. A perfectionibus redux, nullam in Collegio requiem assumit. 127. Varios scribit libros, quorum aliquos edit Vasconice. 127. seq. Modestiam, et parsimoniam ubique servat. 128. Tuendæ castitati duriores adhibet castigationes corporis. ib. Paupertatem exacte colit. 129. Multa pro augendo Dei cultu agit, multaque meditat. 129. seqq. Congregationes multas erigit in honorem SS. Cordis Jesu. ib. Hoc ipse frequentibus reveretur obsequiis. ib. Feralem Passionis noctem pene ducit insomnem. 130. Pompelone novam templi molitionem aggreditur. 131. Domum item Exercitiorum in ea manium parte, ubi S. Ignatius concidit. ib. Neutrum tamen absolvit propter indictum exilium, quod ipse constanter excipit. 132. In itinere militibus timorem eripit seditionis. ib. In durioribus exilii casibus alios erigit

ad fiduciam. ib. Scribendis libris utilibus tempus impendit. 133. Bononæ vitam agit a privatis commodis abhorrentem. ib. Ad mortem in antecessum se præparat diligenter. 134. In longo vitæ cursu nullam gravem culpam creditur adnisisse. ib. Pietatem, et constantiam perhibet in morte: in qua S. Firmini Martyris, et Mariæ V. patrocinium expertus fuisse videtur. 135. Mendizabal (Joseph Joachimus) ante aditam Societatem multa patitur a domesticis. 23. Eorum animos singulari consilio expugnat. 24. A tirocinio domandæ naturæ incumbit. 24. Divinæ consuetudinis studiosus. humanæ minus indulget. 25. Ab honore mundano abhorrens, se ipse despicit. 25. Parvo semper contentus, lautiora non curat. 26. Aliorum famæ, atque utilitati deservit. 26. Patientiam in diuturno morbo cum insigni pietate conjungit. 27. seq. Ut pudori serviat, gravissimum celat incommodum. 28. Ejus in Foro Cornelli obitus. ibid. Mozius (Aloysius) Hispanis exulibus libros mittit, et pecuniam. 300. 326.

Muriel (Dominicus) Faventia moritur cum opinione sanctitatis. 97. Mutiloa (Vincentius) statuam erigit S. Aloysio, cujus aram aliis donis exornat. 122.

## N

Novitiorum nomina, qui venerunt in exilium: et aliorum facta quædam fusius explicata . . . in Præfat.

## O

Obesus (Hieronymus) ad necem, quam certam credit, invicto ani-

mo properat. 186. seq.  
 Osorii (Ignatii) genus, et Parentum mores indicantur. 29 Quali animi comparatione Societatem adierit. 30. In tirocinio spem magnam facit futuræ probitatis. 31. In scientiarum curriculo cæteris antefertur. 31. Philosophiam Methyunæ docet. ib. Sed contracto ex labore morbo, Salmanticam reddit, ubi creatur Doctor. 32 Romam Theologiæ Magister evocatus, expectationem superat, quam de se moverat. 32. Ejus docendi ratio probatur a Cardinali Quirino, et aliis. 33 Quædam ejus scripta prælo evulgantur. ib. Redux in Hispaniam, Salmanticæ docere pergit. 34. Ab Academiæ Doctoribus Matritum mittitur, ut Carolo III de adventu ad regnum gratuletur. 34 Jam rude donatus, Dissertationes perficit. quas Romæ inchoaverat. ibid. Designatus spiritualium rerum Præfectus, accuratissime munus illud exercet. 35. Conciones domi habet, et extra illam. ib. Collegium regit Salmantinum pari vigilantia, ac prudentiæ laude. 36. Magistros æque, ac discipulos diligenter excitat ad officium. 37 Erga omnes religiosas exercet beneficentiam. ibid. Templum et Sacrarium exornat. 38 Bbli thecam auget. 39. Villam amplificat, et amœniorem reddit. 39. seq. Post iteratam Salmantini Collegii gubernationem provinciæ Castellanae præficitur 40 Tirocinium ante omnia lustrat. 41. Proscriptione Sociorum cognita, iter arripit Matritense, ut Regem alloqueretur. 42. Habita per Aranae Comitum

eligendi portus facultate, Sanctanderum ire decernit. 43. Ex itinere literas ad Socios mittit. 43. seq. Per viam tum alios passim, tum maxime novitios consolat. 44. Sanctanderi cum gaudio Sociorum excipitur. ib. Inde ad Comitum Aranae rescribit libere. 45. Calvium appulsus, multam ibi prudentiam, et caritatem exercet. a pag. 45 ad 52. Ad Liguriam ductus, in Januensi portu conatibus Gallorum obsistit. 52. Per Bononiensem agrum Sociorum domicilia disponit. 53. Absoluta præfectura Provinciæ, domum Bononiæ regit. 54. Societatis exterminium patienter fert, et humiliter. 55. In suburbanam domum secedit. 56. Erat in eo singulare religionis studium. 56. Precandi, meditandique frequentia. ib. Amor solitudinis et paupertatis. 57. Ad retinendam communis vitæ rationem indefessa cura. 58. seq. In pudore servando sollicitudo. 59. seq. Prompta, submissaque obedientia. 60. 61. Humilitas cum magnanimitate conjuncta. 42. Animus ab elatione, fastuque abhorrens. 61. seq. Eximia ad imperandum doctes. 63. Prudentiam ejus Socii suspiciunt et Societatis Præpositus laudat. 64. In extremo diuturno morbo patientiam, et pietatem æque demonstrat. 65. 66. Ad balneas Porrectæ ducitur. 66. seq. ibidem pie decedit, ac sine pompa, ut petierat, tumulatur. 67. 68.

## P

Pereiræ (Emmanuelis) patria, et ingressus in Societatem. 1. Ejus inter studia devotio. 2. Magisteria. ibid.

ibid. Diuturna præfectura socio-  
rum. 3. In ea vigilantiam adhibet,  
prudentiamque religiosam. 4. Ad  
irrogandam poenam, discrimen in-  
ter culpas habet. ibid. Externos  
pariter, ac domesticos mansuetu-  
dine sibi conciliat. 5. In exilium  
abiturus, honori suorum prospic-  
it imperterrite. 7. Calvii Socio-  
rum animos variis modis erigit ad  
constantiam. 9. seqq. Ad perqui-  
rendum subditis victum industri-  
am, et operam adhibet. 12. Æ-  
grotantibus eximia caritate minis-  
trat. 13. Suam interim negligit  
valetudinem. 14. Ad Bononien-  
sem translatus agrum, familiam  
ibi ducit numerosiorem. 14. Ei-  
dem de necessariis providet, et  
optimam vivendi formam statuit.  
15. Hospitalitatem cum multis ex-  
ercet. 16. Bononiam accitus, qui-  
busdam Sociorum domibus præ-  
est. 16. Soluta jam Societate, vi-  
tam agit simillimam religiosæ. 17.  
Propinquæ mortis nuntium sere-  
no vultu excipit. 19. Ad eam  
multis religionis actibus compa-  
ratur. 19. Deiparæ opem, cui se  
priedem mancipio dederat, suavis-  
sime implorat. 19. Placide Bono-  
niæ obit. ib. Quædam ejus virtu-  
tes indicantur. 20. seqq.

## R

Recii ( Bernardi ) elogium, et o-  
bitus. 69.

Recii ( Clementis ) ortus; et ingres-  
sus in Societatem. 69. Magistri,  
et Oratoris munus laudabiliter o-  
bit. 70. Segovienses et vitæ exem-  
plo, et prudenti consilio juvat. 71.  
Sociis sine inferiorum querela, et  
cum profectu juvenum præest. 71.  
seqq. Provinciæ Præpositus illum

sibi adhibet ab epistolis. 72. Ubi-  
que censetur dignus, cui Provin-  
cia deferatur, ibid. Hanc ei de-  
cernit Præpositus Generalis, præ-  
cluso ad recusandū auditu. 73. Post  
biennium, cogente valetudine,  
magistratum abdicat. ib. Labores  
Societatis, quam amabat intime,  
recuperandæ salutis obsistunt. 74.  
Expulsis ab Hispania Sociis, Val-  
lisoleti manet. ib. Inde in Corsi-  
cam, et Bononiam venit, invicto  
semper animo sub extenuato cor-  
pore. 75. Diligenter se præparat  
ad extremam horam. 76. Bono-  
niæ obit. ib. Elucebat in eo fides.  
76. seqq. Familiam Sacram singula-  
riter veneratur. 77. Ad novum S.  
Jacobi festum præces ordinat Sa-  
cerdotales. ib. Erga S. Joannem  
Chrysostomum mirifice afficitur.  
78. S. Joanni Nepomuceno aram  
statuit, celebrandoque illius festo  
dotem assignat. ib. Fiduciam in  
Deo collocat. 78. seqq. Ejus in De-  
um et homines caritas. 79. Libe-  
ralitas ejus in pauperes in sperato  
dono rependitur. 80. Illius in gu-  
bernando prudentia. 80. seqq. For-  
titudinem in tuendo suorum jure. 81.  
seqq. Patientiam inter injurias. 82.  
Modestia, et temperantia. 83.  
Constantiam in officio religioso ser-  
vando. 84.

Religiosos inter viros officium nul-  
lum est vile. 12.

## S

Salazarii Comitis erga Philippum V  
in bello, et in pace merita. 205.  
Ejusdem oratio ad pronepotem  
suum Idiaquezium. 208. seqq.

Salgadi ( Jacobi ) elogium. 90.  
Sanctistephani ( Michaelis ) elogi-  
um. 231.

Silentium mansuetudini admixtum ad propulsandas irurias turcissimus clypeus. 5.

Societas a Magistris suis non minus modestiam, quam sapientiam exigebat. 103. seq.

Socii, qui Collegis aberant, dum Societas proscriberetur, sponte se sistunt Judici. 186.

## T

Tergestini Socii opem ferunt exulibus Hispanis. 328. seq.

Turiano (Josepho) propter vitæ periculum Baptismi gratia prope-ratur. 194. Apud Hieron. Dutarium primam confessionem instituit ib. Contra Matris et Patris vota Societatem amplectitur. ib. Ad Indos mitti petit, neque illud obtinet. 195. Post magisteria cum laude obita, regendis Sociis addicitur. ib. Auricæ cives, et Episcopum valde sibi conciliat et Collegii templum instaurat. 195. seq. In Sociorum expulsionem propter valetudinem in Cœnebio quodam detentus, multa ibi patitur. 195.

Profectus deinde in Italiam, sedem tandem Medicinæ constituit. ib. Perhumaniter a Mexicanis Sociis habetur. 196. seq. In meditando divinis sesquihoram quotidie ponit. 197. Mysteria Christi patientis assidue meditat. ib. Eucharistiam, et Mariam V. frequenti cultu prosequitur. 198. Servilibus modis corpus suum excipit. ib. Inter molestias morbi, et incisiones Chirurghi patientiam invictam retinet. 199. Castimoniam et paupertatem diligenti colit studio. ib. Vitam religioso fine concludit, et honorifice sepelitur. 200.

## U

Ugualde (Franciscus) apud Mataguios votum obtinet fundendi pro Christo sanguinis. 100.

Vulnerata Sanctæ Mariæ Virginis Imago quæ ædam celebris, quæ Valisoleti colitur. 228.

## Z

Zelus (Stephanus) Salmanticæ, cum aliis occumbit in obsequio militum contagiosorum. 262.

*Errata**Corrige*

Pag. 23.	lin. ult.	coepit	cepit
196.	8.	celam	cellam
246.	17.	Villagasienses	Villagarsienses
247.	28.	alios	alios
276.	pen.	venientibus	venientes
344.	1.	incidebat	incedebat
371.	8.	in aliq. exemp. Vicecmoes	Viccomes





ALBETH 1921548

CA-12446

